

Matêwre

Matêwre kot tanhmã Jejus kot amnhĩ nhĩpêx to ho pa hã kagà

Matêwre na pre kagàja nhĩpêx. Kêp Jejus nhỹ hã hkrajê jahkre xwỳnh na pre. Nê kêp Ijaew. Hixi hõ pê na Rewi. Tã na pre mẽ pamã kagàja nhĩpêx nê kamã Jejus kot pika hwỳr wrỳk nê kator nê tanhmã ri amnhĩ nhĩpêx to ho pa hã harẽ nê hã kagà. Nê kêp mẽ panhõ pahihiti mex o mex ã harẽ nê hã kagà. ã na pre Matêwre mẽ pamã Jejus jarẽ nê hã kagà anê.

Apraãw kanrêhã hkra nê htàmnhwỳjê nhĩxi

Rukre 3.23-38

- 1** 1 Amnepêm Jejus Kris kormã pika hwỳr wrỳk kêt ri hkukamã higêtjê nhĩxi na jajaja.
Wỳj ri higêtjê hõ nhĩxi na pre kêp Tawi.
Nê Tawi xwỳj ri higêt nhĩxi pê na pre Apraãw.
- 2 Nê Apraãw kra na pre kêp Ijak.
Nê Ijak kra na pre kêp Jako.
Nê Jako hkra na pre kêp Juta mẽ htôjaja.
- 3 Nê Juta hkra na pre wa kêp Pere nê Jera.
Nê Pere mẽ Jera wa katorxà na pre kêp Tama.
Nê Pere hkra na pre kêp Erõ.
Nê Erõ hkra na pre kêp Ari.
- 4 Nê Ari hkra na pre kêp Amĩnatap.
Nê Amĩnatap kra na pre kêp Nasõ.
Nê Nasõ hkra na pre kêp Samõ.
- 5 Nê Samõ hkra na pre kêp Poas.
Nê Poas katorxà na pre kêp Raap.
Nê Poas kra na pre kêp Opex.
Nê Opex katorxà na pre kêp Rutre.
Nê Opex kra na pre kêp Jese.
- 6 Nê Jese hkra na pre kêp Pahihti Tawija.

Nē Tawi hkra na pre kêp Sarumāw.

Sarumāw katorxàja Uristi hprō na pre. Tā nhūm pre Uristi ty nhūm Tawija hāmri mỳrpê Uristi hprō ho hprō nē kamā hkra. Nhūm wa hkraja kêp Sarumāw.

7 Nē Sarumāw kra na pre kêp Ropā.

Nē Ropā hkra na pre kêp Apiasti.

Nē Apiasti kra na pre kêp Asti.

8 Nē Asti hkra na pre kêp Josapa.

Nē Josapa hkra na pre kêp Jorã.

Nē Jorã hkra na pre kêp Ojis.

9 Nē Ojis kra na pre kêp Jotã.

Nē Jotã hkra na pre kêp Akaj.

Nē Akaj kra na pre kêp Ejekis.

10 Nē Ejekis kra na pre kêp Manase.

Nē Manase hkra na pre kêp Amõ.

Nē Amõ hkra na pre kêp Josis.

11-12 Nē Josis kra na pre kêp Jekonīs mẽ htōjaja.

Kormã mẽ htír ri na pre Papirōn nhō xwỳnhjaja kot mẽ hkurê kaxàr kaxyw mẽ hwỳr hprōt nē mẽ unê. Ijaew piitã unênh pa nē ma akupỳm mẽ õ pyka hwỳr mẽ ho hapêx nhūm mẽ hpãnhã Papirōn kamã pa ho pa. Jakamã nhūm Josis mẽ hkra Jekonīs mẽ htōjaja mẽ hipêêxà pyrã nē Papirōn kamã pa ho pa.

Nē Jekonīs kra na pre kêp Saraxi.

Nē Saraxi hkra na pre kêp Joropape.

13 Nē Joropape hkra na pre kêp Apiux.

Nē Apiux kra na pre kêp Eriakĩ.

Nē Eriakĩ hkra na pre kêp Ajo.

14 Nē Ajo hkra na pre kêp Satok.

Nē Satok kra na pre kêp Akĩ.

Nē Akĩ hkra na pre kêp Eriux.

15 Nē Eriux kra na pre kêp Eresa.

Nē Eresa hkra na pre kêp Matã.

Nē Matã hkra na pre kêp Jako.

16 Nē Jako hkra na pre kêp Juje.

Nē Juje hprō na pre kêp Marir.

Nē Marir Kra na pre kêp Jejus.

Mẽ kot kãm: “Tirtũm kot mẽ pakaxyw ãm xwỳnh” anhỳr xwỳnhhta na pre.

17Nhūm Apraãw kanrêhã axte axpên kanrêhã mẽ àptàr nywjaja Tawija wỳr kêp 14. Nē Tawi nhĩrō pê Papirōn hwỳr mẽ hapêx kêt ri axpên

kanrêhã mē àptàr nywjaja mãânên kêp 14. Nê ra Papirôn kamã mē pa nhîrô pê axpên kanrêhã Jejus pê Tîrtûm kot mē pakaxyw âm xwÿnhhta wÿr mãânên kêp 14. ã na pre Jejus Kris xwÿj ri higêtjê nhîxi anê.

Jejus Kris kator

Rukre 1.26-38, 2.1-7

18Tã ã mē hixi jarênh kot anhÿr kanrêhã na pre ã Jejus Kris kator anê. Nhûm pre kormã Jujeja Marir o hprô kaxyw. Nom kormã ho hprô hkêt ri nhûm htujarô. Kormã hkukrit tã nhûm Tîrtûm Karô tanhmã ho nhûm htujarô. 19Hãmri nhûm Jujeja harênh ma nê tee ri hamaxpêr nê htÿx nhãm mêhõ kot kêp htu hã hkamnhîx. Juje kot tãm amnhî nhîpêx nê tãm hamaxpêr jakamã tee ri kot ho hprô hkukamã hamaxpêr. Nê hamaxpêr o:

—Nà pa mãn ixte hturê hã. Nhãm mêhõ ra kot ã hipêx anhÿr kênã. Nà kot paj ho ixprô hkêt nê. Nom kot paj ixkwÿjê mã ã kot amnhî nhîpêx anhÿr o amnhîrît kêt nê. Kot paj anê nhûm mē kuma nê ho kapêr punuj nhûm amnhî kamã hpijaàm tÿx nê. Ja pymaj kot paj ixkatàt kôt hkaga kurê kumrêx. Nom ixkwÿjê hkàx ã hkaga. Anê.

20Nê ã hamaxpêr anhÿrja o ra gôr nê nô. Nhûm Tîrtûm kapêr o mē wrÿk xwÿnhjê hõ hwÿr wrÿ nê hwÿr axàn kuri xa. Hãmri nê kãm:

—Pa Juje? E ot pa awÿr tẽ. Kwa tee ri Marir o aprô hkukamã ajamaxpêr punuj kêt nê. Mãmrî ho aprô. Mêhõ kot apê tanhmã ho hkêt. Tîrtûm Karô na pre ã hipêx anê. Jakamã kwa tee ri ajamaxpêr kêt nê mãmrî ho aprô nê war apa. 21Koja hkrare kato nê myre nê hprêk. Hãmri nê mē kot hkôt amnhî xunhwÿr xwÿnhjaja mē kot amnhî tomnuj piitã pê mē utàr pa. Jakamã koja kato ka wa hã hixi mē nhûm kêp Jejus. Anê.

Nhûm pre ã Tîrtûm kapêr o mē wrÿk xwÿnhja kãm kapêr anê. Ijaew kapêr kãm Jejus jarênhja te kêp “Tîrtûm kêp mē papytâr xwÿnh” anhÿr pyrâk. Jakamã nhûm Tîrtûm kapêr o mē wrÿk xwÿnhja Juje ôt kãm ã kãm Marir jarênh anê. 22-23Nom kormã ã kãm kapêr anhÿr xwÿj ri na pre ra Tîrtûm nhÿ hã kapêr xwÿnhjê hõja kukamã tanhmã harênh to nê hã kagà. Nê hã kagà ho:

E mē inhma nê inhmar tÿx nê ho apa. Kojã nhÿrmã pyka ja kamã mêhõ kormã hkukrit tã htujarô. Nê hkra kato nê myre.

Nhûm mē omu nê hã hixi mē nhûm kêp Emanuew. Anê.

Ijaew kapêr kãm “Emanuew” jarênhja te kêp “Ota ra Tîrtûm mē pahkôt pa ho pa” anhÿr jarênhhta pyrâk. Jakamã nhûm pre Tîrtûm nhÿ hã kapêr xwÿnhja Jejus kukamã ã harênh anê nê hã kagà.

24Jakamã nhûm Tîrtûm kapêr o mē wrÿk xwÿnhja Juje mã kapêr par mē nhûm hkrâkato. Hãmri nê kot kãm ujarênh xà hkôt Marir o hprô. 25Nom kormã tanhmã ho hkêt nê ri o pa rãhã nhûm hkrareja kato. Hãmri nhûm wa hã hixi mē nhûm kêp Jejus nê mãânên kêp Emanuew.

Kanhêti ho studa xwÿnhjê jarênh

2 ¹Nhũm pre Jejus Perêj kamã kato. Pika pê Jutej kamã. Pahi Erox kormã kot Jutej nhõ xwÿnhjê ho amnhĩptàr o pa ri nhũm õ pika kamã kato. Hãmri nhũm Tĩrtũmjaja kaxkwa kamã Kra kator jarênh xà hã kanhêti raxta õ nhõ nhũm pika hõ kamã kanhêti ho studa xwÿnhjaja omu. Kanhêtijaja pumu nê hkĩnh nê axpên mã:

—Kwa ga mẽ kanhêti raxti mũj pumu. Mãn ra Ijaew nhõ pahi nywta kato nhũm kanhêti mũj kêp ho amnhĩrĩt xà hã ajê. Kwa pu mẽ ma hapêr o mõi nê nhĩri tokyx omu nà.

Anê hãmri nê amnhĩ to pikuprõnh pa nê ma hapêr o pa. Ma myt gjêx xà hwÿr hapêr o pa hã apkati xohtõ nê. Hãmri nê ra Ijaew nhõ pika hwÿr pøj nê krĩ pê Jerujarê hwÿr hapêr o mõi. Pahi Erox nhõ krĩja wÿr nhũm mẽ hapêr o mõi hãmri nê kamã pøj nê mẽ hkrare nywta ã krĩ nhõ xwÿnhjê kukjêr o mõi ²nê mẽ kãm:

—Pa? Ot pa mẽ apê Ijaew nhõ pahi nywreta pumunh kaxyw mõi. Ham kator xwÿnhhta. Mẽ inhõ pika kamã na pa prem kaxkwa hkrax rũm kot ho amnhĩrĩt xà hã kanhêti raxta pumu. Hãmri nê nhĩri pahi nywre pumunh nê kutã mẽ ixkõn krã ho ixtêm nê ixkrĩ nê kãm mex o mex ã harênh kaxyw nêtãnh mẽ inhõ krĩ rũm hapêr o mõi. Kwa mẽ inhmã harê. Nhĩri na? Na pa mẽ inhmã omunh prãm tÿx kumrêx.

Anhÿr o hã mẽ hkukjêr o mõi jakamã nhũm mẽ piitã pahi nywja jarênh ma nê axpên mã harênh o hprõt. ³Nhũm pahi Eroxja harênh ma nê tee ri amnhĩ kukamã hamaxpêr. Pahi nyw kot mẽ ho amnhĩptàr ã hkamnhix nhũm ja kêp omnuj tÿx nê. Nhũm krĩ nhõ xwÿnhjaja ã hamaxpêr anhÿr ã omu nê tee ri amnhĩ kukamã hamaxpêr o ra kãm ma nê. ⁴Hãmri nhũm pahi Eroxja amnhĩ wÿr hkwyjê hã karõ. Mẽ õ patre krãhtũmjaja nê Tĩrtũm kapêr tũm o mẽ ahkre ho mẽ pa xwÿnhjaja nhũm amnhĩ wÿr mẽ hã karõ nê Tĩrtũm kot nhĩrmã mẽ hwÿr mênh mã xwÿnhhta ã mẽ hkukjêr kaxyw. Nê mẽ kãm:

—E Tĩrtũm kot nhĩrmã mẽ pahwÿr mênh mã xwÿnhhta ã na pa mẽ akukjêr kaxyw mẽ ato akuprõ. Kwa mẽ atõ inhmã harê. Koja nhĩrmã kator kaxyw nê nhĩri koja we kato? Xà jar mẽ panhõ krĩ kamã nà? Xà nhĩri krĩ hõ kamã? Anê.

⁵Hãmri nhũm mẽ kuma nê kãm:

—Nà mẽ panhõ pika pê Jutej kamã koja xep kato. Krĩ pê Perêj kamãã. Na pre Tĩrtũm nhĩ hã kapêr o mẽ pa xwÿnhja ra hkukamã mẽ panhĩgêjtê mã tanhmã harênh to nê hã kagà. Nê hã kagà ho:

⁶ Pa Perêj nhõ xwÿnhjaja? E mẽ anhõ krĩ grire htã kamã koja nhĩrmã mẽ panhõ Pahi Maatija kato. Koja mẽ pahpê Ijaewjê piitã mẽ pahto amnhĩptàr mex o pa. Jakamã mẽ anhõ krĩ grire htã koja Ijaew piitã axpên mã mex ã harênh o pa.



Matêwre 2.8-10

Ã na pre Tĩrtũm kot mẽ pahwỳr mẽnh mã xwỳnhhta kukamã mẽ kãm harẽ nẽ hã kagã anẽ. Anẽ.

7Hãmri nhũm pahi Erox tee ri ã harẽnh anhỳrja ma hãmri nẽ amnhĩ wỳr mẽ kot hã àhkukjêr o mõi xwỳnhjê hã karõ. Nom nhỹri Ijaew kàx ã. Hãmri nhũm mẽ ma hwỳr mra nẽ agjê nhũm mẽ omu nẽ pahi nywta ã mẽ hkukja nẽ mẽ kãm:

—E mẽ aprĩ hã inhmã pahi kator nywta jarẽ. Tanhmã na pre ra mẽ ate kanhêti pumunh ã mytwrỳ kute? Xà ham na ka prem omu nà amnepẽ mã? E mẽ aprĩ hã tanhmã inhmã harẽnh to. Anẽ.

Hãmri nhũm mẽ ihõja kãm:

—Nà na ra hã amgrà axkrut kaxyw. Na pa prem omu hãmri nẽ inhnojarêt nẽ man ixpa ho ixpa ry rax nẽ mẽ awỳr põi. Anẽ.

8Nhũm mẽ kuma nẽ mẽ kãm:

—Tỳ. Nom jar amrakati. Perěj kamã na xep kato. E mẽ mãmrĩ ma hwỳr mõi nẽ kamã hapêr. Hãmri nẽ nhỹri omu nẽ akupỳn ixwỳr mõi nẽ inhmã harẽ. Pa ijaxwỳja ma hwỳr mõi nẽ omu nẽ mẽ apyrã nẽ kãm mex o mex ã harẽ. Ijaxwỳja inhmã omunh prãm tỳx kumrêx. Anẽ.

Nom hêx rom ã ri mẽ kãm kapêr anẽ. Kot nhỹri harẽnh mar nẽ hã àmnênh nhũm mẽ kot hpĩr kaxyw nhũm hêx rom ã kãm omunh prãm tỳx ã amnhĩ jarênh anẽ. 9-10Jakamã nhũm mẽ kuma hãmri nẽ kato nẽ ma Perěj wỳr mõi kurê kumrêx. Hãmri nẽ kormã mẽ õ pika kamã mẽ pa ri kanhêti ho studa xwỳnhhta nhũm mẽ axte amnhĩ kukamã omu nẽ

hkĩnh nê. Nhũm ma Perěj wỳr mẽ hkukamã mō nhũm mẽ omunh pê ma hkôt pa rãhã hwỳr pøj. Nhũm kanhêtija pahi nywre nhõrkwỳ mỳri ajêt. 11 Jakamã nhũm mẽ ma hkôt mra nê ixkreja wỳr pøj nê kapem xa. Hãmri nê mẽ kãm kapêr nê mẽ hwỳr agjê nê Jejus mẽ katorxàja wa omu. Hãmri nê Jejus kutã hkõn krã ho hkrĩ hpa nê kãm kapêr nê kãm:

—Pa Xugitre. Hêxta waa nê. Nà amex o amex. Kot kaj nhỹrmã axàptàr hãmri nê apê mẽ inhõ Pahi Maati. Nà ãm hãmri na pa mẽ apumu nê ixkĩnh nê. Anê.

Hãmri nê ahpỹnhã kãm hkĩnh xà gō. Kãm ôr kwỳ gō nê kãm mẽhkuxwa xà hkwy gō nê kãm te kot rãmre kuxware pyrãk pê mĩraja nhũm mẽ kãm hkwy gō. Mẽ hkĩnh xà hã kàxpore xohtô nhũm prem kãm ôr pa. 12 Hãmri nê ra akupỹm Jerujarẽ kamã pahi Eroxo wỳr nojarêt. Nhũm kamàt nhũm mẽ gõr nê hikwỳ hãmri nê ra amỹti. Nhũm Tĩrtũm mẽ hpimtir kãm mẽ kãm kapêr nê mẽ kãm:

—Pa? E mẽ inhma. Kêr ka mẽ akupỹm pahi Eroxo wỳr amrar nê kãm mẽ hkrata jarênh kêt nê. ãm kwarĩ ho kwarĩ. Nê kêr ka mẽ pry hõ hã mãn ma mẽ anhõ pika hwỳr akupỹm apa ho apa.

Anhỹr o mẽ kãm kapêr jakamã nhũm apkati nhũm mẽ kãnhmã hkrĩ hãmri nê Tĩrtũm kot mẽ kãm hã karõ xà hkôt ma akupỹm mẽ õ pika hwỳr pa kurê kumrêx nê akupỹm pahi Eroxo wỳr mrrar kêt nê.

Juje mẽ hprõ wa kot Eroxo pymaj ma Jejus o mõi

Apokarip 12.1-6, 12.13-18

13 Tã nhũm kanhêti ho studa xwỳnhjaja ma akupỹm hapêx hãmri nhũm Tĩrtũm axte Marir mjên Juje hwỳr kapêr o mẽ wrỳk xwỳnhjê hõ mẽ. Nhũm kê axte hpimtir kãm hwỳr wrỳ nê kãm kapêr nê kãm:

—Pa Juje. E kwa kãnhmã nhỹ. Na ra pahi Eroxa aprõ pê hkrata ã amỹnê. Kojã tokyx põristi hkwyjaja mẽ anhõ krĩ hwỳr pøj nê war apê hpĩr kaxyw ri hapêr. Jakamã kwa wa tokyx akato nê ma pika pê Ejit wỳr amõi kurê kumrêx. Nê Ejit kamã apa rãhã pa nhỹrmã akupỹn amnê war amê. E kwa tokyx. Anê.

14 Hãmri nhũm kuma nê kãnhmã nhỹ nê Marir mra nê war amnhĩ to akuprõ nê ra nojarêt. Hãmri nê krĩja pê Jejus o kato nê ma o mõi kurê kumrêx. Wa mõi ryy nê hãmri nê Ejit wỳr pøj nê kamã pa ho pa.

15-20 Rõm nhũm pahi Eroxo tee ri amnhĩ wỳr kanhêti ho studa xwỳnhjê kamã hamak o pa nom nhũm mẽ akupỹm hwỳr mrrar kêt nê. Jakamã nhũm mẽ kamã gryk nê hamaxpêr o:

—Tk. Kwa nà. Na mẽ ãm inhmã hêx nê akupỹn ixwỳr mrrar nê nhỹri inhmã pahi nywta jarênh kêt nê. Nà kwãr mẽ mãmri ã inhĩpêx anê. Mẽ kot ixpê ho hpimxuure kaxyw ã. Nà kot paj mẽ kêp kupĩ nhũm mẽ rĩ amnhĩ pumu. Na xep prem kanhêti kot harênh xàja pumunh ã ra hã amgrã pyxi nê hkôt mytwrỳ kêp 6. Jakamã mãn mẽ hkrata ra hã amgrã

axkrut kaxyw. Nà na pa ra ijamaxpêr. Kot paj Perêj kamã mẽ hkra myjaja ra mẽ hã amgrà axkrut xwÿnhjaja nê kormã mẽ hã amgrà axkrut kêt xwÿnh piitã mẽ himex pa. Jao ra mẽ kamã pahi nywta pĩ. Nà ixte hpĩr mã kênã. Koja hprêk nê ixpãnhã Ijaew o amnhĩptàr kêt nê.

Anhÿr o hamaxpêr hãmri nê amnhĩ wÿr õ pôristi hkwÿjê hã karõ nê mẽ kãm mẽ hkrajê hã amÿnê nê mẽ kãm:

—E kêr ka mẽ ma Perêj wÿr mra nê kamã mẽ kêp mẽ hkra myrejaja ra mẽ hã amgrà axkrut xwÿnhjê nhĩmex pa. Nê kormã mẽ hã amgrà axkrut kêt xwÿnhjaja mãânên mẽ himex par kumrêx. Nê Perêj pu hã ri krĩ hkryre hkôt mãânên ri ajapôj nê ã mẽ himex par anê. Anê.

Hãmri nhũm mẽ kuma nê ma mẽ hwÿr mrar kurê kumrêx. Hãmri nê Perêj wÿr pôj nê mẽ kêp mẽ hkra myre piitã mẽ himex pa. Jakamã nhũm mẽ katorxà nê mẽ hipêêxàjaja tee ri mẽ hkra htyk xwÿnhjê pumu nê hkaprĩ htÿx nê mÿr rÿnh nê. Nom na pre Tirtũm nhÿ hã kapêr jarênh o mẽ pa xwÿnh finat Jeremĩstija ra amnepêm ã mẽ kot amnhĩ nhĩpêx anhÿrja kukamã mẽ panhĩgêjtê mã mẽ harê nê hã kagà. Na pre mẽ kãm Ijaew kurê xwÿnhjê pynênh nê ma mẽ õ pika hwÿr mẽ ho hapêx par kaxyw. Hãmri nhũm mẽ panã Rrakewja te ra kot tee ri ja hã mẽ omunh nê tanhmã amnhĩ nhĩpêx to pyræk nhũm Jeremĩstija tanhmã Ijaewjê jarênh to nê hã kagà. Nê hã kagà ho:

Amnepêm Perêj kamã na pre mẽ panã Rrakewja hpijagri ho nôrja ã ra htyk kaxyw nê tee ri hkra kator mã xwÿnhhta kukamã hamaxpêr nê mÿr o nõ. Nhũm hkwÿjaja tee ri akupÿm tãm hamaxpêr kaxyw kãm kapêr. Tã jarãhã Rrakew kanrêhã hkra nê htãmnhwÿ nijaja ra uræk nê tee ri mẽ hkrare ho hamak xàj mÿr o pa. Mẽ kot mẽ kêp utàr nê mẽ himex par jakamã nhũm mẽ tee ri mẽ ho hamak xàj mÿr o pa. Anê.

Nhũm pre finat Jeremĩsja mẽ hkukamã ã mẽ harê nê mẽ hã kagà anê. Tã ra jarãhã mẽni piitã Rrakew pyrà nê hkrajê o hamak xàj mÿr o pa.

Wa kot akupÿm wa õ pika hwÿr Jejus o môr

Juãw 7.41-42

Tã nhũm mytwrÿ grêre nê hapêx nhũm pahi Eroxo ty. Jakamã nhũm kamàt nhũm Jujeja gôr nê nõ. Nê kê õt kãm axte amÿti. Nhũm Tirtũm kapêr o mẽ wrÿk xwÿnhja axte hwÿr wrÿ nê kãm:

—Pa Juje? E na ra Marir pê hkra pĩr mã xwÿnhhta ty. Jakamã kwa wa mãmrĩ ma akupÿm mō. Ma akupÿm mẽ apê Ijaewjê nhõ pika hwÿr axãmnhix aprõ mẽ hkrata wa o mō.

Anhÿr o kãm kapêr. Na pre ra amnepêm Tirtũm nhÿ hã kapêr o mẽ pa xwÿnhjê hõja ja kukamã mẽ panhĩgêjtê mã ja jarê nê hã kagà. Nê hã kagà kot: “Ixpê Tirtũm kot paj nhÿrmã Ejit rúm ma akupÿm õ pika hwÿr ixkrata wa mẽ kumê.” Anhÿr o kot hkukamã harênh nê hã kagà.

21Jakamã nhũm Tĩrtũm kapêr o mẽ wrỳk xwỳnhja ã Juje mã karõ anê hãmri nhũm kuma nê ma akupỹm wa o mõi. Ma akupỹm mẽ õ pika hwỳr wa o mõi.

22Tã ra akupỹm hpõx kaxyw htêp o mõi. Hãmri nê pahi Erox kra Akêrawja ra hipêêxà mỳr pê kot Jutej kamã mẽ ho amnhĩptàr hã harênh ma. Hãmri nê tee ri mẽ amnhĩ kukamã hamaxpêr nê kãm mẽ hwỳr wa o mõi pyrna nê.

Tã nhũm kamàt nhũm Juje ra gõi nê nõ nê kê axte amỹti. Nhũm kê axte Tĩrtũm kapêr o mẽ wrỳk xwỳnhja hwỳr wrỳ nê akupỹm õ pika hkwỳ pê Jutej wỳr mõi nê wa mẽ hkurê nê kãm:

— Pa Juje? E kêr ka Jutej wỳr wa mẽ amõi kêt nê. Pãnhã nhãm mẽ anhõ pika hõ hwỳr mãn mõi nê kamã ri apa.

Anê nhũm kuma nê hpãnhã wa mẽ ma mẽ õ pika hkwỳ pê Garirej wỳr wa mẽ juk nê ma mõi. 23Nê kamã põi nê krĩ pê Najare hwỳr mõi nê kamã amnhĩm õrkwỹ nhĩpêx nê kamã wa mẽ pa ho pa. Nhũm pre ra amnepêm Tĩrtũm nhỹ hã kapêr o mẽ pa xwỳnhjê hõja ra ã mẽ kot amnhĩ nhĩpêx anhỹrja kukamã mẽ panhĩgêjtjê mã mẽ harê nê hã kagà. Nê hã kagà kot:

Tĩrtũm kot mẽ pahwỳr mẽnh mã xwỳnhhta koja kêp Najare nhõ xwỳnh. Anê.

Juãw Paxis kot Tĩrtũm kapêr jarênh o pa

Makre 1.1-6; Rukre 3.1-14; Juãw 1.19-23

3 1Nhũm pre Juãw Paxisja ã amnhĩ nhĩpêx anê. Nê pika pê Jutej kamã mẽ kãm Tĩrtũm kapêr jarênh o pa. No ãm krĩm pa hkêt nê. ãm mẽ hpu hã krĩ pê amỹm ri kapõt ã ri mẽ kãm Tĩrtũm kapêr jarênh o pa. 2-3Tĩrtũm nhỹ hã kapêr o pa xwỳnh finat Ijais ra kot Juãw kukamã mẽ panhĩgêjtjê mã tanhmã harênh to nê hã kagà xà hkõt. Na pre hkukamã hã kagà ho:

Koja nhỹrmã mẽhõ mõi põi. Kapõt ã mõi põi nê mẽ kãm tanhmã mẽmoj tã karõ hto ho ri pa. Nê mẽ kãm: “Koja Tĩrtũm tokyx mẽ pahwỳr mẽ panhõ Pahihtija mẽ nhũm wrỳ nhũm mẽ piitã omu. Jakamã kwa mẽ tokyx kutêp tãm amnhĩ nhĩpêx o ri apa. Te mẽ kot mẽhõ kutêp pry ho mexta pyrà nê amnhĩ nhĩ ho tãm amnhĩ nhĩpêx nê tãm ajamaxpêr mex o ri apa. Kêr ka mẽ Pahihti kutêp ã amnhĩ nhĩpêx anhỹr o ri apa.” Anhỹr o koja mẽ kãm ujarênh o pa. Anê.

Na pre finat Ijaisja Juãw Paxis kukamã ã mẽ kãm harênh anê nê hã kagà. Tã nhũm hã kagà xàja kõt nhũm Juãw Paxisja mõi põi. Hãmri nê Ijais kot hkukamã harênh xà hkõt kapõt ã ri mẽ kãm ujarênh o pa nhũm mẽ kãm mar prãm xwỳnhjaja ma hwỳr mra. Nhũm mẽ kãm kapêr nê mẽ kãm:

—E koja Tirtûm tokyx kot mẽ pakaxyw âm xwÿnhja o amnhĩrĩt. Jakamã kwa mẽ tokyx kutêp amã amnhĩ tomnuj kaga hprãm xàj tãm amnhĩ nhĩpêx o apa.

Anhÿr o Jejus kutêp mẽ kãm kapêr o pa.

4Juãw Paxisja hikàxpore hkêt jakamã na pre ê mex kêt nê pa. Âm mẽmo mry pê kamer kĩ ho amnhĩm ê nhĩpêx nê hagjê nê hã pa. Nê mẽmo mry hkà ho amnhĩ pre nê ri pa. Nê mẽo mex kur kêt nê âm krit ku nê menh ôr o ri pa.

5Jakamã nhũm kapôt ã ri mẽ kãm Tirtûm kapêr jarênh o pa nhũm mẽ kot mar kaxyw ma hwÿr mra. Pika pê Jutej kamã ri mẽ pa xwÿnhjaja. Nê Jutej kamã krĩ pê Jerujarê nhõ xwÿnhjaja. Nê pyhti pê Jotãw mÿri mẽ pa xwÿnhjaja. Nhũm prem piitã harênh ma nê kot mar kaxyw ma hwÿr mra. 6Hãmri nê kapêr ma nê Tirtûm noo mã mẽ kot amnhĩ tomnuj xwÿnh ã kãm amnhĩ jarê. Mẽ kot amnhĩ tomnuj kaga nê tãm amnhĩ nhĩpêx o pa hprãm xàj ã kãm amnhĩ jarênh anê. Nhũm Tirtûm kaxkwa kamã hkrĩ htã mẽ kuma nê amnhĩ katut kôt mẽ kot amnhĩ tomnuj rênh pa nê axte kãm hamaxpêr kêt nê. Jakamã nhũm pre Juãw Paxisja Tirtûm mã gôx kãm mẽ hkrã kumrãr pa. Pyhti pê Jotãw kamã mẽ hkrã kumrã.

7Tã nhũm Parijew mẽ Satusew nhõ xwÿnhjaja mãânên mẽ hkôt ma Juãw Paxis wÿr mra. Mẽ urak nê mẽ kêp Ijaew jakamã haxwÿja Juãw Paxis kot mẽ hkrã kumrãr kaxyw ma hwÿr mra. No âm hkwÿjê hkĩnhã mẽ kot amnhĩ tomnuj kaga hprãm xàj kãm amnhĩ jarênh kêt nê. Âm amnhĩ krã hkôt hkwÿjê hkôt hwÿr mra nê amnhĩ to kuma. Nom nhũm Juãw Paxisja ra hprĩ hã ã mẽ hamaxpêr anhÿrja kôt mẽ omunh mex nê. Jakamã mẽ kãm:

—Tk kwa nà. Kormã mẽ ate amnhĩ tomnuj pix o ri apa kênã. Xà kot paj mẽ ate amnhĩ tomnuj o apa rãhã mẽ akrã kumrã nhũm Tirtûm ja hã mẽ apumu nhũm ja kãm mex nê? Nà koja ja kãm mex kêt nê. Koja ja mÿrapê nhÿrmã tanhmã mẽ atomnuj tÿx to ka mẽ tee ri umaj apimxur prãm kaprÿ. 8Na htem amnhĩ tomnuj kaga nê tãm amnhĩ nhĩpêx nê tãm axpên nhĩpêx. Jakamã e kwa mẽ ã amnhĩ nhĩpêx o apa anê pa rĩ kormã mẽ akrã kumrã. 9Na ka htem atÿx ri ajamaxpêr o: “Mẽ ixpê finat Apraãw kanrêhã htãmnhwÿ hkwÿ na pa mẽ. Jakamã koja Tirtûm ja hã mẽ ixpumu hãmri nê mẽ ixte amnhĩ tomnuj o ixpa tã nhũm ja hã tanhmã mẽ ixto hkêt nê. Koja mẽ ixto mex nê.” Anhÿr o atÿx ri amnhĩ kukamã ajamaxpêr. Nom ja kot anhÿr kêt. Mẽ apê Apraãw kanrêhã htãmnhwÿ htã mẽ ate urak nê tãm amnhĩ nhĩpêxre hã. Kot kaj mẽ apê htãmnhwÿ htã amnhĩ tomnuj o ri apa hãmri nê Tirtûm noo mã te mẽ apê pikap kênre nhĩkwÿ pix pyrak. 10Na ra Tirtûm mẽ ate amnhĩ tomnuj mÿrapê tanhmã mẽ ato kaxyw. Te ho mẽhõ nhõ mẽmo hpar ô hkêt nhũm kot tee ri omunh nê krãhyr nê

kuwy kamã mênh nê ho kaxàr par pyràk o koja mẽ anhîpêx. Jao amnhî nê kuwy hwÿr mẽ arê ka mẽ kamã amnhî xà htÿx kamã ajamak rãhã ho ri apa. Anê.

Nhũm pre ã Juãw Paxisja Parijew mẽ Satusew nhõ xwÿnhjê mã kapêr anê. 11Hãmri nê hpãnhã axte mẽ kot mar kaxyw hwÿr mẽ mrar xwÿnhjê mã kapêr nê mẽ kãm:

—E ra mẽ ate amnhî tomnuj kaga xwÿnhjaja. Na pa Tirtũm mã mẽ akrã kumrãr kaxyw gô pix o mẽ akrã kumrã. Nom koja tokyx ixpãnhã Tirtũm kot mẽ pakaxyw ãm mã xwÿnhhta tãm mẽ pahwÿr pøj. Àhpumunh tÿx o kot ijakrenh par jakamã na pa hte ãm kukwak ri ixpa nê amnhî tã hã ixpijaãm o ri ixpa. Koja mẽ awÿr Tirtũm Karõ rê nhũm mẽ akarõ mã agjê. Ka mẽ ÿ hã tãm amnhî nhîpêx o ri apa. Nom kormã mẽ kot tãm amnhî nhîpêx kêt xwÿnhjaja koja Tirtũm kot mẽ pahwÿr mênh xwÿnhja ja hã mẽ omu nê mẽ hipêx o te kuwy kot mẽmoj to kaxàr par pyràk o mẽ hipêx.

12—Na htem pur kãm harôj nhîkê nê ho grã nê hpãnhã kahtwÿ. Nê kahuk pa hãmri nê hkapi nhũm kôk apê nê prÿhkà ho htor pa. Nhũm mẽ hpãnhã hy ho pa nê ixkre kamã gôj kãm unhwÿ. Ja pyrã nê koja tokyx Tirtũmja mẽ piitã mẽ kot tanhmã amnhî nhîpêx to ho pa hã mẽ omunh xà hkôt mẽ ho axkjê. Jakamã mẽ kot tãm amnhî nhîpêx o mẽ pa xwÿnhjaja koja ma amnhî wÿr mẽ ho api nhũm mẽ kuri mex rãhã nê pa ho pa. No mẽ kot amnhî tomnuj rãhã ho mẽ pa xwÿnhjaja koja jajê hkĩnhã tanhmã mẽ homnuj to. Nhũm mẽ ma kuwy raxja wÿr pa nê kamã amnhî xà htÿx kamã hamak rãhã nê pa ho pa.

Anhÿr o mẽ kãm kapêr.

Juãw Paxis kot Jejus krã kumrãr

Makre 1.9-11; Rukre 3.21-22; Juãw 1.32-34

13Tã nhũm Jejus pika pê Garirej rũm kato nê ma Juãw Paxis wÿr mõ. Juãw kot pyhti pê Jotãw kamã hkrã kumrãr kaxyw ma hwÿr mõ. Hãmri nê omu nê kãm:

—Pa. E ot pa awÿr amnhî to tẽ. Ate mẽ kuxwar ixkrã kumrãr kaxyw. Anê.

14Hãmri nhũm tee ri kuma nê kãm:

—Kwa nà. Aa ate amnhî tomnure hã kot pa kêt ri akrã kumrã. Nà ka kot kaj ixkrã kumrã. Anê.

15Hãmri nhũm kãm:

—Kwa nà. Mãmrĩ ixkrã kumrã Juãw Paxis. Tirtũm kãm ja prãm kênã kot ka kêt ri axtem nê ixkaga. Kot puj mẽ Tirtũm kãm hprãm xà hkôt tanhmã amnhî nhîpêx to ho ri papa. Anê.

Hãmri nhũm kuma nê kãm:

—Tôe. Nà kot paj akrã kumrã. Anê.

16Hāmri nê pyhti hwÿr o wrÿ nê kamã hkrã kumrã. Hāmri nê wa akupÿm api nê gô mÿ ri âm rãhã nhũm kaxkwa axkjê. Hāmri nhũm kurũm Tirtũm Karõja Jejus wÿr te tuuti pyrã nê ahpar mã hwÿr wrÿk o tẽ nê ìkre hã xa. Nhũm Jejus arĩ amnhĩ wÿr wrÿk o htẽm kãm omunh o xa. 17Hāmri nhũm Tirtũm kaxkwa rũm kãm kapêr nê kãm:

Pa? E apê ixkra mex na ka. Âm hãmri na ka hte ixkanrêhã ã amnhĩ nhĩpêx mex anê. Inhmã ajapê kamã na ka ri apa ho apa. Anê.

Satanasti tee kot amnhĩ tã Jejus kamã hamak

Makre 1.12-13; Rukre 4.1-13; mãânên Eprêw 2.18, 4.15

4 1Tã nhũm Jejus Tirtũm Karõ nhĩ hã ma kapôt ã ri pa. Satanasti kot amnhĩ tã kamã hamak kaxyw nhũm ma kapôt ã ri pa. 2Ri pa hã apkati xohtô nê. Ra hã arĩgro pê 40. Nê kormã apkur kêt jakamã ra kãm prãm tÿx kumrêx nê ri pa. 3Hāmri nhũm Satanastija nhÿhÿnh hwÿr tẽ nê hêx rom kãm kapêr nê kãm:

—Pa. E kwa mãn ka ra amã prãm tÿx nê nà? Nom xep apê Tirtũm Kra jakamã apê mêmoj hihtÿx kêt. Tirtũm pyrã nê axãhpumunh o axãhpumunh kênã. Jakamã kwa kên nhĩkwÿ mÿj mã anê kê amã pãwti hã amnhĩ jahkre ka aku nê tokyx ho amnhĩ xihtÿx. E kwa tokyx kãm akapêr. Anê.

4Hāmri nhũm kuma nê kãm:

—Tk. Nà kot paj amar xà hkôt ã ri amnhĩ nhĩpêx anhÿr kêt nê. Koja Tirtũm kãm inhmã mêmoj nhõr prãm nê inhmã mêmoj gô pa rĩ kormã kukrê. Kapêr ã kagã htũm kot ja jarênh kot:

Na htem mẽ apkur xà pix kukwak ri htĩr nê pa hkêt nê. Na htem mãânên Tirtũm kapêr ma nê hkôt amnhĩ nhĩpêx nê htĩr nê pa. Anê.

—Ã kapêr ã kagã kamã kot harênh kot anhÿr jakamã kot paj akapêr kôt ri ã amnhĩ nhĩpêx anhÿr kêt nê. Âm kwarĩ ho kwarĩ. Anê.

5Hāmri nhũm Satanastija tee ri kuma hãmri nê hpãnhã ma Jerujarê hwÿr o mõi. Nê Tirtũm mã amnhĩ jarênh xà hã ixkre hprêk nhĩmõk wÿr ho api nê kÿxpê hatur xà hã âm nhũm xa. Hāmri nê amnhĩ parpê kên rũnh nhĩkwÿ xwÿnhja pumunh o xa nhũm Satanasti kãm:

6—E apê Tirtũm Kra jakamã kwa ja rũm ahpar mã ajarĩ nê ma tẽ nê pikap tẽm. Koja Anhĩpêêxãja apumunh mex nê ka tanhmã amnhĩ to hkêt nê. Kapêr ã kagã htũm kot harênh kot:

Tirtũm koja kapêr o wrÿk xwÿnh kwÿjê mã ajarê ka ajarĩ nê ahpar mã tẽ nhũm mẽ kÿx pê amÿ nhũm mêmoj akã hyr kêt nê. Anê.

—Ã kapêr ã kagã htũm kot ajarênh anhÿr jakamã e tokyx ajarĩ. Anê.

7Hāmri nhũm Jejus kuma nê kãm:

—Tk kot paj ri ate inhmã karõ xàja kôt ã amnhĩ nhĩpêx anhÿr kêt nê. Koja Tirtùm tãm inhmã ijarĩ hã karõ pa rĩ mar xà hkôt ijarĩ. No kot pa ri amar xà hkôt ijarĩ hkêt nê. Tirtùm kapêr ã kagà htùm kot ja jarênh kot:

Kêr ka mẽ amnhĩ krã hkôt amnhĩ tã ixkamã ajamak kaxyw inhĩxi jarênh kôt tanhmã amnhĩ nhĩpêx to hkêt nê. Anê.

— ã kot ja nê kapêr kot anhÿr jakamã kwarĩ ho kwarĩ. Kot paj ri amar xà hkôt ijarĩ hkêt kumrêx. Tirtùm tãm kot inhmã ã ixte amnhĩ nhĩpêx anhÿr ã karõre hã. Anê.

8Hãmri nhùm Satanasti tee ri kuma nê hpãnhã ma nhÿri kên prêeti hwÿr o tẽ nê himõk ã axte o xa. Hãmri nê kãm pika piitã ahkre hpa. Nê mẽ hikukrêx piitã nhùm kãm ahkre ho xa. Kàxpore nê mẽmoj mex piitã nhùm kãm ahkre nhùm Jesus piitã omunh o xa. 9Hãmri nhùm kê Satanasti axte kãm:

—E mãn ka kam ri mẽmoj mex mÿj piitã omunh pa. Piitã inhõ na. Nom kot kaj ixkutã tẽm nê inhmã inhmex o inhmex ã ijarê pa ama nê amã piitã õr pa. Ka kam mẽmoj piitã ho anhõ nê ho amnhĩptãr o apa. Jakamã e kwa tokyx. Anê.

10Hãmri nhùm kuma nê axte kãm kapêr nê kãm:

—Tk kwa ma nhÿhÿm tẽ Satanasti. Kot paj ri amã amex o amex ã ajarênh kêt kumrêx. Tirtùm kapêr ã kagà htùm kot ja nê kapêr kãm hihtÿx kênã. Kapêr kot:

Kêr ka mẽ ixkapêr pix ma nê ixkutã pix mã akõnkrã ho akrĩ nê inhmã inhmex o inhmex ã ijarê. Kêr ka mẽ ã amnhĩ nhĩpêx anhÿr o ri apa.

—Anhÿr o kot hã karõ jakamã kot paj amã amex o amex ã ajarênh kêt kumrêx. Anê.

11Hãmri nhùm tee ri amnhĩ tã kuma hãmri nê ma tẽ. Tee ri kãm kapêr kaprÿja ã amnhĩ pumu hãmri nê hkaga nê ma tẽ. Hãmri nhùm Tirtùm kapêr o mẽ wrÿk xwÿnhjaja Jesus wÿr wrÿ nê tanhmã ho mex to nê kãm õ nhùm kukrê nê akupÿm hihtÿx.

Jesus kot Garirej kamã kapêr o pa

Makre 1.14-15; Rukre 4.14-15

12Tã nhùm Juãw Paxisja mẽmoj tã pahi Eroxo mã akir nhùm amnhĩ tã kuma nê gryk xàj haxà nhùm hkrĩ ho hkrĩ. Hãmri nhùm Jesusja harênh ma nê ma akupÿm Garirej kamã krĩ pê Najare hwÿr ma akupÿm tẽ. 13Hãmri nê ra pøj nom kamã ri pa hkêt nê. Nê hpãnhã kurũm kato nê ma krĩ pê Kapanau hwÿr tẽ. Gõ rax pê Garirej mÿri na pre. Pika hkwy pê Jepurõ mẽ Natari wa mẽ kamã na pre nhùm Jesus ma hwÿr tẽ. Hãmri nê kamã pa. 14Nhùm ra amnepêm Tirtùm nhÿ hã kapêr jarênh o mẽ pa xwÿnh finat Ijaisja Jesus kukamã ra mẽ panhĩgêtjê mã ã kot amnhĩ

nhîpêx anhÿr ã harê nê hã kagà. Jejus kot ã mẽ hwÿr mör anhÿrja kukamã nhũm pre harê nê hã kagà. 15Pika hkwÿ kamã mẽ pa xwÿnhjaja nhũm pre mẽ hkukamã mẽ harênh mex nê. Nê pika pê Garirej kamã mẽ pa xwÿnhjaja nhũm pre mãänên mẽ hkukamã mẽ harê. Nê pyhti pê Jotãw mẽ gô xujanãr wa hkaêx kãm pika piitã kamã mẽ pa xwÿnhjaja. Nê krî pê Garirej kamã mẽ kêp Ijaew kêt xwÿnhjaja nhũm pre mãänên mẽ harê. ã na pre finat Ijaisja mẽ hkukamã Tirtũm nhÿ hã mẽ piitã mẽ harê nê hã kagà anê. Jejus kot ma mẽ hwÿr mörja kukamã nhũm ra hprî hã harê nê hã kagà. Nê hã kagàja o:

16 E. Kot paj mẽ amã mẽmoj mex jarê ka mẽ inhma. Mẽ ate Tirtũm pumunh kêt jakamã te mẽ ate kamàt kô kamã ri apa pyrãk. Tã koja Tirtũm mẽ amã amnhî to amnhîrit ka mẽ hpãnhã te mẽ ate hirã kamã ri apa pyrãk o amnhî nhîpêx nê ra hkôt amnhî xunhwÿ.

Anhÿr o mẽ hkukamã mẽ harê nê hã kagà. 17Tã nhũm ra kot hkukamã mẽ kãm ujarênh xà hkôt nhũm Jejusja mẽ hwÿr mō nê mẽ kãm Tirtũm kapêr jarênh o ri mẽ hkôt pa. Nê mẽ kãm tanhmã amnhî jarênh to ho pa. Nom kormã hprî hã mẽ kãm amnhî jarênh kêt nê. Te ho nhãm mẽhō jarênh pyrãk o mẽ kãm amnhî jarê nê mẽ kãm:

—E na ra Tirtũmja kot mẽ akaxyw ãm xwÿnhhta mẽ nhũm mẽ awÿr wrÿ. Jakamã kwa mẽ tokyx tee ri ate amnhî tomnuj ã amnhî pumu nê ã ate amnhî nhîpêx anhÿr kaga nê hpãnhã Tirtũm kôt mãn amnhî nhîpêx o ri apa.

Anhÿr o mẽ kãm kapêr o pa pê mẽ ahkre ho ri mẽ hkôt pa.

Jejus kot amnhî wÿr tep pynênh xwÿnhjê hwÿr

Makre 1.16-20; Rukre 5.1-11

18Tã nhũm Jejus ma gô rax pê Garirej mÿ ri pa nê gôx kãm ja wa omu. Simãw Pêtre mẽ htō Andreja nhũm wa gôx kãm kryhti rênh o wa xa. Hãmri nhũm Jejus wa hwÿr tē nê wa omu nê amnhî kôt wa kuwÿ nê wa kãm:

19—Pa. E kwa ma ixkôt mãn war apa. Kot paj tanhmã war ajahkre hto ka wa ma mẽ kãm ijarênh o ri apa. Mẽ kot war amar nê ra ixkôt amnhî xunhwÿr kaxyw. Anê.

20Hãmri nhũm wa kuma nê kryhti re nê wa ma hkôt htēm kurê kumrêx. 21Hãmri nhũm mẽ ma nhãm axte mō nê ra jajê hwÿr kato. Jepetew mẽ hkra Xiakre mẽ Juãwja nhũm wa mẽ hwÿr kato. Nhũm mẽ õ pàr kãm kryhti ho mex o wa mẽ nhÿ. Hãmri nhũm mẽ hwÿr mra nhũm Jejus amnhî kôt ja wa kuwÿ nê wa kãm:

—Pa Xiakre mẽ Juãw. E wa ma ixkôt mãn wa apa. Anê.

22Hãmri nhũm wa kuma nê hipêxã mã amnhî jarê nê ma hkôt pa ho pa kurê kumrêx.

Jejus kot tanhmã amnhĩ nhĩpêx to

Rukre 6.17-19

23Tã nhũm Jejus Garirej kamã Ijaew mã Tĩrtũm kapêr jarênh o pa. Na pre hte Tĩrtũm kapêr o mẽ ahkre xà hã ixkre hwỳr agjê nê kamã mẽ kãm Tĩrtũm kapêr jarênh o hkrĩ nê mẽ kãm:

—E mẽ tee ri ate amnhĩ tomnuj ã amnhĩ pumu nê hpãnhã Tĩrtũm kôt mãn amnhĩ nhĩpêx o ri apa. Kot kaj mẽ ã amnhĩ nhĩpêx anê nhũm ja hã mẽ apumu nê mẽ ato hkra kurê kumrêx. Anê.

Hãmri nê akupỹm mẽ kãm mẽ à xwỳnhjê ho mex. Ahpỹnhã tanhmã mẽ à kute xwỳnhjaja nhũm akupỹm mẽ ho mex o pa. 24Jakamã nhũm mẽ piitã pikaja kamã ri axpên mã harênh o hprôt. Nê pika pê Sir kôt mãânên ma ri axpên mã harênh o hprôt. Nhũm mẽ piitã harênh ma nê ma hwỳr mẽ à xwỳnhjê ho mra. Ahpỹnhã ri tanhmã mẽ à kute xwỳnhjaja. Mẽ à htỳx xwỳnhjaja. Nê mẽ ã kamã mẽ htyk xwỳnhjaja. Nê mẽ hkrã pipãnh xwỳnhjaja. Nê mẽkarõmnuti kot Satanasti nhỹ hã tanhmã ri mẽ ho xwỳnhjaja. Nhũm prem mẽ hamỳ nê ma Jejus wỳr mẽ o mra nhũm mẽ omu nê akupỹm mẽ ho mex pa. 25Jakamã nhũm mẽ ohtô nê ma hkôt pa. Krĩ pê Garirej rũm nê Tekap rũm nê Jerujarê rũm nê pika pê Jutej rũm. Nê pyhti pê Jotãw nhĩkê rũm mẽ pa xwỳnhjaja. Nhũm mẽ ã ohtô nê ma Jejus kôt omunh o pa anê.

Jejus kot tanhmã mẽ ahkre hto

Rukre 6.20-23

5 1Nhũm Jejus amnhĩ kôt ri mẽ kot omunh o mẽ pa xwỳnhjê pumu hãmri nê mẽ ahkre kaxyw ma tẽ nê hixêt ã api nê himõk ã nhỹ. Hãmri nhũm mẽ ma hkôt mra nê pu hã hkrĩ pa. 2Hãmri nhũm mẽ ahkre nê mẽ kãm:

3 E mẽ inhma. Kot kaj mẽ atõ amnhĩ kaxyw tanhmã Tĩrtũm mẽ wa inhã ajamxpêr to nê ajamxpêr o: “Koja Tĩrtũm inhĩhkô hã pa hkêt pa ixtỳx ri tanhmã amnhĩ tomnuj to ho ri ixpa rãhã ho ri ixpa.” Anhỹr o ajamxpêr. Hãmri nhũm Tĩrtũm ã ajamxpêr anhỹr ã apumu nhũm ja kãm mex nê. Hãmri nhũm apê hkra hã ato mex nê atãnopxar o akôt pa ho pa ka ajamakêtkati nê axãmnhĩx akĩnh nê ri apa.

4 Nê kot ka mẽ atõ tanhmã amnhĩ tomnuj to. Hãmri nê tee ri ja hã amnhĩ pumu nê apijaãm nê akaprĩ nê. Nê akaprĩ xaj amỳr o nhỹ. Amỳr rax nê. Hãmri nhũm Tĩrtũm ja hã apumu nhũm ja kãm mex nê. Jakamã nhũm anê akaprĩ hta nê ato mex nê ka ajamakêtkati nê axãmnhĩx akĩnh nê ri apa.

- 5 Nê kot ka mẽ atô agryx tokyx anhÿr kêt nê. Nê kritpêm amnhĩ tâ amã mẽ hkaprĩ ho ri apa. Hãmri nhũm Tĩrtũm ja hã apumu nhũm ja kãm mex nê. Hãmri nhũm ato mex nê ka ajamakêtkati nê axàmnhĩx akĩnh nê ri apa.
- 6 Nê kot ka mẽ atô amã Tĩrtũm kãm hprãm xà hkôt amnhĩ nhĩpêx o ri apa hprãm nê. Nhũm amnhĩ tâ apumu nhũm ja kãm mex nê. Hãmri nhũm ato mex nê tanhmã akrã hto ka hkôt pix mã amnhĩ nhĩpêx o ri apa. Jao ajamakêtkati nê axàmnhĩx akĩnh nê ri apa.
- 7 Nê mẽ kamã mẽ axukaprĩ ho ri apa xwÿnhjaja na hte Tĩrtũm ja hã mẽ apumu nhũm ja kãm mex nê. Jakamã na hte mẽ hã mẽ apyrã nê mẽ akamã ukaprĩ ho pa. Jao mẽ ato mex nê ka mẽ ajamakêtkati nê axàmnhĩx akĩnh nê ri apa.
- 8 Nê kot ka mẽ atô ã ajamaxpêr anê nê ajamaxpêr o: “Nà kot paj ãm Tĩrtũm kapêr kôt pix mã ri amnhĩ nhĩpêx o ri ixpa. ãm ja pix na inhmã hprãm.” Anhÿr o ajamaxpêr. Hãmri nhũm Tĩrtũm amnhĩ tâ mẽ apumu nê mẽ ato mex nê. Ka mẽ ajamakêtkati nê axàmnhĩx akĩnh nê ri apa. Nê nhÿrmã Tĩrtũm wÿr api nê kuri amex rãhã apa ho apa.
- 9 Nê kot ka mẽ atô mẽhõ wa kot axpên kutã amnhĩ xãm xwÿnhhta axpên tâ wa omu nê wa kot tanhmã axpên nhĩpêx tota nê tanhmã wa kãm akapêr to nê akupÿm tãm wa ãm. Hãmri nhũm Tĩrtũm ja hã apumu nhũm ja kãm mex nê. Nê apê hkra hã ajarê ka ajamakêtkati nê axàmnhĩx akĩnh nê ri apa.
- 10 Nê koja mẽhõ mẽ ate Tĩrtũm kapêr mar xà hkôt amnhĩ nhĩpêx o apa hã mẽ apumu nê hã tanhmã mẽ anhĩpêx kati hto. Tã nom koja Tĩrtũm arĩ mẽ ato mex nê. Mẽ apê hkra jakamã mẽ kot tanhmã mẽ anhĩpêx hto htã ka mẽ ajamakêtkati nê axàmnhĩx akĩnh nê ri apa.
- 11-12—Kwãr mẽ mãmri ixtã mẽ ato kapêr rÿ mẽ ato hêx rÿ tanhmã ri mẽ atomnuj to. Kwãr mẽ mãmri ã mẽ anhĩpêx anê. Nom kêr ka mẽ arĩ amnhĩ kaxyw inhmã ajamaxpêr tÿx rãhã pê ajamakêtkati nê axàmnhĩx akĩnh nê ri apa. Kwãr mẽ mãmri ixtã ã mẽ anhĩpêx anê nê mẽ amex kêt ã mẽ ajarê. Amnepêm na prem ã Tĩrtũm nhÿ hã kapêr jarênh xwÿnhjê nhĩpêx anê. Jakamã koja mẽ uràk nê ã mẽ anhĩpêx anê. Hãmri nhũm Tĩrtũm ja hã mẽ apumu nê amnhĩm mẽ amex ã mẽ ajarê. Hãmri nê nhÿrmã kaxkwa kamã wa inhõ krĩ kamã mẽ ato mex nê. Jakamã kêr ka mẽ ã amnhĩ kukamã ajamaxpêr anhÿr pê mãmri akĩnh nê ajamakêtkati nê axàmnhĩx ri apa. Kwãr mẽ mãmri ã wa ixtã mẽ anhĩpêx anê. Anê.

Jejus krajaja te kot kaxwa mẽ kanê hpôk wa uràk

Makre 9.49-50; Rukre 13.34-35

13Nhũm Jêjus arĩ mẽ kãm kapêr nê mẽ kãm:

— Nê mẽ ate ixkôt amnhĩ xunhwỳr xwỳnhjaja te mẽ ate kaxwa pyràk. Kaxwaja mẽ apkur xà ho ành mã mex. No koja mēhō tēn kamã pika hkwy mẽ nê ho ahkà. Hãmri tanhmã kot wem ho nê akupỹm ho mex? Nà koja akupỹm mex kêt nê. Âm mẽ kot hkapĩr pix kaxyw koja mex. Ja pyrã nê kot ka mẽ atõ ate inhmã tanhmã amnhĩ nhĩpêx to ho apa hã amnhĩ jarênh tã gaa nê rĩ amã ixkôt amnhĩ nhĩpêx prãm kêt nê. Hãmri nê ra te apê kaxwa mẽ pika pihkarta pyràk. Kwa mẽ ixujarênh ma nê kãm ajamaxpêr tỳx rãhã ho ri apa.


14-16— Nê te mẽ ate kanê hpôk pyràk. Nê te mẽ ate hixêt prêk nhĩmõk ã krĩ xãm pyràk. Koja krĩja hixêt prêeti nhĩmõk ã xa nhũm mẽ piitã omu. Nê kanêja. Xà na htem kanê hpôk nê poti ho hpro? Nà na htem hpôk nê kỳx pê mẽmoj nhĩmõk ã unhwỳ nhũm mẽ piitã mẽ kãm hirã nhũm mẽ hirã kamã mẽmoj pumunh mex nê. Ja pyrã nê kot kaj mẽ tãm amnhĩ nhĩpêx o ri apa nhũm mẽ piitã ja hã mẽ apumunh kôt ra kaxkwa kamã Tĩrtũm mex ã harênh o pa. Anê.

Jejus kot tanhmã Mojes kapêr jarênh to

Rukre 16.16-17

17Nhũm Jêjus arĩ mẽ kãm kapêr nê mẽ kãm:

— Nê amnepêm Mojes kot Tĩrtũm nhỹ hã Ijaewjê mã tanhmã mẽ kot amnhĩ nhĩpêx to hã mẽ kãm karõja. Nê amnepêm Tĩrtũm nhỹ hã kapêr jarênh o mẽ pa xwỳnhjê kapêrja. Ixte mẽ kapêr o ijapêx kaxyw na pa



Matêwre 5.14-16

pre mẽ awÿr ixwryk kêt nê. Jakamã kwa mẽ ri ã axpên mã ijarênh anhÿr kêt nê. Kêt ixprî hã ixte mẽ amã mẽ kapêr jarênh nhùm mẽ ate mar mex kaxyw na pa pre kaxkwa rùm mẽ awÿr wry.

18—Tirtûm kapêr ã kagà htûm kot mẽmoj jarênhja. Koja ujarênh xà hkôt mẽmoj tanhmã amnhî to hpar mẽ nhùm rî kormã kaxkwa mẽ pika wa hapêx pa nhùm kapêr ã kagàja mãânên hapêx. Nom nhùm Tirtûm kapêr koja mẽmojja pyrà nê aa hapêx kêt nê. Koja rãhã ho rãhã nê aa ihkjê ho tanhmã mênh to hkêt nê. Âm hãmri na pa ã mẽ amã harênh anê.

19—Nê kot ka mẽ atõ Tirtûm kapêr o pixire nê hirôp xa. Hãmri nê ra amnhî pyrà nê anhîõ mã ja hã amÿnê. Apyrà nê kot hirôp âm kaxyw ka kãm hã amÿnê. Kot kaj ã amnhî nhîpêx anê hãmri nê apê Tirtûm kra hkêt ã amnhî to amnhîrît. Nom kot ka kêt mẽ tãm amnhî nhîpêx o ri apa. Nê amnhî pyrà nê tãm mẽ kot amnhî nhîpêx kaxyw mẽ kãm akapêr o ri apa hãmri nhùm Tirtûm ja hã apumu nê ato hkra nê ato mex nê.

20—No Parijew nhõ xwÿnhjaja nê Tirtûm kapêr tûm o mẽ ahkre ho mẽ pa xwÿnhjaja. Mẽ kot Tirtûm kapêr kôt amnhî nhîpêx mex ã amnhî jarênh tâ no âm hkôt ã amnhî nhîpêx anhÿr kêt nê. Jakamã kot kaj mẽ hkôt amnhî nhîpêx o ri apa hãmri nê mẽ urak nê nhÿrmã Tirtûm mẽ wa inhõ krî kamã apa hkêt nê. Anê.

Mẽ gryk o mẽ pa xwÿnhjê jarênh

Rukre 12.58-59;

mãânên Rômãn 12.19; Epes 4.26; Wam Ximotre 2.8; Xiakre 1.19-20

21Nhùm Jejus arî mẽ kãm kapêr nê mẽ kãm:

—Nê amnepêm na prem mẽ panhîgêjtjê mã Tirtûm kapêr kwÿ jarênh o pa nê mẽ kãm:

Kêr ka mẽ axpên par kêt nê. Kot kaj mẽ mẽhõx pî nhùm mẽ ja mÿrapê atomnuj nê. Nê ma mẽ anhõ pahîhti hwÿr ato tẽ nhùm mÿrapê tanhmã ato rÿ hkôt apî. Anê.

Âm hãmri na prem mẽ kãm ja jarê. 22Tã kot paj ixprî hã mẽ amã tanhmã harênh to ka mẽ inhma. Kot kaj mẽ mẽmoj tâ anhîõ kamã agryk. Hãmri nhùm Tirtûm tee ri ja hã apumu nhùm ja kãm mex kêt nê. Jakamã koja mẽ anhõ pahîhti tanhmã ja hã mẽ ato japêr hã koja ja mex nê. Rÿ kot kaj mẽ tanhmã mẽhõ japyrÿ hto. Ho hagrô rÿ ho rop. Mÿrapê kop apu akwÿ kot apynênh nê anhõ pahîhti hwÿr ato htêm nê îhkram ajaxàr ronhÿx ja inhmã mex nê. Rÿ kot kaj mẽ tanhmã anhîõ mã akapêr punuj to nê kãm: “Tk. Ate ho warêhti hã. Te apê hagrô pyràk kênã.” Anhÿr o kãm akapêr. Tã kop apu Tirtûm ra ã akapêr anhÿrja mÿrapê mẽ kot amnhî xà htÿx kamã hamak tûm xàta wÿr amênh ronhÿx ja inhmã mex nê. Ja pumaj kwa kêr ka mẽ ã axpên mã akapêr anhÿr kêt nê. Kêt mẽ axpên mã tãm akapêr pix o ri axpên kôt apa.

23—Nê kêr ka mê tanhmã ate anhĩo nhĩpêx hto kamã Tĩrtũm mã mex o mex ã harênh kêt nê. Kêr ka mê kãm amnhĩ jarênh o akrĩ hãmri nê ra mêhõ kot mêmõj tã akamã gryk xwỳnh mã ajamaxpêr japêr. 24Hãmri nê akato nê ma hwỳr atêm kurê kumrêx nê wa tãm axpên mã akapêr nê tãm akupỹm axpên xãm. Hãmri nê rĩ kormã ma akupỹm tẽ nê Tĩrtũm mã amnhĩ jarênh jatur xãm amê nê kãm mex o mex ã harê. Kêr ka mê ã amnhĩ nhĩpêx anhỹr o ri apa.

25-26—Na htem tanhmã axpên nhĩpêx to hãmri nê kot tanhmã war axpên to xwỳnhjê hõja ma õ pahi hwỳr tẽ nê kãm tanhmã kot ho xwỳnhhta jarênh kaxyw nojarê. Hãmri nhũm ra kamã gryk xwỳnhhta kot pahi mã harênh kaxyw nojarê ã harênh ma nê tee ri amnhĩ kukamã hamaxpêr nê ma hwỳr tẽ nê wa akupỹm tãm axpên xãm. Na htem ã amnhĩ nhĩpêx anê. Pahi kot wa harênh mar nê tanhmã axpên tã wa ho pymaj na htem ã amnhĩ nhĩpêx anê nê tokyx tãm akupỹm axpên xunhwỳ. No koja mê anhỹr kêt nhũm pahija wa harênh ma nê wa kot tanhmã axpên to xwỳnhhta õ jaxà nhũm tee ri kãm kator prãm. Hãmri nê tanhmã amnhĩ to nê ra amnhĩ pãnhã kãm amnhĩrer pa nhũm pahĩhtija rĩ kormã põristi mã anê nhũm kãm ure nhũm kato. Ja pyrà nê kêr ka mê Tĩrtũm tanhmã kot mê anhĩpêx to pymaj tokyx mê ate amnhĩ tomnuj kaga nê hkõt amnhĩ nhĩpêx rãhã ho ri apa. Anê.

Tanhmã mê pahte mê pahprõjê nhĩpêx to

Matêwre 19.3-9; Makre 9.43-47, 10.2-9; mããnên Rukre 16.18

27Nhũm Jejus arĩ mê kãm kapêr nê mê kãm:

—Nê na pre finat Mojesja mê panhĩgêjtê mã Tĩrtũm kapêr tũm kwỳ jarê nê mê kãm: “Kêr ka mê amnhĩ prõ pix tãnopxar o ri apa. No mê kuhpa hã nhãm mêhõ ho amnhĩkati ho ri apa hkê. Anê. ãm hãmri na pre mê kãm ja hã karõ. 28Tã kot paj ixprĩ hã mê amã tanhmã harênh to ka mê inhma. Kot kaj mê nhãm mêhõ pumu nê amã ho amnhĩkati hprãm mã ajamaxpêr. Jao te ra ate ho amnhĩkati pyræk o amnhĩ nhĩpêx. Kormã ate ho amnhĩkati hkê tã ra hkukamã ajamaxpêr jakamã te ra ate ho amnhĩkati pyræk o amnhĩ nhĩpêx. 29Ã mê hamaxpêr punuj anhỹr xwỳnhhjaja koja mê nhỹrmã ma mê kot amnhĩ xà htỳx kamã hamak tũm xàta wỳr ma mra nê kamã pa rãhã ho pa. Jakamã kêr ka mê nhãm mêhõ pumu nê amã hkĩnh japêr hãmri nê te ate ano kaxàr nê mênh nê axte ate omunh kêt pyræk o amnhĩ nhĩpêx. Jao hkàx ã rĩt nê ma nhỹhỹm atêm kurê kumrêx.

30—Nê kot kaj mê anhĩhkra ho tanhmã amnhĩ tomnuj to kaxyw. Hãmri nê tee ri ja hã amnhĩ pumu nê te ate amnhĩ nhĩhkra krãhyr nê mênh pyræk o amnhĩ nhĩpêx nê tanhmã amnhĩ tomnuj to hkê. Mê ãhkra ho mê kot tanhmã amnhĩ tomnuj to ho mê pa xwỳnhhjaja koja mê

nhÿrmã ma mẽ kot amnhĩ xà htÿx kamã hamak tũm xàta wÿr ma mra nẽ kamã pa rãhã ho pa. Anẽ.

Mẽ pahte axpẽn kaga hkêt

31Nhũm Jejus arĩ mẽ kãm kapẽr nẽ mẽ kãm:

—Nẽ na pre finat Mojes mẽ panhĩgêjtjẽ mã Tĩrtũm kapẽr tũm kwÿ jarẽ nẽ mẽ kãm: “Kot kaj mẽ atõ aprõ kaga kaxyw hãmri nẽ ate hkaga hã amnhĩ jarẽnh ã kaga nhĩpêx nẽ kãm agõ nẽ rĩ kormã hkaga.” Anẽ. ãm hãmri na pre ã mẽ kãm Tĩrtũm kapẽr tũm jarẽnh anẽ. 32Tã kot paj ixprĩ hã mẽ amã tanhmã harẽnh to ka mẽ inhma. Kêr ka mẽ atÿx ri amã hprãm xà hkõt aprõ kaga hkêt nẽ. Nom koja aprõ akuhpa hã nhãm mẽhõ ho amnhĩkati ka harẽnh ma hãmri nẽ amã ja hã hkaga hprãm nẽ mãmri kam nẽ hkaga. Ja tanhmã kute hkêt. Nom koja ã amnhĩ nhĩpêx anhÿr kêt tã ka amnhĩ krã hkõt hkaga. Hãmri nhũm mẽhõ apãnhã ho hprõ nẽ o pa. Hãmri nẽ ra kot apê aprõ ho amnhĩkati ho pa pyræk o hipêx. Nẽ nija haxwÿja. Te arĩ kêp aprõ htã akuhpa hã nhãm myja o amnhĩkati o pa pyræk o amnhĩ nhĩpêx. Anẽ.

Tãm mẽ pakapẽr ã Jejus kot mẽ pamã karõ

Xiakre 5.12

33Nhũm Jejus arĩ mẽ kãm kapẽr nẽ mẽ kãm:

—Nẽ na pre finat Mojes mẽ panhĩgêjt nẽ pahpãmjẽ mã Tĩrtũm kapẽr tũm jarẽnh o: “Kêr ka mẽ Tĩrtũm mã mẽmoj to anhÿr ã amnhĩ jarẽ hãmri nẽ amnhĩ jarẽnh xà hkõt kãm tanhmã amnhĩ nhĩpêx to. Nom kêr ka mẽ atÿx ri kãm tanhmã amnhĩ jarẽnh to ho amnhĩ to axêx kêt nẽ. ãm akatàt kõt mẽ ate amnhĩ jarẽnh to xà hkõt kãm tanhmã mẽmoj to.” Anẽ. ãm hãmri na pre mẽ kãm ja jarẽ. 34Tã kot paj ixprĩ hã mẽ amã tanhmã harẽnh to ka mẽ inhma. Kêr ka mẽhõ mã tanhmã amnhĩ jarẽnh to. Tĩrtũm mã pix mã amnhĩ jarẽnh kêt nhãm mẽhõ mã mããnẽn tanhmã amnhĩ jarẽnh to. Nẽ akatàt kõt kãm amnhĩ jarẽ. Na ka htem mẽ kot mẽ axêx kêt kõt mẽ apumunh kaxyw mẽmoj nhĩxi jarẽnh kõt amnhĩ jarẽ. Nom kêr ka mẽ axte ã mẽmo nhĩxi hã amnhĩ jarẽnh anhÿr kêt nẽ. Mẽmoj tã amnhĩ jarẽ nẽ akatàt kõt amnhĩ jarẽnh kurê kumrêx. No mẽ kot axêx kêt kõt apumunh kaxyw mẽmoj nhĩxi hkõt amnhĩ jarẽnh kêt nẽ. Tanhmãn kaxkwa nhĩxi jarẽnh kõt mẽmoj tã amnhĩ jarẽnh kêt nẽ. Kaxkwa kêp Tĩrtũm krĩ xà maati kênã kot ka kêt mẽ axtem nẽ atÿx ri amnhĩ kaxyw hixi jarẽ. 35Rÿ mẽ kot axêx kêt kõt apumunh kaxyw pika nhĩxi jarẽnh kêt nẽ. Pika kêp Tĩrtũm par xãm xà kênã kot ka kêt mẽ atÿx ri amnhĩ kaxyw tanhmã hixi jarẽnh to. Nẽ krĩ pê Jerujarẽja mããnẽn kêr ka mẽ ri amnhĩ kaxyw tanhmã hixi jarẽnh to hkêt nẽ. Koja nhÿrmã Tĩrtũm mẽ awÿr Jerujarẽ hwÿr ixpê pahi maati hã inhmẽ pa kamã mẽ ato

amnhĩptàr o ixkrĩ. Jakamã kër ka mẽ ri atỳx amnhĩ kaxyw tanhmã hixi jarënh to ho ri apa hkêt nê.

36—Nê kër ka mẽ kot axêx kêt kêt apumunh kaxyw mẽ ri tanhmã amnhĩ krã hkĩ jarënh to hkêt nê. Kot kaj mẽ anê nê ãm tanhmã hã harënh to kaprỳ. Xà kot kaj mẽ ajamaxpêr pix o tanhmã amnhĩ krã hkĩ hto? Nà kot kaj mẽ ho anhỳr kêt nê. Jakamã mẽ ri atỳx tanhmã harënh to hkêt nê.

Nê mẽ atỳx ri mẽmo nhĩxi jarënh kêt mẽmoj tã amnhĩ jarënh o apa hkêt nê. 37 ãm akatàt kêt tãm amnhĩ jarënh kurê kumrêx. Jao mẽ kãm: “Tỳ. Nà kot paj ho anê.” Anhỳr o mẽmoj tanhmã ho. Rỳ mẽ kãm: “Nà kot paj ho anhỳr kêt nê.” Anhỳr o mẽmoj tanhmã ho hkêt nê. ãm akatàt kêt tanhmã mẽmoj tã amnhĩ jarënh to xà hkôt ho anhỳr kurê kumrêx. Mẽ kot Satanasti hkôt amnhĩ nhĩpêx o mẽ pa xwỳnh pixjaja na htem hêx rom mẽmoj nhĩxi jarënh kêt tanhmã amnhĩ jarënh to ho pa. Anê.

Mẽ pahte tanhmã axpên nhĩpêx to hã Jejus kot mẽ pamã karõ

Rukre 6.27-30, 23.34; määnên Atre 7.60; Römãn 12.14

38Nhũm Jejusja arĩ mẽ kãm kapêr nê mẽ kãm:

—Na prem amnepêm mẽ panhigêtjê mã Tirtũm kapêr tũm jarënh o: “Koja mẽhõ apê ano katõk nê hkapa hã koja mẽ anhõ pahija atã mã ho anê nê kêp no kapa. Rỳ koja mẽhõ apê axwa hõ hkwỳr hã koja atã mã ho anê nê atã kêp wa hõ hkwỳr.” Anhỳr o mẽ kãm hã karõ. ãm hãmri na prem ã ja jarënh anê. 39Tã kot paj ixprĩ hã mẽ amã tanhmã ja jarënh to ka mẽ inhma. Koja mẽhõ tanhmã mẽ anhĩpêx to ka mẽ ãm amnhĩ tã omu nê tanhmã amnhĩ tã ho hkêt nê. Koja anhĩnep akura ka ãm omu nê tanhmã amnhĩ tã ho hkêt nê. Te ate kãm ihkjê hpêr nhũm kot ihkjê kamã hkuranh pyræk o amnhĩ nhĩpêx nhũm ja amã mex nê. No amnhĩ tã tanhmã ho hkêt nê.

40—Nê koja mẽhõ anhĩnõhkã hã awỳ nhũm mẽ anhõ pahija amã anê ka mãmrĩ kãm agõ nê tanhmã hã kãm nê hkêt nê. Te ate hkôt kry pê kãm anhĩnõhkã hpakà ry jagjênh xwỳnhnta nhõr pyræk o amnhĩ nhĩpêx. Nom kër ka mẽ kamã agryk kamã kãm õr kêt nê.

41—Nê koja mẽhõ ate kãm jênh tur nê hkôt ho amõr ryy kaxyw amã kapêr ka mãmrĩ kãm ho anê. Nê kot amã nhỳri hã karõ xàja wỳr o põi nom kamã kãm õr kêt nê. Kãm ho hakrenh ryy nê rĩ kormã akupỳm kãm agõ.

42—Nê koja mẽhõ õ mẽmoj kêt nê awỳr tẽ nê mẽmoj tã awỳ ka mãmrĩ kãm agõ. Rỳ nhũm awỳr tẽ nê apê mẽmoj to ipresta kaxyw ka mãmrĩ kãm ho ipresta. Kër ka mẽ ã axpên nhĩpêx anhỳr o ri apa. Anê.

Mẽ pamã axpên kĩnh ã Jejus kot mẽ pamã karõ

Rukre 6.32-36; määnên Römãn 12.14

43Nhũm Jejus arĩ mẽ kãm kapêr nê mẽ kãm:

—Nê na prem amnhĩ krã hkôt axtem nê tanhmã mẽ panhĩgêjtê mã mẽmoj jarênh to nê mẽ kãm: “Kêr ka mẽ amã mẽ akrãmnhwỳjê pix kĩnh nê tanhmã mẽ ho mex to. No kêt mẽ kot tanhmã mẽ ato xwỳnhjaja kêr ka mẽ mãmri mẽ kamã axãhkurê ho ri apa.” Anhỹr o mẽ kãm karõ. 44Nom pa kot paj mẽ amã Tĩrtũm kot tanhmã ja hã karõ hto hã harê ka mẽ inhma. Kêr ka mẽ kot tanhmã ri mẽ atomnuj to xwỳnhjaja amnhĩ tã tanhmã mẽ ho hkêt nê. ãm tanhmã mẽ ho mex to pix hkukamã mãn ajamxpêr. Nê mẽ ho Tĩrtũm wỳr pix kukamã mãn ajamxpêr. 45Na hte ã kaxkwa kamã Mẽpahpãm Tĩrtũmja amnhĩ nhĩpêx anhỹr o pa. Mẽ kot amnhĩ tomnuj xwỳnhjaja nê mẽ kot amnhĩ to mex xwỳnhjaja nhũm hte mẽ ho hpimràatã mẽ ho mex o axpên pyrãk. Jao hamê wa hwỳr na rê nê hamê wa hwỳr myyti rê nhũm hamê wa kãm hirã ho pa. Jakamã kêr ka mẽ urãk nê mẽ piitã tãm mẽ hipêx o axpên pyrãk. Mẽ kot amnhĩ tomnuj xwỳnhjê mẽ mẽ kot amnhĩ to mex xwỳnhjê mẽ ho apimràatã mẽ ho mex o axpên pyrãk.

46—Nê xat kaj mẽ amã mẽ piitã mẽ ho mex prãm kêt nê ãm mẽ kot mẽ ato mex xwỳnh pixjaja ka mẽ amã mẽ ho mex prãm nhũm Tĩrtũm ja hã mẽ apumu nhũm ja kãm mex nê nà? Nà koja kãm mex kêt nê. Koja mẽhõ ato mex kêt tã kêr ka ãm amnhĩ rom ho mex nê. Nhũm Tĩrtũm ja hã apumu nê amnhĩm amex ã ajarê. Mẽ kot amnhĩ tomnuj xwỳnhjaja na htem ãm mẽ kot mẽ ho mex xwỳnh pixjaja nhũm mẽ amnhĩ xwar mẽ ho mex. No tãm mẽ kot amnhĩ nhĩpêx xwỳnhjaja na htem mẽ piitã mẽ ho mex o axpên pyrãk. Mẽ kot tãm amnhĩ nhĩpêx xwỳnhjaja nê mẽ kot amnhĩ tomnuj xwỳnhjaja nhũm mẽ ho hpimràatã mẽ ho mex o axpên pyrãk.

47—Nê na hte mẽ hkwỳjaja ãm amnhĩ kwỳjê pix mã kapêr mex o pa. Nom mẽ piitã tãm mẽ hipêx kêt nê. Nom kêr ka mẽ ã amnhĩ nhĩpêx anhỹr kêt nê. Kêr ka mẽ kurom mẽ piitã tãm mẽ hipêx o axpên pyrãk. Mẽ akwỳjê mẽ mẽ akwỳ hkêt xwỳnhjaja ka mẽ hipêx o axpên pyrãk. Nê tãm mẽ kãm akapêr o axpên pyrãk. 48Kaxkwa kamã Mẽpahpãm Tĩrtũm pyrã nê mẽ kot amnhĩ tomnuj xwỳnhjê mẽ mẽ kot amnhĩ to mex xwỳnhjaja mẽ ho apimràatã mẽ ho mex o axpên pyrãk. Na hte ã Tĩrtũmja mẽ panhĩpêx anê. Anê.

Mẽ pahte mẽ kêp amrakati xwỳnhjê ho mex rãhã hã mẽ pamã karõ

6 1-2Nhũm Jejus arĩ mẽ kãm kapêr nê mẽ kãm: —Nê na htem mẽ piitã hkwỳjê noo mã tanhmã mẽ kêp amrakati xwỳnhjê ho mex to. Nom kãm mẽ hkaprĩ kamã tanhmã mẽ ho mex to hkêt nê. ãm hkwỳjaja kot ja hã mẽ omunh nê mẽ mex ã mẽ harênh pix kaxyw na htem krĩ hkôt ri mẽ kêp amrakati xwỳnh piitã mẽ ho mex o pa. Nê mẽ pikuprõnh xã hã ixkre kamã kuhê nê tanhmã mẽ ho mex to. Mẽ hkwỳjaja kot ja hã mẽ omunh nê amnhĩm mẽ mex ã mẽ ho jarkrar

kaxyw. Jakamã koja nhÿrmã Tirtÿmja axte ja hã mẽ kãm mẽmoj mex nhôr kêt nê. Ra jar mẽ hkwÿjaja kot ja hã mẽ omunh nê amnhĩm mẽ mex ã mẽ harênh kênã. Jakamã kwa kêr ka mẽ ho mẽ uràk kêt nê. Nê tanhmã mẽhõ ho mex to kaxyw nê akwÿjê no kuhpa hã mẽ hkàx ã tanhmã mẽ ho mex to. No kot kaj mẽ noo mã tanhmã mẽ ho mex to. Mẽ kot hã apumunh nê ato jarkrar kaxyw tanhmã mẽ ho mex to nhũm kaxkwa kamã Mẽpahpãmja ja hã apumu nê mẽ hã tanhmã ato mex to hkêt nê. Koja ãm hã apumu.

3—Ja pymaj kêr ka mẽ mẽ kêp amrakati xwÿnhjê mã mẽmoj nhôr kaxyw hãmri nê mẽ piitã mẽ no hkàx ã tanhmã mẽ ho mex to. Hãmri nê nhãm ri ja hã mẽ kãm amnhĩ to jarkrar kêt nê. Aprõ mã rÿ akrajê mã rÿ akrãmnhwÿ mã hã amnhĩ jarênh kêt nê. 4Kot kaj mẽ no hkàx ã tanhmã ho mex to no nhũm Tirtÿm tapxipix apumunh o nhÿ. Hãmri nê ja hã ato mex rax nê ka amex nê apa. Anê.

Tanhmã mẽ pahte Tirtÿm mã amnhĩ jarênh to hã mẽ pamã karõ

Rukre 11.1-13, 18.9-14

5Nhũm Jejus arĩ mẽ kãm kapêr nê mẽ kãm:

—Nê mãânên ja. Na htem hakwa pix o amnhĩ mex ã amnhĩ jarênh xwÿnhjaja Tirtÿm mã amnhĩ jarênh kaxyw nê mẽ kot Tirtÿm kapêr o mẽ ahkre xà hã ixkreja wÿr agjê. Nê mẽ piitã mẽ noo mã kãm tanhmã amnhĩ jarênh to. Rÿ gáp kuhê nê mẽ piitã mẽ noo mã kãm amnhĩ jarê. Tã mẽmo kaxyw na htem mẽ noo mã Tirtÿm mã amnhĩ jarê? Nã ãm mẽ kot ja hã mẽ omunh nê mẽ mex ã mẽ ho jarkrar pix kaxyw. Nê mẽ harênh o: “E mũjti pumu. Na hte apkati mẽ ã Tirtÿm mã amnhĩ jarênh anê. Kot amnhĩ to mex xwÿnh mãn.” Anhÿr ã harênh kaxyw. Tã ra mẽ piitã mẽ kot ja hã omunh nê amnhĩm mex ã ho jarkrar jakamã koja Tirtÿm axte ja hã tanhmã ho mex to hkêt nê. Ra pika ja kamã mẽ kot mẽ omunh nê mẽ mex ã mẽ harênh kênã. 6No mẽ kajaja. Kêr ka mẽ uràk nê ã amnhĩ nhĩpêx anhÿr kêt nê. ãm Tirtÿm mã amnhĩ jarênh kaxyw nê akwÿjê no hkàx ã hitom wÿr agjê nê hitom kãm ahte kãm amnhĩ jarê. Hãmri nhũm Tirtÿm tapxipix ja hã mẽ apumu. Mẽ amã amnhĩ to amnhĩrit kêt tã mẽ apumu. Hãmri nê mẽ ato mex nê.

7—Nê mẽ kêp Tirtÿm kra hkêt xwÿnhjaja na htem sãnti mã amnhĩ jarênh kaxyw nê xatã kãm amnhĩ jarê. Nê xatã kàx pêê kãm amnhĩ jarê. Nê hamaxpêr o: “Kot paj xatã sãnti mã amnhĩ jarê nhũm inhmar japêr.” Anhÿr o hamaxpêr jakamã xatã kãm amnhĩ jarê. No ãm htÿx ã hamaxpêr anhÿr kaprÿ. 8Jakamã kwa kêr ka mẽ ho mẽ uràk kêt nê. Tirtÿm ra kot mẽ ate mẽmoj tã hwÿr xàta ra ja kukamã kot omunh mex kênã kot ka kêt mẽ xatã hã hwÿr o akuhê.

9—Nê kêr ka mẽ kãm amnhĩ jarênh kaxyw nê amnhĩ krã hkõt tanhmã kãm amnhĩ jarênh to rÿ kãm amnhĩ jarênh o:

Pa Měinhîpêxà maati pê kaxkwa kamã ri apa xwÿnh? Amex o amex Tîrtûm.

10 Apê mẽ ijamãr mex xwÿnh maati na ka.

Na hte kaxkwa kamã mẽ kot ri amã tanhmã amnhî nhîpêx to ho mẽ pa xwÿnhjaja akôt pix mã amnhî nhîpêx o ri pa. Tã ijaxwÿja inhmã mẽ uràk nê akôt pix mã amnhî nhîpêx o ri ixpa hprãm.

11 Nê kwa jarãhã mẽ inhmã mẽmoj gô pa mẽ akukwak ri ho apku.

12 Na pa hte tôhã amnhî tomnuj nê Tîrtûm. Nom mẽ kot tanhmã ixtomnuj to xwÿnhjaja na pa hte ãm mẽ omu nê amnhî tã tanhmã mẽ ho hkêt nê. Nê ja ho ijamakêtkati nê axte kãm ijamaxpêr kêt nê. ã ixte amnhî nhîpêx anhÿr jakamã kwa ja hã ixpumu nê ixpyrà nê ixte tanhmã amnhî tomnuj to hã ixpumu nê hã tanhmã ixto hkêt nê. ãm ho ajamakêtkati kurê kumrêx nê axte kãm ajamaxpêr kêt nê.

13 Nê kot paj nhÿrmã tanhmã amnhî tomnuj to kaxyw ka ja hã ixpumu nê ixte ã amnhî nhîpêx anhÿrja nê ixto htÿx nê pa tanhmã amnhî tomnuj to hkêt nê. ãm mẽmoj punuj pê ixpytâr rãhã ho apa Tîrtûm. Tã ãm ja pix na hapêx. Anê.

—E kêr ka mẽ ã Tîrtûm mã amnhî jarênh anê. Anê.

14—Nê koja mẽhõ tanhmã anhîpêx to htã ka ho ajamakêtkati nê axte kãm ajamaxpêr pix o ri apa hkêt nê. Hã koja kaxkwa kamã Měpahpãm maatija ja hã apumu nê apyrà nê tanhmã ate amnhî tomnuj to ho hamakêtkati nê axte kãm hamaxpêr kêt nê. 15Nom kot kaj mẽ ã amnhî nhîpêx anhÿr kêt nê. Nê tanhmã mẽ kot mẽ atota ã anohtÿx rãhã ho apa hãmri nhÿm Měpahpãm maatija mẽ apyrà nê mẽ ate tanhmã amnhî tomnuj to ho hamakêtkati hkêt nê. ãm hã nohtÿx rãhã ho pa ho pa. Anê.

Tanhmã mẽ pahte Tîrtûm mã mex o mex ã harênh to

Rukre 18.11-12

16Nhÿm Jejus arî mẽ kãm kapêr nê mẽ kãm:

—Nê mẽ kot amnhî to jarkrar xwÿnhjaja na htem Tîrtûm mã amnhî jarênh kaxyw hãmri nê tôhã ho apkur kêt rãhã kãm amnhî jarênh jakamã hkuk kaprî nê hkwyjê hkôt pa. Tã mo kaxyw na htem ã mẽ noo mã amnhî nhîpêx anê? ãm mẽ apkur kêt rãhã Tîrtûm mã amnhî jarênh ã mẽ omunh pix kaxyw. Tã ra jar pika ja kamã mẽ kot ja hã mẽ omunh jakamã koja Tîrtûm nhÿrmã ja hã tanhmã mẽ ho mex to hkêt nê. Jakamã kwa kêr ka mẽ ho mẽ uràk kêt nê. 17Kêr ka mẽ tôhã Tîrtûm mã amnhî jarênh ryy kaxyw axàpkur kaga hãmri nê amnhî krã kahõ nê amnhî jaxwÿr mux nê akuk kînh nê ri akwyjê hkôt apa. 18Hãmri nê nhÿri mẽ hkàx ã ahte kãm amnhî jarê nê kãm mex o mex ã harê. Kot kaj mẽ ã mẽ hkàx ã amnhî nhîpêx anê nhÿm mẽ akwyjaja mẽ axàpkur kaga hã mẽ

apumunh kêt nê. Nhũm Tĩrtũm pix ja hã mẽ apumu. Hãmri nê nhỹrmã ja hã mẽ ato mex nê. Anê.

Kaxkwa kamã mẽmoj mex

Rukre 12.33-34; mǎǎnĕn Sikũn Ximotre 4.8; Wam Pĕtre 1.4; Eprĕw 10.34

19Nhũm Jejus arĩ mẽ kǎm kapĕr nê mẽ kǎm:

—Nê mǎǎnĕn ja. Kĕr ka mẽ jar pika ja kamã akukrĕx rũnh o apa hkĕt nê. Kĕt jar mẽ hikukrĕx koja kritpĕm mex kĕt nê. Kot kaj mẽ ho akuprŏ nhũm amnhŏre apĕ homnu rỹ paratre apĕ homnu. Nê kǎx o mẽ akukrĕx nhũm haxwỹja apĕ omnu rỹ nhũm mĕhŏ apĕ hkwỹ ho ahkĩ. **20**Jakamã kĕr ka mẽ akukrĕx rũnh o apa hkĕt nê. Kaxkwa kamã Tĩrtũm kot mẽ akutĕp mẽ akukrĕx o pikuprŏnhja na kĕt mex kumrĕx o jar mẽ hikukrĕx jakrenh par. Jakamã kĕr ka mẽ amã nhỹrmã kaxkwa kamã akukrĕx mex prǎm xǎj tǎm mẽ piitǎ tǎm mẽ hipĕx nê mẽ ho mex o ri apa. Nê mẽ kamã axukaprĩ nê. Nê Tĩrtũm kŏt ri amnhĩ nhĩpĕx mex nê. Hãmri nhũm ǎ mẽ ate amnhĩ nhĩpĕx anhỹr ǎ mẽ apumu nê mẽ akutĕp mẽ amã mẽmoj mex kwỹ jaxwỹ. Kaxkwa kamã mo amnhŏre nê mo paratre? Nê kamã mo mẽ ahkĩnh xwỹnh? ǎm kamã amrakati kumrĕx. **21**Kot kaj mẽ jar akukrĕx rũnh hãmri nê ǎm tanhmã apĕ homnu hto pix kukamã ajamaxpĕr. Nom kot kaj mẽ apĕ Tĩrtũm kra hã kaxkwa kamã akukrĕx mǎ ajamaxpĕr rǎhã ho ra akĩnh nê ri apa.

22—Nê kot kaj mẽ ixkapĕr ma nê ixkŏt amnhĩ nhĩpĕx hãmri nê tǎm amnhĩ nhĩpĕx. Nê tǎm axpĕn hipĕx. Jao te hirã kamã arĩt mex pyrǎk o amnhĩ nhĩpĕx. **23**No koja mĕhŏ ixkapĕr ma nê ǎm kuma nê ixkwỹm ri amnhĩ nhĩpĕx o pa. Hãmri nê te kamǎt kŏ kamã mĕhŏ rĩt mex kĕt kot amnhĩ nhĩpĕx pyrǎk o amnhĩ nhĩpĕx. E kĕr ka mẽ ǎ amnhĩ nhĩpĕx anhỹr pymaj ixkapĕr ma nê kǎm ajamaxpĕr tỹx rǎhã ho ri apa.

24—Nê kot kaj apyxi nê anhŏ patrǎw hamĕxkrut hãmri nê arĩgro pyxi hã hamĕ wa kǎm axǎpĕnh o amỹkry hkĕt nê. Kot kaj anĕ nê hŏ gryk ǎ ihŏ kaga. Ja pyrǎ nê kot kaj mẽ jar akǎxpore nê akukrĕx pix mǎ ajamaxpĕr nê amã hapĕ ho akwỹjĕ pĕ ho anhŏxỹ ho ri apa. Nê gryk ǎ Tĩrtũm kǎm hprǎm xǎ hkŏt tanhmã ho mẽ ho mex to hkĕt nê. Jakamã kwa kĕr ka mẽ Tĩrtũm pix mǎ mǎn ajamaxpĕr rǎhã nê. Jao akǎxpore nê akukrĕx pix kukamã ajamaxpĕr o ri apa hkĕt nê. Anê.

Mĕ pahte tee ri amnhĩ kukamã pajamaxpĕr kĕt ǎ mẽ pamã karŏ

Rukre 12.22-31; mǎǎnĕn Piripos 4.6; Wam Pĕtre 5.7

25Nhũm Jejus arĩ mẽ kǎm kapĕr nê mẽ kǎm:

—E. Kwa kĕr ka mẽ tee ri mẽmoj tǎ amnhĩ kukamã ajamaxpĕr kĕt nê. Tanhmǎn axǎpkur xǎ rỹ axĕ ka mẽ tee ri hkukamã ajamaxpĕr kĕt nê. Mĕmoj piitǎ hkukamã tee ri ajamaxpĕr o ri apa hkĕt nê. Tĩrtũmja ǎhpumunh tỹx o ǎhpumunh tỹx xwỹnh na. Na pre ǎhpumunh tỹx o mẽ

anhîpêx ka mẽ kukwak ri atîr nê apa. Jakamã xà kot mẽ amã mẽ anhõ ho pa kaxyw àhpumunh kêt? Nà ja kaxyw àhpumunh tỳx kênã. Kêp mẽ anhîpêx xwỳnh jakamã mãânên kêp mẽ amã mẽ anhõ xwỳnh. Nê kêp mẽ amã mẽ axê nhõr xwỳnh.

26—Mãn ka htem kuwênhre pumu. Na hte tee ri amnhĩ xàpkur xà hkukamã hamaxpêr o hkaprĩ nê ri pa hkêt nê. Mẽ anhîpêxà maati tãm na hte kãm õ ho pa. Tã kãm mẽ ajapê htỳx o kot kuwênhre jakrenh jakamã koja uràk nê mẽ amã mẽ anhõ rãhã ho pa.

27—Nê xà kot kaj mẽ kritpêm atîr prãm xàj ja pix kukamã ajamaxpêr rãhã nê ra ajamaxpêr kôt kritpêm atîr nê apa? Nà kot kaj mẽ anhỳr kêt nê.

28—Mãn ka htem akunĩ kamã pixôrà pumu. Na hte tee ri tanhmã kute hkukamã hamaxpêr o ra hkaprĩ nê harir kêt nê. 29Tã nom muxre nê harir ka mẽ omu. Te ho amnepêm pahilti Sarumãw xê mex pyràk nom mex o hakre. 30Pixôràreja koja mẽmo arĩgro hã htîr nê mux nê harir tã mẽmo arĩgro hã ra grà pa nê hapêx. Kêp pixôrà pix nê hapêx tokyx anhỳr tã nhũm Tirtũm ho mex nê nhũm mux nê harir. No mẽ kajaja na hte mẽ ato mex o pixôrà ho mexta jakre. Jakamã kwa mẽmo kaxyw kot ka kêt mẽ tee ri amnhĩ xê hkukamã ajamaxpêr o ri akaprĩ nê apa? Kot kaj mẽ ã ajamaxpêr anhỳr jao kormã amnhĩ kaxyw Tirtũm mã ajamaxpêr tỳx kêt nê.

31—Kwa mẽ tee ri axàpkur xà hkukamã ajamaxpêr o ri akaprĩ hkêt nê. Nê tee ri amnhĩ kukamã tanhmã ajamaxpêr to ho ri akaprĩ hkêt nê. 32Mẽ kot Tirtũm kôt amnhĩ xunhwỳr kêt xwỳnhjaja na htem ã ri hamaxpêr anhỳr o pa. Tã nom kêr ka mẽ ho mẽ uràk kêt nê. Tirtũm ra kot mẽ panhõ mẽmoj kêt kôt mẽ pahpumunh mex kênã. 33Jakamã kêr ka mẽ hkôt ri tanhmã amnhĩ nhîpêx to rãhã ho ri apa. Nê amã ja pix tãnopxar prãm. Hãmri nhũm Tirtũm amnhĩ tã mẽ apumu nê apkati mẽ mẽ amã mẽmoj nhõr o pa.

34—Jakamã kwa kêr ka mẽ tee ri amnhĩ kukamã ajamaxpêr o akaprĩ nê apa hkêt nê. Tirtũm kot apkati mẽ mẽ pajamãr mex jakamã kêr ka mẽ jarãhã amnhĩ kukamã apkati mẽ ajamaxpêr kêt nê. Kê apkati mãn. ãm jarãhã pix mã mãn mẽ ate tanhmã amnhĩ nhîpêx tota kukamã ajamaxpêr. Tirtũm kot mẽ pahpumunh mex o pa rãhã kênã. Anê.

Mẽ pahte axpên to pakapêr punuj kêt ã kot mẽ pamã karõ

Rukre 6.37-38, 6.41-42; mãânên Rõmãn 2.1-3; Wam Korõt 4.5; Xiakre 4.11-12

7 1Nhũm Jejus arĩ mẽ kãm kapêr nê mẽ kãm:
—Nê kêr ka mẽ atỳx ri amnhĩ krã hkôt tanhmã akwỳjê hõ kot amnhĩ tomnuj to hã harênh kêt nê. Kot kaj mẽ ã harênh anê nhũm Tirtũm ja hã mẽ apumu nê mẽ kajaja ã mẽ ajarênh anê. 2Na hte tanhmã mẽ pahte axpên nhîpêx to hã mẽ pahpumunh kôt tanhmã mẽ panhîpêx to. 3-5Jakamã kwa kêr ka mẽ mẽhõ kot tanhmã amnhĩ tomnuj to hã omu

hāmri nê hã kãm kapêr tokyx anhÿr kêt nê. Akumrêx ate tanhmã amnhĩ tomnuj to hã amnhĩ pumu nê hkaga hāmri nê rĩ kormã ate mêmoj tã omunh xwÿnhhta wÿr tẽ nê hã tanhmã kãm akapêr to. Kêr ka mẽ ã amnhĩ nhĩpêx anhÿr o ri apa.

—Nê xà koja mẽ akwÿjê hõ tanhmã amnhĩ tomnuj to grire. Ka ate amnhĩ tomnuj tÿx o hakrenh tã ã kot amnhĩ nhĩpêx anhÿr ã omu nê hã kãm akir nhũm amã ja mex nê nà? Nà koja amã ja mex kêt nê. Kot ka akumrêx ate tanhmã amnhĩ tomnuj tota kaga hāmri nê rĩ kormã anhĩo tanhmã kot amnhĩ tomnuj to gireta nê kãm akapêr nhũm ja amã mex nê.

6—Nê xà na htem mẽ apkur xà mex jamÿ nê rop mã kurê? Nà na htem anhÿr kêt nê. Ja pyrã nê kêr ka mẽ kot Tirtũm kaga xwÿnhjê mã kapêr jarênh o ri apa hkêt nê. Anê.

Mê pahte mêmoj to presija hã amnhĩ to Tirtũm wÿr

Makre 11.24; Rukre 11.5-13; Juãw 14.13-14;

mããnêw Wam Tesarõn 5.17; Xiakre 1.5-8, 4.1-3

7-11Nhũm Jejus arĩ mẽ kãm kapêr nê mẽ kãm:

—Nê xà kot we akraja kãm prãm nê tep ã awÿ ka axtem nê kagã hõ py nê kãm agõ? Rÿ nhũm krãhyre gre hã awÿ ka axtem nê makre hõ py nê kãm agõ? Nà na ka htem ã mẽ hipêx anhÿr kêt. Na ka htem kot mêmoj tã mẽ awÿr xà hkõt kãm mêmoj gõ. Mẽ ate amnhĩ tomnuj tã na ka htem akrajê ho mex o ri apa. Tã kaxkwa kamã Tirtũmja na hte mẽ ato mex o mẽ ate mẽ akrajê ho mex jakrenh. Kãm mẽ ajapê htÿx kõt na hte mẽ amã mêmoj mex nhõr o pa. Jakamã kot ka mẽ mêmoj tã awÿ nhũm mẽ ama nê mẽ ate mêmoj tã hwÿr xàta kõt amã kugõ. ãm xatã mẽ ate hã axàhwÿr o ri apaja nhũm mẽ amã hprãm xwÿnhhta gõ. ãm mêmoj tã hwÿr rãhã ho ri apa nhũm mẽ ama nê mẽ amã mêmoj tanhmã hipêx to. Te ho mêmõ kãm tep xành nê teprênhxà hpyr nê xatã gõx kãm rênh o ãm pyrã nê xatã mêmoj tã awÿ. Hāmri nhũm mẽ ama nê mẽ amã hprãm xwÿnhhta gõ. Te tep kanhêr xwÿnhhta jatã kot tep kanhêr pyrãk. Jao mẽ amã mêmoj prãm xwÿnhhta gõ.

12—Nê mẽ piitã mẽ kot tãm mẽ anhĩpêxja na mẽ amã hprãm. Tã kêr ka mẽ amnhĩ pyrã nê tãm mẽ piitã mẽ hipêx o ri apa. Mẽ kot tãm mẽ anhĩpêx kêt tã kêr ka mẽ axãmnhĩx mẽ kêp anhõxÿ hkêt nê tãm mẽ hipêx. Kot kaj mẽ ã axpên nhĩpêx anê nê finat Mojes mẽ Tirtũm nhÿ hã mẽ kapêr o mẽ pa xwÿnhjê xujarênh xà hkõt axpên nhĩpêx mex o ri apa. Anê.

Pry pijakrut jarênh

Rukre 13.24; mããnêw Piripos 3.19-21

13-14Nhũm Jejus arĩ mẽ kãm kapêr nê mẽ kãm:

—Tirtũm kapêrja mẽ kêp hihtÿx jakamã na htem ohtô nê hkõt amnhĩ xunhwÿr kêt nê. Na htem ãm hpÿnhre nê hkõt amnhĩ xunhwÿr nê hkõt

amnhĩ nhĩpêx. Jakamã te Tirtũm nhõ krĩ hwỳr pry grireta ã hpÿnhre nẽ pa pyræk. No nhũm Satanasti hkõt mẽ kot amnhĩ xunhwỳr xwỳnhjaja na htem Satanasti kõt pix mã tanhmã amnhĩ tomnuj to hprãm. Mẽ kãm mex jakamã nhũm mẽ amnhĩ nhĩpêx o te pry krepak rax ã axpẽn kõt mẽ ohtõ nẽ pa pyræk o amnhĩ nhĩpêx. Axtem kuwy hwỳr pry krepakja nõr tã nhũm mẽ htỳx kuwyja wỳr amnhĩ to pa. Jakamã Tirtũm kapêrja mẽ apê hihtỳx tã kêr ka mẽ mãmri hkõt amnhĩ xunhwỳ. Jao Tirtũm nhõ krĩ hwỳr pry grireta ã mãn apa. Anẽ.

Mẽ kot amnhĩ to hêx xwỳnhjê jarênh

Rukre 6.43-44; mãănẽn Xiakre 3.9-12; Wam Juãw 3.10, 4.4-6

15Nhũm Jejus arĩ mẽ kãm kapêr nẽ mẽ kãm:

—E kwa mẽ o kora. Mẽ akwỳjaja kot kêp Tirtũm nhỹ hã kapêr jarênh xwỳnh ã amnhĩ jarênh tã na htem ja hã amnhĩ to hêx. Nhũm htem kãm mẽ kapêr mar prãm nẽ. Te mẽ kapêr mex pyræk tã no nhũm htem ãm mẽ kãm amnhĩ to hêx pix o ri mẽ hkõt pa. Mẽ kot mar nẽ axtem nẽ Tirtũm kapêr kwỳm tanhmã amnhĩ nhĩpêx to kaxyw nhũm htem hêx rom tanhmã mẽ kãm kapêr to. Jakamã kwa mẽ o kora. Mẽ axkãm ajamak rom nẽ amnhĩ nẽ mẽ omunh mex nẽ. 16Kêr ka aprĩ hã mẽ piitã mẽ kot tanhmã amnhĩ nhĩpêx to hã mẽ omu nẽ rĩ kormã tanhmã mẽ harênh to. Mẽ hamaxpêr punuj xwỳnhjaja kêp Tirtũm nhỹ hã kapêr jarênh xwỳnh kêt. No koja mẽ tãm hamaxpêr nẽ tãm amnhĩ nhĩpêx ka ja hã mẽ omu nẽ mẽ kêp Tirtũm nhỹ hã kapêr jarênh xwỳnh ã mẽ omunh kurê kumrêx. Na htem hprĩ hã mẽ kot tanhmã amnhĩ nhĩpêx to ho pa hã mẽ omu nẽ rĩ kormã tanhmã mẽ harênh to. 17Na htem hamaxpêr punuj hãmri nẽ hkõt tanhmã amnhĩ tomnuj to. Nom koja mẽhõ hamaxpêr mex nẽ hãmri nẽ hkõt tãm amnhĩ nhĩpêx mex o pa. 18Na htem tanhmã hamaxpêr to xà hkõt tanhmã amnhĩ nhĩpêx to ho pa.

19—Nẽ koja mẽhõ õ pĩ hpàr ô hkêt japêr nhũm tee ri omu hãmri nẽ krãhta nẽ kuwym kumẽ. Ja pyrã nẽ koja mẽhõ tanhmã amnhĩ tomnuj to ho pa nhũm Tirtũm tee ri ja hã omu hãmri nẽ ã kot amnhĩ nhĩpêx anhỳr o paja mỳrapê kuwy hwỳr kumẽ. 20Jakamã kot kaj mẽ tanhmã mẽ kot amnhĩ nhĩpêx to ho pa hã akwỳjê pumu nẽ ra aprĩ hã tanhmã mẽ kute hã mẽ omunh kurê kumrêx. Mẽ kêp Tirtũm nhỹ hã kapêr xwỳnh ã mẽ omu rỳ mẽ kêp hkwỳm ri kapêr xwỳnh ã mẽ omu. Anẽ.

Mẽ kot Tirtũm nhõ krĩ hwỳr gjêx mã xwỳnhjê jarênh

Rukre 13.25-27; mãănẽn Sikũn Korĩt 13.5; Wam Juãw 2.3-6

21-23Nhũm Jejus arĩ mẽ kãm kapêr nẽ mẽ kãm:

—Nẽ Inhĩpêxã Tirtũm mẽ wa inhõ krĩja wỳr koja mẽ piitã gjêx kêt nẽ. ãm mẽ kot kapêr kõt amnhĩ nhĩpêx o mẽ pa xwỳnh pixjaja koja mẽ

nhÿrmã ma hwÿr agjê. Na hte mẽ hkwÿjaja ixto “Pahihti” anhÿr ã ijarênh tâ no âm ixkôt ri amnhÿ nhÿpêx kêt nê. Jakamã koja mẽ nhÿrmã wa inhô krÿ hwÿr àpir kêt nê. Kot paj nhÿrmã mẽ piitã mẽ htÿr ri tanhmã mẽ kot amnhÿ nhÿpêx to ho pa hã mẽ omunh xà hkôt tanhmã mẽ harênh to. Mẽ mex ã mẽ hkwÿjê jarê nê mẽ kot amnhÿ tomnuj ã mẽ hkwÿjê jarê. Hãmri nhÿm mẽ hkwÿ kot ixkôt amnhÿ nhÿpêx o pa hkêt xwÿnhjaja kuwyta wÿr ma pa pymaj tee ri amnhÿ kukamã hamaxpêr hãmri nê tanhmã inhmã amnhÿ jarênh to nê inhmã: “Kwa Jejus. Xà ate ixpumunh kêt? Na pa pre amnepêm ixtÿr ri pikap ixpare ri anhÿ hã aa mẽ kot mẽmoj pumunh kêt kwÿ ho anhÿr rax nê. Nê ixkwÿjê nê mẽkarômnuti jano nê mẽ kãm akapêr jarênh o ri ixpa. Kwa xà ate ja hã ixpumunh kêt?” Anhÿr o inhmã amnhÿ jarê.

—Nom mẽ htÿr ri ã mẽ kot amnhÿ nhÿpêx anhÿr o pa htã ixkapêr kôt amnhÿ nhÿpêx kêt jakamã kot paj mẽ kuma nê âm mẽ kuma nê amnhÿ nê mẽ hano nê mẽ kãm: “Tk kwa mẽ ma mra. Mẽ apê ixkwÿ hkêt. Mẽ ate ixkôt amnhÿ nhÿpêx o apare hã. Âm mẽ ate amnhÿ tomnuj xwÿnh na ka mẽ. E mẽ ma kuwy hwÿr amrar kurê kumrêx.” Anhÿr o kot paj amnhÿ nê mẽ hano. Hãmri nhÿm mẽ kot ixkôt amnhÿ nhÿpêx o mẽ pa xwÿnh pixjaja ma Tÿrtùm mẽ wa inhô krÿ hwÿr gjêx pa. Anê.

Ixkre pijakrut jarênh

Rukre 6.46-49; mãänêñ Xiakre 1.22-25; Wam Juãw 2.3-6

24Nhÿm Jejus arÿ mẽ kãm kapêr nê mẽ kãm:

—E kot paj mẽ amã awjarê ka mẽ ixujarênh ma. Nà mẽ kot ixkapêr mar nê hkôt amnhÿ nhÿpêx o mẽ pa xwÿnhjaja te mẽ kot ixujarênh ja pyræk. Mẽ kot amnhÿ nhÿpêx o te mẽhõ kot amnhÿ kukamã hamaxpêr mex nê aptÿx kãm amnhÿm òrkwÿ nhÿpêxja pyræk. **25**Koja mẽhõ aptÿx kãm amnhÿm hipêx nhÿm mẽmo arÿgro hã na wrÿk rax nê gô htàm rax nê hanhi no nhÿm arÿ âm tÿx nê xa. Tã kot kaj mẽ ixkôt amnhÿ nhÿpêx o ri apa hã kot kaj mẽ te ixkre ja pyræk. Jao amex nê ajamakêtkati nê ri apa. Te ho gô htàm kot ixkre janhir nhÿm arÿ âm tÿxta pyræk.

26-27—No mẽ kot ixkapêr mar nê âm mar xwÿnhjaja. Te mẽ kot mẽhõ kot amnhÿ kukamã hamaxpêr mex kêt nê htÿx mõi nê gô mÿri gwy rerek kãm amnhÿm òrkwÿ nhÿpêx pyræk. Koja mẽmo arÿgro hã òrkwÿ hã kòk xàpêr tÿx nê na wrÿk rax nê. Nê gô htàm nê hanhi nê kêp grành pa. Jakamã koja mẽhõ ixkôt amnhÿ nhÿpêx kêt nê te kot ã kot amnhÿ nhÿpêx anhÿr xwÿnhhta pyræk. Jakamã kwa mẽ ixkapêr mar tÿx nê hkôt amnhÿ nhÿpêx rãhã ho ri apa. Te mẽhõ aptÿx kãm òrkwÿ xãm xwÿnhhta pyræk. Anê.

28Nhÿm pre Jejusja ã mẽ kãm ujarênh ry anê nhÿm mẽ amnhÿ jaêr pê kot tanhmã mẽ ahkre htoja mar o hkrÿ. **29**Hãmri nê axpên mã harênh o:

—Hêxta waa nê. Âm hāmri na ã mẽ pamã kapêr anê. Àhpumunh tỳx kôt na hte âm hāmri tanhmã mẽ pamã ujarênh to. Pêr âm Tĩrtũm kapêr tũm o mẽ ahkre xwỳnhjê kurom àhpumunh tỳx kumrêx. Anê.

Kà nhy hkro xàpêr o pa xwỳnh jarênh

Makre 1.40-45; Rukre 5.12-16

8 1Tã nhũm Jejus mẽ kãm kapêr pa hāmri nê hixêt prêêta rũm akupỳn wrỳ nê ma tẽ nhũm mẽ ohtô nê ma hkôt mra. 2Hāmri nhũm mẽhõ my hkà nhy hkro xàpêr o pa xwỳnhja omu nê hwỳr tẽ. Hāmri nê kutã hkõnkrã ho tẽm nê hipô nê nhỹ nê amnhĩ to kuwỳ nê kãm:

—Pa Pahihti. E ot pa awỳr amnhĩ to tẽ. Akupỳm ate mẽ ixto mex kaxyw axàhpumunh tỳx jakamã kot ka amã akupỳm ixto mex prãm nê māmri ixto mex. Anê.

3Hāmri nhũm Jejus kuma nê hkà punuti hã ìhkra xi. Amnhĩ kamã kahak kêt nê hã ìhkra xi nê kãm:

—Nà kot paj ato mex. E akupỳm akà mex. Anê.

Hāmri nhũm hkà akupỳm mex kurê kumrêx. 4Hāmri nhũm Jejus kãm:

—E kêr ka amnhĩ tã mẽ kãm tanhmã ijarênh to hkêt rãhã ma patre hwỳr tẽ kê akupỳm akà mex ã apumu. Hāmri ka hpãnhã amnepêm finat Mojes kot mẽ ate akupỳm amex ã Tĩrtũm mã tanhmã amnhĩ nhĩpêx to hã karõta ka kãm ho anê. Kê mẽ piitã akupỳm akà mex ã apumu. Anê.

Pôristi krãhtũm mã àpênh xwỳnh jarênh

Rukre 7.1-10

5Tã nhũm Jejus ma krĩ pê Kapanaũ hwỳr mō. Hāmri nê hwỳr pōj nhũm Rõm nhõ xwỳnh pê pôristi krãhtũmja omu nê hwỳr tẽ. Kêp Ijaew kêt tã hwỳr tẽ. Na pre kãm àpênh xwỳnh kêp à htỳx nê nõ nhũm omu nê tee ri hkukamã hamaxpêr. Hāmri nê Jejus ra õ krĩ hwỳr hpõx ã omu nê hwỳr tẽ nê kãm harê nê kãm:

6—Pa Jejus? E ot pa awỳr tẽ. Inhmã àpênh xwỳnhja na ixpê à htỳx nê. Ra ì kamã htyk pa nê nõ. O mũj inhõrkwỳ kamã nõ. Anê.

7Nhũm Jejus kuma nê kãm:

—Tỳ? Tôe. Nà pa ma akôt tẽ nê akupỳm amã ho mex. Anê.

8-9Hāmri nhũm tee ri kuma nê kãm:

—Kwa akĩnhã ixpê Ijaew kêt jakamã ixte amnhĩ kuk ã ixpijaàm. Âm ja rũm mãn akapêr pix o akupỳm inhmã ho mex nà? Ixpê mẽ hkrãhtũm na pa hte inhõ pôristi mã mẽmoj tã karõ nhũm mẽ inhmar xà hkôt inhmã mẽmoj tanhmã ho. Na pa hte mẽ kãm: “E mẽ ma mra nê ã amnhĩ nhĩpêx anê.” Anê nhũm htem inhma nê ma mrar kurê kumrêx. Rỳ pa mẽ kãm: “E mẽ amnê ixwỳr mra nê ã amnhĩ nhĩpêx anê.” Anê nhũm mẽ inhma nê ixwỳr mra. No kêt ixrom axàhpumunh

tỳx kôt na ka hte mẽ àja mã akapêr nhũm ama nê mẽ kêp hapôx nê ma mrrar kurê kumrêx. Jakamã kwa âm ja rũm akapêr pix o akupỹm inhmã ho mex nà? Anê.

10Hãmri nhũm Jejus amnhĩ jaêr pê kot kãm ã kapêr anhỹrta ma nê hkĩnh nê. Hãmri nê hã hkôt ri mẽ môr xwỳnhjê mã kãm:

—Kwa xà na ka mẽmyja kapêr ma? Mẽ pahkĩnh ã kêp Ijaew kêt tâ mẽ arom amnhĩ kaxyw inhmã hamaxpêr tỳx nê. Aa mẽ atô uràk nê ã amnhĩ kaxyw inhmã ajamaxpêr tỳx anhỹr kêt tâ nhũm mẽ arom kãm àpênh xwỳnh kaxyw ã inhmã hamaxpêr tỳx anê. 11Nà koja nhỹrmã mẽ hkwỳjaja kêp Ijaew kêt tâ ohtô nê pika piitã kurũm ma Tĩrtũm mẽ wa inhõ krĩ hwỳr api nê hwỳr agjê. Nê wa ixkuri wa inhõ krĩ kamã Ijaew pàr krax pê Apraãw nê Ijak nê Jako mẽ pimràatã pa ho pa. Mẽ kêp Ijaew kêt tâ mẽ ìhkô hã apkur mex o hkrĩ nhũm Tĩrtũm mẽ ho mex rax o pa. 12No pêr mẽ apê Ijaew kwỳjaja kot kaj mẽ hkôt hwỳr agjêx kêt nê. Tĩrtũm kãm hwỳr mẽ agjêx prãm tâ ka mẽ axtem nê hkaga. Jakamã kot kaj mẽ ma kamàt kô xihtỳx rax wỳr ajapêx nê mẽ kêp awry rax nê mẽ kot amnhĩ xà htỳx kamã hamak tũm xàta kamã apa ho apa. Hãmri nê tee ri mẽ ixwỳr agjêx prãm kaprỳ nê akaprĩ xàj mur nê amnhĩ kamã agryk tỳx nê. No âm tee ri amnhĩ kamã agryk kaprỳ. Mẽ ate Tĩrtũm kapêr kaga nê hkôt amnhĩ xunhwỳr kêt jakamã kot kaj mẽ nhỹrmã ã amnhĩ nhĩpêx anê. Anê.

13Nhũm pre ã Jejusja mẽ kãm kapêr anê. Hãmri nê pôristi krãhtũmta mã kãm:

—E mãmrĩ ma akupỹm tẽ nê amã àpênh xwỳnhnta pumu. Ra ate kaxyw inhmã ajamaxpêr tỳx jakamã na pa ra akupỹm amã ho mex. E akupỹm tẽ nê omu.

Anhỹr o kãm kapêr rôm nhũm ra akupỹm kãm mex kurê kumrêx.

Jejus kot ahpỹnhã mẽ à xwỳnhjê ho mex

Makre 1.29-31; Rukre 4.38-41

14Tã nhũm Jejus ma Simãw Pêtre nhõrkwỹ hwỳr tẽ nê hwỳr axà. Nhũm Simãw Pêtre xupãnhgêx ra à nê hkà kagro htỳx nê nõ. 15Hãmri nhũm Jejus hwỳr axà nê omu nê ìhkra hã kupy nhũm hkà hakry nê akupỹm hihtỳx kurê kumrêx. Jakamã kãnhmã nhỹ nê mẽ kãm mẽõ hã àpênh o ri mra.

16Tã nhũm ra awjakry. Ra kamàtre ho mō nhũm mẽ piitã Jejus wỳr mẽ à xwỳnhjê ho mra. Nê mẽkarōmnuti kot mẽ hwỳr gjêx xwỳnhjaja nhũm mẽ hwỳr mẽ o mra. Hãmri nhũm mẽ omu nê akupỹm mẽ piitã mẽ ho mex. Mẽ à xwỳnhjê ho mex nê mẽ hkwỳjê nê mẽkarōmnuti jano. Âm kapêr pix o mẽ nê mẽ hano nhũm mẽ kêp hapôj nê ma hapêx. 17Na pre ra Tĩrtũm nhỹ hã kapêr xwỳnh finat Ijaisja ã amnhĩ nhĩpêx anhỹrja kukamã amnepêem mẽ kãm harênh o:

Tirtûm kot mẽ pahwÿr mẽnh mã xwÿnhja koja nhÿrmã wrÿ nẽ mẽ panê mẽ paxã piitã rênh pa nẽ akupÿm mẽ pahto mex pa. Anẽ.

Na pre ã finat Ijaisja Jejus kukamã harênh anẽ. Tã nhÿm wrÿ nẽ kot harênh xà hkôt ã amnhĩ nhĩpêx anhÿr o pa.

Wa kãm Jejus kôt amnhĩ xãm prãm xwÿnh wa harênh

Rukre 9.57-62

18Tã nhÿm Jejus amnhĩ pu hã rît nẽ tee ri hwÿr mẽ mrar xwÿnhjê pumu hãmri nẽ hkôt mẽ pa ho mẽ pa xwÿnhjê mã kãm:

—E ma pu mẽ pàr mã agjê nẽ ma xarmã mō. Anẽ.

19Hãmri nhÿm mẽ nojarêr rôm nhÿm Tirtûm kapêr tûm o mẽ ahkre xwÿnhjê hō Jejus wÿr tẽ nẽ kãm:

—Pa mẽ ijahkre xwÿnh? E pa ma akôt ri ixpa ho ixpa nà. Anẽ.

20Hãmri nhÿm kuma nẽ kãm:

—Ko ka mã. Kam nẽ rĩ ma ixkôt ri apa. Nom kêr ka inhmar kumrêx. Xore na hte pika hkre kamã hikwÿ. Nẽ kuwênhre pĩ nhĩmōk ã hikwÿ. No pa ixpê Tirtûm kot mẽ awÿr inhmênh xwÿnh tã mry hkĩnhã inhōrkwÿ hkêt. Na pa hte amarĩ nhãm krĩ hwÿr ixpa nẽ nhãm hō hwÿr ixpa. Tã xà kot ka ixpyrà nẽ ã amnhĩ nhĩpêx anhÿr o ri apa nà? Anẽ.

21Hãmri nhÿm pãnhã hōja hwÿr tẽ. Ra mẽ kot hkôt amnhĩ xunhwÿr xwÿnhjê hōja hwÿr tẽ nẽ kãm:

—Pa Pahihti. E pa amã amnhĩ jarê ka inhma. Kot paj ma akôt ixpa ho ixpa no ãm kormã. Koja nhÿrmã inhĩpêêxã tanhmã amnhĩ to nẽ ty mãn. Pa haxã hãmri nẽ rĩ kormã ma akôt ixpa ho ixpa. Anẽ.

22Hãmri nhÿm kuma nẽ kãm:

—Kwa nà ri ã ajamaxpêr anhÿr kêt nẽ. Ma ixkôt apa ho apa kurê kumrêx. Kê mẽmoj inhnê ano kupyrr rÿ apê àmnàr kêt nẽ. Kwãr mẽ htĩr tûm nẽ mẽ pa hkêt mã xwÿnhjaja mãn axwakre kamã amã anhĩpêêxã jamãr o pa nẽ haxã. Anẽ.

Jejus kot kôk o pinhkrênh jarênh

Makre 4.35-41; Rukre 8.22-25

23Tã nhÿm mẽ ra xarmã nojarêr nhÿm Jejus mẽ hkôt mẽ pa ho mẽ pa xwÿnhjaja pàr wÿr agjê hãmri nẽ himô raxja ã ma xarmã mō.

24Hãmri nhÿm Jejus ra ôtxwa nẽ ra gôr nẽ nō. Puh nhÿm naja hkoko ho mō nẽ kôk xapêr tÿx kumrêx. Nhÿm gô kànhmã harĩ nẽ axpên tak tÿx nẽ. Xatã axpên tak nẽ pàr kre kamã axkapĩ nhÿm ra àr o mō. Hãmri nhÿm mẽ tee ri omu nẽ kãm ma htÿx kumrêx. Nẽ tee ri amnhĩ nhĩpêx. No nhÿm Jejusja htÿx gôr nẽ nō. 25Hãmri nhÿm mẽ hwÿr hprôt nẽ kumra nẽ kãm:

—Kwa Pahihti. Kot puj mē jarāhã pahtyk pa. Kwa tokyx kànhmã nhỹ nē ri tanhmã amnhĩ nhĩpêx to wehe. Anē.

26Hāmri nhũm hkrākato nē kànhmã nhỹ nē kôk mã kapêr nē kãm:

—E kwa hāmri anhĩkrê. Anē.

Puh nhũm hpinhkrênh pa nhũm gôja tãm nôr kurê kumrêx. Hāmri nhũm Jejusja hkôt mē pa ho mē pa xwýnhjê hwýr apkjê nē mē kãm:

—Hêxta waa nē. Kwa pēr âm kormã te mē ate amnhĩ kaxyw Tĩrtũm mē wa inhmã ajamaxpêr tỳx kêt pyrāk. Hã na ka mē amã ma xaj tee ri amnhĩ kukamã ajamaxpêr. Anē.

27Hāmri nhũm mē amnhĩ jaêr pê ã kot amnhĩ nhĩpêx anhỹrja ã omu nē tee ri hamaxpêr nē axpên pumunh pê omunh o kuhê. Hāmri nē axpên mã:

—Kokỹỹ. Pêr Jejus kêp mē panhĩo hkêt. Mē pahtô kot pu we te kot amnhĩ nhĩpêx pyrã nē kôk mã pakapêr nhũm hpinhkrênh kurê kumrêx? Nã Jejusja mē pakurom àhpumunh tỳx o àhpumunh tỳx. Anē.

Jejus kot wa nē mēkarõmnuti janor

Makre 5.1-20; Rukre 8.26-39

28Tã nhũm mē ra himô rax pê Garirejja ã rê nē pika pê Geras wýr pøj nē kamã mō. Hāmri nhũm ra mēhō myja wa hamêxkrut nē mē kutã tē. Ra mēkarõmnuti kot hamē wa hwýr gjêx xwýnhja wa. Mēkarõmnuti xohtô kot tanhmã wa ho jakamã nhũm wa oprê htỳx nē hihtỳx rax nē wa pa. Jakamã nhũm mē piitã kãm wa uma nē amnhĩ nē mē htykjê jagjênh xã hã kên kre kaêx kãm wa kumê nhũm wa kamã pa ho pa. Jakamã nhũm wa Jejus kutã tē nē amnhĩ wýr omu hāmri nē amnhĩ nē tanhmã kãm kapêr to. Nom mēkarõmnuti nhỹ hã àmra kamã kãm kapêr nē kãm:

29—Pa Tĩrtũm Kra Jejus? Mo kaxyw na ka mē ixwýr tē? Kwa tanhmã mē ixto hkêt nē. Ate tanhmã mē ixtomnu hto hã arĩgrota kormã katoore hã. Anē.

30Nhũm ra krĩ nhõ xwýnhjê hkrit hagrô ohtô nē ri mē hpum pa.

31Nhũm mēkarõmnuti mē omu hāmri nē amnhĩ to Jejus wý nē kãm:

—Kwa kot ka jahti wa nē mē ijapôx japêr nē mē kot amnhĩ xã htỳx kamã hamak tũm xàta wýr mē ixrênh kêt nē. Hagrô hkwy mũj wýr mãn mē ixrê pa mē hpãnhã hwýr mãn hagjê nã? Anē.

32Hāmri nhũm mē kuma nē mē kãm:

—Tôe mē tãm mē hwýr mãn mra. Anē.

Hāmri nhũm mē kuma nē myta wa kêp hapøj nē hagrô hwýr mrar kurê kumrêx nē hpãnhã kãm gjêx pa. Hāmri nhũm hagrôta mēkarõmnuti pymaj amýra nē ma hprôt nē himô hã hixêt prêk ã axpum rôrôk nē gôx kãm mrô nē pikaprâr pa. 33Hāmri nhũm hagrô jamâr o ri mē pa xwýnhjaja tee ri omu hāmri nē ma akupým krĩm hprôt nē mē

kãm awjarê. Nê myta wa akupÿm tãm hkrã hã harênh o hprôt. 34Hãmri nhũm krĩ nhõ xwÿnhjaja tee ri mẽ hkrit jarênh ma nê ma piitã Jejus wÿr mra nê hkaxpa. Hãmri nê amnhĩ nê kãm:

—E kwa mẽ ma amrar kurê kumrêx. Anê.

Hãmri nhũm mẽ kuma nê awjanã nê ma akupÿm pan rê.

Ĩ kamã htyk xwÿnh jarênh

Makre 2.1-12; Rukre 5.17-26; Juãw 10.37-38

9 1Nhũm Jejus mẽ hkôt mẽ pa ho mẽ pa xwÿnhjaja awjanã nê ma akupÿm pãr wÿr mra nê gjêx pa nê akupÿm xarmã rê nê akupÿm Jejus nhõ krĩ hwÿr mõi. 2Hãmri nê hwÿr pøj nhũm krĩ nhõ xwÿnh kwÿjaja mẽ omu nê ĩ kamã htyk xwÿnhja mÿ nê Jejus wÿr o tẽ. Nõr xà kamã nõr rãhã nhũm mẽ hã hije nê kumÿ nê hwÿr o tẽ. Hãmri nhũm amnhĩ tã mẽ omu. Ra mẽ kot hkrãmnhwÿta kaxyw kãm hamaxpêr tÿx ã mẽ omu nê ĩ kamã htyk xwÿnhhta mã kapêr nê kãm:

—Pa? Kwa tee ri amnhĩ kukamã ajamaxpêr kêt nê. Na pa ra apê tanhmã ate amnhĩ tomnuj to ho ijapêx pa. Kot paj axte kãm ijamaxpêr kêt nê. Anê.

3Hãmri nhũm Tĩrtũm kapêr tũm o mẽ ahkre xwÿnhjaja tee ri ã kot kãm kapêr anhÿrja ã kuma nê axpên mã:

—Tk. Kwa mẽhõ myti mũj kêp Tĩrtũm kêt tã te ri kot amnhĩ nhĩpêx pyrãk ã amnhĩ nhĩpêx. Tĩrtũm pix na kot mẽ nê mẽ kot amnhĩ tomnuj o hapêx xwÿnh. Anê.

4Hãmri nhũm Jejus amnhĩ tã mẽ kuma nê mẽ kãm:

—Kwa mẽ ã ajamaxpêr anhÿr kêt nê. 5Ixte mẽ nê mẽ kot amnhĩ tomnuj o ijapêx par ã amnhĩ jarênh tã mẽ ate ja kôt ixpumunh kêt jakamã na ka mẽ ja kaxyw ixkôt ajamaxpêr kêt nê. Nom kot paj mẽ anoo mã akupÿm ĩ kamã htyk xwÿnhhta o mex ka mẽ apiitã hã ixpumu hãmri nê ixkôt ajamaxpêr kurê kumrêx. Ixpê Tĩrtũm kot mẽ awÿr inhmênh xwÿnhhta na pa. Ixte mẽ anê mẽ ate amnhĩ tomnuj rênh kaxyw na pre mẽ awÿr inhmê pa mẽ awÿr wrÿ. 6Tã mẽ ate ja hã ixpumunh kaxyw kot paj mẽ anoo mã ja ho mex.

Anhÿr o mẽ kãm amnhĩ jarê hãmri nê ĩ kamã htyk xwÿnhhta mã kãm:

—E kãnhmã xa nê anõr xàta py nê ma akupÿm anhõrkwÿ hwÿr tẽ. Anê.

7Puh nhũm kãnhmã ãm kurê kumrêx nê nõr xà py nê mẽ noo mã kato nê ma akupÿm õrkwÿ hwÿr tẽ. 8Hãmri nhũm mẽ piitã no hapõx rũnh nê omunh o kuhê nê kamã no puma htÿx nê. Nê tee ri omu nê axpên mã:

—Kokÿÿ. Kwa aa mẽ pahte ã mẽhõ kot amnhĩ nhĩpêx anhÿr ã omunh kêt tã jarãhã ja pumu.

Anhÿr o Jejus jarê hãmri nê ÿ hã Tĩrtũm mã mex o mex ã harê.

Jejus kot amnhĩ kôt Matêwre hwỳr

Makre 2.13-17; Rukre 5.27-32

9Tã nhũm Jejus mẽ kêp kato nê hkôt mẽ pa xwỳnhjê mẽ nhũm mẽ ma mỗ. Hãmri nê pa ixpê Matêwre ixpumu. Ixte Rôm kãm mẽ ho amnhĩptàr xwỳnh mã krĩ nhỗ xwỳnhjê pê kàxpore hkwỳ jamỳnh xwỳnh na pa pre. Nom mẽ kot ho tewên kryre htã ixte amnhĩm hkwỳ ho ixàrik prãm xàj na pa pre hte mẽ kãm ho rũnh nê harê. Jakamã nhũm mẽ piitã kãm ixkĩnh kêt nê. Tã pa pre mẽ kêp kàxpore jamỳnh xà hã ixkre kamã mẽ kêp hamỳnh o nhỹ nhũm Jejus mẽ hkwỳjaja ijãnh mra nê ixpumu nê amnhĩ kôt ixwỳ nê inhmã:

—Pa? E axàpênhta kaga nê hpãnhã amnê mẽ ixkôt mãn tẽ nê ixkôt mãn ri apa ho apa. Anê.

Hãmri pa kuma nê ixàpênh kaga nê ma hkôt tẽ. Nê hpãnhã hkôt ixpa ho ixpa.

10Hãmri nê mẽmo arĩgro hã amnhĩ nhõrkwỹ hwỳr Jejus nê hkôt mẽ pa ho pa xwỳnhjaja mẽ ixkràmnhwỳ hkwỳjê hwỳ. Nhũm mẽ piitã mra nê inhõrkwỹ hwỳr agjê nê ixkutã apkur o hkrĩ. Nê ixpyrà nê Rôm nhõ pahi mã mẽ kêp kàxpore hkwỳ jamỳnh xwỳnh kwỳ haxwỳja ixwỳr mra nê mẽ ixkutã apkur o hkrĩ. 11Hãmri nhũm Parijew nhõ xwỳnhjaja mra nê inhõrkwỹ kapem mẽ ixàpkur ã mẽ ixpumu. Nê tee ri mẽ ixkaêx ã Jejus pumu hãmri nê hkôt mẽ pa ho mẽ pa xwỳnhjê hwỳr agjê nê mẽ ixtã mẽ kãm akir nê mẽ kãm:

—Kwa mẽ kot jajê kutã apkur kêt tã mẽ akrãhtũmja axtem nê mẽ kutã apkur o nhỹ. Kwa nà mẽ kot amnhĩ tomnuj xwỳnh kênã. Jejus kot amnhĩ to mex ronhỹx mẽ kutã apkur kêt nê. Anê.

12Hãmri nhũm Jejus amnhĩ tã ã mẽ kapêr anhỹrja ma nê mẽ kãm:

—Tk. Nà ixte tãm mẽ unhwỳr kaxyw na pa mẽ kutã ixàpkur o nhỹ. Xà na hte tõtôja mẽ mex xwỳnhjê hwỳr mra nê mẽ hkane? Nà ãm mẽ à xwỳnhjê pix wỳr na hte mra nê tanhmã mẽ hkane hto. Ra mẽ ate ja pumunh mex. Tã ja pyrà nê na pa pre mẽ kot amnhĩ to mex xwỳnhjê hwỳr ixwrỹk kêt nê. Mẽ kot amnhĩ tomnuj xwỳnhjê pix wỳr na pa pre wrỳ. Ixte tãm mẽ unhwỳr kaxyw mẽ hwỳr wrỳ nê ã jajê kutã ixàpkur o inhỹr anê. 13Ga mẽ ma mra nê Tĩrtũm kapêr ã kagà htũm kot ja jarênhja kamã harê nê ama. Harênh kot:

Na ka htem inhmã tanhmã amnhĩ jarênh to kaxyw hãmri nê
 inhmã mẽmoj gõ nê tanhmã ixto mex to. Nom kêr ka mẽ
 ãm ja pix ho anhỹr kêt nê. Mẽ mãănên mẽ piitã tanhmã
 mẽ ho mex to ho ri apa. Anê.

—Ã Tĩrtũm kapêr ã kagà htũm kot ja jarênh kot anhỹr. Tã ja pyrà nê na pa pre mẽ kot amnhĩ tomnuj xwỳnhjê hwỳr wrỳ nê mẽ kamã ixukaprĩ ho ixpa. Mẽ kot amnhĩ tomnuj kaga nê hpãnhã tãm amnhĩ nhĩpêx kaxyw

na pa pre ã mẽ hwÿr ixwryk anê. Tã ka mẽ ri atÿx amnhĩ krã hkôt ã ixto akapêr anê. Anê.

Mẽ kot mẽmoj tã Jejus kukjêr

Makre 2.18-20; Rukre 5.33-35

14Tã nhũm Juãw Paxis kôt mẽ pa xwÿnhjaja Jejus wÿr mra nê mẽmoj tã hkukja nê kãm:

—Pa? E ot pa mẽ awÿr mra. Kwa mẽ inhmã mẽmoj jarê. Na pa htem tãhã Parijew nhõ xwÿnhjê pyrã nê ixàpkur kêt kãm Tirtũm mã amnhĩ jarê. Tã nom akôt mẽ pa ho mẽ pa xwÿnhjaja na htem àmnhĩx apkur o pa kamã kãm amnhĩ jarênh o pa. Kwa mo na htem mẽ ixpyrã nê tãhã apkur kêt kamã kãm amnhĩ jarênh kêt nê? Anê.

15Hãmri nhũm mẽ kuma nê mẽ kãm:

—Nà mo kaxyw kot kêt mẽ apkur kêt rãhã kãm amnhĩ jarê? Mẽ hkaprĩre hã. Mẽ kot ixkôt pa ho pa hã amnhĩ pumunh jakamã na htem hkĩnh nê ixkôt pa. Kormã ixte mẽ kamã ixpa kênã kot kêt mẽ apkur kêt rãhã Tirtũm mã tanhmã amnhĩ jarênh to. Xà na htem hkrãmnhwÿ hã hkĩnh kaxyw hã akuprõ nê hkaprĩ nê apkur kêt o kamãt nê mÿr o hkrĩ? Nà na htem anhÿr kêt nê. Na htem hã akuprõ nê hkĩnh nê hã apkur rũnh nê. Ja pyrã nê na hte ixkôt mẽ pa ho mẽ pa xwÿnhjaja ixkôt kormã àmnhĩx hkĩnh nê apkati mẽ apkur o pa. Nom koja mẽ kãm ixkurê xwÿnhjaja nhÿrmã tanhmã ixto hãmri nhũm mẽ hkaprĩ htÿx nê rĩ kormã tãhã apkur kêt rãhã Tirtũm mã amnhĩ jarê. Anê.

Mẽ pahte Jejus kôt amnhĩ nhĩpêx

Makre 2.21-22; Rukre 5.36-39

16Nhũm Jejus mẽ piitã mẽ kãm kapêr nê mẽ kãm:

—Mẽ kot amnhĩ tomnuj xwÿnhjaja ra mẽ kot amnhĩ nhĩpêx tũm o amnhĩ pyrãk jakamã na htem tanhmã mẽ kot amnhĩ nhĩpêx nyw tota kaga. 17Tã ixte amnhĩ nhĩpêx nywja te kot mẽ ate amnhĩ nhĩpêx tũm pyrãk kêt jakamã na ka htem ixkapêr ma nê ãm ama. Kwa mẽ inhma nê mẽ ate amnhĩ nhĩpêx tũmja gryk ã ixkaga hkêt nê. Anê.

Mẽ hkra htyk nê mẽhõ ni kamrô wa harênh

Makre 5.21-43; Rukre 8.40-56

18Nhũm pre ã Jejus mẽ kãm kapêr anhÿr o xa. Rôm nhũm mẽõ pahihtija tẽ nê mar o xa. Hãmri nê hamaxpêr o:

—Kokÿÿ. Jejusja ãm hãmri kêp pahi maati kumrêx. Hã na ri ã kapêr mex anê. E pa hwÿr tẽ nê ixkrare ho kuwÿ. Anê.

Hãmri nê hwÿr tẽ nê kutã hkõnkrã ho nhÿ nê kãm:

— Pa akupÿm mẽ ixto mex xwÿnh? E ot pa awÿr tẽ. Kwa ma ixkõt tẽ nẽ inhmã ixkra nire pumu nẽ tanhmã inhmã ho kê akupÿm inhmã htĩr. Na ham ixpê ty pa kaxyw amã ijamaxpêr nẽ man awÿr tẽ. Anẽ.

19Hãmri nhũm kuma nẽ kãm:

— Tôe. Nà kot paj ma akõt tẽ. Anẽ.

Hãmri nẽ ma hkõt tẽ. Mẽ ixpê hkõt ixpa ho ixpa xwÿnhjê mẽ pa mẽ ma hkõt mō. 20-21Nhũm mẽhō ni kamrō rãhã ho pa xwÿnhja ma mẽ ixkõt tẽ. Na pre hte hkamrō hkryre rãhã ho pa hã amgrã pê 12 nẽ tee ri kãm amnhĩ mex prãm o pa. Jakamã Jejus jarẽnh ma nẽ amnhĩ kaxyw kãm hamaxpêr kurê kumrẽx nẽ hamaxpêr o:

— Ma pa kop ma hwÿr tẽ nẽ kêp ê nhĩrê pix kupênh tã akupÿm inhmex japêr. Anẽ.

Hãmri nẽ ma mẽ ohtôjê kaêx kõt hwÿr tẽ. Nẽ katut kõt tẽ nẽ kêp ê nhĩrê kupê. 22Hãmri nhũm Jejus ho hakêx nẽ amnhĩ tã omu nẽ kãm:

— Pa? Kwa tee ri amnhĩ kukamã ajamaxpêr kêt nẽ. Ate amnhĩ kaxyw inhmã ajamaxpêr tÿx jakamã na ka ra akupÿm amex. E mãmri ajamakêtkati nẽ ri apa. Anẽ.

Hãmri nhũm akupÿm mex nẽ hkĩnh tÿx nẽ ma akupÿm tẽ. 23Hãmri pa mẽ ma htyk xwÿnh nhĩpêêxã hkõt mra nẽ òrkwÿ hwÿr agjê nẽ mẽ pikuprõnh xwÿnhjê pumu. Nhũm mẽ ra mẽ hã htu rax nẽ. Nẽ omũj ri kaprĩ xàj pifti kakôr o hkrĩ nẽ omũj ri mur. Kàx pê mur nẽ amnhĩ tak o hkrĩ. 24Hãmri nhũm Jejus mẽ hwÿr axà nẽ mẽ omu. Nẽ ra kot my hkrata htyk ã omunh tã kuri mẽ mÿr o mẽ hkrĩ xwÿnhjê mã kapêr nẽ mẽ kãm ãm òt nẽ nōr ã harê nẽ mẽ kãm:

— Pa? Kwa mon ka mẽ ri akaprĩ nẽ amÿr o akrĩ? E mẽ ma mra. Na wa hkrata wa kêp htyk kêt nẽ. Na ãm gōr nẽ nō. Anẽ.

Hãmri nhũm mẽ kot ra htyk ã omunh mex jakamã kuma nẽ ãm kuma. Nhũm mẽ hkwyja axtem nẽ ri axpên mã hã hpêr o pikênh o hkrĩ. 25Hãmri nhũm kapôt mã mẽ hano nhũm mẽ hapôj nẽ kapôt ã kuhê. Hãmri nhũm Jejusja htyk xwÿnhhta wÿr axà nẽ hpa hã kupy nẽ kãnhmã ãm nhũm akupÿm htĩr nẽ kãnhmã ãm kurê kumrẽx. 26Hãmri nhũm mẽ piitã akupÿm htĩr kãm omu nẽ ma ri krĩ piitã hkõt ri mẽ kãm harẽnh o hprõt.

Wa nohkre xwÿnh wa harẽnh

Matre 20.29-34

27Tã nhũm Jejus kato nẽ ma tẽ. Pa mẽ hkõt ixpa ho ixpa xwÿnhjaja ma hkõt mō. Hãmri nhũm wa myja wa hamẽxkrut. Hamẽ wa nohkre xwÿnh wa Jejus jarẽnh ma nẽ hã ajêt nẽ hkõt rôrôk o mō. Nẽ xatã amnhĩ to hwÿr o hkõt rôrôk o mō nẽ kãm:

— Pa Jejus? E Tirtũm kot mẽ ixkaxyw axãm jakamã kwa wa ixpumu nẽ wa ixkamã axukaprĩ kêt wehe. Anẽ.

28Hãmri nhũm wa kuma nẽ wa hkukamã nhỹri ixkrem axà nhũm wa hkôt axà nẽ xa nhũm wa omu nẽ wa kãm:

— Pa? E xàn ka wa ra amnhĩ kaxyw inhmã ajamaxpër tỳx nẽ nà? Anẽ. Hãmri nhũm wa kãm:

— Tỳ. Wa ixte amnhĩ kaxyw amã ijamaxpër tỳx kênã. Anẽ.

29Hãmri nhũm wa kuma nẽ hamẽ wa no hã ihkra xi nẽ wa kãm:

— Tôe. Nà war ate tanhmã amnhĩ kaxyw inhmã ajamaxpër to xà hkôt kot paj war anhĩpêx. Anẽ.

30Hãmri nhũm wa akupỹm rĩt mex kurê kumrêx. Hãmri nẽ akupỹm kato nẽ ma htêm kaxyw nhũm wa kãm:

— E kêr ka wa nhãm mẽ kãm ixte war ato mex ã ijarênh kêt nẽ. ãm kwarĩ ho kwarĩ.

31Anhỹr tã no nhũm wa kuma nẽ ãm kuma nẽ wa ma tẽ nẽ krĩ pu hã mẽ piitã mẽ kãm ri war amnhĩ tã harênh o mra.

Kapër kêt xwỳnh jarênh

32Tã nhũm Jejus ma axte nhỹhỹm mẽ ixto mō. Hãmri nhũm mẽhō my mẽkarōmnuti kot hwỳr àr nẽ tanhmã ho nhũm kapër kêt nẽ pa xwỳnhja nhũm mẽ Jejus wỳr o tẽ. 33Hãmri nhũm omu nẽ nẽ mẽkarōmnuti jano nẽ kãm:

— E kêp akato nẽ ma tẽ. Anẽ.

Hãmri nhũm kuma nẽ kurũm kato nhũm akupỹm kapër mex kurê kumrêx. Hãmri nhũm mẽ kot hã omunh xwỳnhjaja tee ri kot mẽkarōmnuti janor ã omu nẽ kamã no puma nẽ. Nẽ axpên mã:

— Kokỹỹ. Aa mẽ pahte ã mẽhō kot anhỹr pumunh kêt kumrêx tã na pu mẽ jarãhã ja pumu. Anẽ.

34Nom nhũm mẽ hkwyè pê Parijew nhō xwỳnhjaja axtem nẽ hã mẽ kãm kapër o:

— Tk. Kot amnhĩ krã hkôt mẽ hanor kêt kênã. Mẽkarōmnuti nhō pahi nhỹ hã kot mẽ nẽ mẽ hanor kênã. Anẽ.

Jejus kêp mẽ pakamã ukapri xwỳnh

Makre 6.34; Rukre 10.2-3; Juãw 4.35

35Tã nhũm Jejusja krĩ ho ohtô nẽ hkôt ri mẽ kãm Tĩrtũm kapër jarênh o pa. Pa mẽ hkôt ixpa. Na pre hte nhỹri krĩ hwỳr pøj nẽ mẽ kot Tĩrtũm kapër o mẽ ahkre xà hã ixkre hwỳr mra nẽ hwỳr agjê nẽ mẽ pikuprõnh xwỳnhjê jahkre. Nẽ mẽ kãm:

— E mẽ inhma. Tĩrtũm kãm mẽ apiitã mẽ ato hkra hprãm. Jakamã kwa mẽ ate amnhĩ tomnuj kaga hprãm xàj hkôt amnhĩ xunhwỳ nẽ kapër kôt amnhĩ nhĩpêx. Jao amnhĩ nhĩpêx nyw o amnhĩ nhĩpêx o ri apa.

Anhÿr o mẽ kãm kapêr. Hãmri nê ahpÿnhã ri tanhmã mẽ à kute xwÿnhjê ho mex. Nhũm mẽ ohtô nê hkôt mar o pa. **36**Hãmri nhũm mẽ omu nê kãm mẽ hkaprĩ nê. Na prem tee ri amnhĩ kukamã hamaxpêr o pa jao ra hkaprĩ nê. Nhũm Jejus ja hã mẽ omu nê hamaxpêr o:

—Hêxta waa nê. Na mẽ mex kêt nê pa. Te mẽ kêp ôwêhti jamãr xwÿnh kêt kot amnhĩ nhĩpêx pyrãk o htÿx ri pa. Mêhõ koja kãm mẽ hkaprĩ nê tanhmã mẽ ho mex to ho pa? Anê.

Hãmri nê mẽ kamã ukaprĩ nê. **37**Hãmri nê mẽ hã mẽ ixpê hkôt ixpa ho ixpa xwÿnhjê mã kapêr nê mẽ inhmã:

—Nà na mẽ kormã ohtô rax nê Tĩrtũm kapêr mar kêt nê. No ãm kormã mẽ ate mẽ kãm kapêr jarênh o apa kaxyw mẽ agrêre. Te pur rax kãm ra harôj kamrêk par nê ãm tã no ãm kaxyw hikênh xwÿnhjaja grêre pyrãk. **38**Jakamã kwa mẽ ho Tĩrtũm wÿ kê axte mẽ kaxyw mẽ akwÿjê rê kê mẽ apyrã nê ma mẽ hkôt ri mẽ kãm kapêr jarênh o pa. Anê.

Jejus kot mẽ ho 12 nê mẽ rênh

Makre 3.13-19; Rukre 6.12-16

10 ¹⁻⁴Tã nhũm Jejusja hkôt mẽ ixpa ho mẽ ixpa xwÿnhjê ho 12 nê mẽ ixrê. Mẽ ixte ma krĩ piitã hwÿr inhmrar nê ÿ hã mẽ ahkre nê tanhmã mẽ à kute xwÿnhjê ho mex o ixpa kaxyw. Nê ÿ hã mẽ nê mẽkarõmnuti janor o ixpa kaxyw nhũm mẽ ixrê. Na pre mẽ ixto 12 nê mẽ ixrê. ã mẽ inhĩxi kot anhÿr.

Pêtre kumrêx na pre kuta. Hixi hõ pê Simãw.

Nê hkôt htõ Andreja ta.

Nê hkôt Jepetew kra Xiakreja ta.

Nê hkôt Xiakre htõ Juãwja ta.

Nê hkôt Firiptija ta.

Nê hkôt Patoromewja ta.

Nê hkôt Tomasja ta.

Nê hkôt pa ixpê Matêwre nhũm pre mẽ hkôt ixta.

Ixpê pahi nhÿ hã kãm mẽ kêp ixujamÿnh xwÿnh tã nhũm pre jajê hkôt ixta.

Nê ixkôt Apew kra Xiakre hõja ta.

Nê hkôt Tatewja ta.

Nê hkôt Simãw Jeroxja ta.

Nê hkôt Jut Kariotja ta.

Kormã kot mẽ kãm Jejus kurê xwÿnhjê nhĩhkram òr mã nhũm Jejus kot amnhĩ kukamã omunh mex tã mẽ hkôt amnhĩ kaxyw kuta.

ã mẽ ixte ÿ hã mẽ ahkre o ixpa kaxyw mẽ ixrênh xwÿnhjê nhĩxi kot anhÿr.


Jejus kot mẽ kêp 12jê mã mẽ àpênh ã karõ

Makre 6.7-13; Rukre 9.1-6, 10.1-12, 10.14; mãânên Atre 13.50-51, 18.6

5Hãmri nhũm Jejus mẽ ixrênh pa nê ma mẽ hwỳr mẽ ixrênh kaxyw tanhmã mẽ inhmã kapêr to nê mẽ inhmã:

—E. Kêr ka mẽ ma mẽ piitã mẽ kãm ri ijarênh o apa. No ãm kormã mẽ kêp Ijaew kêt xwỳnhjê nhõ pika hwỳr apa hkêt nê. Rỳ mẽ kêp Samar nhõ krĩ hwỳr ka mẽ apa hkêt nê. 6Ãm mẽ pahpê Ijaew nhõ krĩ kôt pix mã măn ri apa. Mẽ kot tee ri amnhĩ kukamã hamaxpêr o pa jakamã te mẽ kêp ôwêhti pikunor nê htỳx ri mex kêt nê pa pyræk. 7Jakamã kêr ka mẽ ma mẽ hwỳr apa nê ã mẽ hkôt ri mẽ kãm akapêr o apa anê nê mẽ kãm: “E kot kaj mẽ ate amnhĩ tomnuj kaga nê Tirtũm kôt amnhĩ xunhwỳ hãmri nhũm amnhĩ tã mẽ apumu nê mẽ ato hkra. Jakamã e kwa mẽ tokyx hkôt amnhĩ xunhwỳ.” Anê. Kêr ka mẽ ã mẽ kãm akapêr anhỳr o ri mẽ hkôt apa. 8Hãmri nê akupỹm mẽ à xwỳnhjê ho mex o ri apa. Nê mẽ htyk xwỳnhjaja ka mẽ akupỹm mẽ ho htĩr o ri apa. Nê mẽ hkànhy rũnh xwỳnhjaja ka mẽ akupỹm mẽ ho mex o ri apa. Nê mẽ kamã mẽkarõmnuti xwỳnhjaja ka mẽ nê mẽ hano. E kêr ka mẽ ã inhỹ hã mẽ ho mex o ri apa anê. Na pa amarĩ tanhmã mẽ ato ka mẽ inhmã amnhĩrer kêt tã ra mẽ ate tanhmã mẽ ho mex to mã tãm. Tã kêr ka mẽ amnhĩ xwar amarĩ ri mẽ ho mex o ri mẽ hkôt apa. No ri mẽ ho mex pãnhã kàxpore hã axàhwỳr kêt nê.

9-10—Nê kêr ka mẽ ma mẽ hwỳr apa kaxyw anojarêt hãmri nê amnhĩ kôt akukrêx rũnh o apa hkêt nê. ãm anhỹ kamã mẽ hwỳr apa. Nê akàxpore ho rax nê ho apa hkêt nê. Rỳ akawà kamã axê hkwy rỳ aparkà hõ xàr nê ho amõr kêt nê. Rỳ kô hõ py nê ri ho apa hkêt nê. ãm anhõ mrykà pix jamỳ nê ma ho apa. Kêr kê mẽ ate Tirtũm kapêr o mẽ ahkre nê mẽ ho mex xwỳnhjaja măn amnhĩ pãnhã mẽ amã mẽ axàpkur xà gõ ka mẽ kutã axàpkur o ri mẽ hkôt apa.



Matêwre 10.11-12

11—Nê kêr ka mê nhÿri krî hwÿr ajapôj nê kamã mêhõ kot amnhî to mex xwÿnh japêr. Nê ra omu hãmri nê kuri mân pøj nê hkôt apikamênh tâmtã kurûm akupÿm ajapôj nê ma nhãm krî hõ hwÿr mra.

12—Nê kêr ka mê mêhõ nhõrkwÿ hwÿr pøj nê mê kãm: “E ot pa mê awÿr mô. Nà koja Tirtûmja mê ato mex nê.” Anhÿr o mê kãm akapêr. 13Koja mê ama nê amnhî wÿr awÿ ka mê amnhî tâ mê omu nê mê kãm: “E koja Tirtûm mê ato mex nê ka mê ajamakêtkati nê ri axãmnhîx apa.” Anhÿr o mê kãm akapêr. No koja mê amnhî nhõrkwÿ nê mê akurê nhûm Tirtûm ja hã mê omu nê mê ho mex kêt nê.

14—Nê koja nhÿri krî hõ kamã mê akaga nê akapêr mar kêt japêr. Ka mê tee ri amnhî tâ mê kamã ama hãmri nê tokyx mê kurûm ajapôj nê ma akupÿm apa. Nê akupÿm anojarêr nê mê noo mã akuhê nê amnhî par ã awjagrô kapî nê ma apa. Mê kot Tirtûm kaga hã amnhî pumunh kaxyw ka mê ã mê noo mã amnhî nhîpêx anê. Hãmri nê ma nhÿhÿm hpãnhã apa. 15Koja nhÿrmã Tirtûm mê kot amnhî tomnuj mÿrapê tanhmã mê ho. Na pre ã Sotõ mê Komo nhõ xwÿnhjê nhîpêx anê. Na prem amnhî tomnuj tÿx nê nhûm Tirtûm tee ri ja hã mê omu nê tanhmã hã mê homnuj tÿx to. Tã jar mê kãm ixkapêr mar prãm kêt nê mê kot ixkaga xwÿnhjaja koja ja hã mê omu nê kot Sotõ mê Komo nhõ xwÿnhjê nhîpêx o mê hipêx. No ãm tanhmã mê ho htÿx o mê hakre. Anê.

Nhûm pre Jejus ã mê inhmã mê ixapênh ã karõ anê.

Jejus kot mê kêp 12jê hkukamã mê harênh

Makre 13.9-13; Rukre 12.11-12, mããñên Rukre 21.12-17; Wam Pêtre 3.13-17, 4.12-19, 4.24-25; Rukre 6.40; Juãw 15.20, 15.26-33; Rukre 12.2-9

16Nhûm Jejus arî kot mê ixrênh xwÿnhjê mã kapêr nê mê inhmã:

—E kot paj ma mê hwÿr mê arê. Ma mê ate Tirtûm kapêr o mê ahkre ho ri mê hkôt apa kaxyw. Jakamã kot kaj mê te ôwêhti kot mry xoprê hwÿr amnhî to mrar nhûm kot hkwÿ hpar pyrãk o amnhî nhîpêx. Koja mê hkwÿjaja mê ate mê ahkre ma nhûm ja mê kêp omnuj nê nhûm mê hã tanhmã mê anhîpêx to. Tã nom kêr ka mê tee ri amnhî kukamã ajamaxpêr nê amã mê uma hkêt nê.

17—E kwa mê o kora. Kêr ka mê ma mê hwÿr mra nê amnhî nê mê htãnopxar o ri apa. Koja mê hkwÿjaja mê akapêr ma nê kêp mê aprãm nôkati. Nê mê apynê nê ma mê utãr xwÿnhjê hwÿr mê ato mra nê mê kãm tanhmã mê ato hêx to. Hãmri nhûm mê mar xà hkôt mê atak. Tirtûm kapêr o mê ahkre xà hã ixkre kamã koja mê ã mê anhîpêx anê.

18—Nê koja mê ixtã tanhmã mê ato kaxyw mê apynê nê ma mê õ pahi hwÿr mê ato mra nê tanhmã kãm mê ato hêx to. Nom kwãr mê mamrî ã mê anhîpêx anê. Koja mê ato anê ka mê kutã akrî nê mê kãm Tirtûm kapêr jarê. Ijaewjê mã nê mê kêp Ijaew kêt xwÿnhjê mã.

19—Nê koja mẽ ma mẽ õ pahi hwỳr mẽ ato mra nê ã mẽ anhîpêx anê nom kêr ka mẽ tee ri tanhmã mẽ kãm amnhî jarênh to hkukamã ajamxpêr kêt nê. Koja Tîrtûm Karõ tãm tanhmã mẽ akrã hto ka mẽ ô ri mẽ kãm akapêr mex nê. 20Nê kot kaj mẽ amnhî krã hkôt ri mẽ kãm akapêr kêt nê. Tîrtûm Karõ nhỹ hã kot kaj mẽ ô ri mẽ kãm tanhmã axujarênh to.

21-22—Nê koja mẽ hkwỳjaja ixtã mẽ akamã gryk nê. Nê mẽ atã àmnênh pix o pa. Nê mẽ kot mẽ apar kaxyw mẽ akwỳjê hã amỳnê. Koja mẽ anhîpêxã hkwỳjaja mẽ apê mẽ hkra hã amỳnê. Nhùm mẽ akra hkwỳjaja mẽ apê mẽ hipêxã hã amỳnê. Nhùm mẽ atõ hkwỳjaja mẽ apê mẽ htõ hã amỳnê. Nhùm mẽ akatorxàjaja mẽ atã amỳnê. Hãmri nhùm mẽ apa. No ãm kwãr mẽ mãmri ã mẽ anhîpêx anê. ã mẽ kot mẽ anhîpêx anhỹr tã kêr ka mẽ tee ri amnhî kukamã ajamxpêr pê ixkaga hkêt nê. Mẽ ãm amnhî to htỳx rãhã ty. Hãmri nê akaxwỳnhja ma Tîrtûm mẽ wa inhõ krĩ hwỳr axàpir kurê kumrêx nê wa ixkuri akupỹm amex nê atĩr tũm nê apa ho apa.

23—Nê koja mẽ nhỹri krĩ hkwỳ kamã ixtã tanhmã mẽ anhîpêx hto ka mẽ mãmri mẽ kurùm ajapôj nê ma nhỹhỹm krĩ hõ hwỳr apa. Nê hpãnhã kamã mẽ kãm ri ijarênh o mẽ hkôt apa. Kot kaj mẽ kormã Ijaewjê nhõ krĩ piitã hwỳr apa hkêt ri pa akupỹn mẽ awỳr wrỳ. Kwa kêr ka mẽ ixkapêr mã ajamxpêr tỳx rãhã ri apa.

24-25—Mẽ ate ixkôt apa ho apa xwỳnh na ka mẽ. No pa na ixpê mẽ ajahkre xwỳnh. Jakamã koja mẽ kot tanhmã inhîpêx to ho mãânênh mẽ anhîpêx. Koja mẽ nhỹrmã tanhmã inhîpêx to nê mã ixkôt mẽ ato anê nê. Mẽ pahte amnhî nhîpêxja kot axpên pyrãk. Jakamã koja mẽ ixpê Satanasti hã ijarê nê mãânênh tanhmã mẽ ajarênh punuj to ho pa. Mẽ pahte amnhî nhîpêxja kot axpên pyrãk jakamã koja mẽ panhîpêx o axpên pyrãk.

26—Tã nom kêr ka mẽ tee ri amnhî kukamã ajamxpêr pê amã mẽ uma ho apa hkêt nê. Na htem piitã axpên pê tanhmã hamaxpêr punuj to ho hpimxur o pa nom tee ri ho pimxur prãm kaprỳ. Koja nhỹrmã mẽ hamaxpêr piitã amnhîrĩt pa. Nê mẽmoj piitã ra hpimxur mex tã koja nhỹrmã amnhîrĩt par kumrêx.

27—Nê koja nhỹrmã mẽ piitã ixte amnhî nhîpêx kôt ixpumu. Na pa ra mẽ hkàx ã mẽ amã ixujarênh rax nê. Tã kêr ka mẽ ma mẽ piitã mẽ kãm harênh o ri apa. Nê ra ixte mẽ hkàx ã ahte ixte mẽ amã mẽmoj jarênhhta ka mẽ hpãnhã ma mẽ kãm harênh o ri apa kê mẽ apyrã nê harênh ma.

28—E kêr ka mẽ amã mẽ kot tanhmã mẽ ato mã xwỳnhjê puma ho apa hkêt nê. Mẽ kot mẽ apar mã tã koja mẽ ãm mẽ akrãhkã pix pa nom tanhmã mẽ akaxwỳnh to hkêt nê. Tîrtûmja tapxipix na hte mẽ hkrãhkã nê mẽ hkaxwỳnh mẽ ho pimràatã kot amnhî xà htỳx kamã hamak tũm

xàta wỳr mẽ rēnh pumunh. Tã kot hwỳr mẽ arēnh pymaj kēr ka mẽ amã kapēr kwỳm ri tanhmã amnhĩ nhĩpêx to puma ho ri apa.

29-31—Ně Tĩrtũm kot mẽ pahto hapêx par pumunh tã mããnēn kot mẽ pajamãr mex. Mãn ka htem kuwēnhre pumu. Na hte Tĩrtũm kuwēnhre jamãr mex o pa. Mẽ piitã mẽ kot ãm omunh tã nom nhũm Tĩrtũm mẽ kurom hamãr mex pē mẽ htãnopxar rãhã ho pa. Tã kãm mẽ pajapê htỳx o kot kuwēnhre jakrenh jakamã kwa mẽ tee ri amnhĩ kukamã ajamaxpēr o ri akapri mẽ apa hkêt mẽ. Koja Tĩrtũm mẽ pahtãnopxar rãhã ho pa. Kot mẽ panhĩ piitã omunh par. Nẽ ahpỳnhã tanhmã mẽ pahkrã hkĩ kute hkôt mẽ pahpumunh par. Tã kot mẽ pahtãnopxar rãhã jakamã mo kaxyw kot kaj kêt mẽ ri amã mẽ uma ho apa? Anẽ.

Mẽ pahte Jejus kôt amnhĩ xunhwỳr rỳ mẽ pahte hkaga jarēnh

32Nhũm Jejus arĩ kot mẽ hwỳr mẽ ixrēnh xwỳnhjê mã kapēr mẽ mẽ inhmã:

—E kwa mẽ mãmrĩ akwỳjê mã mẽ apê ixkwỳ hã amnhĩ jarēnh o ri apa mẽ amã mẽ uma xàj tee ri amnhĩ nhĩpêx kêt mẽ. Kot kaj mẽ kãm ra ate ixkôt amnhĩ xunhwỳr ã amnhĩ jarē. Pa ja hã mẽ apumu hãmri mẽ mẽ apyrã mẽ kaxkwa kamã Inhĩpêêxã mã ra ate ixkôt amnhĩ xunhwỳr ã mẽ ajarē. 33Nom kot kaj mẽ kot ixtã tanhmã mẽ ato pymaj apê ixkwỳ hã amnhĩ jarēnh kêt mẽ. Pa ja hã mẽ apumu hãmri mẽ nhỹrmã amnhĩ xwar Inhĩpêêxã mã mẽ apê ixkwỳ hkêt ã mẽ ajarē. Jakamã kwa mẽ mãmrĩ mẽ kãm apê ixkwỳ hã amnhĩ jarēnh o ri mẽ hkôt apa kê mẽ ama mẽ amnhĩ kaxyw inhmã hamaxpēr japêr. Anẽ.

Mẽ kãm Jejus ã hkwỳjê kurê xwỳnhjaja

Makre 8.34-35; Rukre 9.24, mããnēn Rukre 12.51-53, 14.26-27; Apokarip 12.11

34Nhũm Jejus arĩ kot mẽ hwỳr mẽ ixrēnh xwỳnhjê mã kapēr mẽ mẽ inhmã:

—Ra mẽ awỳr ixwrỳk tã koja mẽ piitã ixkukwak ri hamakêtkati mẽ àmnhix ri pa hkêt mẽ. Kormã. Koja mẽ akwỳjaja ixkapēr ma mẽ mẽ apyrã mẽ amnhĩ kaxyw ixkôt hamaxpēr. Nhũm mẽ akwỳjaja axtem mẽ kuma mẽ ãm kuma. Hãmri mẽ ixtã tanhmã mẽ atomnuj to ho pa ka mẽ amnhĩ xà htỳx kamã ajamak o ri apa.

35—Koja mẽ akrajaja ixtã mẽ apê mẽ hipêêxã mẽ mẽ katorxã kutã amnhĩ xunhwỳ. Nhũm mẽ wỳjjaja ixtã mẽ umregêxjê kutã amnhĩ xunhwỳ.

36—Koja mẽ ã mẽ akwỳjaja ixtã mẽ akutã amnhĩ xunhwỳr anẽ. Mẽ anhōrkwỳ kamã mẽ akukwak ri pa htã ixtã mẽ akutã amnhĩ xunhwỳ.

37—Ně mẽ amã mẽ anhĩpêêxã mẽ mẽ akatorxã japêê. Nẽ mẽ amã mẽ akrajê japêê. Tã nom kot kaj mẽ gryk ã ixkôt amnhĩ nhĩpêx mex o ri apa

hkêt hāmri nê apê ixkwỳ mã tām kêt. **38**Rỳ nhũm mẽ nhỹrmã ixtã mẽ apar kaxyw ka mẽ tee ri amnhĩ kukamã ajamxpêr nê mẽ kot mẽ apar pymaj ixkaga hã kot kaj apê ixkwỳ mã tām kêt nê. **39**Koja mẽ nhỹrmã ixpĩ pa mẽ anê ty. Tã mẽ ate ixkôt amnhĩ nhĩpêx o apa xwỳnhjaja. Koja mẽ ixpyrà nê ixtã mẽ apar mã tã kwa kêr ka mẽ amã atyk pymaj ixkaga hkêt nê. Kwãr mẽ māmri tanhmã ixtã mẽ ato. Kot kaj mẽ nhỹrmã Tĩrtũm mẽ wa ixri axte amnhĩ xà kamã ajamak kêt nê atĩr tũm nê amex rãhã apa ho apa. Nom kot kaj mẽ jar amã amex nê apa hprãm xaj ixkaga hāmri nê nhỹrmã wa ixri atĩr tũm nê apa ho apa hkêt nê. Anê.

Mẽ kot Jejus krajê ho mex xwỳnhjê jarênh

Matre 25.34-40; Makre 9.41; Juãw 13.20

40Nhũm Jejus arĩ kot mẽ hwỳr mẽ ixrênh xwỳnhjê mã kapêr nê mẽ inhmã:

—E koja mẽhõ nhỹri mẽ apumu nê mẽ apê ixkra hã tanhmã mẽ ato mex to nê te pa kot ixto mex pyræk. Nê kot kaj mẽ tanhmã pa ixto mex to nê te Tĩrtũm o mex pyræk.

41—Nê kot ka mẽ nhỹri Tĩrtũm nhỹ hã mẽ kãm kapêr jarênh xwỳnhjê hõ tanhmã ho mex to nhũm Tĩrtũm hã apumu nê nhỹrmã hã ato mex nê. Rỳ ka mẽ mẽhõ kot Tĩrtũm kôt amnhĩ nhĩpêx xwỳnhjê hõ pumu nê tanhmã ho mex to. Nhũm Tĩrtũm hã apumu nê mããnên hã ato mex nê. Te ate mẽhõ ho mexta pyrà nê mããnên ato mex nê. **42**Nhũm mẽhõ nhỹri mẽ kot ixkôt kormã amnhĩ xãm nyw nê kormã àhpumunh tohtuj anhỹr xwỳnhjê hõ pumu. Nê kãm kôr ã omu nê hamaxpêr o: “Kwa Jejus kôt ri pa xwỳnh mũj kãm kôr. Kormã kot Jejus kôt amnhĩ xãm tỳx kêt tã kêp hkwỳy. E kot paj kãm gô hkwyê kê ho ixkô.” Anê hāmri nê kãm hkwyê nhũm ho ixkô. Hāmri nhũm Tĩrtũm hã omu nhũm kot kãm gô pix nhõr nhũm kot ho hkôm tã nhũm ja hã ho mex rax nê. Anê.

Nhũm pre ã Jejus kot mẽ hwỳr mẽ ixrênh xwỳnhjê mã kapêr ry rax anê. Mẽ ixpê 12jê mã ã kapêr anê.

Juãw Paxis kot Jejus jarênh mar

Rukre 7.18-23, 7.5, mããnên Rukre 4.16-21

11 **1**Tã nhũm Jejus ra kot mẽ hwỳr mẽ ixrênh xwỳnhjê mã kapêr pa hāmri nê kato nê ma krĩ pu hã krĩ hkwyêjê hkôt ri pa. Nê mẽ kãm Tĩrtũm kapêr jarênh o ri mẽ hkôt pa.

2Nhũm Juãw Paxisja arĩ kêp prês nê mẽ hagiênh xà kamã hkrĩ. Nhũm pre hte hkôt mẽ pa ho mẽ pa xwỳnhjaja hwỳr mra nê kãm Jejus kot tanhmã amnhĩ nhĩpêx to ho pa hã harê. Hāmri nhũm harênh ma nê tee ri hkukamã hamaxpêr. Hāmri nê hkôt mẽ pa xwỳnh wa ho axkrut nê wa kuta **3**nê hwỳr wa kumê nê wa kãm:

—Kwa wa ma Jejus wÿr tẽ nẽ hkukja nẽ kãm: “Xà ka na pre Tirtũm mẽ ixwÿr amẽ nà? Xà kormã axtem mẽhõ na pa mẽ ri hamãr o ri ixpa?” Anhÿr o hkukja hãmri nẽ tanhmã kot amnhĩ jarẽnh to hã ama nẽ man akupÿn ixwÿr tẽ nẽ inhmã harẽ. Anẽ.

4Hãmri nhũm wa kuma nẽ ma hwÿr tẽ. Nhũm Jejus kormã tanhmã mẽ à kute xwÿnhjê ho mex o xa. Mẽ nohkre xwÿnhjaja nhũm akupÿm mẽ ho mex. Nẽ mẽkarõmnuti kot mẽ hwÿr gjêx xwÿnhjaja nhũm mẽ nẽ mẽ hanor o âm rãhã nhũm Juãw kõt wa pa xwÿnhhta wa hwÿr tẽn pøj. Nẽ kormã mẽ hã omunh o wa xa. Hãmri nẽ kãm Juãw Paxis kapër jarẽ nhũm wa kuma nẽ wa kãm:

—Tÿ. Nà âm hãmri na ja hã ijarẽ. Ixpê mẽ ate ixkamã ajamak o apa xwÿnhhta na pa. Na ka wa kam ã ixte amnhĩ nhĩpêx anhÿr ã ixpumu. Jakamã wa ma akupÿm tẽ nẽ aprĩ hã kãm ijarẽ. 5Na pa hte akupÿm mẽ nohkre xwÿnhjê ho mex. Nẽ mẽ hkãnhÿ xwÿnhjaja pa akupÿm mẽ hkã ho mex. Nẽ mẽ hyk o mẽ pa xwÿnhjaja pa akupÿm mẽ hte ho mex. Nẽ mẽ htyk xwÿnhjaja pa akupÿm mẽ ho mẽ htĩr. Nẽ mẽ kêp amrakati nẽ ri mẽ pa xwÿnhjaja pa mẽ kãm mẽmoj mex jarẽnh o ri mẽ hkõt ixpa. ã na pa hte mẽ hipêx anhÿr o ri ixpa. Jakamã e wa ma akupÿm Juãw wÿr tẽ nẽ ã kãm ijarẽnh anẽ 6Kê ijarẽnh ma nẽ ixkõt hamaxpër tÿx nẽ tee ri ixkukamã hamaxpër kêt nẽ. Koja ã amnhĩ nhĩpêx anẽ nẽ hamakêtcati nẽ ri pa. E wa tokyx ma akupÿm tẽ nẽ kãm ã ijarẽnh anẽ. Anẽ.

Jejus kot tanhmã Juãw Paxis jarẽnh to

Rukre 7.24-35

7-9Nhũm pre ã Jejus Juãw Paxis kõt wa pa ho wa pa xwÿnhja wa kãm amnhĩ jarẽnh anẽ nẽ akupÿm hwÿr wa kumẽ nhũm wa ma akupÿm hwÿr tẽ. Hãmri nhũm Jejus mẽ kot mar o kuhê xwÿnhjê mã tanhmã Juãw Paxisja jarẽnh to nẽ mẽ kãm:

—Na ka pre htem kapõt ã Juãw Paxis mar kaxyw ma hwÿr mra. Nom ê mex ã omunh kaxyw rÿ hpijaãm kãm tanhmã kapër to hã mar kaxyw na ka prem hwÿr amrar kêt nẽ. Tirtũm nhÿ hã kapër o pa jakamã na ka prem ate mar kaxyw ma hwÿr mra. Tirtũm nhÿ hã ixkukamã ijarẽnh o pa xwÿnh na. Ixpê Tirtũm kot mẽ akaxyw ixãm xwÿnh ã na hte ijarẽnh o pa. Nẽ hprĩ hã tanhmã mẽ amã ijarẽnh to. Jakamã kapërja mex o kot wam Tirtũm nhÿ hã kapër jarẽnh xwÿnhjê kapër piitã hakrenh par. 10Tirtũm kapër ã kagà htũm kot Juãw kukamã tanhmã harẽnh to nẽ harẽnh kot:

Kot paj Ixkra hkukamã ma mẽ hwÿr harẽnh xwÿnhja mẽ nhũm ma ri kutêp mẽ kãm harẽnh o pa. Mẽ kot mar nẽ kutêp tãm amnhĩ nhĩpêx o pa kaxyw.

—Anhÿr o Tirtũm Juãw Paxis kukamã harẽ nhũm prem hã kagà. Tã nhũm ixkukamã mẽ awÿr kumẽ. 11 Juãw Paxisja na mex kumrêx. Na pre

hprĩ hã ixkukamã tanhmã ijarênh to ho pa. Tã nom ixkôt mẽ pa ho mẽ pa xwỳnhjê hkĩnhã na pre ixkôt pa ho pa hkêt nê. Jakamã ixkôt mẽ pa ho mẽ pa xwỳnhjaja kot ixkôt hprĩ hã ixkapêr mar o pa jakamã na mẽ mex o mẽ kot Juãw Paxisja jakrenh. Anê.

12-13—Na pre finat Mojes kumrêx mẽ kãm Tĩrtũm kapêr kwỳ hã kagà. Tã nhũm hpãnhã Tĩrtũm nhỹ hã kapêr jarênh xwỳnhjaja Mojes mỳr pê hkwỳ hã kagà. Nhũm prem kamã harê nê kuma nê hkôt amnhĩ nhĩpêx o pa. Hãmri nhũm Juãw Paxisja mẽ mỳrpê kato nê tãm Tĩrtũm kapêr o mẽ ahkre ho ri pa. Tã pa hpãnhã ho mẽ ajahkre ho ri mẽ akôt ixpa nhũm mẽ ohtô nê inhma nê ixkôt amnhĩ xunhwỳ nê kãm ixkapêr kôt pix mã amnhĩ nhĩpêx o ri pa hprãm nê.

14—Amnepêm na pre Tĩrtũm nhỹ hã kapêr jarênh xwỳnhjaja mēhõja kukamã tanhmã harênh to ho pa. Nê mẽ kãm harênh o: “Koja nhỹrmã mēhõ te Eris kot amnhĩ nhĩpêx pyrak o amnhĩ nhĩpêx nê mẽ awỳr mō. Nê mẽ amã Tĩrtũm kot mẽ awỳr mēnh mã xwỳnhja jarênh o pa ka mẽ ama.” Anhỹr o mẽ kãm mēhõ jarê. Tã kot paj mẽ amã kot hkukamã harênh xwỳnhnta nhĩxi jarê ka mẽ inhma. Nã Juãw Paxisja kukamã na prem ã harênh anhỹr o pa.

15—E kot pa mẽ amã mẽ piitã htỳx ri tanhmã mẽ hamaxpêr to ho mẽ pa hã mẽ amã mẽ harê ka mẽ harênh ma. 16Te mēhprĩre kot amnhĩ nhĩpêx pyrak o na htem amnhĩ nhĩpêx. Mēhprĩrejaja na htem mẽ őrkwỳ kapem mẽmoj to amnhĩkati nê tee ri hkwỳjê kot amnhĩ nhĩpêx pumu nê mẽ kãm:

17 Kwa na pa mẽ amã gre htã ka mẽ ixkutã anhõkrepõx kêt nê. Pa mẽ ja hã mẽ apumu nê hpãnhã mẽ amã mẽ htyk jarê htã ka mẽ akaprĩ nê amỳr kêt nê. Kwa mẽ ri ã amnhĩ nhĩpêx anhỹr kêt nê. Anê.

—Mēhprĩjaja na htem ã axpên mã kapêr anê. Tã te mẽ ate mẽ urak. Tĩrtũm kot mẽ awỳr ÿ hã kapêr jarênh xwỳnhjê rēnh tã ka mẽ te mēhprĩre kot amnhĩ nhĩpêx pyrã nê mẽ ama nê ãm mẽ ama nê mẽ hkôt amnhĩ nhĩpêx kêt nê.

18—Juãw Paxis na pre mẽ awỳr mō nê ixkĩnhã apkur mex o ri pa hkêt nê. Nê ixkĩnh ã wĩhti ho hkõm kêt nê. Ka mẽ ja hã omu nê hkaga nê atỳx ri Satanasti nhỹ hã tanhmã kot amnhĩ nhĩpêx to hã hkamnhĩx. Hãmri nê mēhprĩre kot amnhĩ nhĩpêxta pyrã nê hkôt amnhĩ nhĩpêx kêt nê.

19Tã hãmri pa hpãnhã mẽ awỳr mō nê Juãw Paxis rom apkati mẽ ixàpkur mex o ri mẽ akôt ixpa. Nê kurom mẽ akutã wĩhti hkwỳ ho ixkõm o ri ixpa. Tã ka mẽ ja hã ixpumu nê atỳx ri ixàpkur rũnh nê ixpipãnh o ri ixpa hã ixkamnhĩx nê ã axpên mã ixto akapêr anê. Nê mẽ kot amnhĩ tomnuj xwỳnhjê hkôt ri ixpa xwỳnh ã axpên mã ijarê. ã na ka htem axpên mã ijarênh anê. Jao te mẽ ate Juãw Paxis nhĩpêx pyrã nê ixkaga

nê ixkôt amnhĩ nhĩpêx kêt nê. Na hte ã htỳx ri tanhmã mẽ hamaxpêr to ho mẽ pa xwỳnhjaja amnhĩ nhĩpêx anê. No tãm ri mẽ hamaxpêr xwỳnhjaja na htem ahpỳnhã wa ixte amnhĩ nhĩpêx ã wa ixpumu nê axpên mã wa ijarênh o: “Nà ahpỳnhã wa kot amnhĩ nhĩpêx tã no ãm hamê Tĩrtũm nhỹ hã kapêr mex o pa. E pu mẽ wa uràk nê Tĩrtũm kôt amnhĩ xunhwỳ.” Anhỹr o axpên mã wa ijarê. Anê.

Mê kot Tĩrtũm kôt mẽ hamaxpêr kêt xwỳnhjê jarênh

Rukre 10.13-15

20Na pre hte Jejus krĩ piitã hkôt pa nê krĩ nhõ xwỳnhjê mã kapêr nê mẽ kot amnhĩ tomnuj ã mẽ kãm kapêr. Korajĩ mẽ Pese nhõ xwỳnhjê kumrêx mã kapêr nê mẽ kãm:

21-22—E mẽ inhma. Amnepêm krĩ pê Sitõ mẽ Xir wa kamã mẽ pa xwỳnhjaja na prem tanhmã amnhĩ tomnuj tỳx to ho pa nhũm Tĩrtũm tee ri ja hã mẽ omu nê mẽ kot amnhĩ tomnujta ã tanhmã mẽ ho. Tã kwa mẽ o kora Korajĩ mẽ Pesêj nhõ xwỳnhjaja. Ra ixte mẽ amã aa mẽ ate mẽmoj pumunh kêt kwỳ ho anhỹr rax tã ka mẽ omu nê ãm omu nê amnhĩ tomnuj kaga hkêt nê. Arĩ tanhmã amnhĩ tomnuj to ho ri apa. Mỳrapê kot kaj mẽ amex kêt nê. Kop apu Sitõ rỳ Xir kamã mãn ixte mẽ kãm aa mẽ kot mẽmoj pumunh kêt kwỳ ho anhỹr o ri ixpa ronhỹx mẽ omu nê mẽ arom amnhĩ kaxyw ixkôt hamaxpêr tỳx kurê kumrêx. Nê tee ri kot tanhmã kot amnhĩ tomnuj to hã amnhĩ pumu nê hkaprĩ nê hkaga hpa. No mẽ kajaja na pa hte tee ri mẽ amã aa mẽ ate mẽmoj punuj kêt kwỳ ho anhỹr o ixpa kaprỳ. Ka mẽ ja hã ixpumu nê ãm ixpumu nê amnhĩ tomnuj kaga hkêt nê. Jakamã koja nhỹrmã Tĩrtũm tanhmã mẽ atomnuj tỳx to. Nê tanhmã Sitõ mẽ Xir wa kamã mẽ pa xwỳnhjê jarênh to nhũm mẽ kot amnhĩ tomnuj mỳrapê amnhĩ xà htỳx kamã hamak rãhã ho pa. No mẽ kajaja mẽ ate amnhĩ tomnuj tỳx o mẽ hakrenh jakamã koja Tĩrtũm mẽ hkĩnhã mẽ atomnuj tỳx kumrêx. Ka mẽ amnhĩ xà htỳx kamã ajamak rãhã ho ri apa kãm ga. Anê.

23-24Nhũm pre ã Jejus mẽ kãm kapêr anê. Nê hpãnhã Kapanaũ nhõ xwỳnhjê mã kapêr nê mẽ kãm:

—No mẽ apê Kapanaũ nhõ xwỳnhjaja. Kot kaj mẽ ajaxwỳja mẽ uràk nê amex kêt nê. Ra ixte mẽ amã aa mẽ ate mẽmoj pumunh kêt kwỳ ho anhỹr rax nhũm mẽ ate hã ixpumunh tã amnhĩ tomnuj kaga hkêt tã Tĩrtũm mẽ wa inhõ krĩ hwỳr akrà. No ãm hwỳr akrà kaprỳ. Kot kaj mẽ atõ hwỳr axàpir kêt nê. Kop apu Sotõ nhõ xwỳnhjaja mãn kot ã ixte amnhĩ nhĩpêx anhỹr ã ixpumunh ronhỹx mẽ ra kot amnhĩ tomnuj kaga nê ixkôt amnhĩ xunhwỳr kurê kumrêx. No mẽ kajaja na ka mẽ ã amnhĩ nhĩpêx anhỹr kêt nê. Jakamã kot kaj mẽ nhỹrmã ma kuwy maatita wỳr ajapêx pa kãm ga. Anê.

Jejus kot ô Papaj mã amnhĩ jarênh*Rukre 10.21-22*

25-26 Tã nhũm Jejus Tĩrtũm mã amnhĩ jarê nê kãm:

— Pa Papaj? Nà apê mẽ inhõ Pahi Maati na ka. Pikap ri mẽ pa xwỳnhjaja nê kaxkwa kamã mẽ pa xwỳnhjaja apê mẽ ixpiitã mẽ inhõ Pahi Maati na ka. ãm hãmri na ka hte amnhĩ nhĩpêx mex o ri apa. Na ka hte mẽ àhpumunh tỳx ã mẽ kot amnhĩ to jarkrar xwỳnhjê mã axàhpumunh tỳx o amnhĩrĩt kêt nê. ãm mẽ àhpumunh kêt ã mẽ kot amnhĩ jarênh xwỳnhjê pix mã na ka hte axàhpumunh tỳx o amnhĩrĩt nhũm mẽ tapxipixjaja ja hã apumu. Nà ãm hãmri. ãm hãmri na ka hte amã hprãm xà hkôt ã mẽ piitã mẽ hipêx anhỹr o ri apa Papaj. Jakamã mẽ kot amnhĩ to hkryre xwỳnh pixjaja na htem hprĩ hã ate amnhĩ nhĩpêx kôt apumunh o pa. Anê.

Nhũm pre ã Jejus Tĩrtũm mã amnhĩ jarênh anê. 27 Hãmri nê hpãnhã mẽ kot mar o kuhê xwỳnhjê mã kapêr nê mẽ kãm:

— Nà na pre ra Inhĩpêxàja inhĩkra kamã mẽmoj piitã hagjênh pa. Ixte kãm ho amnhĩptàr o ixpa kaxyw. Jakamã tapxipix na kot ixpê Kra hã ixpumunh par. No jar pika ja kamã mẽ pa xwỳnhjaja na mẽ kot ja hã ixpumunh kêt. Nê papxipix na ixte Inhĩpêxà kot tanhmã amnhĩ nhĩpêx to hã omunh par. Jakamã na pa hte ã amnhĩ nhĩpêx o ri ixpa anê nê inhmã hprãm xà hkôt mẽ hkwyjê mã ho amnhĩrĩt o ri ixpa. Jakamã nhũm mẽ ixpyrà nê Inhĩpêxà kot tanhmã amnhĩ nhĩpêx to ho pa hkôt omu.

28-30— Nê tee ri amnhĩ kukamã mẽ ajamaxpêr o ri apa xwỳnhjaja te mẽ ate mẽmoj pytĩ rax tur nê ahte ho apa pyræk. Kwa mẽ ixkôt amnhĩ xunhwỳ nê ixte amnhĩ nhĩpêx ã ixpumu. Ixte mẽ akamã ixukapri xwỳnh na pa. Na pa hte mẽ akutã inhnojarêt rãhã ho ixpa. Jakamã kot kaj mẽ ixkôt amnhĩ xunhwỳ pa te ixte mẽ anê mẽmoj pytĩ ho ixwryk pyræk o mẽ anhĩpêx nê tãm mẽ axunhwỳ ka mẽ tãm ajamaxpêr nê tãm amnhĩ nhĩpêx o ri apa. Mo kaxyw koja ixkôt mẽ kot amnhĩ nhĩpêx o pa xwỳnhjaja tee ri amnhĩ kukamã hamaxpêr o pa? Nà na htem ixkamnàr rom hamakêtkati nê àmnhĩx ri pa ho pa. Anê.

Jejus kêp arĩgromnu hpãm*Makre 2.23-28; Rukre 6.1-5*

12 ¹Tã nhũm Ijaew nhõ arĩgromnu pê sapja kato. Hãmri nhũm Jejus mẽ hkôt ri mẽ ixpa ho mẽ ixpa xwỳnhjê mẽ pa mẽ ma mẽ hpur kôt ri nhỹhỹm ri ixpa. Hãmri nê ra mẽ inhmã prãm nê mẽmo hy te kot harøj pyræk xwỳnhja kwỳ rê nê kugrà nê ma Jejus kôt hkanhar o mō. Mẽ ixpê Ijaew na pa htem axpên pur kãm ã amnhĩ nhĩpêx anhỹr o

ixpa. 2Hāmri nhũm mẽ ixkwỳ pê Parijew nhõ xwỳnhjaja kām mẽmoj tă Jejus o kapêr prām jakamã ã mẽ ixte amnhĩ nhĩpêx anhỹr ã mẽ ixpumu nẽ mẽ ixtã Jejus kukjêr kurê kumrêx nẽ kãm:

—Kwa Tĩrtũm kapêr tũm kot mẽ panhõ arĩgromnu hã mẽ pahte mẽ hpur kãm mẽmoj nhĩkênh nê mẽ pahkurê htã nhũm ri akôt mẽ pa ho mẽ pa xwỳnhjaja axtem nẽ ã amnhĩ nhĩpêx anhỹr o ri akôt pa. Mẽmo hyta rê nẽ akôt hkanhar o pa. Kwa mẽ kãm anê kê mẽ ã amnhĩ nhĩpêx anhỹr kêt nẽ. Na htem arĩgromnu hã mẽmoj tă àpênh kêt kênã. Anẽ.

3-4Hāmri nhũm mẽ kuma nẽ hprĩ hã mẽ kãm Tĩrtũm kapêr jarê nẽ mẽ kãm:

—Tk. Xàn ka htem Tĩrtũm kapêr ã kagà htũm kot pahi Tawi kot tanhmã amnhĩ nhĩpêx tota kamã harênh nẽ mar kêt nẽ? Na pre hkôt ri mẽ pa xwỳnhjê mẽ nhũm mẽ prām xàj Tĩrtũm mã amnhĩ jarênh xà hã ixkre hwỳr agjê. Hāmri nhũm mẽ õ patre maatija mẽ kãm prām tỳx ã mẽ omu nẽ kãm mẽ hkaprĩ nẽ mẽ kãm mẽmoj gõ. Mẽ kot Tĩrtũm noo mã pãwti jaxwỳr xwỳnhhta gõ nhũm mẽ kuku. Tĩrtũm kapêr ã kagà htũm kot ja nê mẽ hkurê htã nhũm mẽ kãm prām tỳx ã mẽ omu nẽ mẽ kamã ukaprĩ xàj mẽ kãm kugõ. ãm mẽ õ patre pix kot ja hkur kaxyw tă nhũm mẽ kãm kugõ nhũm mẽ kuku. Tã nom nhũm Tĩrtũm ja hã mẽ omu nhũm ja kêp omnuj kêt nẽ. Kot mẽ kamã ukaprĩ nẽ mẽ kãm õr ã omu nhũm ja kãm mex nẽ.

5—Mẽ panhõ arĩgromnu htã na hte patrejaja arĩ hã Tĩrtũm mã amnhĩ jarênh xà hã ixkre kamã àpênh o pa. Tĩrtũm kapêr ã kagà htũm kôt na htem arĩgromnu htã nhũm mẽ arĩ hã apê nhũm Tĩrtũm pê jamnuj kêt nẽ. Kumã mẽ àpênh xwỳnh kênã. 6ãm hāmri na pa mẽ amã ja jarê. Tĩrtũm mã amnhĩ jarênh xà hã ixkreta mex tă nom ixpê Tĩrtũm Kra jakamã inhmex o ixte ixkreta jakrenh. 7Tĩrtũm kapêr ã kagà htũm kot ja harênh kot:

Kêr ka mẽ inhmã amnhĩ jarênh kaxyw nẽ ãm inhmã mẽmoj nhõr
pix pê inhmã amnhĩ jarênh kêt nẽ. Mẽ mãânên mẽ kamã
axukaprĩ o ri apa pê inhmã amnhĩ jarê. Ja na kêt inhmã
hprãm.

—Ã harênh kot anhỹr. Tã mẽ ate aprĩ hã ja mar ronhỹx ka mẽ ixkôt mẽ pa xwỳnhjê kot mẽmo hy rênh nẽ hkanhar o mõi ã mẽ omu nẽ ri tanhmã mẽ ho akapêr to hkêt nẽ. ãm mẽ kãm prãm ã mẽ omu nẽ mẽ kamã axukaprĩ nẽ.

8—Kêt pa na pre Tĩrtũm mẽ akaxyw ixãm nẽ mẽ awỳr inhmẽ. Jakamã papxipix na pa hte arĩgromnu hã tanhmã mẽ kot amnhĩ nhĩpêx to hã mẽ kãm karõ. Kwa mẽ jajê pumu nẽ mẽ kamã axukaprĩ kêt wehe. Kwār mẽ mãmrĩ mẽmo hyta rê nẽ hkanhar o ixkôt mõi. Anẽ.

Ĩhkra grà xwỳnh jarěnh*Makre 3.1-6; Rukre 6.6-11*

9Nhũm pre ã Jejus Parijew nhõ xwỳnhjê mã kapěr aně hãmri nẽ Tĩrtũm kapěr o mẽ ahkre xà hã ixkre hwỳr tẽ nẽ axà. 10Nhũm Parijew nhõ xwỳnhjaja tanhmã ho kapěr to kaxyw htãnopxar o kuhê. Jakamã nhũm ixkre kamã mễhõ my ĩhkra grà xwỳnhja mẽ pikuprõnh xwỳnhjê nhĩhkõ hã nhỹ nhũm Parijew nhõ xwỳnhjaja omu nẽ axpẽn mã:

—Kwa pu mẽ jar pakuhê nẽ Jejus kot tanhmã amnhĩ nhĩpêx to hã omu. Xà koja arĩgromnu hã mũjti ho mex nà? Koja ho aně nẽ Tĩrtũm kapěr tũm kuhpa hã amnhĩ nhĩpêx. E pu mẽ kop xa nẽ hã omu. Aně.

Hãmri nẽ hã Jejus kukja nẽ kãm:

—E mẽ inhmã mễmoj jarẽ. Xà na htem arĩgromnu hã akupỹm mẽ ho mex nhũm Tĩrtũm kãm ja mex nẽ nà? Aně.

11Hãmri nhũm mẽ hamaxpěr kõt mẽ omunh mex nẽ mẽ kãm:

—Kwa tanhmã na htem arĩgromnu hã amnhĩ nhĩpêx to ho pa wehe? Xà koja we mẽ akrit ôwêhti ahkrehti kamã tẽm ka omu nẽ ãm omu nẽ arĩgro mex jamãr pẽ ho axàpir kêt nẽ? Nà kot kaj mẽ tee ri omu nẽ ho axàpir kurê kumrẽx. 12Arĩgromnu hã mẽ ho mexja ja mex kẽnã. Tĩrtũm mã mẽ pahpê panhĩa na mẽ pamex o mẽ hkrit jakrenh jakamã kër pu mẽ tee arĩgromnu htã pu mẽ hã tanhmã axpẽn to mex to ho papa. Ja na Tĩrtũm kãm hprãm.

Anhỹr o mẽ kãm kapěr. 13Hãmri nẽ hpãnhã myta mã:

—E anhĩhkra katat. Aně.

Hãmri nhũm ĩhkra katat nẽ mex kurê kumrẽx. 14Hãmri nhũm Parijew nhõ xwỳnhjaja tee ri ja hã omu nẽ Jejus kamã gryk nẽ. Arĩgromnu pẽ sap ã kot ho mex jakamã nhũm mẽ kamã gryk tỳx nẽ. Hãmri nẽ ma mra nẽ hapôj nẽ hã axpẽn kukjêr o kuhê nẽ axpẽn mã:

—Kwa ã kot amnhĩ nhĩpêx anhỹrja mỳrapê tanhmã kot puj wem ho? ã kapěr anhỹrja o te mẽ papamjaja mẽ pahte hkĩnhã mẽ kamã paxukapĩ kêt pyrak ã mẽ pajarẽ. Koja mẽ pahkwỳjaja kuma hãmri nẽ mẽ pahte amnhĩ nhĩpêx kaga nẽ amnhĩ kaxyw hkõt pix mã hamaxpěr. Kwa tanhmã kot puj wem ja nẽ ho?

Anhỹr o axpẽn kukjêr o kuhê.

Jejus kęp Tĩrtũm kot mẽ pahwỳr mễnh xwỳnh ã harěnh*Makre 3.7-12*

15Hãmri nhũm Jejus amnhĩ tã Parijew nhõ xwỳnhjê jamaxpěr kõt mẽ omu hãmri nẽ mẽ kęp kato nẽ hpãnhã ma nhỹhỹm krĩ hõ hwỳr ma tẽ. Nhũm mẽ ohtõ nẽ omu nẽ ma hkõt mra nhũm mẽ omu nẽ akupỹm mẽ kãm mẽ à xwỳnh piitã ho mex. 16Hãmri nẽ mẽ kãm:

—E na pa akupÿm mẽ ato mex. Nom kêr ka mẽ amnhĩ tã ixto axàmra ho ri apa hkêt nê. Ixpê Tĩrtũm Kra hã mẽ kãm ijarênh kêt nê. Ām kwarĩ kumrêx.

Anhÿr o mẽ kãm kapêr. 17Na pre ra amnepê m Tĩrtũm nhÿ hã kapêr xwÿnh finat Ijaisja Jejus kukamã mẽ kãm tanhmã harênh to nê hã kagà. Te Tĩrtũm tãm kapêr pyræk o harê nê hã kagà. Nê hã kagà ho:

18 Ota ixkôt amnhĩ nhĩpêx o pa xwÿnh ta xa. Pa na pa amnhĩ kaxyw âm. Inhmã hapêê. Na pa hte tanhmã kot amnhĩ nhĩpêx to ho pa hã omu nê ixkĩnh tÿx nê. Kot paj hwÿr amnhĩ karõ mẽ nhũm hwÿr axà nhũm ma ÿ hã pika piitã hkôt mẽ piitã mẽ kãm ijarênh o ri mẽ hkôt pa. Mẽ kot hprĩ hã ixte tanhmã amnhĩ nhĩpêx to nê tanhmã ijamaxpêr to hã ixpumunh kaxyw.

19 Nom koja ri amnhĩ to àmra o pa hkêt nê. Rÿ kãm amnhĩ to rax prãm o mẽ kãm tanhmã amnhĩ nhĩpêx to ho pa hkêt nê.

20 Ām kapêr xukaprí pix o koja mẽ hirerek xwÿnhjê mã kapêr o pa. Nê mẽ kot tee ri amnhĩ nhĩpêx ã amnhĩ pumunh xwÿnhjê kamã ukaprí o pa. Nê mẽ kot htÿx ri amnhĩ nhĩpêx o mẽ pa xwÿnhjê kutã nojarêt rãhã ho pa jakamã nhũm mẽ hpãnhã tãm amnhĩ nhĩpêx o pa. Koja ã amnhĩ nhĩpêx anhÿr o ri mẽ hkôt pa rãhã ra akupÿm mẽmoj piitã tãm haxwÿr pa.

21 Ā kot amnhĩ nhĩpêx anhÿr o pa jakamã koja pika piitã hkôt mẽ pa xwÿnh kwÿjaja kukwak ri amnhĩ kaxyw Tĩrtũm kôt hamaxpêr nê hkôt amnhĩ xunhwÿ. Anê.

Na pre ã finat Ijaisja Tĩrtũm nhÿ hã kormã Jejus wrÿk nê kator kêt ri tanhmã kot amnhĩ nhĩpêx to ho pa hkukamã harênh nê hã kagà anê. Tã nhũm mẽ hwÿr wrÿ nê ã mẽ hkôt amnhĩ nhĩpêx anhÿr o pa.

Jejus mẽ mẽkarõmnuti wa harênh

Makre 3.20-30; Rukre 11.14-23, 11.31-32, 12.10

22Tã nhũm prem Jejus wÿr mẽhõ myja o mõi. Mẽkarõmnuti kot hwÿr àr nê ho nohkre nê ho kapêr kêt xwÿnh ta nhũm mẽ hwÿr o mõi. Hãmri nhũm omu nê nê mẽkarõmnuti jano nê akupÿm ho mex kurê kumrêx nhũm akupÿm rít mex nê akupÿm kapêr mex nê. 23Hãmri nhũm mẽ amnhĩ jaêr pê omu nê kamã no puma nê hã axpên kukjêr o:

—Kokÿÿ. Jejus na hte âm mẽ ho mex o mẽ ho mex o pa. Mãn kêp Tĩrtũm kot mẽ pahwÿr mẽnh mã xwÿnh ta na nà? Ā na hte ã amnhĩ nhĩpêx anhÿr o pa. Mãn kêp pahi finat Tawi kanrêhã tãmnhwÿta na nà? Anê.

24Nom nhũm Parijew nhõ xwÿnhjaja ã Jejus kot amnhĩ nhĩpêx anhÿr ã omu nê kêp mẽkarõmnuti hkwy hã hkamnhĩx. Jakamã mẽ kot hã axpêr kukjêr ã mẽ kuma nê mẽ kãm:

—Tk pěr hinhu nhĩkôoti nhỹ hã na hte mẽ nê amnhĩ kwỳjê japôx o pa. Anẽ.

Hinhu nhĩkôoti nhĩxi hõ pê Satanasti nhũm prem ã Satanasti nhỹ hã Jejus kot amnhĩ nhĩpêx ã hkamnhĩx anẽ. 25Nhũm ra mẽ hamaxpěr kôt mẽ omunh mex jakamã mẽ kãm:

—Kwa mẽ inhma mẽ ate ixpê Satanasti hkwy hã ixkamnhĩx xwỳnhjaja. Koja pika nhõ xwỳnhjaja axpẽn kutã amnhĩ xunhwỳ nê axpu hãmri nê anhrã nê ma ahpỳnhã ri pa. Hãmri nê amnhĩ krã hkôt ri tanhmã amnhĩ nhĩpêx to ho pa. Jakamã nhũm mẽ õ pahija mẽ hamãr kêt nê. Nê koja krĩ nhõ xwỳnhjaja. Rỳ mẽ kot axpẽn to hkwy xwỳnhjaja mẽmoj tã axpẽn kãm gryk nê axpẽn kutã amnhĩ xunhwỳ. Hãmri nê ahpỳnhã awry hã pa nhũm mẽ õ pahija tee ri kãm mẽ hamãr prãm kaprỳ. Mo mẽ hkwyjaja kot ri mẽ hamãr o pa? No koja pahija tãm amnhĩ nê amnhĩ kwỳjê janor kêt nê. 26Tã ja pyrã nê ixte Satanasti nhỹ hã tanhmã amnhĩ nhĩpêx to ho ri ixpa ronhỹx pa ri mẽ nê amnhĩ kwỳjê janor kêt nê.

27—No mẽ akwỳjaja? Xà Satanasti nhỹ hã na htem mẽ nê mẽkarõmnuti japôx o pa? Kêp apu pa ixte ỹ hã mẽ nê amnhĩ kwỳjê japôx ronhỹx mẽ akwỳjaja ixpyrã nê ỹ hã mẽ nê amnhĩ kwỳjê japôx o pa. Nà Tĩrtũm nhỹ hã mẽ ixte mẽ nê mẽ hapôx o ixpa kênã. Jakamã mẽ ate ã ijarênh anhỹrja mex kêt. 28Tĩrtũm Karõ nhỹ hã ixte mẽ nê mẽ hapôx jakamã kwa mẽ ja hã ixpumu nê ixte mẽ ato amnhĩptar kaxyw Tĩrtũm kot mẽ awỳr inhmênh kôt ixpumu kêt wehe. Pa na ka htem ijamãr o apa.

29—Satanastija àhpumunh tỳx jakamã na htem tee ri kêp hkôt mẽ kot amnhĩ xunhwỳr xwỳnhjê pytãr kaxyw nhũm mẽ nê mẽ omunh mex nê. Tã nom ixàhpumunh tỳx o ixte Satanasti jakrenh par jakamã na pa hte kêp mẽ utã nhũm mẽ hpãnhã ixkôt ri amnhĩ nhĩpêx.

30—Ra mẽ amã ixkapêr mar prãm tã nom kormã ixkôt amnhĩ xunhwỳr kêt nê. Kwa wem ma amnhĩ to amõr gri nê tokyx ixkôt amnhĩ xunhwỳ kêt wehe. Kot kaj mẽ anhỹr kêt hãmri nê mẽ apê ixkutã amnhĩ xunhwỳr xwỳnh pyrãk o amnhĩ nhĩpêx.

31-32—Nê koja mẽhõ ixkapêr ma nê kãm ixprãm kêt nhũm Tĩrtũm ixtã omu nom tokyx tanhmã ixtã ho hkêt nê. Koja kormã amnhĩ tã hamã. Karõ kot axte kãm ijarênh o amnhĩrĩt nhũm jatã kot mar nê kãm ixprãm nê ixkôt amnhĩ xãm prãm xaj nhũm kormã amnhĩ tã hamã. Nom koja Karõ xatã mẽ kãm tanhmã ixto amnhĩrĩt to htã nhũm mẽ kuma nê ãm kuma nê te mẽ kêp amnhĩ jamak pro pyrãk. Jao ra Karõ hã hpijaam kêt o amnhĩ nhĩpêx. Mỳrapê koja Tĩrtũm nhỹrmã amnhĩ xwar te kêp amnhĩ jamak pro pyrãk o mẽ hipêx nhũm mẽ tee kãm amnhĩ kaprĩ kaprỳ. Hãmri nê amnhĩ xà htỳx kamã hamak o pa xàta wỳr ma pa nê kamã pa rãhã nê pa ho pa. Anẽ.

Mê pajamaxpêr xà hkôt tanhmã ri mê pakapêr to

Rukre 6.43-45

33Nhũm Jejus arĩ Parijew nhõ xwỳnhjê mã kapêr nê mê kãm:

— Nê kot kaj mê atõ anhõ mẽmo pàr nhũm amã ô mex nê. Ô rax nê. Ka omu nê akĩnh nê amnhĩm mex ã harê. No koja apê ô hkêt ka tee ri omu nê mex kêt ã harê. Na htem ã amnhĩm mẽmo xô hpàr pumunh kôt tanhmã kute hã harênh anê. Ja pyrã nê na htem tanhmã mê kot amnhĩ nhĩpêx to hã mê omunh kôt tanhmã mê harênh to. Mê kot amnhĩ tomnuj xwỳnh ã mê harê rỳ mê kot amnhĩ to mex xwỳnh ã mê harê.

34-35— Nê koja mēhõ hamaxpêr mex nê hãmri nê kapêr mex o pa. Nom koja hamaxpêr punuj nê kapêr punuj pix o pa. Nê htỳx ri tanhmã amnhĩ tomnuj to ho pa. Na htem ahpỳnhã amnhĩ jamaxpêr xà hkôt tanhmã kapêr to ho pa. No mê kajaja na ka htem kagã xoprê jamaxpêr pyrãk o ajamaxpêr punuj pix o ri apa. Jao akapêr punuj nê. No tãm ajamaxpêr o tãm akapêr o ri apa hkêt nê. Na htem tanhmã hamaxpêr to xà hkôt tanhmã ri kapêr to ho pa. **36-37**Koja nhỹrmã Tĩrtũm mê piitã tanhmã mê kapêr to hã mê mar xà hkôt tanhmã mê harênh to. Jakamã mê akapêr mex o mẽ apa xwỳnhjaja koja mẽ amex ã mẽ ajarê. Nom mẽ atỳx ri akapêr punuj o mẽ apa xwỳnhjaja koja mẽ amex kêt ã mẽ ajarê. Hãmri nê mẽ akapêr punuj o apaja mỳrapê mẽ atomnuj tỳx nê. Anê.

Jejus kot Jõhti jarênh

Makre 8.11-12; Rukre 11.29-32

38Hãmri nhũm Tĩrtũm kapêr tũm o mẽ ahkre xwỳnh mẽ Parijew nhõ xwỳnh kwỳjaja mẽmoj tã Jejus wỳ nê kãm:

— Kwa Pahihti. Mê inhmã aa mẽ ixte mẽmoj pumunh kêt õ ho anê. Kot paj mẽ omu hãmri nê Tĩrtũm kot mẽ ixwỳr amênh ã apumunh kurê kumrêx. Jakamã e mẽ inhmã mẽmoj to anê nà. Anê.

39Hãmri nhũm mẽ kuma nê mẽ kãm:

— Tk. Pêr ãm mẽ ajamaxpêr punuj pix o na ka htem apa. Ixpê Tĩrtũm kot mẽ awỳr inhmênh xwỳnh tã mẽ ate ja hã ixpumunh kêt. Nê mẽ ate ja hã axpên mã ijarênh kêt tã ixte mẽ amã aa mẽmoj pumunh kêt õ ho anhỳr kaxyw hã ixwỳ. Nà pa mẽ amã ho anhỳr kêt nê. Kormã. ãm amnepêm Jõhti kot tanhmã amnhĩ nhĩpêx toja pix kot paj mẽ amã harê.

40— Tĩrtũm nhỹ hã kapêr xwỳnh Jõhtija amnepêm na pre tep rax kumrêxja htĩr rãhã kukrê. Nhũm õxàhkre kamã htĩr nê hkrĩ hã apkati axkrunêpxi hãmri nê htĩr rãhã õxàhkre rũm kato. Tã ixpê Tĩrtũm kot mẽ awỳr inhmênh xwỳnh kot paj nhỹrmã kên kre kamã ixtyk nê inhnõr ã apkati axkrunêpxi. Jõhti hkĩnhã ixtyk kumrêx nê inhnõr ã apkati axkrunêpxi hãmri nhũm Tĩrtũm akupỳm ixto ixtĩr.

41—Nê koja nhÿrmã Tirtûm akupÿm mē htyk nē mē hikwÿ xwÿnh piitã akupÿm mē ho htîr hãmri nhûm mē piitã Inhîpêêxã mē wa ixkutã hkrî pa wa tanhmã mē harênh to. Tirtûm mē wa ixkuri mē htîr tûm nē mē pa ho mē pa mã xwÿnhjê hã mē hkwyjê jarê nē wa ixkuri mē pa ho mē pa hkêt xwÿnhjê jarê. Mē piitã ã ahpÿnhã mē harênh anê. Amarî mē pa xwÿnhjaja nē mē õ pahijaja. Jakamã nhûm Ninîwe nhõ xwÿnhjaja tanhmã wa inhmã mē ajarênh to. Jõhti kot mē hwÿr mör nē mē kãm Tirtûm kapêr jarênh o pa xwÿnhjaja nhûm mē tanhmã wa inhmã mē ajarênh to nē wa inhmã: “Na pre Jõhtija man mē inhõ krî hwÿr mō nē mē inhmã akapêr jarênh o ri mē ixkôt pa. Pa prem kuma nē mē ixte amnhî tomnuj kaga nē akôt amnhî xunhwÿr kurê kumrêx Tirtûm. No or war akutã mē hkrî xwÿnh kwÿ ata mē na pre Akra Jejus tãm mē hwÿr mō nē mē kãm kapêr o ri mē hkôt pa nhûm prem mar tã mē ixkînhã mē kot amnhî tomnuj kaga nē hkôt amnhî xunhwÿr kêt nê. Mē ixkurom mē kot Akra mar tã amnhî kaxyw kãm hamaxpêr kêt nê.” Anhÿr o koja mē wa inhmã mē ajarê ka mē tee ri mē ama nē ra mē amã ma nê. Nom ãm mē amã ma kaprÿ.

42—Nê sur kãm mē õ pahi nitita koja mē hpãnhã tanhmã wa inhmã mē ajarênh to nē wa inhmã: “Na pa pre inhmã pahi Sarumãw kot war anhÿ hã àhpumunh tÿx ã harênh ma hãmri nē inhmã mar prãm xaj ma awry hã õ pika hwÿr mō nē omu nē kapêr ma. Hãmri nē ma akupÿm inhõ pika hwÿr mō nē ixkwÿjê mã àhpumunh tÿx ã harênh o ri ixpa. Tã Akra Jejus na kot àhpumunh tÿx o pahi Sarumãw jakrenh tã or war akutã mē hkrî xwÿnh kwÿ ata mē. Mē kot kapêr mar tã ixkînhã kãm mar prãm kêt. Na prem kuma nē ãm kuma.” Anhÿr o koja wa inhmã mē ajarê. Hãmri nē ja hã mē amã akir ka mē tee ri mar o akrî nē amnhî kamã agryk o akrî. Nom ãm amnhî kamã agryk kaprÿ. Anê.

Mêkarõmnuti kot tanhmã mēhõ hto hã harênh

Rukre 11.24-26

43Nhûm Jejus arî Parijew nhõ xwÿnhjê mē Tirtûm kapêr tûm o mē ahkre xwÿnhjê mã kapêr nē mē kãm:

—Te mē ate ixte mēhõ nê mêkarõmnuti japôx xwÿnhhta pyrãk. Nhûm te kêp kator nē ma htêm pyrãk. Nê nhÿri amgrã kamã ri pa pyrãk. Koja ja kêp omnuj nhûm tee ri kamã nhÿri hkôt xã japêr o pa. Nom tee ri hapêr o pa kaprÿ. 44Hãmri nē tanhmã amnhî kukamã hamaxpêr to nê hamaxpêr o: “E kot paj ma akupÿm mē kot nê ixkator xwÿnhhta wÿr tē nē axà nē kamã mãn ri ixpa.” 45Anhÿr o hamaxpêr hãmri nē ma akupÿm hwÿr tē. Nom kormã akupÿm hwÿr àr kêt ri nhûm kamã amrakati nē ri pa. Jakamã nhûm akupÿm hwÿr axà. Nom ahte hwÿr àr kêt nê. Amnhî kôt hkwyjê ho 7 nê hwÿr mē ho gjêx pa. Mē kêp 7jaja nē wamta mē nhûm mē piitã hwÿr gjêx pa. No mē kêp 7jaja na omnuj tÿx o kot wamta

jakrenh jakamã nhũm mẽ kot hwỳr gjêx xwỳnhnta mẽ ỹ hã ra amnhĩ tomnuj tỳx nê oprê htỳx o pa. Wam pyxire kot hwỳr àrta nhỹ hã nhũm amnhĩ tomnuj o ri pa nom kawax pê oprê. Tã nhũm ra axte hwỳr mẽ ohtô nê gjêxta nhỹ hã hãmri oprê htỳx kumrêx. Ja pyrà nê kot kaj mẽ tokyx ixkôt amnhĩ xunhwỳr kêt nê hãmri nê amnhĩ tomnuj tỳx pix o ri apa. Anê.

Jejus kot tanhmã hkwỳjê jarênh to hã harênh

46Nhũm Jejus arĩ mẽ ahkre ho nhỹ. Rôm nhũm katorxà nê htôjaja nhỹhỹnh hwỳr môn pôj. Nom kormã hwỳr gjêx kêt nê. Mẽ kot hã htu rax jakamã nhũm mẽ tee ri hwỳr gjêx kaxyw kormã kapôt ã hã mẽ omunh o kuhê. 47Hãmri nhũm mêhôja kapôt ã mẽ omu nê Jejus mã mẽ harê nê kãm:

—Kwa Pahihti. Ota akatorxà mẽ atôjaja awỳr môn pôj nê tee àr kaxyw. O mũj mẽ kapôt ã kuhê. Anê.

48-50Hãmri nhũm kuma nê kãm:

—Tôe. Nà kot pa ixkato nê mẽ omu. Inhmã mẽ hapêê. Nom kot kaj mẽ atô Tirtùm kapêr ma nê hkôt amnhĩ xãm nê hkôt amnhĩ nhĩpêx. Hã kot kaj te apê ixtô rỳ ixkatorxà pyràk o pu mẽ axpên nhĩpêx o ri papa. Pa inhmã ixkatorxà nê ixtôjê japê pyrà nê määnên inhmã mẽ ajapê nê. Anê.

Mêmo hy hkre xwỳnh jarênh

Matêwre 13.18-23; Makre 4.1-9; Rukre 8.4-8

13 1Hãmri nhũm Jejus mẽ kãm kapêr pa nê ixkre rùm kato nê ma himô rax wỳr tẽ nê gô mỳri mẽ kãm ujarênh kaxyw nhỹ. Pa mẽ ixpê hkôt mẽ ixpa ho ixpa xwỳnhjaja ma hkôt mra. 2-3Hãmri nê gôta wỳr pôj nê mỳri ixkrĩ. Nhũm mẽ Jejus ã htu rax nê nhũm tee ri mẽ omunh o nhỹ. Hãmri nê hamaxpêr nê kànhmã xa nê tẽ nê pàr krem axà nê pàr kre kamã mütùm awry rùm mẽ ahkre ho nhỹ nhũm mẽ piitã omunh nê mar mex o hkrĩ. Nhũm mẽ kãm ujarênh o mẽ ahkre ho nhỹ. Nom mẽ kãm tãm ujarênh kêt nê. Mẽ kot Tirtùm kapêr mar nê tanhmã hkôt amnhĩ nhĩpêx to ho paja nhũm hã kuxi nê mẽ kãm harênh o nhỹ nhũm mẽ amgrà kamã kỳx pê mar o hkrĩ. Nhũm mẽ kãm:

4—E mẽ inhma. Koja mêhô ma pur mã mô nê pur kãm mêmo hy ho ukapêr o ri pa. Nom nhũm hy piitã amex kãm rôrôk kêt nê. Koja hkwỳja ahpỹnhã nhỹri rôrôk. Kwỳ aptỳx kãm rôrôk nhũm kuwênhre omu nê hwỳr mra nê hkrêr pa.

5—Nê koja kên kãm hkwỳ rôrôk nê ra higrôt kutã nojarêr nê higrôt pa. Nom nhũm kamã aptỳx nê kêp pika hkryre. 6Jakamã nhũm higrôt nhũm hã myt ahpa nê arĩgro htỳx mẽ nhũm grà pa. Harê hkryre jakamã grà pa.

7—Nê koja mrônhi kamã hkwỳ rôrôk nê higrôt tâ no nhũm utija kêp amýtã nhũm ô hkêt nê.

8—No kêt hirã kamã pika mex kãm rôrôk xwỳnhja hirã kamã rôrôk jakamã higrôt mex nê piitã ô rũnh nê. Kamã ô hkwỳ kêp 30 nê kamã hkwỳ kêp 60 nê kamã hkwỳ kêp 100. Ǻ mẽ ujarênh kot anhỹr. 9Kwa kêr ka mẽ ixujarênhja ma nê kãm ajamaxpêr tỳx rãhã ho apa. Anê.

Mêmo kaxyw Jejus kot mẽ ujarênh o mẽ ahkre

Makre 4.10-25; Rukre 8.9-15

10Hãmri pa mẽ ixpê Jejus kôt mẽ ixpa ho ixpa xwỳnhjaja Jejus kot mẽ kãm Ǻ ujarênh anhỹrja Ǻ kuma nê tee ri hkukamã ijamaxpêr. Hãmri nê hã hkukja nê kãm:

—Kwa axujarênhta na pa mẽ ixprĩ hã hkôt mẽmoj pumunh kêt nê. Mon ka hte Ǻm mẽ ujarênh pix o mẽ ahkre? Anê.

11Hãmri nhũm mẽ inhmã:

—Tôe. Nà kot paj mẽ amã harê. Tĩrtũm kãm mẽ ate aprĩ hã mar prãm jakamã kot paj ixprĩ hã mẽ amã harê. Mẽ kot amnhĩ tomnuj kaga nhũm Tĩrtũm kot ja hã mẽ omunh nê mẽ ho hkra. Ja na pa harê. No mũjjaja mẽ akĩnhã kãm ja mar prãm kêt jakamã na htem ixujarênhja ma nê Ǻm kuma nê htỳx ri pa.

12—No kêt mẽ kajaja na ka mẽ ixkôt ri apa ho apa. Nê xatã ixkapêr mar o apa jakamã na ka mẽ aprĩ hã ixkapêr ma. Tã mẽ ate ixkôt amnhĩ nhĩpêx o apa jakamã na pa tanhmã mẽ akrã hto ka mẽ aprĩ hã mar mex o mō. No mẽ kot ixkapêr mar nê Ǻm mar xwỳnhjaja na mẽ akĩnhã inhmar tỳx kêt nê. Jakamã nhũm Tĩrtũm tanhmã mẽ hkrã hto nhũm mẽ hã no hkêt tokyx anê htỳx ri pa.

13 “Ixte mẽ kãm aa mẽ kot mẽmoj pumunh kêt kwỳ ho anhỹr rax tâ nhũm mẽ omu nê Ǻm omu. Nê ixte amnhĩ nhĩpêxja nhũm mẽ kãm hkĩnh kêt nê. Nê mẽ kot ixkapêr mar tâ Ǻm inhma nê kãm hprĩ hã inhmar prãm kêt nê.”

—Jakamã na pa hte Ǻ mẽ kãm mẽmoj te ho tãm pyrã nê harê no Ǻm hã haxwỳ nê mẽ kãm ixujarênh anê.

14-15—Na pre ra Tĩrtũm nhỹ hã kapêr o pa xwỳnh Ijaisja amnepêm mẽ hkukamã tanhmã mẽ harênh to nê hã kagã. Mẽ kot inhmar nê Ǻm inhmar xwỳnhjê jarê nê tanhmã mẽ hkukamã mẽ harênh to nê mẽ harênh o:

Koja mẽ ujarênh mex mar pymaj amnhĩ jamak pro nê amnhĩ no hpro nê hkôt hamaxpêr kêt nê. Jakamã koja mẽ kãm mẽ kot amnhĩ nhĩpêx mex prãm kêt nê harênhja ma nê Ǻm kuma. Nê omu nê Ǻm omu. Mẽ kãm hprãm kêt jakamã koja mẽ Ǻ amnhĩ nhĩpêx anê. Ǻ mẽ kot amnhĩ nhĩpêx anhỹr kêt ronhỹx mẽ ra Tĩrtũm kapêr ma nê hkôt amnhĩ

xunhwỳ. Hāmri nhũm amnhĩ tã mẽ omu nẽ mẽ nê mẽ kot amnhĩ tomnuj rênh pa. Hāmri nhũm mẽ hkôt amnhĩ nhĩpêx mex nẽ kapêr mar mex o pa. Tã no nhũm mẽ ã amnhĩ nhĩpêx anhỹr kêt nẽ. Anẽ.

— ã Ijaisja mẽ hkukamã mẽ harẽ nẽ mẽ hã kagà anẽ.

16— No kêt mẽ kajaja na ka htem ano ho ixte tanhmã amnhĩ nhĩpêx to ho ixpa hã ixpumunh o ixkôt apa. Nẽ mẽ ajamak o ixkapêr mar o ri ixkôt apa. 17 Amnepêm mẽ akukamã pahijaja nẽ Tĩrtũm nhỹ hã mẽ kãm kapêr o ri mẽ pa xwỳnhjaja na prem kãm ixpumunh prãm tỳx o pa. Nẽ mẽ kãm ixkapêr mar prãm tỳx o pa. No ãm mẽ akĩnhã ixpumunh nẽ ixkapêr mar kêt rãhã htyk pa. Kormã ixwrỳk nẽ jar ixkator kêt jakamã na prem arĩ htĩr nẽ pa ri ixpumunh kêt rãhã ra htyk pa. ãm mẽ kapxipixjaja na ka mẽ mỳr pê ixte amnhĩ nhĩpêx ã ixpumunh nẽ ixkapêr mar o ixkôt apa. Tã mẽ kurom mẽ ate ano ho ixpumunh nẽ ajamak o ixkapêr mar o ixkôt apa jakamã kwa mẽ ja hã amnhĩ pumu nẽ tãm amnhĩ nhĩpêx o ri apa pê akĩnh nẽ ri apa. Anẽ.

Nhũm pre ã Jejus mẽ ixpê hkôt ixpa ho ixpa xwỳnhjê mã kapêr anẽ.

Jejus kot hprĩ hã mẽmo hy jarênh

Makre 4.13-20; Rukre 8.11-15

18 Hāmri nhũm Jejus mẽ ixpê hkôt ixpa ho ixpa xwỳnhjê mã hprĩ hã mẽ ujarênhhta jarẽ nẽ mẽ inhmã:

— E kot paj ixprĩ hã mẽ amã mẽmo hy ho ukapêr xwỳnh ã ixujarênhhta jarẽ ka mẽ inhma. Nà mẽmo hyta te kêp Tĩrtũm kapêr pyræk. Nẽ ahpỳnhã mẽmo hy rôrôk ã pikata te kêp mẽ apê panhĩ ahpỳnhã mẽ ate Tĩrtũm kapêr mar nẽ ahpỳnhã hkôt tanhmã amnhĩ nhĩpêx tota pyræk. 19 Jakamã mẽ kot mar xwỳnh kwỳjaja te mẽ kot aptỳx kãm hy rôrôk nhũm kuwênh kot hwỳr mrar nẽ hkrêr par xwỳnhhta pyræk. Jao Tĩrtũm kapêr ma no nhũm Satanasti te kuwênh kot hy krêr parta pyrã nẽ mẽ kot mar nẽ amnhĩ kaxyw hkôt hamaxpêr nẽ hkôt amnhĩ xunhwỳr pymaj hāmri ra tanhmã kapêrja nẽ mẽ hkrã hto. Jakamã nhũm mẽ kuma nom ho hamakêtkati tokyx anẽ nẽ axte kãm hamaxpêr kêt nẽ pa.

20— Nẽ mẽ kot mar xwỳnh kwỳjaja te mẽ kot kênre kamã hy hkwy rôrôk nẽ higrôt nẽ grà par tokyx anhỹr xwỳnhhta pyræk. Jao Tĩrtũm kapêr ma nẽ hkĩnh nẽ. Nẽ kãm mar prãm nẽ. 21 Tã nhũm mēhō Tĩrtũm nẽ tanhmã mẽ kãm kapêr to nhũm mẽ kuma nẽ Tĩrtũm kaga. Te mẽmo hy higrôt nom ra grà par tokyx anhỹrta pyræk.

22— Nẽ mẽ kot mar xwỳnh kwỳjaja te mrônhi kamã hy hkwy rôrôk nẽ higrôt nhũm mrônhi kot kêp àmnar xwỳnhhta pyræk. Jao mẽ kãm Tĩrtũm kapêr mar prãm tã mãänen kãm mẽ hikukrêx rũnh nẽ mẽ hikàxpore rũnh prãm. Hāmri nẽ ãm ja pix kukamã hamaxpêr o pa. Nẽ ja gryk ã axte Tĩrtũm kapêr mã hamaxpêr nẽ hkôt amnhĩ nhĩpêx kêt nẽ.

23—Nê mẽ kot mar xwÿnh kwÿjaja te hirã kamã pika mex kãm hy hkwy rôrôk nê higrôt nê ô rûnhta pyrãk. Jao ixkapêr ma nê amnhĩ krã him hagdênh tÿx nê. Nê ixkôt ri amnhĩ nhîpêx mex rãhã ho pa. Jakamã te mẽmo hy ô rûnh nê ô mex pyrãk o amnhĩ nhîpêx. E ã ixujarênhja kot anhÿr. Anê.

Harôj kaàkre jarênh

Matêwre 13.36-43; Makre 4.26-29

24Nhũm Jejus axte mẽ kot mar o hkrĩ xwÿnhjê mã awjarê nom hprĩ hã mẽ kãm ujarênh kêt nê. Axte mẽ kãm mẽmoj tã kuxi nê awjarê nê mẽ kãm:

—Nà nhÿrmã Tirtũm mẽ kot kormã htĩr ri tanhmã amnhĩ nhîpêx to ho pa hã mẽ omunh xà hkôt ahpÿnhã tanhmã mẽ harênh toja te mẽ ujarênh ja pyrãk. Koja mēhō harôj y mex o ukapêr kaxyw ma hpur mã mō. Hãmri nê hkre hpa nê ma akupÿm mō. 25Tã nhũm kamãt nhũm ra gōr nê nō. Hãmri nhũm kãm hkurê xwÿnhja ma kêp ihpur wÿr tẽ nê harôj mexta nhîpy axtem nê kêp harôj kaàkre hkre. Harôj kaàkreja te kot harôj mex pyrãk nom mẽ kot hkur kêt. Tã nhũm kêp harôj y mex nhîpy hkre hpa hãmri nê ma akupÿm tẽ.

26—Tã nhũm hamê higrôt nê anhîpê ô. 27Nhũm kãm mẽ àpênh xwÿnhjaja tee ri harôj mex kaêx ã harôj kaàkreta pumu nê hpur nhō dōn wÿr tẽ nê kãm harê nê kãm: “Kwa ate harôj mex pix kre htã pêr hkaêx ã harôj kaàkre mãânên kato. Kwa tanhmã na pre amnhĩ to nê hkaêx ã kato?” Anê. 28Hãmri nhũm tee ri mẽ kuma nê mẽ kãm: “Nà mēhō kãm ixkurê xwÿnh na pre ã inhîpêx anê.” Anê hãmri nhũm kãm mẽ àpênh xwÿnhhta kãm: “Kwa xà kot paj mẽ tokyx ma hwÿr mra nê nê harênh pa nê kurê nà?” Anê. 29Nhũm mẽ kãm: “Nà kot kaj mẽ anê nê harôj mexta mẽ ho apimràatã ixpê harênh pa. 30Kwãr mãmrĩ harôj mex mẽ hpmràatã ô hpa mãn. Ka mẽ rĩ ma hwÿr mra nê harôj kaàkre kumrêx jarênh pa nê axpên tã harê ho ê nê ma o mra nê hpôk. Hãmri nê rĩ kormã hpãnhã harôj mex jakã nê ho akuprô nê ô ho mra nê ixkre kamã haxwÿ.” Anê. ã mẽ ujarênh kot anhÿr.

Anhÿr o mẽ kãm kapêr.

Jejus te kot mẽmo hy hkryre pyrãk ã harênh

Makre 4.30-32; Rukre 13.18-19

31-32Hãmri nhũm Jejus arĩ mẽ kãm amnhĩ tã kuxi nê ujarênh o nhÿ. Nê tanhmã mẽ kãm amnhĩ tã ujarênh to nê mẽ kãm:

—Nà Tirtũm kot mẽ awÿr ixte mẽ ato amnhiptar kaxyw inhmênh ã ijarênhja. Te ixte mẽmo hy pixire nhũm mẽ kot hkre nhũm higrôt pyrãk. Koja gaa nê hprêk. Hãmri nê hpa anhrã nhũm kuwênhre hwÿr mra nê hōptĩ kamã amnhĩm haê nhîpêx nê kamã hikwÿ. Tã kot paj nhÿrmã

mêmo hy jarênhta pyrâ nê ixpyxi htã pika piitã hkôt mê ho amnhĩptã nê mê omunh mex rãhã ho ixpa. Anê.

Jejus te kot pãwti kaxkrit xà pyrâk ã harênh

Rukre 13.20-21

33Nhũm Jejus arĩ mê kãm amnhĩ tã kuxi nê ujarênh o nhỹ nê mê kãm:

—E kot pa hpãnhã mê amã tanhmã pãwti kaxkrit xà jarênh to ka mê inhma. Na hte mênijaja pãwti nhĩpêx kaxyw hãmri nê kaxkrit xà hkwy ho grire nê kupy nê trik xôm mê ho ahkã. Hãmri nê ho pãwti nhĩpêx. Kaxkrit xaja grire htã pãwti piitã ho kaxkrit mex nê. Tã ja pyrâ nê ixpyxi htã koja mê nhỹrmã pika piitã hkôt ixkôt amnhĩ nhĩpêx mex o pa.

Anhỹr o mê kãm amnhĩ jarê.

Jejus kot mê ujarênh pix kãm mê ahkre hã harênh

Makre 4.33-34

34Na pre ã Jejusja mê ujarênh o mê ahkre ho pa anê. ãm mê ujarênh pix o mê ahkre ho pa. Te tãm ujarênh pyrâk no ãm mêmoj tã haxwý rý amnhĩ tã haxwý nê mê kãm tanhmã amnhĩ jarênh to. 35Ã kot mê ahkre ho pa anhỹr kukamã na pre ra amnepêm Tĩrtũm nhỹ hã kapêr o mê pa xwýnhjê hõja harê nê hã kagã. Te Jejus tãm tanhmã amnhĩ jarênh to pyrâk o hkukamã harê nê hã kagã nê hã hkagã ho:

Kot paj mê kãm ixujarênh pix kãm mê ahkre ho ri ixpa. Mêmoj te ho tãm pyrâ nê harê nom mêmoj tã haxwý nê tanhmã mê kãm ixujarênh to. Nê aa mê kot mêmoj mar kêt xwýnh kwý kot paj mê kãm harê kê mê kuma. Anê.

Jejus kot hprĩ hã harôj kaàkre jarênh

Matêwre 13.24-30, 13.47-50

36Tã nhũm Jejus mê kãm ujarênh pa nê mê kure nê ma tèn ixkrem axã. Hãmri pa mê ixpê hkôt ixpa ho ixpa xwýnhjaja ma hkôt mra nê ixkrem agjê. Hãmri nê harôj kaàkre hã ujarênhta ã hkukja nê kãm:

—Kwa aprĩ hã mê inhmã harôj kaàkre jarênhta jarê nã. Na pa mê kormã ixprĩ hã mar mex kêt nê. Anê.

37Hãmri nhũm mê inhmã:

—Tõe pa ixprĩ hã mê amã harê. ãm paa.

Ixpê Tĩrtũm kot mê awýr inhmênh xwýnh te ixte mêmo hy mex o ukapêr xwýnhhta pyrâk.

38 Nê purta te kêt pika piitã pyrâk.

Nê harôj mexta te ra mê ate ixkôt amnhĩ xunhwýr nê ixkôt amnhĩ nhĩpêx o apa xwýnhjê pyrâk.

Nê harôj kaàkreta te mē kot Satanasti hkôt amnhĩ nhĩpêx o mē pa xwÿnhjê pyrâk.

39 Nê kot harôj kaàkre hkre xwÿnhta te Satanasti pyrâk.

Nê harôj jakâr xà hã arĩgrota te Tĩrtũm kot ahpÿnhã tanhmã mē harênh to xà hã arĩgrota pyrâk.

Nê mē kot harôj jakâr xwÿnhjaja te Tĩrtũm kapêr o wrÿk xwÿnhjê pyrâk.

40 Mē ujarênhja kamã na prem harôj kaàkre kumrêx jarê nê hã hpôk jarê. Ja pyrã nê koja nhÿrmã Tĩrtũm kot ahpÿnhã tanhmã mē harênh to xà hã arĩgrota ã hãmri ã mē kot amnhĩ tomnuj o mē pa xwÿnhjê nhĩpêx anê.

41—Kot paj nhÿrmã kãm mē piitã mē ho amnhĩptâr kaxyw hãmri nê kapêr o mē wrÿk xwÿnhjê mã anê nhũm mē ma mran wrÿ nê mē kot amnhĩ tomnuj xwÿnhjê pix o akuprô. Nê mē kot nhãm mē hkwyjê kot mē urâk nê tanhmã amnhĩ tomnuj to ho pa kaxyw mē kãm anhÿr xwÿnhjaja nhũm mē mãânên mē ho akuprô. 42 Hãmri nê mē ho pikuprônh pa nê te mē kot harôj kaàkreta nhĩpêx pyrã nê kuwy kamã mē rênh pa. Hãmri nhũm mē kamã amnhĩ xà htÿx kamã hamak rãhã nê pa ho pa. Nê amnhĩ xà htÿx ã maj tee ri mÿr rãhã ho pa. Nê tee ri amnhĩ xà hã maj amnhĩ nham o axpên kamnhar tÿx kaprÿ.

43—No ixkôt mē kot amnhĩ nhĩpêx xwÿnhjaja koja mē mē kurom mex kumrêx nê pa. Kot paj mē ho mex rax nê nhũm mē mex rãhã nê pa ho pa. Tĩrtũm kot kormã pika nyw nhĩpêx mã xwÿnhta kamã nhũm mē mex kumrêx nê pa ho pa. E kêr ka mē ixujarênhja ma nê kãm ajamexpêr tÿx rãhã ho apa. Anê.

Mê hikukrêx mex o hpimxur jarênh

Piripos 3.7

44 Nhũm Jejus arĩ mē ixpiitã mē inhmã tanhmã ujarênh to. Nom hprĩ hã ujarênh kêt nê. Kê axte mēmoj tã kuxi nê mē inhmã tanhmã ujarênh to nê mē inhmã:

—Mê ate ixkôt amnhĩ xunhwÿr xwÿnhjaja te mē apê mē hikukrêx mex ã pika japrô xwÿnhta pyrâk. Koja mēhõ mē hikukrêx mex jamÿ nê o tē nê nhÿri amnhĩm ho amũxu. Kaxyw kakwÿ nê kamã hagjê nê hity hpa nê ma akupÿm tē. Hãmri nhũm jãã nhũm mēhõ tēn kãm kato. Hã pikata kakwÿ nê kãm kato nê omu nê hkĩnh nê. Nê hamaxpêr o: “E pa ma tē nê inhôrkwÿ kamã ixkukrêx piitã ho wênê hpa nê hpãnhã kàxpore jamÿ nê ho amnhĩm mē hikukrêx mex ã pika japrô nê amnhĩm mēmoj mexta o ixarĩk pa.” Anhÿr o hamaxpêr nê akupÿm hity hpa nê ma akupÿm tē. Hãmri nê mēmoj mexta gryk ã õ mēmoj piitã ho wênê hpa. Hikukrêx nê ôrkwy nhũm piitã ho wênê hpa. Hãmri nê hpãnhã kàxpore jamÿ nê ma o tē nê amnhĩm pikata japrô. Hãmri nê ma akupÿm hwÿr tē nê kamã mē hikukrêx mexta kwÿnh pa nê ho õ kumrêx.

—Tã te mẽ ate mẽhõ kot ã amnhĩ nhĩpêx anhÿr xwÿnhnta pyrãk. Na ka mẽ urãk nê inhgryk ã amnhĩ tomnuj kaga hpa nê hpãnhã ixkõt amnhĩ nhĩpêx. Te mẽhõ kot mẽmo mẽ hikukrêx mex gryk ã hikukrêx tũm piitã kaga hpar nê mẽ hikukrêx mex o hpimxur xà hã pikata japrõr pyrãk. Anê.

Mêhõ kot kên jaxênh japrõr jarênh

45Nhũm Jejus arĩ mẽ inhmã awjarê nê mẽ inhmã:

—Nê ja. Na htem kãm hkĩnh nê hamakêtkati nê ri hpa hprãm xàj Tĩrtũm kõt amnhĩ xunhwÿ nê hkõt ri amnhĩ nhĩpêx rãhã ho pa. Te mẽhõ my kãm kên jaxênh mex prãm nê ma ri hapêr o pa xwÿnhnta pyrãk. 46Nê ra nhÿri omu nê ma tẽ nê prês ã mẽ hkukja. Nhũm mẽ kãm hã ho ohtõ nê harê nhũm ma akupÿm tẽ nê kãm ho õ hprãm xàj hikukrêx piitã ho wênê hpa. Hãmri nê kàxpore jamÿ nê o tẽ nê amnhĩm ho haprõ. Kên jaxênh mexta pix gryk ã hikukrêx piitã ho wênê hpa nê hpãnhã ho amnhĩm haprõ.

—Tã ja pyrã nê na ka htem amex nê ajamakêtkati nê axãmnhĩx ri apa hprãm xàj ixkõt amnhĩ xunhwÿ nê ixkõt pix mã amnhĩ nhĩpêx o apa. Anê.

Kryhti jarênh

Matêwre 13.24-30, 13.36-43

47-48Nhũm Jejus arĩ mẽ inhmã awjarê nê mẽ inhmã:

—E Tĩrtũm kot nhÿrmã tanhmã mẽ harênh to xà hã arĩgro kot paj ixprĩ hã tanhmã mẽ amã harênh to. Te ho mẽmyjaja kot himõ kamã kryhti rênh pyrãk. Kojã mẽ gõx kãm kumẽ nê akupÿm ho api nhũm kamã tep ohtõ nê. Nhũm omu nê kÿx pê amgrã kamã hkapĩ nê ahpÿnhã ri tanhmã kamã kute kawrà. Nê kamã mex kawrà nê kawà kamã kugjê nê mẽ kot hkur kêtja nhũm nhãm kurê. 49Ja pyrã nê Tĩrtũm kot ahpÿnhã ri tanhmã mẽ kot amnhĩ nhĩpêx to hã mẽ omunh xà hkõt tanhmã mẽ hipêx to kaxyw arĩgrota ã ã mẽ hipêx anê. Kojã kapêr o mẽ wrÿk xwÿnhjaja mẽ kot hkõt amnhĩ xunhwÿr xwÿnhjê nê mẽ kot amnhĩ tomnuj o mẽ pa xwÿnhjê kawrà hpa. 50Nê te mẽ kot tep mex nê tep punu kawrà nê nhãm rênhta pyrãk o mẽ hipêx nê ma kuwy hwÿr mẽ o mra nê kamã mẽ kurê. Nhũm mẽ tee ri amnhĩ xà htÿx ã maj amÿra nê tee ri amnhĩ nhĩpêx kaprÿ. Anê.

Nhũm pre ã Jejusja axte mẽ ixpê hkõt mẽ ixpa ho mẽ ixpa xwÿnhjê mã ujarênh anê. 51Hãmri nê mẽ inhmã:

—E xàn ka mẽ atã aprĩ hã ixujarênhnta ma nà?

Anê pa mẽ kãm:

—Tÿ. Nà na pa mẽ atã ixprĩ hã mar mex nê. Anê.

52Hãmri nhũm mẽ inhmã:

—Tôe. Nà ãm hãmri. Na ka xep mē ra ixte mē ahkre nywta mar mex nē. Nē mē akwỳjaja mãânēn Tirtũm kapēr tũm mar mex nē. Te mē apē mēhõ apkur xà rax pyrà nē ma ho mē piitã mē hipêx o ri mē hkõt paja pyræk. Ja pyrà nē kêr ka mē ma mē piitã mē hkõt Tirtũm mē wa ixkapēr o mē ahkre ho ri mē hkõt apa. Anē.

Najare nhõ xwỳnhjaja kot Jejus kaga hã mē harēnh

Makre 6.1-6; Rukre 4.16-30; Juãw 1.11

53 ã Jejus mē inhmã ujarēnh par anē. 54 Hãmri nē ma akupỹm Najare hwỳr mō nē Tirtũm kapēr o mē ahkre xà hã ixkre hwỳr tē nē axà nē mē ahkre ho nhỹ. Nhũm mē amnhĩ jaēr pē tanhmã kot mē ahkre hto hã kuma nē tee ri hkukamã hamaxpēr nē axpēn mã:

—Tk. Kwa kêp mē panhĩõ htã tanhmã kot we amnhĩ to nē ã àhpumunh tỳx kõt mē pamã kapēr anē nē ri mē kãm aa mē kot mēmoj pumunh kêt kwỳ ho anhỹr o pa? 55-56 Na pre mē panoo mã hprêk nhũm mē pahte pahprĩ hã hkwỳjê pumunh. Kêp pĩ kuprãr xwỳnh Juje mē hprõ Marir wa hkraa. Nē kêp Xiakre nē Juje nē Simãw nē Jut mē htõõ. Nē htõxjaja jar mē pakamã pa nhũm mē pahte mē piitã mē omunh mex kênã kot kêt we mē kurom ã àhpumunh tỳx anē. Anē.

57 Hãmri nē kamã gryk nē hkaga. Hãmri nhũm tee ri amnhĩ tã mē omu nē mē kãm:

—Nà Tirtũm nhỹ hã kapēr jarēnh o mē pa xwỳnhjaja na htem krĩ hkwy kamã kãm mē mar prãm nē. Nom õ krĩ kamã mē kot karàre rũm hprêk kãm omunh xwỳnhjaja na htem kuma nē ãm kuma. Anē.

58 Tã mē kot amnhĩ kaxyw hkõt hamaxpēr kêt jakamã nhũm tee ri mē kãm aa mē kot mēmoj pumunh kêt kwỳ ho anhỹr rax prãm. No ãm mē kãm mēmoj to grêre nē ho anē.

Mē kot Juãw Paxis pĩr ã mē harēnh

Makre 6.14-29; Rukre 9.7-9

14 ¹Tã nhũm pika pē Garirej kamã mēõ pahihti Erox Jejus jarēnh ma ²nē tee ri hkukamã hamaxpēr nē hã õ pôristi mã kapēr nē mē kãm:

—Kwa pēr Juãw Paxis na nà? Ra ixte hã ixãmnnēnh nhũm mē kot hpĩr tã mãn tanhmã amnhĩ to nē akupỹm htĩr. Nà pēr tãm kênã. Jakamã na hte aa mē kot mēmoj pumunh kêt kwỳ ho anhỹr o pa. Anē.

³⁻⁵Na pre ra Erox htõ pē hprõptàn ho hprõ. Tõ arĩ htĩr tã nhũm axtem nē kêp utà nē ho hprõ. Hãmri nhũm Juãw Paxisja harēnh ma nē hã kãm akir nē kãm:

—Kwa Eroxis kêp atõ hprõ kênã na ka kêt axtem nē kêp utà nē ho aprõ. Kwa ja omnuj tỳx o omnuj tỳx. Anē.

Hāmri nhūm amnhĩ tã kuma nē kamā gryk nē kot hpĩr kaxyw. Tã nom nhūm Ijaew kot axpēn mā kēp Tĩrtūm nhỹ hã kapēr jarēnh xwỹnh ã harēnh jakamã nhūm mē umaj hpĩr kēt nē. Ām ho prēs nē haxà nhūm hkrĩ ho hkrĩ.

6Tã nhūm jãã nhūm Erox kator ã arĩgro kato nhūm mē hã akuprõ nē hã hkĩnh. Hāmri nhūm hprõ nyw kra niti mē hwỳr axà nē ahte mē hipòk ri mē kãm gre. Mē kot omunh nē kamã hkurē kaxyw nhūm mē noo mā hpijaam kēt nē mē kãm gre o xa. Hāmri nhūm pahi Erox omu nhūm ja kãm mex nē nhūm hkĩnh nē kamã nopyma nē. 7Hāmri nē kãm:

—Nà ãm hāmri na ka ã mē inhmã amnhĩ nhĩpêx anē. Jakamã kwa māmri mēmoj tã ixwỳ. Amã mēmoj prãm xà hkôt hã ixwỳ kot paj amã kugõ. Ām hāmri na pa amã anē. E mēmoj na amã hprãm? Anē.

8Hāmri nhūm kuma nē kãm:

—Ma Juãw Paxis krã na pa inhmã hprãm. Inhmã hkrã krãhta nē pasiiti kamã axà nē ixwỳr o tē nē inhmã agõ. Anē.

Ra katorxà kot kaxyw kãm karõ jakamã nhūm ã hã hwỳr anē. 9Hāmri nhūm Eroxja tee ri kuma nhūm ja kēp omnuj nē. Nom ra mē pikuprõnh rax xwỹnhjê nhĩpòk ri mē noo mā kot kãm: “E māmri amã mēmoj prãm xà hkôt hã ixwỳ pa amã kugõ.” Anhỹr jakamã kãm kot kēp nē hprãm kēt nē. Hāmri nē Juãw Paxis wỳr õ pôristi hkwȳ rē 10nhūm mē ma mē hagjēnh xàta wỳr mra nē unē nē mut krãhta. 11Hāmri nē hkrã mỳ nē pasiiti kamã kuxà nē ma akupỹm nita wỳr o tē nē kãm kugõ nhūm kumỳ nē ma katorxà hwỳr o tē nē kãm kugõ.

12Hāmri nhūm Juãw Paxis kôt mē pa xwỹnhjaja tee ri mē kot hpĩr ã harēnh ma nē ma hwỳr mra nē kumỳ nē ma o mōn haxà. Hāmri nē ma Jejus wỳr mra nē kãm harē.

Jejus kot mē ho ohtõ nē mē kãm mē õ hã harēnh

Makre 6.30-44; Rukre 9.10-17; Juãw 6.1-14

13Hāmri nhūm Jejus Juãw Paxis jarēnh ma nē hkaprĩ nē. Nē ma himõ nhĩkjê hwỳr kapõt ã mōr kaxyw pàr krem axà nē ma mō. Pa mē hkôt ixpa ho ixpa xwỹnhjaja ma hkôt mra. Hāmri nhūm krĩ hkwȳ kamã mē pa xwỹnhjaja harēnh ma nē ohtõ nē ma mē inhĩhkreppikap mra. Nē ra amnhĩ to wa nē mē inhmōr xàja wỳr pøj nē mē ixkutêp hkrĩ. 14Jakamã pa mē mō nē mē hwỳr pøj nē mē omu. Hāmri nhūm Jejus mē omu nē kãm mē hkaprĩ nē mē kãm mē à xwỹnhjê ho mex pa.

15Tã nhūm ra myt àr kaxyw pa mē hkôt ixpa ho ixpa xwỹnhjaja tee ri mē omu nē Jejus wỳr mra nē kãm:

—Kwa na ra amỹkry htỳx nē. Amnhĩ nē mē hano kê mē ma nhỹri krĩ hkwȳ hwỳr mra nē tokyx amnhĩm mēmoj japrõ nē kuku. Mo jar mē apkur xà hã mēõ? Jar akunĩ pix kēnã. Anē.

16Hāmri nhūm mē inhma nē mē inhmã:

— Nà kot paj mẽ hanor kêt nê. Mẽ kajaja kot kaj mẽ kãm õ nhũm mẽ apku. Anê.

17-21 No nhũm mẽ ohtô rax kumrêx. Mẽmyjaja kêp 5.000. Nê kaxyw mẽ hprõ nê mẽ hkrajaja. Jakamã nhũm Jejus ã mẽ inhmã kapêr anê pa mẽ tee ri mẽ hkukamã ijamaxpêr nê kãm:

— Kwa nà mẽ panhõja raxti hã. Mẽ panhõ pãwti kêp sîk pix. Nê kaxyw tep gràja pijakrutre kênã kot kêt mẽ piitã mẽ hipêx. Nà xà kot paj mẽ ma mra nê nhÿri mẽ kãm mẽ mẽmoj japrõ nhũm mẽ kuku? Anê.

Hãmri nhũm mẽ inhmã:

— Nà pu mẽ kãm mẽmoj japrõr kêt nê. Kot puj mẽ kãm mẽ panhõta o anhgrà. E mẽ kãm anê kê mẽ ahpÿnhã ri hije nê hkrĩ hpa. Anê.

Hãmri pa mẽ kuma nê mẽ kãm anê nhũm mẽ piitã hkrĩ hpa. Hãmri nhũm Jejus pãwti mẽ tepja jamÿ nê kaxkwa hwÿr rît nê ho Tirtũm wÿ nê kãm:

— Pa Papaj? Nà apê mẽ inhmã mẽ inhõ ho apa xwÿnh jakamã amex o amex. Anê.

Hãmri nê mẽ kãm ho hkry hpa nê hkõt mẽ ixpa ho mẽ ixpa xwÿnhjê mã kugõ pa mẽ ô ri ho mẽ hipêx pa. Nhũm mẽ piitã apkur o hkrĩ. Mẽõja grire htã nhũm Jejus tanhmã mẽ kãm ho rax to nhũm mẽ ohtô rax kumrêx tã piitã kuku nê ho õhy htu hpa nhũm arĩ mẽõ jakrêx prã. Hãmri pa mẽ akupÿm hakrêx o akuprõ nê ho kawà ho 12 nê ho nÿt pa.

Jejus kot gô krãhkà hã ãm nê htêm ã harênh

Makre 6.45-52; Juãw 6.15-21

22-23 Tã nhũm Jejus mẽ ixpê hkõt ixpa ho ixpa xwÿnhjê mã anê pa mẽ akupÿm pàr mã agjê nê ma xarmã hkukamã mõ. Hãmri nhũm mẽ kot mar o kuhê xwÿnhjê jano nhũm mẽ ma akupÿm hapêx. Hãmri nhũm Jejus kot Tirtũm mã amnhĩ jarênh kaxyw ahte tẽ nê hixêt ã api nê himõk ã kãm amnhĩ jarênh o nhÿ.

Gaa nhũm ra kamàt nhũm arĩ ahte hixêt nhĩmõk ã nhÿ.

24 Rôm pa mẽ pàr kãm mẽ inhmõr xwÿnhjaja kormã himô nhĩpõk ri mõ. Pu nhũm kòk xàpêr tÿx mẽ ixkaxpa. Nê gô axpên tak tÿx nê pa mẽ tee ri rrêmti ho gô rênh nhĩpêx nê tee ri axpên pumu.

25 Tã nhũm krãhyre kà nhũm Jejus man mẽ ixkõt gô krãhkà hã xan tẽ 26 pa mẽ amnhĩ wÿr omu. No nhũm kormã hirã mex kêt jakamã pa mẽ ixprĩ hã omunh mex kêt nê. Hãmri nê tee ri omu nê mẽkarõ hã hkamnhix nê umaj ixàmra rax nê. 27 Hãmri nhũm mẽ inhmã kapêr nê mẽ inhmã:

— Tk. Kwa mẽ amã ma hkêt nê. Pa na pa mẽ akõt tẽ. Anê.

28 Hãmri nhũm Simãw Pêtre kuma nê kãm:

—Kwa xà ka na ka tē? Tôe apê mē inhō Pahihiti jakamā kwa amnhĩ wỳr ixwỳ pa apyrà nē gô krāhkà hã xa nē awỳr tē nà? Anē.

29Hāmri nhũm kām:

—Tôe mamrĩ amnē ixwỳr tē. Anē.

Hāmri nhũm kuma nē pàr rũm kato nē hwỳr tē. Uràk nē gô krāhkà hã hwỳr tē. 30Hāmri nē kormã htêp o htêm mē kôk xapêrta kamã ama nē tee ri amnhĩ kukamã hamaxpêr pê ra àr o mô. Hāmri nē àmra kamã Jejus mã amnhĩ to akir nē kām:

—Kwa tokyx ixto api Pahihiti. Anē.

31Hāmri nhũm hpa hã kupy nē ho àpir kurê kumrêx nē kām:

—Kwa pêr âm kormã ate amnhĩ kaxyw inhmã ajamaxpêr tỳx kêt. Mon ka we ixkamnàr rom māmri man ixwỳr atêmre hkêt nē? Anē.

32Hāmri nhũm wa akupỳn mē ixwỳr tē nē wa axà. Hāmri nhũm kôk katat kôt pinhkrênh pa nhũm gô tãm nôr kurê kumrêx. 33Hāmri pa mē Jejus kot ã amnhĩ nhĩpêx anhỳrja ã omu hāmri nē kãm mex o mex ã harê nē kãm:

—Kwa âm hāmri na hte amnhĩ pê Tirtũm Kra hã amnhĩ jarê. Nà apê Kra kênã. Anē.

Jenêjare kamã Jejus kot akupỳm mē ho mex ã harênh

Makre 6.53-56

34Tã pa mē ra himô hã rê nē Jenêjare hwỳr pôj. 35Hāmri nē ma kapê hã ri ixpa. Hāmri nhũm pika nhô xwỳnh kwỳjaja Jejus pumu nē mē piitã mē kãm harênh o hprôt nē ahpỳnhã hwỳr nhỹhỹnh mē à xwỳnhjê hã karô. Nhũm mē man mē ixwỳr mē o mra 36nē mē ho Jejus wỳ nē kãm:

—Pa? Kwa kê mē à xwỳnhjaja akupỳm mex kaxyw apê axê kupê nà? Anē.

Hāmri nhũm mē kãm:

—Tôe. Kwãr mē māmri mran hkupê. Anē.

Hāmri nhũm mē kuma nē axpên pãnhã hwỳr mra nē kêp ê pix kupênh tã ra akupỳm mex nē ma akupỳm mra.

Parijew nhô xwỳnh mē Tirtũm kapêr tũm o mē ahkre xwỳnhjê jarênh

Makre 7.1-13

15 1Tã nhũm Parijew nhô xwỳnh mē Tirtũm kapêr tũm o mē ahkre ho mē pa xwỳnhjaja Jerujarê rũm ma Jejus wỳr mra. Na htem mē ixkukamã mē inhĩgêjtê pyrà nē apkur kaxyw nē amnhĩ nhĩhkra kuhõnh ryy nē. Amnhĩ nhĩhkra htyk pix kuhõnh nē hkrĩ hkêt nē âm amnhĩ nhĩhkra kuhõnh japjêê nē. Nê õ prat kuhõnh japjêê nē kormã apkur kaxyw hkrĩ. Tirtũm kot ja hã mē omunh nē mē mex ã mē harênh ã amnhĩ kamnhix jakamã na pre ã amnhĩ nhĩpêx anhỳr o pa. Jakamã nhũm mē ma Jejus wỳr mra. 2Hāmri nē omu nē kãm:

— Pa Jejus? E kwa mẽ inhmã mẽmoj jarẽ. Amnepêm mẽ panhîgêtjaja na prem apkur kaxyw nẽ amnhĩ nhĩhkra kuhõnh japjê nẽ rĩ kormã apku. Tã pa htem arĩ ijaxwỳja ã amnhĩ nhĩpêx anẽ. No akõt mẽ pa ho mẽ pa xwỳnhjaja na htem mẽ ixpyrà nẽ ã amnhĩ nhĩpêx anhỹr kêt nẽ. Kwa mo na htem amnhĩ nhĩhkra tyk kuhõnh tokyx anẽ nẽ hkrĩ nẽ apku? Anẽ.

3Hãmri nhũm mẽ kuma nẽ mẽ kãm:

— Tk. Na ka htem ãm mẽ panhîgêtjê hkõt pix mã amnhĩ nhĩpêx o apa no Tĩrtũm kapêr kõt amnhĩ nhĩpêx kêt nẽ. 4Tĩrtũm na pre mẽmoj tã mẽ pamã karõ ho:

Kêr ka mẽ anhĩpêxà nẽ mẽ akatorxà wa hã apijaam nẽ mẽ ho ajuta rãhã ho ri apa. Kot kaj mẽ ã amnhĩ nhĩpêx anhỹr kêt nẽ tanhmã mẽ kãm akapêr punuj to ho ri apa. Hã koja mẽ akwỳjaja ja mỳrapê mẽ apa. Anẽ.

— Na pre ã Tĩrtũmja mẽ pamã karõ anẽ. 5No mẽ kajaja na ka htem ã akwỳjê mã karõ anhỹr kêt nẽ. ãm kapêrja kwỳm na ka htem mẽ kãm karõ nẽ mẽ kãm:

Kot kaj mẽ mẽmo arĩgro hã akàxpore japêr nom kêr ka mẽ ho tanhmã akatorxà rỳ anhĩpêxà ho ajuta hto kaxyw wa kãm hkwỳ nhõr kêt nẽ. ãm ho ate wa ho ajuta hkêt ã wa kãm amnhĩ jarẽ hãmri nẽ Tĩrtũm mã amnhĩ jarênh xà hã ixkre hwỳr o tẽ nẽ mẽ ixte tanhmã ixkreta ho mex to kaxyw mẽ inhmã agõ. Kot kaj mẽ ã amnhĩ nhĩpêx anẽ nhũm Tĩrtũm ja hã mẽ apumu nhũm ja kãm mex nẽ. Kêr ka mẽ ã amnhĩ nhĩpêx anhỹr o ri apa.

— Anhỹr o na ka htem mẽ kãm karõ ho ri apa. 6Nom Tĩrtũm kapêr tũm kot ã ja jarênh anhỹr kêt. ãm amnhĩ krã hkõt na ka htem ã mẽ kãm karõ punuj o ri apa anẽ. Te mẽ akapêrja mex o kot Tĩrtũm kapêr jakrenh pyrãk. 7Mẽ ate Tĩrtũm kõt amnhĩ nhĩpêx ã amnhĩ jarênh tã ãm amnhĩ to axêx nẽ hkõt amnhĩ nhĩpêx kêt nẽ. Na pre Tĩrtũm amnepêm mẽ akukamã tanhmã mẽ ajarênh to. Nhũm ý hã mẽ kãm kapêr jarênh xwỳnh Ijaisja ô ri mẽ kãm mẽ ajarẽ nẽ hã kagà. Te Tĩrtũm tãm kot mẽ ajarênh pyrãk. 8Na pre mẽ akukamã mẽ ajarênh o:

Mẽ kãm ixkĩnh ã mẽ kot amnhĩ jarênh tã mẽ kãm ixkĩnh kêt. Na htem kãm ixprãm ã amnhĩ jarênh kaprỳ.

9 Mẽ kot ixkuhpa hã amnhĩ krã hkõt mẽmoj tã hkwỳjê mã karõ ho pa jakamã na htem kot ixkõt amnhĩ nhĩpêx o pa hã amnhĩ jarênh kaprỳ. Anẽ.

— Na pre ã Ijaisja Tĩrtũm nhỹ hã mẽ akukamã mẽ ajarẽ nẽ mẽ atã kagà anẽ. Anẽ.

Nhũm pre ã Jejus Parijew nhõ xwỳnhjê mẽ Tĩrtũm kapêr tũm o mẽ ahkre xwỳnhjê mã kapêr anẽ.

Mêmoj kot mẽ pahomnu hã harênh

Makre 7.14-23

10Tã nhũm Jejus amnhĩ wỳr mẽ kot mar o kuhê xwỳnhjê hwỳ nẽ axte mẽ kãm kapêr nẽ mẽ kãm:

—E mẽ inhma nẽ inhmar tỳx nẽ. 11Na hte Tĩrtũm kapêr tũm o mẽ ahkre xwỳnhjaja amnhĩ krã hkôt mẽ ate amnhĩ nhĩhkra kuhõnh japjê hã mẽ amã karõ ho pa. Nẽ amnhĩ krã hkôt mẽ axàpkur xà hã tanhmã mẽ amã karõ hto ho pa. Tĩrtũm kot ja hã mẽ apumunh kôt mẽ amex ã mẽ ajarênh kaxyw ã mẽmoj tã mẽ amã karõ anẽ. Nom na hte Tĩrtũm tanhmã mẽ kot amnhĩ nhĩhkra kuhõnh to hã mẽ omunh xà hkôt tanhmã mẽ harênh to hkêt nẽ. Rỳ mẽ axàpkur xà pumunh kôt mẽ mex ã mẽ ajarênh kêt nẽ. Ja tanhmã kãm kute hkêt. Na hte ã mẽ kot amnhĩ nhĩpêx anhỳr ã mẽ omunh xà hkôt mẽ mex ã mẽ harênh rỳ mẽ mex kêt ã mẽ harênh kêt nẽ. Na hte mẽmoj kur ã mẽ omu nẽ ãm mẽ omu nẽ hã tanhmã mẽ harênh to hkêt nẽ. ãm mẽ kapêr punuj rỳ mẽ kapêr mex ã mẽ mar kôt pix mã na hte tanhmã mẽ harênh to. Anẽ.

12Nhũm pre ã Jejus mẽ kãm kapêr anẽ pa mẽ hkôt mẽ ixpa ho mẽ ixpa xwỳnhjaja kuma hãmri nẽ hwỳr mra nẽ kãm:

—Kwa na ka ã mẽ kãm akapêr anẽ nhũm Parijew nhõ xwỳnhjaja tee ri ama nhũm ja mẽ kêp omnuj nẽ. Anẽ.

13-14Hãmri nhũm mẽ inhma nẽ tanhmã mẽ inhmã Parijew nhõ xwỳnhjê jarênh to nẽ hprĩ hã mẽ hkukamã mẽ harênh o:

—Tk. Kwâr mãmrĩ mẽ kêp omnuj. Mẽ kot Tĩrtũm kapêr tũm o mẽ ahkre ho pa htã na htem hkôt amnhĩ nhĩpêx kêt. Jakamã te mẽ nohkre xwỳnh kot amnhĩ nhĩpêx pyrãk. Kojã mẽhõ nohkre htã amnhĩ kôt nhỹhỹm nohkre hõ ho mẽ hãmri nẽ wa hamẽ pry pumunh kêt nẽ htỳx mẽ hãmri nẽ nhỹri ahkrehti kamã tẽm. Tã Parijew nhõ xwỳnhjaja te kot wam htẽm xwỳnhhta pyrãk nhũm mẽ kot mẽ mar xwỳnhjaja te kot wam htẽm xwỳnh kôt hõ htẽmta pyrãk. Jakamã Parijew nhõ xwỳnhjaja mẽ kot mẽ mar o pa xwỳnhjê mẽ kojã mẽ hpimràatã nhỹrmã te ahkrehti kamã rôrôk par pyrãk o amnhĩ nhĩpêx nẽ mex kêt nẽ pa ho pa. Kojã kaxkwa kamã inhõ Papaj nhỹrmã amnhĩ nẽ mẽ hanor pa.

—Inhõ Papaj te kêp mẽmo hy hkre ho pa xwỳnhhta pyrãk. Na htem mẽmo hy hkre nhũm higrõt hapôj nẽ higrõt mex nẽ. Hãmri nhũm mẽ hwỳr mra nẽ omu nẽ nẽ mẽmoj nhĩgrõt punuj jarê nẽ kurẽ. Ja pyrã nẽ kojã nhỹrmã inhõ Papaj amnhĩ nẽ Parijew nhõ xwỳnhjê janor pa nhũm mẽ mex kêt nẽ pa ho pa. Jakamã kwa kêr ka mẽ hkôt ri amnhĩ nhĩpêx kêt nẽ. Anẽ.

Nhũm pre ã Jejus mẽ ixte hkôt ixpa ho ixpa xwỳnhjê mã hprĩ hã Parijew nhõ xwỳnhjê hkukamã ã mẽ harênh anẽ pa mẽ mar o ixkrĩ.

15Hāmri nhūm Simāw Pêtre tee ri Tirtūm kot mẽ apkur xà hã mẽ omunh xà hkôt tanhmã mẽ harênh to hkêt ã harênh ma. Nê ãm tanhmã mẽ kapêr to pix ã mẽ mar kôt tanhmã mẽ harênh toja ma hāmri nê hã Jejus kukja nê kãm:

—Kwa mon ka ri ã ja jarênh anê Pahihti? Anê.

16Hāmri nhūm kuma nê hprĩ hã mẽ inhmã awjarê nê mẽ inhmã:

—Kwa xàn ka mẽ kormã aprĩ hã ja mar kêt nê? 17E pa ixprĩ hã mẽ amã harê ka mẽ inhma. Nà na htem mẽmoj ku nhūm hte mẽ hkrã hi hwÿr gjêx kêt nê. Na hte mẽ ôhy pix wÿr agjê nê gaa nê nhãm hapôj nê hapêx. Na htem mẽ apkur xàja ku nê ÿ hã tanhmã amnhĩ tomnu hto hkêt nê. Jakamã na hte Tirtūm ja hã mẽ omunh xà hkôt tanhmã mẽ harênh to hkêt nê. 18Ãm mẽ hkrã kamã mẽ hamaxpêr punuj pix nhÿ hã mẽ kot tanhmã amnhĩ tomnuj to jakamã na hte Tirtūm mẽ hamaxpêr ã mẽ omunh xà hkôt tanhmã mẽ harênh to. 19Koja mẽhõ tanhmã hamaxpêr punuj to nê ra hkôt amnhĩ tomnuj pix o pa. Na htem nhãm mẽ hpar o pa nê mẽ kêp ahkĩ nê amnhĩ to hêx nê mẽ hakwa kamã nhãm axpên mã mẽ hixi jarênh o pa. Nê nhãm mẽ kêp mẽ hprõ ho amnhĩkati nê mẽ hkuprÿ hwÿr mra nê mẽ ho amnhĩkati. Nê tanhmã ri axpên tomnuj to ho pa. 20Mẽ hamaxpêr punuj nhÿ hã na htem ã amnhĩ nhĩpêx anhÿr o pa. No na hte Tirtūm mẽ kot amnhĩ nhĩhkra kuhõnh japjê hkêt ã mẽ omunh xà hkôt mẽ kot amnhĩ to mex xwÿnh ã mẽ harênh kêt nê. Ja tanhmã kãm kute hkêt. Anê.

Jejus kot Ijaew kêt xwÿnh ni kamã ukaprĩ hã harênh

Makre 7.24-30

21Tã nhūm Jejus mẽ inhmã kapêr pa hāmri nê mẽ inhmã anê pa mẽ ma hkôt mõ. Ma Xir mẽ Sitôja wa pu hã ri ixpa. 22Nhūm mẽhõ nija omu nê hwÿr tẽ. Mẽ ixkĩnhã kêp Ijaew kêt tã hwÿr tẽ. Kanaã nhõ xwÿnh na pre. Tã Jejus wÿr tẽ nê kãm:

—Ka Pahihti Jejus? Apê Tirtūm kot mẽ ixwÿr amênh xwÿnh jakamã xê ixujarênh ma nê ixkamã axukaprĩ hkêt wehe. Na mẽkarõmnutija tanhmã ixpê ixkra ho nhūm ixpê omnuj tÿx kumrêx. Anê.

23Hāmri nhūm Jejus kuma nê ãm kuma nê kãm tanhmã nê hkêt nê. Jakamã pa mẽ ixpê hkôt ixpa ho ixpa xwÿnhjaja kãm:

—Kwa hano kê ma akupÿm têê ri. Na ãm ri mẽ pahkôt xatã hkrata jarênh pix o ri pa. Anê.

24Nom nhūm kot amnhĩ tã kamã hamak kaxyw tanhmã mẽ inhmã hã kapêr to nê mẽ inhmã:

—Nà ãm Ijaewjê pix wÿr na pre Tirtūm inhmê. Te mẽ kêp ôwêhti pikunor pyræk o na htem htÿx ri amnhĩ nhĩpêx o pa. Jakamã ãm mẽ hwÿr pix mã na pre inhmê. Na kormã inhmã tanhmã nhãm mẽ hkwÿjê jarênh to hkêt nê. Anê.

25Hāmri nhūm nitita tee ri amnhĩ tã kuma nê hwỳr tẽ nê kutã hkônkrã ho htêm nê nhỹ nê kãm:

— Xê ma we ixkamã axukapřĩ hkêt wehe. Anẽ.

26Hāmri nhūm kãm:

— Nà kormã. Na pre Tirtũm mẽ kêp Ijaewjê pix wỳr inhmẽ. Jakamã na pa kormã nhãm tanhmã mẽ akwỳjê ho mex to hkêt nê. Anẽ.

27Hāmri nhūm kãm:

— Ma ãm hāmri na ka akapêr. Nom ixpê Ijaew kêt tã mẽ kuxwar ãm ixto mex grire kêt wehe. Anẽ.

28Hāmri nhūm kuma nê kãm:

— Nà ãm hāmri na ka ã akra kaxyw inhmã ajamaxpêr tỳx anẽ. Jakamã kot paj nê mẽkarõmnutita jano. Koja axte tanhmã apê ho hkêt kumrêx.

Anhỹr o kãm kapêrja rôm nhūm hkraja akupỹm mex kurê kumrêx.

Jejus kot mẽ à xwỳnhjê ho ohtô nê mẽ ho mex ã harênh

Makre 7.31-37

29Tã nhūm Jejus mẽ inhmã anẽ pa mẽ ixrohã krĩja pê ixkato nê ma himô rax pê Garirej wỳr mō. Nê nhỹri gô mỳri hixêt wỳr mō nê hã api nê ixkrĩ. 30Hāmri nhūm mẽ ohtô nê ma mẽ ixkôt mra. Nê mẽ à xwỳnhjaja nhūm mẽ hamỳ nê Jejus wỳr mẽ o mra. Na prem ohtô rax kumrêx. Ra ri mẽ pa hkêt xwỳnhjaja nê mẽ nohkre xwỳnhjaja nê mẽ hyk o mẽ pa xwỳnhjaja. Nê mẽ kapêr kêt xwỳnhjaja nê ahpỳnhã ri tanhmã mẽ à kute xwỳnhjaja nhūm mẽ hamỳ nê ma Jejus wỳr mẽ o mra nê kutã mẽ haxwỳ. Hāmri nhūm mẽ omu nê ahpỳnhã akupỹm mẽ ho mex pa. 31Jakamã na pre mẽ kapêr kêt xwỳnhjaja akupỹm kapêr mex nê. Nê ri mẽ pa hkêt xwỳnhjaja akupỹm mrrar mex nê. Nê mẽ hyk o mẽ pa xwỳnhjaja akupỹm tãm ri mra. Nê mẽ nohkre xwỳnhjaja akupỹm rĩt mex nê. ã ahpỳnhã akupỹm mex par anẽ. Hāmri nhūm mẽ kot hwỳr mẽ hamỳnh nê Jejus wỳr mẽ o mrrar xwỳnhjaja amnhĩ jaêr pê akupỹm mẽ mex ã mẽ omu nê mẽ kamã no puma nê hkĩnh nê. Hāmri nê Tirtũm mã mex o mex ã harê nê axpêh mã harênh o:

— Nà ãm hāmri mẽ panhõ Tirtũmja ãm mex o mex. Anẽ.

Jejus kot mẽ ho 4.000 nê mẽ kãm mẽ õ hã harênh

Makre 8.1-10

32Tã nhūm Jejus mẽ ixte hkôt ixpa ho ixpa xwỳnhjaja amnhĩ wỳr mẽ ixwỳ nê mẽ ixkôt mẽ mrrar xwỳnhjê jahkre nê mẽ inhmã:

— E. Ka mẽ rĩ kam jajê pumu. Na pa ra inhmã mẽ hkapřĩ nê. Na mẽ pahkôt ri pa hã apkati axkrunêpxi nhūm ra mẽ kêp mẽõja hapêx pa. Koja mẽ apkur kêt rãhã ma akupỹm mẽ õ krĩ hwỳr pa hāmri nê pry hã hirot nê rôrôk o pa. Mẽ õ krĩ hwỳr awryy. Anẽ.

33Nhũm pre ã mẽ inhmã mẽ harênh anê pa mẽ tee ri kuma hãmri nê kãm:

—Kwa nom nhÿri kot pu mẽ kãm mẽmoj japrô nhũm mẽ tokyx kuku? Ja kapôt pix kênã. Nê mẽ ohtô griiã. Anê.

34Hãmri nhũm mẽ inhmã:

—No mẽ panhõ pãwtita? Tanhmã na arĩ kute nê hikwÿ? Anê.

Hãmri pa mẽ kãm:

—Nà ãm kêp 7 pix. Nê kaxyw tep kwÿ no ãm grêre. Kot mẽ ho dare kaxyw ã. Anê.

35Hãmri nhũm mẽ inhma nê mẽ ixkôt mẽ mrrar xwÿnhjê mã anê nhũm mẽ hkrĩ pa. 36Hãmri nhũm pãwti mẽ tep grêreta jamÿ nê ho Tirtũm wÿ nê kãm:

—Pa Papaj. Nà apê mẽ inhmã mẽ inhõ ho apa xwÿnh jakamã amex o amex. ãm amex kumrêx. Anê.

Hãmri nê mẽ kãm mẽmojta o hkry hpa nê mẽ inhmã kugõ pa mẽ ô ri ho xa nê ho mẽ hipêx pa. 37-38Hãmri nhũm mẽ piitã apku nê ôhy htu hpa. Nhũm prem mẽmyjaja kêp 4.000 nê kaxyw mênijaja nê mẽhprijaja. Mẽ ohtô rax kumrêx tã nhũm Jejus mẽõ ho mẽ hipêx pa. Hãmri pa mẽ hakrêx o akuprõ nê ho kawà ho 7 nê ho nÿt. 39Hãmri nhũm Jejus ma akupÿm mẽ ô krĩ hwÿr mẽ hano pa mẽ pãr krem agjê hãmri nê ma ijaxwÿja mõ. Ma pika pê Makatã hwÿr mõ.

**Parijew nhõ xwÿnh kwÿ kot aa mẽ kot mẽmoj pumunh kêt õ
ho anhÿr ã Jejus wÿr ã mẽ harênh**

16 ¹Tã pa mẽ ra hwÿr pøj nhũm Parijew mẽ Satusew nhõ xwÿnhjaja Jejus pumu nê hwÿr mra. Nê hêx rom kot kamã hamak kaxyw hwÿr mra nê kãm:

—Pa Jejus? E kwa mẽ inhmã aa mẽ ixte mẽmoj pumunh kêt õ ho anê nà? Pa mẽ ate ho anhÿr ã apumu nê Tirtũm kot mẽ ixwÿr amênh ã akôt ijamaxpêr kurê kumrêx. E kwa tokyx. Anê.

2-3Hãmri nhũm mẽ kuma nê mẽ kãm:

—Tk. Nà kot paj mẽ amã ho anhÿr kêt nê. Mẽ ate hã ixpumunh nê ixkôt ajamaxpêre kaxyw ã. Na ka htem kaxkwa kamã kakrã pumu nê axpên mã na wrÿk ã harê. Nê kaxkwa mex pumu nê axpên mã amgrã hã harê. Tã ixte tanhmã mẽ amã mẽmoj nhĩpêx to hã ixpumu nom Tirtũm kot mẽ awÿr inhmênh xwÿnh ã ixkôt ajamaxpêr kêt nê. 4Ãm mẽ ajamaxpêr punuj pix o na ka htem ri ajamaxpêr o apa. Ixpê Tirtũm kot mẽ awÿr inhmênh xwÿnh tã ka mẽ ja hã ixkôt ajamaxpêr kêt nê. Tã mẽ ate aa mẽmoj pumunh kêt kwÿ ixte mẽ amã ho anhÿr kaxyw ka mẽ inhmã hã karõ. Nà kot paj mẽ amã ho anhÿr kêt nê. Kormã. Kot paj ãm nhÿrmã te amnepêm Jõhti kot amnhĩ nhĩpêx pyrãk o amnhĩ nhĩpêx. E

ja pix kot paj mẽ amã harê. Nom kot paj mẽ amã aa mẽ ate mẽmoj pumunh kêt õ ho anhÿr kêt nê. Anê.

Nhũm pre ã Jejus mẽ kãm kapêr anê hãmri pa mẽ ixrohã mẽ kêp ixkato nê ma ixpa.

Jejus kot hkôt mẽ pa xwÿnhjê jahkre hã harênh

Makre 8.14-21

5Tã pa mẽ Jejus mẽ ixrohã ma mõi nê pàr mã agjê nê ma xarmã akupÿm rê nê hikjê hã mõi. Hãmri nê tee ri mẽ ixàpkur xà japêr nê axpên mã:

—Kwa na pu mẽ panhõ pãwti ho pajamakêtkati nê kure. Anê.

6Hãmri nhũm Jejus mẽ inhma nê tanhmã mẽ inhmã Parijew mẽ Satusew nhõ xwÿnhjê jarênh to. Nom pãwti hã kuxi nê mẽ inhmã mẽ harê nê mẽ inhmã:

—Kwa mẽ o kora. Kêr ka mẽ Parijew mẽ Satusew nhõ xwÿnhjê mẽ kêp pãw kaxkrit xà hkwy hpyr kêt nê. Anê.

7Hãmri pa mẽ tee ri kuma nê ixprĩ hã mar mex kêt nê. Nê arĩ kapêrta ã axpên kukjêr o hkôt mõi nê axpên mã:

—Kwa mẽ pahte mẽ panhõ pãwti rer jakamã mãn mẽ pahte mẽ õ pãw kaxkrit xà kwÿ hpyr nê mẽ pahkurê nà? Anê.

8Hãmri nhũm mẽ inhma nê mẽ inhmã:

—Hêxta waa nê. Mon ka mẽ ãm axpên mã mẽ panhõ pãwti hkêt pix jarênh o mõi? Pêr kormã mẽ ate amnhĩ kaxyw inhmã ajamaxpêr tÿx kêt. 9Jãã ixte mẽ anoo mã pãwti kêp 5 pix tã nhũm ixte ho mẽ kêp 5.000tajê nhĩpêx par. Nhũm mẽ kot hkur nê ho õhy htu hpar nhũm mẽ ate mẽõ jakrêx o apikuprõnh par nê ho kawà ho 12 nê ho hipu. 10Nê ham pãwti kêp 7 o mẽ kêp 4.000 nhĩpêx par nhũm mẽ kot hkur nê ho õhy htu hpar nhũm mẽ ate mẽõ jakrêx o apikuprõnh raxja. 11Ra ixte mẽ anoo mã ja ho anhÿr o axkrut tã ka mẽ ra hã ano hkêt nê arĩ axpên mã mẽ paxàpkur xà pix jarênh o ixkôt mõi. Nà mẽ paxàpkur xàja na pa harênh kêt nê. Parijew mẽ Satusew nhõ xwÿnhjê nhõ pãwti kaxkrit xà pix na pa hã kuxi nê mẽ amã tanhmã harênh to. Anê.

12Nhũm pre ã mẽ inhmã kapêr anê hãmri pa mẽ atã kuma nê kãm:

—Nà na pa xep mẽ hãmri tã ama. Xep mẽ ixte Parijew mẽ Satusew nhõ xwÿnhjê kapêr kôt amnhĩ nhĩpêx nê na ka mẽ ixkurê nê ã mẽ harênh anê. Anê.

Jejus kot amnhĩ tã hkôt mẽ pa xwÿnhjê kukjêr ã harênh

Makre 8.27-30; Rukre 9.18-21

13Tã pa mẽ axte Jejus kôt mõi nê pika pê Sejarej Piripos kamã kormã mõi nhũm Jejus amnhĩ tã mẽ ixkukja nê mẽ inhmã:

—E mẽ inhmã mẽmoj jarẽ. Tanhmã na hte mẽ akwỳjaja axpẽn mã ijarẽnh to wehe? Anẽ.

14Hãmri pa mẽ kãm:

—Nà na htem ahpỳnhã tanhmã ajarẽnh to. Na hte kamã mẽ hkwỳjaja ajarẽnh o finat Juãw Paxis ã ajarẽ. Nhũm kamã mẽ hkwỳjaja ato finat Eris ã ajarẽ nhũm mẽ hkwỳjaja tōhã apê Tirtũm nhỹ hã akapẽr o apa xwỳnhjê hō akupỳm atĩr ã ajarẽ. Nẽ tōhã finat Jeremĩstija rỳ axtem hō hã ajarẽ. Ā na htem ahpỳnhã axpẽn mã ajarẽnh anẽ. Anẽ.

15Hãmri nhũm mẽ inhma nẽ mẽ inhmã:

—No mẽ kajaja? Ixpê mẽhō hã na ka htem axpẽn mã ijarẽ? Anẽ.

16Hãmri nhũm Simãw Pêtre kãm:

—Nà apê Tirtũm kot mẽ ixkaxyw axãm nẽ mẽ ixwỳr amẽn h xwỳnh na ka. Nẽ apê mẽ ixpiitã mẽ inhō Pahi Maati na ka. Ā na pa htem axpẽn mã ajarẽnh anẽ. Anẽ.

17Hãmri nhũm kuma nẽ kãm:

—Nà ãm hãmri na ka ã ijarẽnh anẽ Simãw Pêtre. Nom amnhĩ krã hkõt na ka ã ijarẽnh anhỹr kêt nẽ. Tirtũm tãm kot amã ixto amnhĩrit xà hkõt na ka ã ijarẽnh anẽ. 18Nà akumrẽx na ka ã ijarẽnh anẽ. Tã koja mẽ apyrà nẽ nhỹrmã mẽ kot ixkõt amnhĩ xunhwỳr xwỳnhjaja ma hkwỳjê mã ja hã ijarẽnh o ri krĩ piitã hkõt pa. Hãmri nhũm mẽ hkwỳjaja mẽ kuma nẽ mẽ apyrà nẽ ixkõt amnhĩ xunhwỳ. Hãmri nhũm mẽ kệp ixprãm nõkati xwỳnhjaja tee ri tanhmã mẽ kot ijarẽnh toja ma nẽ ã ijarẽnh anhỹrja nẽ mẽ kãm kapẽr tã nom ho hkapyrỹ. Ā koja ixkõt mẽ kot amnhĩ xunhwỳr xwỳnhjaja mẽ kãm ijarẽnh o pa anẽ. Jao te mẽ apê kẽn nhũm ixte mẽ ato amnhĩm inhōrkwỹ nhĩpêx pyræk. Tã akumrẽx ate ã ijarẽnh kot anhỹr jakamã kot paj te ixte akumrẽx amỳnh nẽ ato ixtẽm nẽ inhōrkwỹ nhĩpêx kaxyw amnhĩm akumrẽx axãm pyræk o anhĩpêx Simãw Pêtre.

19—E kêt ka ma inhỹ hã tanhmã mẽ piitã mẽ kãm ijarẽnh to ho ri apa. Mẽ kot hprĩ hã amar kaxyw. Koja mẽ hkwỳjaja ama nẽ amnhĩ kaxyw ixkõt hamaxpẽr nẽ ixkõt amnhĩ xunhwỳ. Ka ja hã mẽ omu nẽ mẽ kãm: “E ra mẽ ate Jejus kõt amnhĩ xunhwỳr jakamã kot ka mẽ nhỹrmã ty nẽ ma kaxkwa hwỳr api nẽ Tirtũm mẽ wa kuri amex kumrẽx nẽ atĩr tũm nẽ apa ho apa.” Anhỹr o mẽ kãm ijarẽnh o apa. No mẽ kot akapẽr mar nẽ ãm mar nẽ ixkõt amnhĩ xunhwỳr kêt xwỳnhjaja ka mẽ kãm: “No mẽ kajaja mẽ ate Jejus kõt amnhĩ xunhwỳr kêt jakamã kot kaj mẽ nhỹrmã Tirtũm mẽ Krata wa kuri atĩr tũm nẽ apa ho apa hkêt nẽ.” Anhỹr o ã inhỹ hã mẽ kãm akapẽr anhỹr o ri mẽ hkõt apa. Jao te ate kaxkwa hwỳr saf pyr nẽ Tirtũm krajê mã kahê xà rẽn h nẽ Tirtũm kra hkêt xwỳnhjê pẽ kahê pyræk o amnhĩ nhĩpêx o apa. Anẽ.

Nhũm pre ã Jejus Simãw Pêtre mã kapẽr anẽ. 20Hãmri nẽ hpãnhã mẽ ixpiitã mẽ inhmã kapẽr nẽ mẽ inhmã:

—E. Kwa kêr ka mẽ kormã mẽ piitã mẽ kãm Tirtũm kot mẽ awÿr inhmẽnh ã mẽ kãm ijarẽnh o ri apa hkêt nõ. Kormã. Anẽ.

Jejus kot amnhĩ kukamã amnhĩ jarẽnh ã harẽnh

Makre 8.31-33; Rukre 9.22

21Hãmri nhũm Jejus hprĩ hã amnhĩ kukamã tanhmã mẽ inhmã amnhĩ jarẽnh to nõ mẽ inhmã:

—Nà mẽ kajaja mẽ ate aprĩ hã ixpumunh mex. No mẽ pahkwÿjjaja kãm hprĩ hã ijarẽnh mar nõ ixpumunh prãm kêt. Ijaew krãhtũmjaja nõ Tirtũm kapẽr tũm o mẽ ahkre xwÿnhjaja nõ patre krãhtũmjaja. Mẽ kãm hprĩ hã ixpumunh nõ mẽ kãm ixkapẽr mar prãm kêt jakamã kot paj tokyx ma Jerujarẽ hwÿr mõ nhũm mẽ kamã ixpynẽ nõ ixtak rax nõ ixpĩ. Nom kot paj ixytk ã apkati axkrunẽpxi nhũm Tirtũm akupÿm ixto ixtĩr. Anẽ.

22Hãmri nhũm Simãw Pẽtre tee ri kot ã mẽ kãm amnhĩ jarẽnh anhÿrja ã kuma nõ hwÿr tẽ nõ hpa hã kupy nõ mẽ ixpẽ ho kato nõ mẽ ixkãx ã o xa. Nẽ ã kot amnhĩ jarẽnh anhÿrja nõ mẽ kãm kapẽr nõ mẽ kãm:

—Kwa nà Pahihti. Ri ã amnhĩ jarẽnh anhÿr kêt nõ. Mo kot kêt mẽ ri axtem nõ ã anhĩpẽx anẽ? Anẽ.

23Hãmri nhũm kuma nõ hwÿr apkjẽ nõ omu nõ mẽ kãm:

—Tk. Te apẽ Satanasti kapẽr pyrãk o na ka ã inhmã akapẽr anẽ. Kot kaj ã akapẽr anẽ hãmri nõ ixkõt apa hkêt nõ. Tirtũm kãm hprãm xã hkõt na ã mẽ kot inhĩpẽx anhÿr kaxyw kẽnã. Tã ka Tirtũm jamaxpẽr o ajamaxpẽr kêt nõ amnhĩ jamaxpẽr o ã inhmã akapẽr anẽ. Te apẽ ixpẽ axãmnrã xwÿnh pyrãk o amnhĩ nhĩpẽx. Anẽ.

Jejus krajaja kot tanhmã amnhĩ nhĩpẽx to hã mẽ harẽnh

Makre 8.34-9.1; Rukre 9.23-27; Juãw 12.24-26; mããnẽn Rõmãn 15.1; Wam Korĩt 10.23-24; Karatas 5.24; Pirĩpos 2.4; Wam Pẽtre 4.1; Apokarip 2.10, 12.11

24Nhũm pre ã Jejus Simãw Pẽtre mã kapẽr anẽ hãmri nõ hpãnhã mẽ ixpẽ hkõt ixpa ho ixpa xwÿnh piitã mẽ inhmã kapẽr nõ mẽ inhmã:

—E kot kaj mẽ ixkõt amnhĩ xunhwÿr ã amnhĩ jarẽ hãmri nõ mããnẽn amnhĩ jarẽnh o: “Jejus kẽp inhõ Pahihti jakamã kot paj kapẽr kõt pix mã amnhĩ nhĩpẽx rãhã ho ri ixpa. Kwãr ixkwÿjjaja tanhmã hã inhĩpẽx hto.” Anhÿr o amnhĩ jarẽ.

25—Koja mẽ ixtã mẽ atõx pĩ rÿ tanhmã mẽ atõ hto ka ty. Tã nom koja akaxwÿnh ma ixwÿr àpir kurẽ kumrẽx. Hãmri ka ixkuri atĩr tũm nõ amex rãhã nõ apa ho apa. Nom kot kaj mẽ jar atĩr prãm xaj ixkaga hãmri nõ inhõ krĩ hwÿr axàpir kêt nõ.

26—Nẽ koja mẽhõ hikukrẽx rax gryk ã Tirtũm kaga. Tã nhÿrmã ty hãmri nõ amnhĩ kõt hikukrẽx õ hpyr nõ o mõr kêt nõ. Koja tee ri kuwy

hwÿr mōr pymaj amnhĩ nê hikukrêx rax o amnhĩ pãnhã amnhĩrer prãm kaprÿ. Tanhmã koja amnhĩ to nê Tĩrtũm mã amnhĩre nê ma õ krĩ hwÿr api? Koja ã amnhĩ nhĩpêx anhÿr kêt nê.

27—Nê ixpê Tĩrtũm kot mē awÿr inhmēnh xwÿnh kot paj nhÿrmã kaxkwa rũm akupÿn mē awÿr wrÿ nhũm Tĩrtũm kapêr o mē wrÿk xwÿnhjaja man ixkõt wrÿ. Hãmri pa inhõ Papaj nhÿ hã ixte mē piitã tanhmã mē kot amnhĩ nhĩpêx to hã mē omunh xà hkõt ahpÿnhã tanhmã mē harēnh to. 28 ãm hãmri na pa ã mē amã amnhĩ jarēnh anê. Kot paj nhÿrmã akupÿn ixte mē ato amnhĩptàr kaxyw man mē awÿr wrÿ. Tã kot kaj mē akwÿjaja akupÿn ixwrÿyta kukamã tokyx ixte tanhmã ixte amnhĩ nhĩpêx to hã ixpumu. Anê.

Jejus kot hixêt prêk nhĩmõk ã hirã kamã ãm ã harēnh

Makre 9.2-13; Rukre 9.28-36; mããnhēn Sikũn Pêtre 1.16-18

17 1Tã nhũm semãnja hapêx nhũm Jejus ma nhÿri hixêt prêk wÿr mō. Nê kaxyw Simãw Pêtre nê Xiakre nê Xiakre htõ Juãwja nhũm ma amnhĩ kõt wa mē o mō. Nhũm wa mē mō nê hixêt prêk ã api nê himõk ã kuhê. 2Hãmri nhũm Jejus xep ra axtem nê xa. Axtem hkuk nhĩrã htÿx nê xa. Te myyti nhĩrã htÿx pyrãk. Nê ê haka htÿx kumrêx. 3Hãmri nhũm xep ja wa kaxkwa rũm hwÿr wrÿ nê kuri kãm kapêr o xa. Mojes mē Erisja wa nhũm hwÿr wrÿ nê kuri xa. Tĩrtũm amnepêm amnhĩ wÿr wa ho àpir tã wa akupÿn wrÿ nê Jejus mã kapêr o xa. 4Hãmri nhũm Jejus kõt mē mōr xwÿnhjaja wa mē omu nhũm Simãw Pêtre tanhmã hamaxpêr to nê Jejus wÿr tē nê kãm:

—Kwa Pahihti. Nà ãm hãmri na pu mē amnê mō. Kwa pu mē kritpêm jar axkamē nê tokyx panojarêt kêt nê. Pa mē amã pô nhĩrõnh o axkrunêpxi nê hipêx. Amã hõ nhĩpêx nê Mojes mã hõ nhĩpêx nê Eris mã hõ nhĩpêx ka mē kamã akrĩ. E kwa pa mē amã ho anê nà?

Anhÿr o kãm kapêr. Nom amnhĩ krã hkõt ã kapêr anê. 5Hãmri nê kormã ã kãm kapêr anhÿr rôm nhũm ra kakrã jaka htÿxja wrÿ nê wa mē hkunor pa nhũm wa mē kamã kuhê. Nhũm kakrã kamã Tĩrtũm mē kãm kapêr nê mē kãm:

—E ota Ixkra xa. Inhmã hapê ho inhmã hapê. E kêr ka mē kapêr mar tÿx rãhã ho ri apa. Anê.

6Hãmri nhũm mē tee ri kuma nê kãm ma htÿx nê umaj pikap rôrõk nê htu mÿrpê hikwÿ. 7Hãmri nhũm Jejus mē hwÿr tē nê mē hã ãhkra jaxwÿ nê mē kãm:

—E mē kãnhmã akuhê nê amã ma hkêt nê. Anê.

8Hãmri nhũm mē kuma nê kãnhmã rĩt nê Jejus pix pumu nhũm ahte xa nhũm kuri wa ãm xwÿnhhta wa ra ma akupÿm api. 9Hãmri nhũm mē kormã akupÿm hixêt nhĩmõk rũm mē ixwÿr wrÿk o mō nhũm Jejus mē kãm:

—E kêr ka mẽ ham ate mẽmoj pumunh xwÿnhnta kormã nhãm mẽ kãm harênh kêt nê. Kot paj nhÿrmã ty nê akupÿm ixtîr ka mẽ rî kormã mẽ kãm ja hã ijarênh o ri apa. Anê.

10Hãmri nhũm mẽ kormã akupÿn mẽ ixwÿr wrÿk o mō nhũm mẽ Jejus mã:

—Kwa mẽ inhmã mẽmoj jarê. Na htem Tîrtũm kapêr tũm o mẽ ijahkre xwÿnhjaja mẽ inhmã: “Eris kumrêx koja Tîrtũm mẽ pahwÿr kumê nhũm Krisja kormã hapu hã wrÿ.” Anê. Na htem ã mẽ inhmã war ajarênh anê. Tã ka ra wrÿ nom kormã akukamã Erisja wrÿk kêt. Anê.

11Hãmri nhũm mẽ kãm:

—Nà ãm hãmri na prem ã wa ijarênh anê. Na pre ra ixkukamã te Eris kot amnhî nhîpêx pyrãk xwÿnhnta tẽ nê ixkutêp mẽ kãm ijarênh o pa. 12Tã nom nhũm mẽ ja hã omunh kêt nê. Na prem axtem nê kãm hprãm xà hkôt tanhmã hipêx to nê kupî. Tã koja mẽ nhÿrmã ã hipêx anhÿr pyrãk o inhîpêx. Anê.

13Hãmri nhũm mẽ ra hprî hã kuma nê axpên mã:

—Kwa Juãw Paxis pimràata na ã mẽ pamã harênh anê. Tapxipix na pre te Eris kot amnhî nhîpêx pyrãk o amnhî nhîpêx o pa. Tã tãm na mẽ pamã harê. Anê.

Jejus kot mẽhō hkra nê mẽkarōmnuti kator ã harênh

Makre 9.14-29; Rukre 9.37-43

14Tã nhũm mẽ ra akupÿm ahpar mã man mẽ ixwÿr hpôx o mō nhũm mẽ ohtô rax nê Jejus kutêp kuhê. Hãmri nhũm mẽhō myja mẽ omu nê mẽ kutã tẽ nê mẽ hkaxpa nê Jejus kutã hkôn krã ho tẽm nê nhÿ nê hkra ho kuwÿ nê kãm:

15—Pa Jejus. Kwa inhmã ixkra kamã axukaprî nê. Na hte mẽkarōmnutija xatã tanhmã ixpê ho nhũm hte ÿ hã mra nê rôrôk nê tōhã kuwy kamã rôrôk nê tōhã gôx kãm mran mrô nê ixpê homnuj tÿx nê. 16Tã pa akôt mẽ pa ho mẽ pa xwÿnhjê hwÿr o tẽ nom nhũm mẽ kot inhmã ho mex kaxyw tee ri tanhmã ho hkapyrÿ. Kwa xà kot kaj akupÿm inhmã ho mex nà? Anê.

17Hãmri nhũm kuma nê mẽ ixte hkôt ixpa ho ixpa xwÿnhjê mã kapêr nê mẽ inhmã:

—Hêxta waa nê. Ra mẽ ate ixte Tîrtũm nhÿ hã mẽ ho mex ã ixpumunh o ixkôt apa ryy htã kormã ixpyrà nê ã mẽ hipêx anhÿr kêt nê. Nà kormã mẽ kaxyw Tîrtũm kôt mẽ ajamaxpêr tÿx kêt jakamã na ka mẽ tee mẽ ho mex kaxyw. Anê.

Hãmri nê myta mã kãm:

—E amnê ixwÿr akrata o tẽ pa omu. Anê.

18Hãmri nhũm kuma nê hwÿr o tẽ nhũm omu nê nê

mêkarõmnutija kator nhũm akupÿm mex kurê kumrêx. 19Hãmri pa mẽ ixte Jejus kôt ixpa ho ixpa xwÿnhjaja ja hã omu mẽ hkàx ã amnhĩ tã hkukja nê kãm:

—Kwa na pa mẽ axwakre kamã tee ri nê hanor prãm kaprÿ. Kwa mon pa mẽ apyrà nê nê hanor nhũm kator nê ma htêm kêt nê? Anê.

20-21Hãmri nhũm mẽ inhmã:

—Nà kormã mẽ ate mẽ kaxyw Tirtũm kôt ajamaxpêr tÿx kêt. Nom kot ka mẽ kaxyw hkôt ajamaxpêr tÿx hãmri nê hkôt amnhĩ nhĩpêx kukwak ri mẽmoj tã awÿ nhũm mẽ ama nê mẽ ate mẽmoj tã axàhwÿr xà hkôt mẽ amã tanhmã mẽmoj nhĩpêx to. Te mẽ ate pĩ hpàr mũj mã akapêr nê kãm: “Kwa amnhĩ jarê nê ma tẽ nê gô xujanãr kãm mãn mrõ.” Anhÿr nhũm kot amar nê amar xà hkôt ã amnhĩ nhĩpêx anhÿr kurê kumrêx pyrãk. Ja pyrã nê kot kaj mẽ amnhĩ kaxyw Tirtũm kôt ajamaxpêr tÿx kukwak ri mẽmoj tã awÿ nhũm mẽ ama nê mẽ amã mẽmoj tanhmã ho rÿ mẽ amã mẽmoj gõ. Anê.

Jejus kot htyk kukamã amnhĩ jarênh ã harênh

Makre 9.30-32; Rukre 9.43-45

22-23Tã hãmri pa mẽ Jejus kôt ma mõi nê nhÿri pika pê Garirej kamã kormã ixpa. Hãmri nhũm Jejus axte amnhĩ kukamã mẽ inhmã tanhmã htyk ã amnhĩ jarênh to nê mẽ inhmã:

—Nà koja mẽ tokyx mẽ kãm ixtã amÿnê nhũm mẽ ixpĩ. Mẽ kot ixpĩr tã kot paj ixyk ã apkati axkrunêpxi nhũm Tirtũm akupÿm ixto ixtĩr. Anê.

Hãmri pa mẽ tee ri ã kot amnhĩ jarênh anhÿrja ã kuma nê ixkaprĩ htÿx kumrêx.

Jejus kot Tirtũm nhõrkwÿ hwÿr àr

Rõmãn 13.5-7; Wam Korõt 10.32-11.1

24Tã pa mẽ Jejus kôt ma mõi nê ra Kapanau hwÿr pøj. Hãmri nhũm mẽ kot Tirtũm mã amnhĩ jarênh xà hã ixkre ho mex kaxyw mẽ kêp kàxpore hkwy jamÿnh xwÿnhjaja mẽ ixpumu nê mẽ ixwÿr mra nê Simãw Pêtre mã kãm:

—Pa. Kwa xà na hte mẽ ajahkre xwÿnhja mẽ pahpê hkwyjê pyrã nê Tirtũm mã amnhĩ jarênh xà hã ixkre ho mex kaxyw kàxpore hkwy nhõr kêt nê nà? Anê.

25Hãmri nhũm mẽ kuma nê mẽ kãm:

—Tÿ kot mẽ kãm õr o pa kênã. Anê.

Hãmri nê ma mẽ ixkôt tẽ nê mẽ ixkôt mēhõ nhõrkwÿ hwÿr axà. Hãmri nê kot Jejus mã mẽ harênh mã tã nhũm ra hamaxpêr ã omu nê kumrêx kãm kapêr nê kãm:

—Kwa inhmã mẽmoj jarê Simãw Pêtre. Xà na hte pahi hkrajaja õ

papaj mã kàxpore hkwy nhõr o pa nà? Xà na hte ãm hkra hkêt xwýnh pixjaja kãm hkwy nhõr o pa? Anê.

26Hãmri nhũm kuma nê kãm:

— Nà mẽ kêp hkra hkêt xwýnh pixjaja na hte kãm õr o pa. Anê.

Hãmri nhũm Jejus kãm:

— Tỳ. Nà ãm hãmri na ka ja jarê. Na hte pahi hkrajaja õ papaj mã kàxpore nhõr kêt nê. Mẽ kêp hkra kênã. Tã ixpê Tirtũm Kra jakamã mo kaxyw kot pa kêt õrkwý hwýr inhgîx kaxyw kãm kàxpore hkwy gõ? **27**Tã nom kot paj õr kêt nhũm kàxpore hkwy jamýnh xwýnhjaja tee ri ja hã ixpumu nê axpẽn mã ixte amnhĩ tomnuj xwýnh ã ijarê. Jakamã e ma gõnhmã tẽ nê tep õ kanhê. Hãmri nê ho api nê apy nê hakwa jakjê nê kamã kàxpore htýxre pumu. Nê apy nê man o tẽ nê pahpãnhã kàxpore jamýnh xwýnhhta mã agõ. Anê.

Nhũm pre ã Jejus Simãw Pêtre mã karõ anê nhũm kuma nê ma hwýr tẽ nê kot kãm karõ xà hkõt ã amnhĩ nhĩpêx anê.

Mẽ kot amnhĩ to rũnh xwýnhjê jarênh

Makre 9.33-37; Rukre 9.46-48; mããnen Piriapos 2.3-7; Wam Pêtre 3.4, 5.5-6

18 ¹Tã mẽ ixte Jejus kõt ixpa ho ixpa xwýnhjaja amnhĩ kukamã ijamaxpêr nê amnhĩ tã Jejus kukja nê kãm:

— Kwa mẽ inhmã mẽmoj jarê Pahihti. Nhỹrmã mẽ ixpê pahi nê anhĩhkõ hã mẽ ho amnhĩptàr o ri ixpata ã mẽ ixtõ kot paj we mẽ ho amnhĩptàr rax o ixkwýjê jakre? Anê.

2Hãmri nhũm mẽ inhma nê amnhĩ wýr mẽhprĩre hõ mã hpa ho apê nhũm hwýr tẽ nê mẽ ixkuri xa. **3**Hãmri nhũm Jejus omu nê hã mẽ inhmã:

— E mẽ inhma. Kêr ka mẽ apê pahi pyràk o tanhmã amnhĩ jarênh to ho ri apa hkêt nê. ãm te amarĩ ri mẽ apa pyràk o amnhĩ nhĩpêx. Te mẽhprĩre kot amnhĩ nhĩpêx pyràk. Kot kaj mẽ ã amnhĩ nhĩpêx anhýr o apa hkêt hãmri nê nhỹrmã inhĩhkõ hã mẽ ho amnhĩptàr kêt nê. **4**Jakamã kot kaj mẽ amã nhỹrmã inhĩhkõ hã mẽ ho amnhĩptàr o apa hprãm. Hã kot kaj mẽ te mẽhprĩre kot amnhĩ nhĩpêx pyrã nê amã amnhĩ to rũnh prãm kêt nê apa.

5— Nê kêr ka mẽ apê pahi kot amnhĩ nhĩpêx pyràk o tanhmã amnhĩ jarênh to ho apa hkêt nê. ãm te amarĩ ri mẽ apa pyràk o amnhĩ nhĩpêx. Jao nhỹri mẽhprĩjê hõ pumu nê kamã axukapri nê kãm mẽmoj tanhmã ho rý kãm mẽmoj gõ. Hãmri nê te pa ate tanhmã ixto mex to pyràk o amnhĩ nhĩpêx. Kot kaj mẽ ã amnhĩ nhĩpêx anhýr o apa hãmri nhũm Tirtũm ja hã mẽ apumu nê mẽ ate amnhĩ to rũnh kêt tã mẽ ate amnhĩ to rũnh xwýnh ã mẽ ajarê. E kot kaj mẽ amã amnhĩ to rũnh prãm hã kot kaj mẽ ã amnhĩ nhĩpêx anhýr o ri apa. Anê.

Mê kot amnhĩ tomnuj xwÿnhjê hkukamã mê harênh

6Nhũm Jejus arĩ mê inhmã mēhprĩ jarê nê mê inhmã:

— Nê mēhprĩre na htem amnhĩ kaxyw ixkôt hamaxpêr o pa. Tã koja mēhō inhnê tanhmã mê kãm kapêr to. Mē kot tanhmã amnhĩ tomnuj to hprãm xàj tanhmã mê kãm kapêr to ho pa. Hãmri nhũm mê kuma nê mê kapêr xà hkôt tanhmã amnhĩ tomnuj to. Hã koja Tĩrtũm ja hã omu hãmri nê kot inhnê tanhmã kãm kapêr to xwÿnhhta pumu nê homnuj tÿx nê. Te mê kot mēhō pynênh nê mut ã kên pytĩ hō nhôr nê ma o htēm nê gô xupÿm kãm mēnh pyræk o hipêx. Te ho ja pyræk no ãm homnuj tÿx o hakre.

7— Nê koja mēhō inhnê tanhmã mê kot ixkôt amnhĩ xunhwÿr xwÿnhjê hō mã kapêr to. Kot tanhmã amnhĩ tomnuj to hprãm xàj tanhmã kãm kapêr to. Rÿ kot ixkaga hprãm xàj tanhmã kãm kapêr to. Hãmri nhũm kuma nê mar xà hkôt ixkapêr kwÿm tanhmã amnhĩ tomnuj to. Tã koja Tĩrtũmja ja hã omu nê mãânên kot inhnê kēp àmnàr xwÿnhhta pumu nê ã inhnê kãm kapêr anhÿrja mÿrapê homnuj tÿx kumrêx.

8-9— E kwa mê okora. Kot kaj mê anhĩkra ho tanhmã amnhĩ tomnuj to rÿ apar o tanhmã amnhĩ tomnuj to. Hã kêr ka mê axte ã amnhĩ nhĩpêx anhÿr pymaj te mê ate amnhĩ pê krâhyr nê mēnh pyræk o amnhĩ nhĩpêx nê axte ã amnhĩ tomnuj anhÿr kêt nê. Rÿ ka mê ano ho mēmoj punuj pumu. Hã kêr ka kãm ajamaxpêr pix o apa pymaj te mê ate amnhĩ pê ano katøk nê kaxàr nê mēnh pyræk o amnhĩ nhĩpêx nê nhãm arĩt kurê kumrêx. Kêr ka mê ã amnhĩ nhĩpêx anhÿr o ri apa. Hãmri nê nhÿrmã ty nê ma Tĩrtũm nhô krĩ hwÿr api. No kot ka mê arĩ akutã ano nê arĩ akutã apar nê arĩ akutã anhĩkra rãhã ri apa htã ho amnhĩ tomnuj o apa. Hãmri nê nhÿrmã ty nê ate amnhĩ tomnuj mÿrapê ma mê kot amnhĩ xà htÿx kamã hamak tũm xà hwÿr ma mō.

10-11— Nê kêr ka mê mēhprĩrejê kamã axukaprĩ rãhã ho apa. Na hte kaxkwa kamã Tĩrtũm kapêr o mê wrÿk xwÿnh kwÿjaja Tĩrtũm mã mê hamãr mex o pa. Tã koja mēhō tanhmã kēp hō hto nhũm mê hã omu nê ma tē nê Tĩrtũm mã harênh kurê kumrêx. Anê.

Ôwêhti pikunor jarênh

Rukre 15.3-7

12Nhũm Jejus arĩ mê inhmã kapêr nê mê inhmã:

— E pa mê amã awjarê ka mê ixujarênh ma. Nà koja mēhō my hkrit ôwêhti xohtô nê. Nê apkati mê ma hamãr o pa. Hãmri nhũm pyxire nê tanhmã amnhĩ to nê kēp akunok. Kwÿ kaga nê ma nhÿhÿm ahte tē nê kēp akunok. Hãmri nhũm mytita ma akupÿm o mōr kaxyw hkwȳ ho pikuprôn pa hãmri nê tee ri hkwȳ kaêx ã pikunor xwÿnhhta japêr nom nhÿri omunh kêt nê. Hãmri nê tee ri hkukamã hamaxpêr nê ma hkwȳ

ho mō nê nhÿri kure. Kutêp apkur kaxyw nhÿri kure hãmri nê ma akupÿm pikunor xwÿnhta japêr o tê. **13**Hãmri nê hapêr ryy nê nhÿri hwÿr kato nê omu nê hkĩnh nê. Hãmri nê kutu nê ma akupÿm o tê. Na hte pikunor kêt xwÿnhjê nhÿ hã hkĩnh tã pikunor xwÿnhta mã kato nê hkĩnh tÿx nê. Krit xohtô htã nom ãm kãm ho pixi nê ho hpikunor prãm kêt. ã mē ujarênh kot anhÿr. **14**Ja pyrã nê Tirtũm kãm mēhõ pyxi nê nhÿrmã ma kuwy wÿr mōr prãm kêt kumrêx. Mē piitã mē kot hkôt amnhĩ xunhwÿrja na kãm hprãm. Anê.

Jejus kôt mē pahtôjê hõ kot mē pahtomnuj jarênh

15Nhũm Jejus arĩ mē inhmã kapêr nê mē inhmã:

— Nê ja. Koja ixkôt mē atõ rÿ mē atõx tanhmã atomnuj to. Hã kêr ka ma hwÿr tē nê kot tanhmã anhĩpêx to hã amnhĩ tã kãm akapêr. Nom kêr ka mē nhãm mēhõ mã harênh kêt nê. ãm tanhmã kot ato xwÿnhta pix wÿr tē nê kumē war axpēn mã akapêr nê war axpēn ma. Nhũm ama nê akupÿm tãm anhĩpêx hã kêr ka akupÿm te ixkôt kêp atõ rÿ atõx pyrãk o ka wa axpēn nhĩpêx nê axte jam ajamaxpêr kêt nê. **16**Nom koja ama nê ãm ama rÿ tanhmã ato hkêt ã amnhĩ jarênh japêr. Hã kêr ka ma akupÿm tē nê akupÿm amnhĩ kôt Kris kôt atõ rÿ atõx o axkrut rÿ mē ho axkrunêpxi nê amnhĩ kôt hwÿr mē o mra kê mē axpēn tã war ama. Amnepêm Tirtũm kapêr ã kagà htũm kot ja jarênh o:

Kêr ka mē atõ tanhmã axpēn nhĩpêx to. Hãmri nê hã axpēn mã akapêr kaxyw nê amnhĩ kôt akwÿjê ho axkrut rÿ ho axkrunêpxi nê akupÿm hwÿr mē o mra kê mē axpēn tã war ama. Anê.

— ã Tirtũm kapêr ã kagà htũm kot ja jarênh kot anhÿr. **17**Jakamã kêr ka mē amnhĩ kôt akupÿm kot tanhmã ato xwÿnhta wÿr mē o mra kê mē atã kuma. Hãmri nhũm arĩ mē kãm kot tanhmã ato hkêt ã amnhĩ jarê ka tee ri amnhĩ tã omu nê ikrêsti hwÿr tē nê Kris kwÿ hã mē pikuprõnh xwÿnhjê mã harê. Kê mē ama hãmri nê ja hã axte kot tanhmã ato xwÿnhta mã kapêr. Nhũm mē mar kêt nê arĩ kot tanhmã ato hkêt ã amnhĩ jarê ka mē amnhĩ nê hanor kurê kumrêx. Hãmri nê te kêp Kris kôt mē atõ rÿ mē atõx kêt pyrãk o hipêx.

18— Nê koja mēhõ ixkôt amnhĩ xãm nê Inhĩpêêxã Tirtũm kôt ri amnhĩ nhĩpêx o pa. Ka mē ja hã omu nê inhÿ hã tanhmã kãm akapêr to nê kãm: “E ra ate Jejus kôt amnhĩ xãm jakamã kot kaj nhÿrmã Tirtũm mē wa kuri amex kumrêx nê atĩr tũm nê apa ho apa.” Anhÿr o kãm akapêr. Nom mē kot ixkôt amnhĩ xunhwÿr kêt xwÿnhjaja ka mē ã mē kãm akapêr anhÿr kêt nê. ãm inhÿ hã mē kãm: “No mē kajaja mē ate Jejus kôt amnhĩ xunhwÿr kêt jakamã kot kaj mē Tirtũm mē Krata wa kuri atĩr tũm nê amex nê apa hkêt nê.” Anê. Kêr ka mē inhÿ hã ã ahpÿnhã tanhmã mē kãm akapêr to ho apa anê.

19-20—Nê kot kaj mē Tirtūm mā amnhī jarēnh kaxyw te axkautre rý axkrunēpxire htā axpēn wýr akuprō nom mē kapxipixjaja apikuprōnh kêt nē. Kot paj mē akaêx ā mē anhīhkô hā mē amar o xa. Mē ate ano ho ixpumunh kêt tā pa wa mē anhīhkô hā mē amar o xa. Jakamā kot kaj mē axpēn wýr akuprō nē mēmoj tā Tirtūm wý nhūm kaxkwa kamā ja hā mē ama. Nē mē ate hā axàhwýr xwýnhhta nhūm mē amā tanhmā ho. Kêr ka mē ā ixkamnàr rom axàmnhīx amnhī to Inhīpêêxà hwýr anē. Anē. Nhūm pre ā Jejus mē inhmā kapēr anē.

Mē pahte tanhmā axpēn nhīpêx to hā mē pamā karō

Matêwre 6.14-15; Rukre 17.3-4; määnēn Epes 4.32; Korosē 3.13

21Tā nhūm Simāw Pêtre Jejus wýr tē nē mēmoj tā hkukja nē kām:

—Kwa inhmā mēmoj jarē Pahīhti. Xà koja akôt ixtō rý ixtōx tanhmā inhīpêx to pa amnhī tā omu nē âm omu nē amnhī tā tanhmā ho hkêt nē. Nhūm axte tanhmā ixto nē axte tanhmā ixto ho 6 tā pa âm amnhī tā omu nē amnhī tā tanhmā ho hkêt nē. Âm ho ijamakêtkati nē axte kām ijamaxpēr kêt nē. Ā amnhī tā hipêx anhýr o 7 nhūm ja amā mex nē nà? Anē.

22Hāmri nhūm kām:

—Nà kot kaj ā amnhī tā hipêx anhýr o 7 pix kêt nē. Koja mēhō xatā tanhmā ato rāhā nē ka amnhī tā omu nē ajaxwýja amnhī tā xatā tanhmā ho hkêt nē. Âm amnhī tā omu nē âm omu nē tām hipêx rāhā ho ri apa. Māmri ho anhýr o apa rāhā nē aa jam anhürer kêt nē.

23—E kot paj ixprī hā mē amā tanhmā ja jarēnh to ka mē inhma. Tirtūm na hte xatā mē ate tanhmā amnhī tomnuj to hā mē apumu nē mē anē rēnh o pa. Te kot pahi kot ā hkwyjê nhīpêx anhýr pyrāk. Koja mē õ pahija kām mē àpēnh xwýnhjaja kot kēp kàxpore ho ãpresta hā mē omunh kaxyw nhý. 24Hāmri nhūm mē hwýr ja ho tē nē kutā âm. Ra kot kēp hikàxpore ho ãpresta rax xwýnhja. 25Tā no âm aa akupým kām õr kêt nē ra kēp ho hapêx pa. Hāmri nhūm pahija tee ri amnhī tā omu nē hkwyjê mā hā amýnê nē mē kām: “E. Mē ma o tē nē hprō nē hkrajaja nē õrkwy nē hikukrêx mērohā ho wēnê hpa nē hpānhā kàxpore py nē man inhmā o tē. Kot ixpê ixkàxpore ho ãpresta nē akupým inhmā õr kêt mýrapê.” Anē.

26—Hāmri nhūm kot ho ãpresta xwýnhhta tee ri amnhī tā kuma nē kutā hkōnkrā ho nhý nē amnhī to hwýr kām hihtýx nē kām: “Kwa nà ri ixto anhýr kêt nē pahīhti. Ixkamā axukapri nē hkêt wehe. Nà kot paj akupým amā kugō kām ga.” Anē.

27—Hāmri nhūm amnhī tā kuma nē kām hkapri nē. Hāmri nē kām: “Tôe. Nà kot paj ā anhīpêx anhýr kêt nē. Kot paj anhō kôt kaxônh pa nē kumē ka māmri ma ajamakêtkati nē axàmnhīx apa.” Anē. 28Nhūm ā kām kapēr anē nhūm kuma nē hkính nē. Hāmri nē ma tē nē kato nē ixkre

kapem pôristi hõ pumu. Na pre ra kêp kàxpore hkwỳ ho grire nê ho ìpresta nhũm kato nê omu. Hãmri nê hwỳr tẽ nê amnhĩ kĩnhã ôkre hã kumỳ nê kãm: “Kwa tokyx akupỳm ate ixpê kàxpore ho ìpresta pãnhã inhmã agõ.” Anẽ. ²⁹Hãmri nhũm tee ri amnhĩ tã omu nê ra ham kot pahi kutã amnhĩ nhĩpêxta pyrã nê kutã hkõnkrã ho nhỹ nê kãm: “Kwa nã. Kwa ri ixto anhỹr kêt nê. Nã kot paj hpãnhã amã kugõ. Kwa ixkamã axukaprĩ nê hkêt wehe.” ³⁰Anhỹr tã nom nhũm kuma nê ãm kuma nê hã amỳnê. Hã hkwỳjê mã amỳnê nê mẽ kãm: “E mẽ ma jahti ho tẽ nê haxã. Koja kot ixpê kàxpore ho ìpresta pãnhã inhmã kugõ nê rĩ kormã kato nê rĩ amnhĩ pumu.” Anẽ. Hãmri nhũm mẽ kuma nê ma o tẽ nê haxã.

³¹—Hãmri nhũm hkwỳjaja tee ri mar o kuhê nhũm mẽ kêp ja omnuj nê nhũm mẽ pahi hwỳr agjê nê kãm harẽ. ³²Hãmri nhũm tee ri harênh ma nê kamã gryk tỳx nê akupỳm amnhĩ wỳr hã karõ nhũm akupỳm hwỳr axã nhũm kãm: “Tk. Kwa na ka pre amnhĩ tomnuj tỳx nê. Ate amnhĩ to ixwỳr nhũm inhmã akaprĩ nê ixte anhõ kõt kaxõnh nê mẽnh tã ³³ka amnhĩ kĩnhã anhĩõta kamã axukaprĩ hkêt nê ri ã hipêx anẽ.” Anẽ. ³⁴Hãmri nê kamã gryk nê hã õ pôristi mã amỳnê nhũm mẽ ma o tẽ nê haxã. Mẽ kot mẽ hagiênh xã hã ixkre kamã apkati mẽ tanhmã mẽ kot hipêx to kaxyw nhũm mẽ kãm hã amỳnê. Tanhmã mẽ kot hipêx to rãhã nhũm kot akupỳm kàxpore raxta nhõr par nê rĩ kormã kator kaxyw nhũm mẽ ma o tẽn haxã. ã mẽ ujarênh kot anhỹr. Anẽ.

³⁵Nhũm pre ã Jejus mẽ ixte hkõt ixpa ho ixpa xwỳnhjê mã kapêr anẽ. Hãmri nê mẽ inhmã:

—Ja pyrã nê koja ixkõt mẽ atõ rỳ mẽ atõx tanhmã mẽ atomnuj to ka mẽ amnhĩ tã omu nê ãm omu nê ho ajamakêtkati kurê kumrêx nê axte kãm ajamaxpêr kêt nê. Te pahi kot mẽhõ nhõ kõt kaxõnh par nê axte kãm hamaxpêr kêeta pyrãk. No kot kaj mẽ ã amnhĩ nhĩpêx anhỹr kêt nhũm kaxkwa kamã inhõ Papaj ja hã mẽ apumu nê te ho pahi tee ri kot amnhĩ tomnuj xwỳnhhta kot amnhĩ nhĩpêx ã omunh nê hã ãmnênh nhũm mẽ kot apkati mẽ tanhmã omnuj tota pyrãk o mẽ anhĩpêx. Anẽ.

Jejus kot mẽ pahte axpên kaga nê mẽ pahkurê

Matêwre 5.31-32; Makre 10.1-12; Rukre 16.18; mãänên Wam Korĩt 7.10-16

19 ¹Tã nhũm Jejus mẽ inhmã kapêr pa nê mẽ inhmã anẽ pa mẽ ixrohã Garirej rũm ixkato nê pyhti pê Jotãw hã rê nê hpãnhã ihkjê hã ri ixpa. Pika pê Jutej kamã. ²Hãmri nhũm mẽ ohtõ nê Jejus pumu nê man mẽ ixwỳr mra nhũm mẽ omu nê mẽ kãm akupỳm mẽ ã xwỳnhjê ho mex. ³Hãmri nhũm Parijew nhõ xwỳnh kwỳjaja hwỳr mra. Hêx rom kot kamã hamak nê tanhmã ho kapêr punuj to kaxyw hwỳr mra nê kãm:

—Pa? Kwa mẽ inhmã mẽmoj jarẽ. Tanhmã na pre amnepêm finat Mojesja mẽ pahte mẽ pahprõ kaga hã mẽ panhĩgêjtjê mã karõ hto? Xã

kot mẽ pahprõ pahkwým ri tanhmã amnhĩ nhĩpêx to pu mẽ hkaga nhũm ja Tĩrtũm mã mex nẽ nà? Anẽ.

4Hãmri nhũm mẽ kãm:

— Nà na ka mẽ aprĩ hã Mojes kot tanhmã ja jarênh to mar mex kêt nẽ. Ja kot anhỹr kêt. Amnepêm mẽmoj piitã hkrax kãm na pre Tĩrtũm my nẽ nija wa hipêx. Axpẽn kaxyw wa hipêx. 5Hãmri nẽ wa hkukamã tanhmã wa kot amnhĩ nhĩpêx to hã wa harẽ nẽ wa harênh o:

Koja mẽmyjaja hprõ kaxyw hãmri nẽ gryk ã katorxà mẽ hipêêxà wa hkaga nẽ ãm hprõ kôt pix mã pa ho pa. Te wa tipxi nẽ ri wa pa pyræk o amnhĩ nhĩpêx. Anẽ.

— Na pre ã Mojes Tĩrtũm nhỹ hã mẽ kãm ja jarênh anẽ. 6Jakamã koja te wa tipxi nẽ ri wa pa pyræk o axpẽn nhĩpêx o pa. Tĩrtũm tãm kot axpẽn mã wa õr kênã kot kêt wa axtem nẽ ri htỹx ri hamaxpêr nẽ axpẽn kaga. Anẽ.

7Hãmri nhũm mẽ kuma nẽ kãm:

— Tỳ. Nom finat Mojes na pre mẽ pakukamã mẽ panhĩgêjtjê mã ã ja hã karõ anẽ nẽ mẽ kãm:

Kot kaj mẽ aprõ kaga kaxyw hãmri nẽ ra kêp aprõ hkêt ã hã kagà nhĩpêx nẽ kãm agõ nẽ amnhĩ nẽ hano kê ma tẽ.

— Anhỹr o na pre mẽ kãm hã karõ. Tã ka na ka mẽ ixte axpẽn kaga hkêt ã mẽ inhmã karõ. Anẽ.

8Hãmri nhũm mẽ kuma nẽ mẽ kãm:

— Tỳ no ãm mẽ kãm Tĩrtũm kapêr kôt amnhĩ nhĩpêx prãm kêt jakamã na pre ã mẽ kãm ja jarênh anẽ. No amnepêm mẽmoj piitã hkrax kãm na prem ã amnhĩ nhĩpêx anhỹr o pa hkêt nẽ. 9Jakamã kêr ka mẽ aprõ kaga hkêt nẽ apa. Kot kaj mẽ hkaga nẽ hpãnhã nhãm mẽhõ ho aprõ nhũm Tĩrtũm noo mã te ate wam aprõ kamã nhãm aprõ nyw o amnhĩkati pyræk. Tĩrtũm pê ja omnuj tỹx nẽ. Rỳ koja mẽhõ hprõ kaga ka hpãnhã ho aprõ nhũm Tĩrtũm noo mã te ate wam mjên pê ho amnhĩkati pyræk. Ja mãânên Tĩrtũm pê omnuj tỹx nẽ. Anẽ.

Nhũm pre ã Parijew nhõ xwỹnhjê mã kapêr anẽ. 10Hãmri pa mẽ ixte hkôt ixpa ho ixpa xwỹnhjaja ã kapêr anhỹrja ã kuma nẽ kãm:

— Xà na hte mẽ mjên ra kãm mẽ hprõ hkĩnh kêt tã hkaga hkêt nẽ arĩ hkôt pa ho pa nhũm hte Tĩrtũm mã ja mex nẽ nà? Jakamã kwa xà kot paj mẽ nhỹrmã ixprõ kaga pymaj ixprõ hkêt kumrêx nẽ ixpa ho ixpa nhũm ja mẽ inhmã mex nẽ nà? Anẽ.

11Hãmri nhũm mẽ inhmã:

— Nà ãm hãmri na ka mẽ ja jarẽ. No mẽ ate harênhja na mẽ piitã mẽ kãm mex kêt. Koja Tĩrtũm tãm amã aprõ hkêt ã ajarẽ ka rĩ aprõ hkêt nẽ ahte ajamakêtkati nẽ ri apa. 12Na htem piitã hprõ nẽ pa hkêt nẽ.

Na hte kamã tanhmã mẽ kute xwỹnhjaja kormã hprĩre ri tanhmã kute mỳrapê kãm hprõ hprãm kêt nẽ pa.

Nê kamã tanhmã mẽ ho mỳrapê nhũm mẽ hkurê hkêť nê hprõ
hkêť nê pa.

Nê kamã mẽ kãm Tĩrtũm mã tanhmã amnhĩ to ho pa pix prãm
xaj kãm hprõ hprãm kêt nê pa.

Tã kot kaj mẽ jajê pyrã nê ã amnhĩ nhĩpêx anhỹr prãm nê rĩ kam nê aprõ
hkêť nê apa. Anê.

Jejus kot amnhĩ nê mẽhprĩjê janor kêt ã harênh

Makre 10.13-16; Rukre 18.15-17

13Tã nhũm Ijaew kwỳjaja Jejus pumu nê hwỳr mẽ hkrarejê jamỳ nê
mẽ o mra. Kot mẽ hã ĩhkra jaxwỳr nê mẽ ho Tĩrtũm wỳr kaxyw hwỳr
mẽ o mra. Hãmri pa mẽ ixte hkôt ixpa ho ixpa xwỳnhjaja tee ri mẽ omu
nê tanhmã nê mẽ kãm ixkapêr to nê mẽ kãm:

—Tk. Mo kaxyw na ka mẽ Jejus wỳr mẽ o mra? Kormã mẽ raxre
kênã. Kwa mẽ ma akupỹm mẽ o mra nã? Anê.

14Hãmri nhũm Jejus mẽ inhma nê mẽ inhmã:

—Kwa nã mẽ ri inhnê mẽhprĩjê kurê hkêť nê. Kwãr mẽ mãmri ixwỳr
mẽ o mra. Anê.

Hãmri nê amnhĩ wỳr mẽ mẽ kãm hpa ho apê nhũm mẽ hwỳr mẽ o
mra nhũm mẽ kuri kuhê nhũm mẽ omu nê mẽ hã mẽ inhmã:

—E mẽ jarejê pumu. Na htem hamakêtkati nê hkĩnh nê ri pa. Nê mẽ
kãm amnhĩ to rũnh prãm kêt nê. Tã Tĩrtũm kôt mẽ kot amnhĩ nhĩpêx o
mẽ pa xwỳnhjaja te mẽ kot jajê pyrã nê kãm amnhĩ to rũnh prãm kêt
nê pa. Anê.

15Hãmri nê mẽ hã ĩhkra jaxwỳ nê mẽ ho Tĩrtũm wỳ hãmri nê mẽ
inhmã anê pa mẽ ma axte mẽ kurũm mỗ.

Kàxpore rũnh xwỳnh jarênh

Makre 10.17-22; Rukre 18.18-23;

mããnênh Rômãn 3.19-20; Wam Ximotre 6.6; Xiakre 2.10

16Tã nhũm Ijaew ôja Jejus wỳr tẽ nê kãm:

—Pa mẽ ijahkre xwỳnh? Kwa inhmã mẽmoj jarê. Tanhmã kot pa
nhỹrmã Tĩrtũm ri ixtĩr tũm nê ixpa ho ixpa kaxyw amnhĩ nhĩpêx to
wehe? Anê.

17Hãmri nhũm kãm:

—Tk. Ra Tĩrtũm kot nhỹrmã mẽ atĩr tũm nê apa kaxyw mẽmoj tã mẽ
amã karõ nhũm ate mar mex kênã kot ka kêt ri axte ja hã ixkukja. Nã
Tĩrtũmja mex o mex jakamã kot kaj amã kuri atĩr tũm nê apa hprãm hã
kot kaj kapêr kôt amnhĩ nhĩpêx no ri apa. Anê.

18Hãmri nhũm kãm:

—No nhỹ kapêr kôt kot paj amnhĩ nhĩpêx o ri ixpa wehe? Anê.

Hāmri nhũm kām:

—Na pre mē amā mēmoj tā karō ho:

Kêr ka mē axpên par kêt nê.

Nê nhām mē hprō ho amnhĩkati hkêt nê.

Nê mē kêp axàhkĩnh kêt nê.

Nê tanhmã mē ho axêx to hkêt nê.

19 Nê anhĩpêxà mē akatorxà wa hã apijaàm nê wa ho mex pê wa kutã anojarêt o ri apa.

Nê amã akwỳjê hã ma ho te ka amã amnhĩ tā ma pyræk o mē hipêx. Jao tãm mē hipêx o ri apa.

E kot kaj amã nhỹrmã Tĩrtũm kuri atĩr tũm nê apa hprãm hã kêr ka ã amnhĩ nhĩpêx anhỹr o ri apa. Anê.

20Hāmri nhũm kuma nê kām:

—Ku nhũm. Ra ã ixte amnhĩ nhĩpêx anhỹr o ri ixpa kênã. Nom te kormã ixtĩr tũm nê ixpa kaxyw ixte tãm kêt pyræk. Kwa axte inhmã mēmoj jarê nà? Anê.

21Hāmri nhũm kām:

—Nà kormã mēmoj pyxi nê arĩk. Na ka amã akukrêx rax prãm tỳx o amã Tĩrtũm prãm jakre. Jakamã ma akupỹm tē nê akukrêx rax o wênê hpa nê hpãnhã kàxpore jamỳ nê ma mē kêp amrakati xwỳnhjê mã òr pa. Hāmri nê rĩ akupỹn ixwỳr tē nê rĩ ixkôt apa ho apa. Anê.

22Hāmri nhũm kuma nê tee ri amnhĩ kukamã hamaxpêr. Kãm hikukrêx rax japê nê kãm kamã ìhkra karo hprãm kêt nê. Hāmri nê tee ri Jejus kot ã kãm hã karō anhỹrja ma nhũm ja kêp omnuj nê nhũm ma akupỹm htēm kurê kumrêx. 23Hāmri nhũm Jejus tee ri omu nê mē inhmã:

—Hêxta waa nê. Koja mē hikukrêx rũnh xwỳnhjaja ohtô nê kãm mē hikukrêx japê xàj Tĩrtũm mē wa ixri htĩr tũm nê pa ho pa hkêt nê. Wa ixte amnhĩ nhĩpêxja mē kêp hihtỳx. 24Mē kãm hikukrêx rũnh mã ìhkra karo hprãm kêt rãhã tee ri kãm Tĩrtũm kôt amnhĩ nhĩpêx prãm kaprỳ. Te ho mēhō kot menh kagô hã hkre nê kãm kagô katòk prãm kêt rãhã kãm guhkrax kãm àr prãm kaprỳta pyræk. Anê.

Nhũm pre ã Jejus mē inhmã kapêr anê. 25Hāmri pa mē kuma nê tee ri amnhĩ kukamã ijamaxpêr nê kãm:

—Kwa mē ixpiitã mē inhmã mē ixkukrêx japê kênã. Jakamã xà kot paj mē ixpiitã nhỹrmã war ari ixtĩr tũm nê ixpa ho ixpa hkêt nê nà? Anê.

26Hāmri nhũm mē inhmã:

—Nà kot kaj mē amnhĩ krã hkôt mē amã mē akukrêx japêja mã anhũrer kêt nê. ãm Tĩrtũm pix na hte ja kaxyw tanhmã mē akrã hto ka mē amã akukrêx japê hkêt nê. Jao ra mē apê Tĩrtũm mē wa ixri atĩr tũm nê mē apa ho mē apa mã xwỳnh. Anê.

27Hāmri nhũm Simãw Pêtre kãm:

—Kwa no we mẽ pajaja Pahihti? Na pa prem agryk ã mẽmoj piitã hkaga hpa nẽ akõt ixpa ho ixpa. Jakamã kot paj mẽ nhỹrmã war ari ixtĩr tũm nẽ ixpa ho ixpa nà? Anẽ.

28Hãmri nhũm kuma nẽ mẽ xpiitã mẽ inhmã:

—Tỳ. Kot paj nhỹrmã mẽmoj piitã ho nyw pa hãmri nẽ ixte mẽ ho amnhĩptàr o ixkrĩ xà maati kamã nhỹ nẽ mẽ piitã mẽ kot tanhmã amnhĩ nhĩpêx to hã mẽ omunh xà hkõt tanhmã mẽ harênh to. Tã mẽ kajaja mẽ ate ixkõt apa ho apa xwỳnhjaja kot kaj mẽ inhmã Ijaew kot amnhĩ nhĩpêx ã mẽ omunh xà hkõt ahpỳnhã tanhmã inhmã mẽ harênh to. Mẽ mex ã mẽ harẽ rỳ mẽ mex kêt ã mẽ harẽ. Kot kaj mẽ ã inhmã mẽ harênh anẽ. ãm hãmri na pa mẽ amã ixkapêr anẽ.

29—Nẽ ka mẽ atõ inhmã tanhmã amnhĩ nhĩpêx to ho apa kaxyw akwỳjê re nẽ ma inhmã mẽmoj to anhỹr o ri apa. Tanhmãn anhõrkwỹ rỳ atõ rỳ atõx re. Rỳ aprõ nẽ akrajê re. Rỳ akatorxà mẽ anhĩpêxà war are. Rỳ akukrêx piitã rer pa hãmri nẽ ma mẽ piitã mẽ kãm ixkapêr o mẽ ahkre ho ri mẽ hkõt apa. Hã kot paj mẽ apumu nẽ mẽ ato mex rax nẽ. Hãmri ka mẽ ma mẽ hkõt apa nẽ mẽ kãm ixkapêr jarênh o apa nhũm mẽ kot mẽ amar xwỳnh kwỳjaja mẽ ama nẽ kãm mẽ akĩnh nẽ. Nẽ ra mẽ ate akwỳjê rer par tã mẽ tãmjaja te mẽ apê mẽ hkra rỳ mẽ htõ rỳ mẽ htõx pyrãk o mẽ anhĩpêx nẽ mẽ ato mex o pa. Hãmri ka mẽ nhỹrmã ty nẽ ma Tĩrtũm mẽ wa inhõ krĩ hwỳr api nẽ wa ixkuri amex kumrêx nẽ atĩr tũm nẽ apa ho apa. 30Nom kwa kêr ka mẽ amnhĩ tã ja ma nẽ amnhĩ to rũnh xwỳnh ã amnhĩ kamnhĩx kêt nẽ. Jar mẽ kot amnhĩ to rũnh ã amnhĩ to jarkrar xwỳnhjaja koja mẽ nhỹrmã amnhĩ to hkryre hã amnhĩ pumu. No jar mẽ kot amnhĩ to hkryre xwỳnh ã amnhĩ jarênh xwỳnhjaja koja mẽ nhỹrmã amnhĩ to rũnh ã amnhĩ pumu. Anẽ.

Jejus kot nhỹrmã hkrajê ho mex ã harênh

Rômãn 9.14-16

20 1Nhũm Jejus arĩ mẽ ixte hkõt ixpa ho ixpa xwỳnhjê mã awjarê nẽ mẽ inhmã:

—Nẽ kot paj nhỹrmã tanhmã mẽ ato mex to. Te ixpê hpur nhõ dõn kot amnhĩ nhĩpêx pyrãk o mẽ anhĩpêx. Koja pur nhõ dõnja ihpur kãm mẽmo xõ ra hkà hpa nhũm omu hãmri nẽ kaxyw mẽ àpênh xwỳnhjê japêr kaxyw ma gãm tẽ. Nẽ gáp xa nẽ mẽ kãm akir nhũm mẽ hã akuprõ.

2Hãmri nhũm mẽ kãm: “E. Kot kaj mẽ jarãhã inhmã ixpur kãm apê. Kot kaj mẽ inhmã axapênh o amỹkry pa hpãnhã mẽ kot apkati pixi hã mẽ àpênh pãnhã mẽ kãm amnhĩrer xàja kõt mẽ amã amnhĩre.” Anẽ hãmri nhũm mẽ kuma nẽ kãm: “Tõe. Nà kot paj mẽ amã apê.” Anẽ nhũm pur wỳr mẽ kurẽ nhũm mẽ ma kãm àpênh mã mra.

3—Tã nhũm arĩ kỳx mã myt tẽ nhũm pur nhõ dõn akupỹm gãm tẽ nhũm mẽ hkwỳja arĩ kuhê. 4Nhũm tee ri mẽ omu nẽ mẽ kãm: “Kwa mon

ka mẽ axàpênh kêt nê arĩ akuhê? E. Mẽ ma wamtajê hkôt mra nê inhmã apê pa hpãnhã mẽ amã amnhĩrer mex nê.” Anê. 5Hãmri nhũm mẽ kuma nê ma mẽ hkôt mra. Tã nhũm ra myt kaxkwa nhĩpòk ri ajêt nhũm hpur nhõ dõnja mã hkwyjê ho anê nê. Kê axte mẽ hkôt jajê jano nhũm mẽ ma mẽ hkôt mra. Tã nhũm ra myt ahpanh grire nhũm ma akupỹm kêwe gàm tẽ nê mã mẽ ho anê nê axte mẽ hkôt jajê rê.

6—Tã nhũm ra myt grire nhũm ma akupỹm kêwe gàm tẽ nê jajê pumu nhũm kê wem arĩ gáp kuhê. Hãmri nhũm tee ri mẽ omu nê mẽ kãm: “Kwa mon ka mẽ axàpênh kêt nê atỳx gáp akuhê ho akuhê?” Anê. 7Hãmri nhũm mẽ kãm: “Nà mēhõ kot mẽ inhmã mẽ ixàpênh ã karõre hã.” Anê. Hãmri nhũm mẽ kãm: “Tõe. Mẽ ma mẽ hkôt ixpur wỳr mra nê inhmã mãn apê.” Anê hãmri nhũm mẽ kuma nê ma hkwyjê hkôt mra.

8—Tã nhũm ra kamàt. Hãmri nhũm hpur nhõ dõnja kãm àpênh xwỳnhjê krãhtũm wỳr tẽ nê kãm: “E. Ma mẽ hwỳr tẽ nê mẽ kãm anê kê mẽ àpênh kaga nê man akôt mra ka inhmã mẽ kãm amnhĩre. Nom kêr ka hapu hã mẽ mõi xwỳnhjê kumrêx mã amnhĩre nê wam mẽ mõi xwỳnhjê ho hapu nê mẽ kãm amnhĩre.” Anê. Hãmri nhũm kãm: “Tõe. Nà kot paj mẽ ho anê.” Anê. 9Hãmri nê ã mẽ kãm amnhĩrer anê. Hapu hã mẽ mrrar xwỳnhjê kumrêx mã amnhĩre. Te mẽ kot kwỳhtã àpênh o amỹkry pyràk o nhũm hpãnhã mẽ kãm amnhĩre. 10Hãmri nhũm wam mẽ mrrar xwỳnhjaja ja hã mẽ omu nê hkĩnh nê. Hãmri nê htỳx hamaxpêr o: “Nà kot paj xep kàxpore jamỳnh rax o mẽ hakre. Ixàpênh rax o ixte mẽ hakrenh kênã.” Anhỳr tã no nhũm mẽ piitã mẽ kãm amnhĩrer o axpên pyràk. Ra pur nhõ dõn kot kãm hã karõ xà hkôt. 11Hãmri nhũm mẽ hamỳ nê tee ri hkre kamã omu nê we ra hpur nhõ dõnja kamã gryk nê. 12Hãmri nê hwỳr mra nê kãm: “Kwa jajaja na mẽ amã àpênh o ore pyxi nê. No kêt mẽ pajaja na pa mẽ kwỳhtã ixàpênh rax o kamàt. Arĩgro htỳx kãm ixàpênh o ixãm o ixtã kamàt tã ka pêr ãm mẽ inhmã amnhĩrer o axpên pyràk. Kwa na ka mẽ ixtomnuj nê.” Anê. 13Hãmri nhũm mẽ kuma nê mẽ kãm: “Tk. Nà na pa mẽ atomnuj kêt nê. Na pa kwỳhtã tanhmã mẽ amã amnhĩrer to xà jarê ka mẽ inhma nhũm ja mẽ amã mex nê ka mẽ ma hwỳr axàpênh mã mra. 14Kwa mẽ akàxpore jamỳ nê ma mra. ãm pa inhmã hprãm xà hkôt na pa ã mẽ amã amnhĩrer anê. 15Ixkàxpore jakamã kot paj nhãm inhmã mēhõ mã õr prãm xà hkôt kãm kugõ. Tã ka mẽ ã mẽ hã ixkamã agryk anê. E mẽ akàxporeja mỳ nê ma mra.” Anê. Nhũm ã hpur nhõ dõn mẽ kãm kapêr anê. ã mẽ ujarênh kot anhỳr. Anê.

16Nhũm pre ã Jejus mẽ inhmã ujarênh anê nê mẽ inhmã:

—Ja pyrã nê wam mẽ ate ixkôt amnhĩ xunhwỳr xwỳnhjaja nê hapu hã mẽ kot kormã ixkôt amnhĩ xunhwỳr mã xwỳnhjaja kot paj nhỹrmã mẽ apiitã mẽ ato mex kumrêx o axpên pyràk. Anê.

Jejus kot htyk kukamã amnhĩ jarênh

Makre 10.32-34; Rukre 18.31-34

17Tã nhũm Jejus mẽ inhmã anẽ pa mẽ ixrohã ma Jerujarẽ hwỳr mỗ. Mẽ ohtôjê hkôt mỗ. Hãmri nhũm Jejus mẽ ixpê 12jê mã anẽ nẽ mẽ ixkwỳjê hkàx ã mẽ inhmã kapêr kaxyw ahte hapu hã mẽ ixto mỗ. 18Hãmri nẽ mẽ inhmã amnhĩ kukamã tanhmã amnhĩ jarênh to nẽ mẽ inhmã:

—E na pu mẽ ra Jerujarẽ hwỳr mỗ. Kamã koja mẽ pahkwỳjaja inhĩpêx kati nẽ. Koja mẽ patre krãhtũmjê mẽ Mojese kapêr o mẽ ahkre xwỳnhjê nhĩhkram ijaxà nhũm mẽ kot ixpĩr kaxyw ixtã amỳnê. 19Koja mẽ kãm ixkurê xwỳnhjaja ixpynê nẽ Rôm nhõ xwỳnhjê nhõ pôristijê hwỳr ixto tẽ nẽ mẽ kãm tanhmã ixto hêx to. Hãmri nhũm mẽ kuma nẽ mẽ mar xà hkôt tanhmã inhĩpêx to. Nhũm mẽ hkwỳjaja ixtã hpêr o axkê nẽ ixtã akunha nhũm mẽ hkwỳjaja ixto kapêr punuj nẽ tanhmã ijapry hto nẽ ixtak. Hãmri nẽ ma ixto tẽ nẽ pĩ kahpa hã inhô nẽ ixpĩ. ã koja mẽ inhĩpêx anẽ. Nom kot paj ixtyk ã ixtã apkati axkrunêpxi nhũm Tĩrtũm akupỹm ixto ixtĩr. Anẽ.

Xiakre mẽ Juãw wa katorxà kot wa ho Jejus wỳr ã harênh

Makre 10.35-45; mãänên Rômãn 12.3, 12.10, 12.16;

Epes 4.2; Piripos 2.3-8; Xiakre 4.6; Wam Pêtre 5.3

20Tã nhũm Jepetew prõja amnhĩ kôt Jejus wỳr hkra Xiakre mẽ Juãwja wa o tẽ. Kot wa ho Jejus wỳr kaxyw hwỳr wa o tẽ. Mẽ ixpyrà nẽ wa kot Jejus kôt pa ho pa xwỳnhjê hõ na pre wa nhũm wa katorxàja Jejus wỳr wa o tẽ. Hãmri nẽ kutã hkõnkrã ho tẽm nẽ nhỹ 21nhũm kãm:

—Pa mo na? Anẽ.

Hãmri nhũm kãm:

—Ma ixkrata na pa ixte wa ho awỳr kaxyw awỳr wa o tẽ. Xê kot kaj nhỹrmã ate mẽ piitã mẽ ho amnhĩptàr kaxyw nhỹ nhũm ixkrata wa akutã anhĩjê nẽ wa kêp anhõ kôwenatô nẽ akutã anhĩjê nẽ wa ato nhỹ. Ja prãm xàj na pa ã wa ho awỳr anẽ. Anẽ.

22Hãmri nhũm kuma nẽ Xiakre mẽ Juãw wa omu nẽ wa kãm:

—Nà na war akatorxàja htỳx ã war ato ixwỳr anẽ. Koja mẽ tokyx ixpĩ kot paj amnhĩ xà htỳx kãm ijamak kãm ty. Tã xà koja mẽ ixpyrà nẽ ã war anhĩpêx anẽ ka wa ixpyrà nẽ amnhĩ xà htỳx kamã ajamak rax kãm ty nà? Anẽ.

Hãmri nhũm wa kãm:

—Tỳ. Nà kot pa wa ijaxwỳja anẽ nẽ apyrà nẽ amnhĩ xà htỳx kãm ijamak kãm ty. Anẽ.

23Hãmri nhũm wa kãm:

—Nà ãm hãmri na ka wa amnhĩ jarẽ. War ate ixpyrà nẽ ixkõt amnhĩ xà htỳx kãm ajamak kãm atyk mã kênã. Tã nom war akatorxà kot war ato ixwỳrta ã kot paj tanhmã war amã nẽ hkêt nẽ. Kêt inhõ Papaj tãm koja ixkaxyw mẽhõ japêr nhũm inhĩhkõ hã nhỹ. No pa kot paj amnhĩ kaxyw mẽhõ jarẽnh kêt nẽ.

Anhỹr o wa kãm kapêr. 24Hãmri pa mẽ ixte wa uràk nẽ Jejus kõt ixpa ho ixpa xwỳnhjaja wa katorxà kot ã wa ho Jejus wỳr anhỹrja ã kuma nẽ wa kamã inhgryk nẽ. Hãmri nẽ axpên mã ixkapêr o:

—Tk. Nà koja Juãw mẽ Xiakre wa nhỹrmã kêp õ kôwenatô nẽ mẽ pahto amnhĩptàr kêt kumrêx. Anẽ.

25Nhũm Jejus mẽ inhma nẽ amnhĩ wỳr mẽ ixpiitã mẽ inhmã hpa ho apê nẽ mẽ inhmã:

—E mẽ amnẽ ixwỳr axkamẽ pa mẽ amã awjarẽ mãn. Anẽ.

Hãmri pa mẽ hwỳr axkamẽ nhũm mẽ inhmã:

—E mẽ inhma. Na hte Ijaew kêt xwỳnhjê nhõ pahijaja ã amnhĩ nhĩpêx anhỹr o ri pa nẽ amarĩ hkrĩ xà kamã hkrĩ ho hkrĩ. Àhpumunh tỳx jakamã amarĩ ixkre hkre jakry kamã hkrĩ ho hkrĩ nẽ kãm mẽ àpênh xwỳnhjê pix mã mẽmo mẽ àpênh ã karõ. Na htem ã amnhĩ nhĩpêx anhỹr o hkrĩ. Nẽ mẽ kot mex ã harênh kaxyw tanhmã mẽ ho mex to ho pa. 26-27Tã no mẽ kajaja. Kêr ka mẽ ho mẽ uràk kêt nẽ. ãm te amarĩ ri mẽ apa pyràk o axpên nhĩpêx o ri apa. Nẽ te mẽ apê mẽ kãm axàpênh xwỳnh pyràk o amnhĩ nhĩpêx o ri mẽ hkõt apa. No kêr ka mẽ ho amnhĩptàr mã ajamaxpêr o ri apa hkêt nẽ. 28Mẽ ate mẽmoj tã pa ixkutã anojarêt ho apa kaxyw na pa pre mẽ awỳr ixwỳr kêt nẽ. Ixte amarĩ mẽmoj to mẽ kamjaja mẽ akutã inhnojarêt o ixpa kaxyw na pa pre mẽ awỳr wrỳ. Nẽ mẽ ate ixkõt amnhĩ xunhwỳr xwỳnhjê nẽ ixyk kaxyw na pa pre wrỳ. Anẽ.

Jejus kot no hkre xwỳnh wa ho mex ã harênh

Matêwre 9.27-31; Makre 10.46-52; Rukre 18.35-43

29Tã pa mẽ Jejus kõt kormã Jerujarẽ hwỳr ra Jeriko htêp o mõ. Hãmri nẽ kurũm ixkaton mõ nhũm mẽ ohtô nẽ mẽ ixkõt mra. 30Nhũm pry nhĩhkjê hã no hkre xwỳnh wa àhwỳr o hkrĩ xwỳnhja wa amnhĩ wỳr mẽ inhmrar mar o nhỹ. Mẽ ohtô nẽ Jejus kõt mẽ mrar xwỳnhjê mrar ma nẽ mẽ kãm:

—Kwa mo na? Mẽmoj wỳr na ka mẽ axohtô nẽ mra? Anẽ.

Hãmri nhũm mẽ wa kãm:

—Nà Jejus pê Najare nhõ xwỳnhhta kõt na pa mẽ mra. Anẽ.

Hãmri nhũm wa mẽ kuma hãmri nẽ kàx pê Jejus mã kapêr nẽ kãm:

—Pa Pahihti? E apê mẽ inhõ Pahihti mex na ka. Te apê amnepêm anhĩgêt pahihti Tawita pyràk. Jakamã kwa wa ixkamã axukaprí nẽ akupỳm wa ixto mex. Anẽ.

31Hāmri nhũm Jejus kôt mẽ mõi xwỳnhjaja wa kuma nẽ wa kãm:

— Tk. Kwa war akapẽr kêt nẽ nhỹ nà. Anẽ.

Tã no nhũm wa ãm mẽ kuma nẽ xatã amnhĩ to kuwỳ. Kàx pẽ amnhĩ to kuwỳ. 32Hāmri nhũm Jejus wa kuma nẽ xa nẽ wa omu nẽ wa kãm:

— Pa mo na? Tanhmã kot pa wa ato? Anẽ.

33Hāmri nhũm wa kãm:

— Nà akupỹm wa inhmã wa ixrít mex prãm. Anẽ.

34Hāmri nhũm kãm wa hkaprĩ nẽ wa no htok nhũm wa akupỹm rít mex kurê kumrẽx. Hāmri nẽ rít mex ã amnhĩ pumu nẽ hkĩnh tỳx nẽ ma Jejus kôt hkwyjê hkôt mõi.

Jejus kot Jerujarẽ hwỳr àr ã harẽnh

Makre 11.1-11; Rukre 19.28-40; Juãw 12.12-19

21 1Tã nhũm Jejus kormã Jerujarẽ hwỳr kormã mõi. Pa mẽ hkôt mõi nẽ ra Petake hwỳr ixàhtêp o mõi. Hixêt pẽ Oriwêhti kahti ri na pre krĩa xa. Jakamã pa mẽ wa hwỳr ixàhtêp o mõi nhũm Jejus mẽ ixte hkôt ixpa ho ixpa xwỳnhjê wa ho axkrut nẽ amnhĩ kukamã wa kumẽ. 2Nẽ wa kãm:

— E wa ma krĩ mũj wỳr mẽ ixkukamã wa tẽ. Nẽ wa hwỳr axà nẽ nhỹri jumẽnre mẽ hkra wa kãm ê nẽ wa ãm xwỳnh wa omu hãmri nẽ kãm ê xà hpôt nẽ man akupỹn amnẽ hamẽ wa o tẽ. 3Koja mẽhõ ja hã war apumu nẽ hã tanhmã war amã kapẽr to ka wa kãm ã ijarẽnh anẽ nẽ kãm: “Nà mẽ panhõ Pahihti na hã karõ pa wa hwỳr tẽ.” Anhỹr o wa kãm ijarẽ. Hãmri nhũm war ama nẽ war amã õr kurê kumrẽx. E wa ma hwỳr tẽ. Anẽ.

4Tirtũm kapẽr ã kagà htũm ra kot ja kukamã harẽnh. Na pre ra Tirtũm nhỹ hã kapẽr xwỳnhjê hõ ja jarẽ nẽ hã kagà ho:

5 Pa Jerujarẽ nhõ xwỳnhjaja. Kwa mẽ tee ri amnhĩ kukamã
ajamxpẽr ho amã ma hkêt nẽ. Ota mẽ anhõ pahi nywta
ra jumẽnre hã nhỹ nẽ mẽ awỳr hpõx o tẽ. Te kot amnhĩ to
grire xwỳnh pyrak o amnhĩ nhĩpêx nẽ tẽ.

6Anhỹr o kot hkukamã harẽnh jakamã nhũm Jejus amnhĩ kukamã ja wa kumẽ hãmri nhũm wa ma hwỳr htẽm kurê kumrẽx. 7Nẽ krĩa wỳr põi nhũm Jejus kot wa kãm harẽnh xà hkôt nhũm wa jumẽnreta pumu. Hãmri nẽ hamẽ wa kãm ê xà hpôt nẽ ma Jejus wỳr wa o tẽ. Hãmri nẽ kaxyw amnhĩ xê hkwy hkwrỹ nẽ kãm ho jumẽnre nywta kõi kahty. Nẽ kãm ho htỳx nẽ o xa nhũm Jejus hã nhỹ nẽ hã mõi. 8Kormã Jerujarẽ hwỳr hixêt ã àpir o mõi. Nhũm mẽ kot omunh o kuhê xwỳnhjaja hkĩnh nẽ ma hkukamã pry ho mex kaxyw amnhĩ xê hkwyptyr ho mõi. Nẽ põi hkwy jakà nẽ utyr o mõi. 9Nhũm mẽ hkwyjaja Jejus kukamã mra nhũm mẽ hkwyjaja hapu hã hkôt mra. Nẽ piitã kàx pẽ Tirtũm mex o mex ã harẽnh o hkôt mõi nẽ harẽnh o:

Ota Tirtûm kot mẽ pahwÿr mẽnh xwÿnhhta ra pøj. Âm hãmri na mẽ pahwÿr wrÿ. Ja na mex kumrêx. Kêp mẽ panhõ Pahihti mex na. Âm hãmri na pre Tirtûm mẽ pahwÿr kumê.

Tirtûm mex kumrêx. Âm mex o mex.

Anhÿr o Jejus kôt Jerujarê hwÿr harênh o mõ. Kot mẽ ho amnhÿptâr kurê kumrêx ã hkamnhÿx jakamã hkÿnh nê hkôt ã harênh anhÿr o mõ. 10Hãmri nhũm krÿ nhõ xwÿnhjaja tee ri mẽ kuma nê axpên mã:

— Kwa mẽhõ na we hpõx o mõ nhũm mẽ ã hkôt harênh anhÿr o mõ? Anê.

11Hãmri nhũm Jejus kôt mẽ mrar xwÿnhjaja mẽ kuma nê mẽ kãm:

— Nà Tirtûm nhÿ hã kapêr jarênh xwÿnh pê Jejus na. Kêp Garirej kamã krÿ pê Najare nhõ xwÿnhhta na. Anê.

Jejus kot Tirtûm nhõrkwÿ hwÿr àr ã harênh

Makre 11.15-19; Rukre 19.45-48; Juãw 2.13-22

12-13Tã hãmri nhũm Jejus Jerujarê wÿr axà nê jumênre rũm wrÿ nê ma Tirtûm mã amnhÿ jarênh xà hã ixkre hwÿr tẽ nê axà. Hãmri nê tee ri mẽ kot tanhmã ixkre kamã amnhÿ nhÿpêx to hã mẽ omunh o xa. Nhũm mẽ axtem nê môx nê ôwêhti nê tuuti ho wênê ho kuhê. Mẽ kot haprôr nê Tirtûm mã amnhÿ jarênh kaxyw kãm hpar nê ôr kaxyw mẽ kãm ho wênê ho kuhê. Nom axtem nê mẽ kãm hã ohtô rax kãm mẽ kãm ho wênê. Hãmri nhũm Jejus mẽ hwÿr axà nê tee ri mẽ omu nhũm ja kêp omnuj tÿx kumrêx. Hãmri nhũm mẽ hwÿr tẽ nê mẽ kot kàxpore ho pinhpanh xwÿnhjê pê mẽ õ mēsti rēnh pa. Nê mẽ kot tuuti ho wênê xwÿnhjê pê hkrÿ xà hkujate nê rēnh pa. Hãmri nê mẽ kãm:

— Tk. Kwa Tirtûm kapêr ã kagà htũm kot ixkreja jarênh kot:

Inhõrkwÿja ãm mẽ ate inhmã amnhÿ jarênh xà hã ixkre pix kaxyw na.

Anhÿr o kot harênh tã ka mẽ axtem nê kamã ã amnhÿ nhÿpêx anê. E kwa mẽ ajapõx tokyx anê. Anê.

Hãmri nê mẽ kator pa nhũm mẽ ma hapêx. 14Hãmri nhũm mẽ no hkre xwÿnhjaja nê mẽ hyk o mẽ pa xwÿnhjaja mra nê agjê nê Jejus kutã kuhê nhũm mẽ omu nê akupÿm mẽ ho mex. 15-16Hãmri nhũm mẽhprÿ hkwyjaja hwÿr mra nê kuri kãm mex o mex ã gre nê kãm grer o:

Amex kumrêx Pahihti.

Tirtûm na pre mẽ ixwÿr amê.

Kot kaj te anhÿgêt Tawi pyrã nê mẽ ixto amnhÿptâr o apa.

Anhÿr o kãm grer o kuhê. Hãmri nhũm patre krãhtũm mẽ Tirtûm kapêr tũm o mẽ ahkre ho mẽ pa xwÿnhjaja tee ri ã mẽ grer anhÿr ã mẽ kuma. Nê tee ri Jejus kot mẽ no hkre xwÿnhjê mẽ mẽ hyk o mẽ pa xwÿnhjê ho mex ã omunh o kuhê nê gryk nê Jejus wÿr tẽ nê kãm:

—Kwa na mēhprījaja mē grer kām ā ajarēnh anē ka mē mar kêt nē? Mē grerja mexti hā. Anē.

Hāmri nhūm mē kām:

—Tỳ ixte mē mar kēnā. Tirtūm kām hprām xà hkôt na mē ā inhmā inhmex o inhmex ā ixtā grer anē. Tirtūm kapēr ā kagà htūm kot ā mē hkukamā harēnh kot anhÿr. Mē harēnh kot:

Koja mēhprījaja Pahihti mā mex o mex ā grer o kuhê.

Anhÿr o kot mē hkukamā harēnh kēnā. Tā mǎn ka mē kormā kamā harēnh kêt jakamā na ka mē ja jarēnh mar kêt nē. Kwār mē māmri ā inhmex ā grer anē.

17Anhÿr o mē kām kapēr hāmri nē mē inhmā anē pa mē ixkreta rūm ijapôj nē ma akupÿm Petān wÿr mra nē kamā amnhīm hikra.

Jejus kot mēmo hpār mā kapēr ā harēnh

Makre 11.12-14; mǎnēn Xiakre 1.6

18Tā nhūm kwÿhtā nhūm Jejus kànhmā nhÿ nē mē inhmā anē pa mē ixrohā ma akupÿm Jerujarē hwÿr mra. Hāmri nē kormā mō nhūm Jejus pry kahti ri ra kām prām nē. 19Hāmri nē mēmo pī pē fikēhti jarēnhja pumu nē kot ô hkwÿ rēnh nē hkrēr kaxyw hwÿr māt. Hāmri nē tee ri ô japēr nhūm ô hkêt nē ām hô hpix harir. Hāmri nhūm tee ri omu nē kām:

—E kot kaj axte axô hkêt kumrēx.

Anhÿrja o nhūm grà par kurê kumrēx. 20Hāmri pa mē ixte hkôt ixpa ho ixpa xwÿnhjaja omu nē Jejus mā:

—Kokÿÿ. Kwa tanhmā na we amnhī nhīpēx to nē grà kurê kumrēx? Anē.

21Nhūm mē inhmā:

—Nà kot kaj mē ixpyrà nē fikēhti kot tanhmā amnhī nhīpēx to kaxyw Tirtūm mā ajamapēr tÿx nē nhūm amā hprām xà hkôt amā tanhmā hipēx to. Nom kêr ka mē ajamapēr kati ho tee ri hkukamā ajamapēr kêt nē. Ām kaxyw Tirtūm kôt ajamapēr tÿx nē nhūm mē amā tanhmā mēmoj nhīpēx to. Ām hāmri na pa mē amā ja jarē. No ām ja pix kêt. Kot kaj mē mǎnēn hixēt mÿj mā akapēr nē kām: “E anhÿr xàta rūm akato nē ma tē nē gô rax kām mrō.” Anē nhūm amar xà hkôt ā amnhī nhīpēx anē.

22—Nē kot kaj mē mēmoj tā Tirtūm wÿ nē kaxyw kām ajamapēr tÿx kām hā awÿ nhūm amā mēmoj prām xwÿnhhta gō. Anē.

Méhō nhÿ hā Jejus kot mē ahkre hā harēnh

Makre 11.27-33; Rukre 20.1-8

23Nhūm arīgro hō hā nhūm Jejus kêwe axte Tirtūm mā amnhī jarēnh xà hā ixkreja wÿr axà nē kamā mē ahkre ho nhÿ. Mē kām tanhmā mē kot amnhī nhīpēx to nē nhÿrmā Tirtūm mē wa kuri htīr tūm nē pa kaxyw

tanhmã mẽ kãm kapër to ho nhỹ. Hãmri nhũm Ijaew krãhtũmjê mẽ mẽ õ patre krãhtũmjaja hãmri hwỳr mra nê hêx rom mẽmoj tã hkukja nê kãm:

—Kwa mẽ inhmã amnhĩ jarẽ. Mẽhõ nhỹ hã na ka hte ã amnhĩ nhĩpêx anhỹr o apa? Na ka hte akupỹm mẽ ho mex o apa nê tanhmã mẽ ahkre hto ho apa. Xà amnhĩ krã hkõt na ka hte ã amnhĩ nhĩpêx anê nà? Anẽ.

24Hãmri nhũm mẽ kãm:

—Nà kot pa ixkumrêx mẽmoj tã mẽ akukja. Ka mẽ inhma nê tanhmã inhmã harênh to pa rĩ kormã mẽ amã amnhĩ jarẽ. 25-26Finat Juãw Paxis ã kot paj mẽ akukja. Mẽhõ nhỹ hã na pre hte mẽ hkrã kumrãr o pa? Xà amnhĩ krã hkõt nà? Xà Tĩrtũm nhỹ hã? E mẽ atõ inhmã ja jarẽ. Anẽ.

Hãmri nhũm mẽ kuma nê tee ri kot tanhmã kutã kãm harênh to hkukamã hamaxpêr pê axpên pumunh o kuhê nê axpên mã:

—Kwa tanhmã kot puj wem kãm ja jarênh to? Or mẽ kot mar o kuhê xwỳnhjaja na htem kêp Tĩrtũm nhỹ hã kapêr jarênh xwỳnh ã harê. Tã kot puj mẽ kãm kot amnhĩ krã hkõt kot mẽ hkrã kumrãr ã harê nhũm mẽ tee ri mẽ pama nê mẽ pakamã gryk tỳx nê. Nê mẽ paxêx rom ã mẽ pahte kãm pakapêr anhỹr ã mẽ pahpumu nê kên o mẽ pahtak o mẽ panhĩmex. No kot puj mẽ kãm Tĩrtũm nhỹ hã kot mẽ hkrã kumrãr ã harê hãmri nhũm mẽ pamã: “Kwa ã kot anhỹr kênã na ka prem kapêr ma nê hkõt ajamaxpêr kêt nê?” Anẽ. Jakamã kot puj mẽ ja pymaj tanhmã kãm harênh to hkêt nê. Kot puj mẽ ãm kãm aa te mẽ pahte ja jarênh mar kêt pyrãk o harê. Anẽ.

Mẽ kot tanhmã Jejus mã nê nhũm kot ta pãnhã tanhmã mẽ kãm nê pymaj nhũm mẽ tee ri kãm tanhmã nê hprãm kaprỹ o kuhê. 27Hãmri nê kãm:

—Konẽn. Mẽ ixte mẽhõ nhỹ hã kapêr o pa hã omunhre hã. Anẽ.

Hãmri nhũm mẽ kuma nê mẽ kãm:

—Tk. Tõe kot pa xep ijaxwỳja mẽ amã tanhmã amnhĩ jarênh to hkêt nê. Ijaxwỳja ixte mẽhõ nhỹ hã ã ixte amnhĩ nhĩpêx anhỹr o ri ixpa hã amnhĩ pumunhre hã. Anẽ.

Mẽhõ my mẽ hkra wa pijakrut ã wa harênh

Matêwre 7.21-23; Rukre 7.29-30

28Hãmri nhũm Jejus axte Ijaew krãhtũmjê mẽ mẽ õ patre krãhtũmjê mã kapêr nê mẽmoj tã kuxi nê tanhmã mẽ kãm ujarênh to nê mẽ kãm:

—E pa mẽ amã awjarê ka mẽ inhma. Koja mẽhõ hkra my hamêxkrut. Hãmri nê hkra kot waja mã tanhmã kapêr to nê kãm: “E kêr ka jarãhã ma tẽ nê inhmã pur kãm apê.” Anẽ. 29Hãmri nhũm kuma nê pur mã htem kaga nê hitõt nê. Tãã no ãm hã ahtũmre nê tanhmã hamaxpêr to hãmri nê ma hwỳr tẽ nê kamã ãpênh o xa. 30Hãmri nhũm wa hipêêxàja hpãnhã hkra kot hapu hwỳr tẽ nê mã kãm kapêr anê nê kãm: “E kêr ka

ajaxwỳja atõ hkõt tẽ nẽ wa inhmã apê.” Anẽ nhũm kuma nẽ kãm: “Tõe. Nã kot paj ma tẽ.” Anhỹr tã no ãm hõta kĩnhã htẽm kêt nẽ.

31—Jakamã e. Nhỹ hkra na pre hipêêxã kapêr ma nẽ hkõt amnhĩ nhĩpêx nẽ kapêr nhĩrõp ãm kêt nẽ? Xà kot waja nã? Xà kot haputa? E mẽ atõ tanhmã inhmã wa harẽnh to. Anẽ.

Hãmri nhũm mẽ kuma nẽ kãm:

—Nã kot wata. Kot wata na hitõt tã tanhmã hamaxpêr to nẽ ma tẽ nẽ kãm apê. Anẽ.

Hãmri nhũm mẽ kãm:

—Tỳ ãm hãmri na ka harẽ. No mẽ kajaja te mẽ ate hkra kot haputa kot amnhĩ nhĩpêx pyrãk. Mẽ ate Tĩrtũm kapêr kõt amnhĩ nhĩpêx o apa hã amnhĩ jarẽnh tã hkwỳm ri amnhĩ nhĩpêx o apa. Te mẽ ate kot hapu kot hipêêxã mã àpênh ã amnhĩ jarẽnh tã kãm àpênh kêeta pyrãk. No kêt mẽ kot amnhĩ tomnuj o mẽ pa xwỳnh kwỳjaja na mẽ arom Tĩrtũm kapêr ma nẽ hkõt amnhĩ nhĩpêx. Jao ra tãm amnhĩ nhĩpêx o pa. Jakamã mẽ arom ma kaxkwa hwỳr pa kaxyw ra tãm nẽ. ãm hãmri na pa mẽ amã ixkapêr. 32Na ka mẽ finat Juãw Paxis ã ixkukja. Juãw Paxisja na pre hte mẽ ate tãm amnhĩ nhĩpêx ã mẽ amã karõ ho pa. Tã no ka mẽ ãm ama nẽ ãm ama nẽ aa kapêr kõt amnhĩ nhĩpêx kêt nẽ. Nom mẽ kot amnhĩ tomnuj o mẽ pa xwỳnh kwỳjaja mẽ arom kuma nẽ Tĩrtũm kõt amnhĩ nhĩpêx. Ka mẽ ja hã mẽ omu nẽ ãm mẽ omu nẽ mẽ urãk nẽ ã amnhĩ nhĩpêx anhỹr kêt nẽ. Anẽ.

Mẽ àpênh punu xwỳnhjê jarẽnh

Makre 12.1-12; Rukre 20.9-18

33Nhũm Jejus arĩ Ijaew krãhtũmjê mẽ mẽ õ patre krãhtũmjê mã kapêr. Nẽ mẽ kot tanhmã hipêx to hkukamã mẽ kãm tanhmã amnhĩ jarẽnh to. No ãm amnhĩ tã kuxi nẽ mẽ kãm awjarẽ nẽ mẽ kãm:

—Koja mẽhõ mẽ kot kãm pur kãm àpênh kaxyw hkwỳjê mã karõ nhũm mẽ ma hwỳr mra nẽ kamã mẽmo hy hkre nẽ hkre pa. Hãmri nhũm hpur nhõ dõn nhỹhỹm nojarêt nẽ kãm mẽ àpênh xwỳnhjê mã tanhmã hpur jarẽnh to nẽ mẽ kãm: “E or ixpur nõ. Kê kamã mẽmoj kà hpa ka mẽ mãmrĩ kamã axujamỳnh pa nẽ ho axkjê. Nẽ ixkutêp inhmã inhõ jaxwỳ nẽ mãmrĩ anhõ tanhmã ho hprãm xà hkõt tanhmã ho.”

—Anhỹr o mẽ kãm kapêr hãmri nẽ ma nhỹhỹm mõ. 34Tã nhũm ra pur kãm mẽmoj hkà pa nom nhũm hpur nhõ dõn arĩ krĩ hõ kamã hã ujahkre ho ri pa htã kuri kãm àpênh xwỳnhjê ho axkrunêpxi nẽ akupỳm mẽ hwỳr mẽ kurẽ. Mẽ kot mẽ kãm hkwỳ nhõr nhũm mẽ ma kot kãm o mõi kaxyw nhũm ma mẽ hwỳr mẽ kurẽ. 35Nhũm mẽ ma hwỳr mõ. Mõi nẽ ra hwỳr põi nhũm mẽ amnhĩ wỳr mẽ omu nẽ axtem nẽ mẽ homnuj nẽ. Nẽ mẽ unẽ nẽ ja tak nẽ ja pĩ nẽ hõja nhũm mẽ kẽn o htak hãmri nẽ amnhĩ nẽ wa hano nhũm wa ma akupỳm ÿ kamã mõ. 36Hãmri nhũm

mê õ patrãwja tee ri wa omu nê hamaxpêr o: “Kwa nà na mê ixpê inhmã mê àpênh xwÿnhjê homnuj tÿx nê. Nà kot paj axte mê hwÿr mê hkwyjê rê. Nom hpãnhã mê ho ohtô nê mê kurê. Kê mê ohtô nê mê hwÿr mō nê tã inhmã inhō hkwyj jamÿ nê man ixwÿr o mō.”

—Anhÿr o hamaxpêr hãmri nê mê hwÿr jajê rê nhũm mê ma akupÿm mê hwÿr mō. Nhũm mê amnhĩ wÿr mê ohtô hã nê mã mê ho anê nê mê hipêx kati nê nhũm mê ÿ kamã ma õ patrãwja wÿr akupÿm mō. 37Hãmri nhũm tee ri mê omu nê hamaxpêr o: “Hêxta waa nê. Tanhmã kot paj amnhĩ nhípêx to? Nà kot paj pêr mê hwÿr ixkraja mãn mê. Inhmã hapê htÿx tã kot paj mê hwÿr kumê kê ma mê hwÿr mō. Hãmri nhũm mê kêp ixkra hã omu nê tanhmã ixpê ho hkêr nê. Nê tã inhmã kãm inhōja kwÿ gō.” Anê.

—Hãmri nê mê hwÿr kumê nhũm ma mō. 38Tã hãmri ra mê hwÿr hpôx o mō nhũm mê amÿm amnhĩ wÿr omu nê kêp hkra hã omu nê axtem nê hã axpên mã amÿnê nê axpên mã: “E onêj hpur nhō dõn krata tẽ. Koja nhÿrmã õ papaj mÿr pê amnhĩm hpur ã pykata pytã nê ho õ. Jakamã kwa pu mê hpÿr kurê kumrêx nê kêp hpur ho arÿk nê ho panhō. E tokyj pu mê kupÿ ri.” Anê.

39—Hãmri nhũm ra tẽ nê mê hwÿr pøj nhũm mê unê nê hpur nê ho kato nê mã ho anê nê kupÿ. ã mê ujarênh kot anhÿr. Anê.

40Nhũm pre ã Jesus mê kãm ujarênh anê. Hãmri nê hã mê hkukja nê mê kãm:

—E koja pur nhō dõnja hkra jarênh ma hãmri nê tãm mê hwÿr mō hãmri nê tanhmã mê hipêx to wehe? Anê.

41Hãmri nhũm mê kãm:

—Nà koja ma akupÿm mê hwÿr mō hãmri nê mê homnuj tÿx nê mê himex pa. Hãmri nê hpãnhã nhãm hpur ã mêmojjê rê nhũm mê tã katat kôt kãm àpênh o pa. Anê.

42Hãmri nhũm Jesus mê kãm:

—Tÿ ãm hãmri na ka ã mê harênh anê. Kot mê ho anhÿr mã tãm



Matêwre 21.22-46

kênã. Mãn ka prem ra Tirtũm kapër ã kagà htũm kot tanhmã ja jarênh toja ma? Harênh kot:

Mê kot kên o amnhĩm òrkwỹ nhĩpêx kaxyw nê kên maati pumu nê htỹx omnuj ã hkamnhĩx nê hkagata. Mê kot hkaga htã nhũm Tirtũm mẽ kurom mex o kot kên piitã hakrenh par ã omunh kurê kumrêx. Tirtũm kot kên maati mex ã harênh xwỹnhhta mẽ pamã mex o mex.

Ã Tirtũm kapër ã kagà htũm kot ja jarênh kot anhỹr. ⁴³Ja pyrã nê na pre ra Tirtũm amnhĩ kaxyw mẽ apê Ijaew xunhwỹ. Mê apê hkra nê hkôt mẽ ate amnhĩ nhĩpêx kaxyw amnhĩ kaxyw mẽ axunhwỹ. Tã ka mẽ axtem nê hkaga. Te mẽ kot kên maati pumunh nê mex kêt ã hkamnhĩx nê hkagata pyrãk. Jakamã koja mẽ apãnhã Ijaew kêt xwỹnh kwỹjê xunhwỹ nhũm mẽ arom hkôt amnhĩ nhĩpêx mex o pa. Jao ra mẽ kêp hkra nê. Anê.

⁴⁴Nhũm pre ã Jejus mẽ kãm te kêp kên maati pyrãk o mẽ kãm amnhĩ jarênh anê. Hãmri nê axte amnhĩ tã kuxi nê mẽ kãm axte kên jarênh pyrãk ã amnhĩ jarê nê mẽ kãm:

— Nã kot kaj mẽ atõ ixkaga hãmri nê te mēhõ htỹx htēm nê kên pumunh kêt nê hã htêk nê tēm pyrãk o amnhĩ nhĩpêx. Jao ixkutã amnhĩ xãm. Rỹ ka tanhmã ajamaxpêr to nê ixkaga nhũm te kên maati kot anhĩpy tēm nê axôm par pyrãk o anhĩpêx ka mẽ amex kêt kumrêx. Anê.

⁴⁵Nhũm pre ã mẽ kãm ujarênh kãm mẽ harênh anê. Hãmri nhũm patre krãhtũmjê mẽ Parijew nhõ xwỹnhjaja tee ri amnhĩ tã kuma ⁴⁶nhũm ja mẽ kêp omnuj tỹx jakamã nhũm mẽ kãm unênh nê haxàr prãm nê. No mẽ ãm amnhĩ tã kãm mẽ kot mar o kuhê xwỹnhjê puma nê. Mê kurom Jejus kêp Tirtũm nhỹ hã kapêr xwỹnh ã hkamnhĩx jakamã nhũm mẽ kãm mẽ uma nê. Hãmri nê kormã tanhmã ho hkêt nê.

Pahi kot hkra hprõ kaxyw hkwyjê hwỳr ã harênh

Rukre 14.15-24; mããnên Wam Korõt 6.9-11; Epes 5.5-6; Apokarip 19.7-8

22 ¹⁻²Tã nhũm Jejus axte mẽ kãm awjarê. Ijaew kot Tirtũm kaga hã mẽ kãm hã kuxi nê awjarê nê mẽ kãm:

— E pa mẽ amã ahpỹnhã mẽ kot Tirtũm kapêr mar nê tanhmã amnhĩ nhĩpêx to xwỹnhjê jarê ka mẽ inhma. Te mẽ kot pahihti kot hkra hprõ kaxyw nhũm kot amnhĩ wỳr hkwyjê hwỳr nhũm mẽ kot harênh mar nê ahpỹnhã tanhmã amnhĩ nhĩpêx to xwỹnhjaja kot amnhĩ nhĩpêx pyrãk. Koja pahihtija hkra hã hkĩnh nê hã apkur mex kaxyw amnhĩ wỳr hkwyjê hã karõ. ³Hãmri nhũm kãm mẽ àpênh xwỹnhjaja ra kot amnhĩ wỳr mẽ hã karõ xwỹnhjê hwỳr mra nê mẽ kãm nojarêr nhũm mẽ kuma nê ãm mẽ kuma nê axtem nê mẽ kêp hitõt nê. Hãmri nhũm mẽ tee ri mẽ kuma nê akupỹm tē nê pahihti mã mẽ harê.

4—Hãmri nhũm tee ri amnhĩ tã mẽ harênh ma nê hpãnhã mẽ hwỳr axtem kãm àpênh xwỳnh kwỳjê rê nhũm mẽ ma mẽ hwỳr mra nê mẽ kãm: “Pa. E kwa mẽ tokyx. Na ra pahшти mẽ akutêp mẽõ nhĩpêx pa. Na mẽ môx kwỳ hpa nê ho àr mex nê. Nê mẽ akutêp mẽmoj nhĩpêx par jakamã e kwa mẽ tokyx nà.” Anê. 5 ã mẽ kãm kapêr anhỳr tã nhũm mẽ kuma nê ãm mẽ kuma nê ma ahpỳnhã nhỹhỹm mra. Nhũm ja ma àpênh mã mra nhũm ja ma ihpur kãm àpênh mã ma tẽ nhũm ja ma nhỹhỹm mẽmo to wênê ho tẽ. 6 Nhũm mẽ hkwỳjaja mẽ kãm ujarênh xwỳnhjê pynê nê mẽ htao o mẽ kupa.

7—Hãmri nhũm pahштija mẽ harênh ma nê àhkurê nê. Hãmri nê mẽ hwỳr pôristi hkwỳ rê nhũm mẽ ma mẽ hwỳr mra nê mẽ unê nê mẽ kupa nê mẽ õ krĩ hã hpôk pa. 8 Hãmri nhũm pahштija kãm mẽ àpênh xwỳnh kwỳjê mã kãm: “Kwa ra ixte mẽ kutêp mẽõ mex kwỳ xunhwỳr tã nhũm mẽ ixwỳr mrar kêt nê. Ixtỳx ho mẽ mex ã mẽ hkamnhĩx nê amnhĩ wỳr mẽ hã karõ no mẽ mex kêt. Mẽ kot mẽ ixkutã apkur mã tãm kêt. 9 E kwa mẽ ma krĩ hkôt axtem mẽ hkwỳjê japêr o mra. Nê nhỹri mẽhõ pumu nê kãm awjarê kê man ixwỳr tẽ nê ixkra hã hkĩnh nê mẽ ixkutã apku. Mẽ ã mẽ kãm axujarênh o amrar anê.” Anê.

10—Hãmri nhũm mẽ kuma nê ma mẽ hapêr o mra nê mẽ piitã mẽ kãm anhỳr o mra. Nhũm mẽ kuma nê wam tajê rom ma mẽ hkôt mrar kurê kumrêx. Mẽ kot amnhĩ to mex xwỳnhjaja nê mẽ kot amnhĩ tomnuj xwỳnhjaja hãmri piitã ma mẽ hkôt mra. Hãmri nê ixkreja wỳr mra nê hwỳr gjêx kaxyw nhũm mẽ kãm mẽ ê mex gõ nhũm mẽ hagjê hãmri nê kormã mẽ apkur xà hã ixkre hwỳr agjê nê ho nỳt pa. 11 Hãmri nhũm pahштija mẽ hwỳr axà nê mẽ piitã mẽ omu. Nhũm ja pixi nê axtem nê hkwỳjê hkĩnhã mẽ kot kãm ê mex nhõrja jaxàr kêt rãhã axà nê apkur o nhỹ. 12 Hãmri nhũm tee ri ja hã omu nê hwỳr tẽ nê kãm: “Pa. Tk. Kwa na htem ixkrem gjêx kaxyw nê mẽ kot mẽ kãm mẽ ê mex nhõr jagjê nê rĩ kormã hwỳr agjê nê apku. Tã mon ka akwỳjê hkĩnhã haxàr kaga? Kwa na htem ã amnhĩ nhĩpêx anhỳr kêt nê.” Anhỳr o kãm kapêr nom nhũm kuma nê ãm kuma nê tanhmã kutã kãm nê hkêt nê. ãm htỳx apkur o nhỹ. 13 Jakamã nhũm tee ri omu hãmri nê hã mẽ kot kãm àpênh xwỳnhjê mã amỳnê nê mẽ kãm: “E mẽ hwỳr tẽ nê unê nê hpa nê hte hpre nê ma o tẽ nê kamàt kô kamã amê. Kê tee ri mur nê amnhĩ xà htỳx kamã hamak o amnhĩ nham o axpên kamnhar tỳx kaprỳ ho nõ nê rĩ amnhĩ pumu.” Anê. Hãmri nhũm mẽ kuma nê kãm ho anê. ã mẽ ujarênh kot anhỳr. Anê.

14 Nhũm pre Jejus ã mẽ kãm ujarênh anê hãmri nê mẽ kãm:

—Nà Tirtũm kot pahштita pyrà nê amnhĩ wỳr mẽ ho ohtô nê mẽ hwỳr tã na hte mẽ piitã hkôt amnhĩ xunhwỳr kêt nê. Jakamã na hte ãm mẽ ho grêre nê amnhĩ wỳr mẽ ho api. Anê.

Parijew nhõ xwỳnh kot Jejus kamã hamak ã mẽ harênh

Makre 12.13-17; Rukre 20.20-26; mãânên Rômãn 12.1, 13.7

15-16Tã nhũm Parijew nhõ xwỳnhjaja ã Jejus kot mẽ kãm ujarênh anhỳrja ma hãmri nẽ kurũm kato nẽ tanhmã hkukamã axpẽn mã hã àmnênh to. Hãmri nẽ hwỳr mẽ hkwỳjê mẽ Erox kôt mẽ pa xwỳnh kwỳjê rẽ. Hêx rom mẽ kot mẽmoj tã hkukjêr kaxyw hwỳr mẽ kurê nhũm mẽ ma hwỳr mra nẽ omu nẽ kãm:

—Kwa Jejus. Nà ãm hãmri na ka hte Tĩrtũm kapêr o mẽ ahkre mex o ri apa nẽ mẽ kamã akahak o apa hkêt nẽ. Mẽ kot tanhmã ato kapêr punuj to htã ka aprĩ hã mẽ ahkre mex o ri apa. 17E kwa mẽ inhmã mẽmoj jarẽ. Rõm nhõ pahihiti kot mẽ pahpê Ijaew mẽ pahte kãm kàxpore hkwy nhõr ã mẽ pamã karõta. Kwa xà ja amã mex nà? Xà kot pu mẽ kãm hkwy gõ? Nà xà kot pu mẽ kãm òr kêt nẽ? E kwa mẽ inhmã tanhmã ja jarênh to. Anẽ.

18Nhũm prem ã hêx rom àhkukjêr anhỳr tã no nhũm ra mẽ hamaxpêr ã mẽ omu nẽ mẽ kãm:

—Tk. Kwa mon ka mẽ ã axêx rom ja hã ixkukjêr anẽ? 19-20E mẽ atõ inhmã kàxpore htỳxre hõ gõ pa omu. Anẽ.

Hãmri nhũm mẽ kãm ja gõ nhũm kupy nẽ kànhmã mẽ kãm kupê nẽ mẽ kãm:

—E mẽhõ nhĩxi nẽ mẽhõ karõ na ja hã? Anẽ.

21Hãmri nhũm mẽ kãm:

—Pahi Sesti karõ nẽ hixi na hã. Anẽ.

Hãmri nhũm mẽ kuma nẽ mẽ kãm:

—Tỳ. Tô kêr ka mẽ mãmri kãm hkwy nhõr o apa. Hã hkarõ nẽ hã hixi. Tãm kot hipêx xwỳnh jakamã õ na. No mẽ kajaja na pre Tĩrtũm mẽ anhĩpêx nhũm mẽ apê õ jakamã kwa kêr ka mẽ kapêr kôt pix mã ri amnhĩ nhĩpêx o ri apa. Anẽ.

22Hãmri nhũm mẽ amnhĩ jaêr pê ã kot kàxpore jarênh anhỳrja ma nẽ axte kãm tanhmã nẽ hkêt nẽ. Hãmri nẽ akryk omu hãmri nẽ ma akupỳm mra.

Akupỳm mẽ htĩr ã mẽ harênh

*Makre 12.18-27; Rukre 20.27-40; Juãw 5.21, 6.39-40;
mãânên Wam Korĩt 6.14, 15.12-28; Wam Tesarõn 4.13-18*

23Tã nhũm Satusew nhõ xwỳnh kwỳjaja mẽ kot akupỳm mẽ htĩr kêt ã mẽ hkamnhĩx kêt xwỳnhjaja na pre mẽ. Na pre htem mẽ htyk nẽ mẽ hapêx kumrêx ã mẽ hkamnhĩx jakamã axpẽn mã tanhmã Jejus jarênh to nẽ axpẽn mã:

—E kwa pu mẽ hwỳr mra nẽ mẽmoj xihtỳx ã hkukja. Kê mẽ pama nẽ tee ri tanhmã mẽ pamã kapêr to hkukamã hamaxpêr kaprỳ. Kê mẽ

piitã ja hã omu nê àhpumunh kêt ã omunh kurê kumrêx. E tokyx pu mē hwÿr.

Anhÿr jakamã Parijew nhõ xwÿnhjê pyrã nê hêx rom ma hwÿr mra nê hkukja nê kãm:

24—Pa Jesus? Kwa mē inhmã mēmoj jarê. Na pre finat Mojesja Tirtũm nhÿ hã ã mē panhĩgêjtê mã karõ anê. Mē hkra hkêt rãhã mē pa nê mē htyk xwÿnhjaja nhũm mē harênh o:

Koja mēhõ hprõ nê kamã hkra hkêt rãhã pan ty. Hã koja hkõt htõja hpãnhã hprõ ho hprõ nê kamã hkra. Hãmri nhũm kato nê te kêp htõ htyk xwÿnhhta hkra pyrãk. Anê.

Ã na pre Mojesja Tirtũm nhÿ hã mē kãm karõ anê. 25Jakamã kwa ga mē ixujarênh ma. Koja mē kot axpên to htõ xwÿnhjaja kêp 7. Nhũm kot waja hãmri hprõ nê wa pa nhũm kamã hkra hkêt rãhã ty. Nhũm hkõt htõja hpãnhã ho hprõ 26nê wa axpên to pa. Nhũm mãânên kamã hkra hkêt rãhã ty. Nhũm htõ hõta haxwÿja hpãnhã tãm o hprõ nê we wa axpên to pa grire nhũm haxwÿja kamã hkra hkêt rãhã ty. Hãmri nhũm htõ hkwÿjaja ni pyxi nê axpên pãnhã ho hprõ hpa no mēhõ kamã hkra hkêt rãhã htyk pa. 27Hãmri nhũm mē hprõta mē hkõt amnhĩ to hitep nê ty. 28Tã Tirtũm kot akupÿm nhÿrmã mē ho htĩr ronhÿx nhÿ nhÿx kêp nija mjên kumrêx? Ra piitã kot ho hprõ kênã. E mē inhmã ja jarê. Anê.

29-30Hãmri nhũm Jesus mē kuma nê mē kãm:

—Nã kaxkwa kamã mē kot amnhĩ nhĩpêxja axtem na. Mē htĩr ri mē kot Tirtũm kõt amnhĩ xunhwÿr xwÿnhjaja na htem ty hãmri nê Tirtũm nhõ krĩ kamã axte kãm hprõ hprãm kêt nê pa. Jakamã hprõ hkêt nê pa. Rÿ ni japêr nê mjên kêt nê pa. Nom ri kãm mjên rÿ hprõ hprãm kêt nê pa. Hãmri nê Tirtũm kapêr o mē wrÿk xwÿnhjê pyrã nê axte htyk kêt nê. ãm htĩr tũm rãhã nê pa ho pa. Pêr mē ate Tirtũm kapêr ã kagã htũm mar mex kêt jakamã na ka mē ã ja hã ixkukjêr anê. Tirtũm àhpumunh tÿx o àhpumunh tÿx jakamã kumã mē ate mēmoj tã ixkukjêr xwÿnhhta na tanhmã kêp kute hkêt. Ra ja kukamã àhpumunh tÿx kênã.

31-32—Nom mē ate akupÿm mē htĩr kêt ã mē hkamnhĩxja kot paj ixprĩ hã mē amã harê. Amnepêm na pre Tirtũm pĩ hpõkja kamã tanhmã Mojes mã kapêr to. Mãn ra mē ate mar. Na pre kãm:

Ixpê Apraãw nhõ Tirtũm na pa. Nê mãânên ixpê Apraãw kra Ijak mē htãmnhwÿ Jako wa õ Tirtũm na pa.

Anhÿr o Mojes mã amnhĩ jarê nhũm kuma nê hã kagã. Kêp apu arĩ mē htyk rãhã nhÿx pre ã mē harênh anhÿr kêt nê. Nhÿx pre mē harênh o: “Amnepêm Apraãw nê hkra nê htãmnhwÿ mē htĩr ri ixpê mē õ Tirtũm na pa pre.” Anhÿr o nhÿx pre mē harê. Nom na pre ã amnhĩ jarênh anhÿr kêt nê. Mē pamã te Apraãwja mē htyk nê mē hapêx pyrãk. Nom nhũm prem ra Tirtũm ri ra akupÿm htĩr nê mex nê pa ho pa. Tã ka htem Tirtũm kapêr kwÿm ri akupÿm mē htĩr kêt ã mē harênh o apa.

Anhÿr o Satusew nhõ xwÿnhjê mã kapêr. **33**Hãmri nhũm mẽ kot mar o kuhê xwÿnhjaja amnhĩ jaêr pê kot mẽ ahkreja ma.

Tirtũm kapêr maati jarênh

Matêwre 10.37; Makre 12.28-34; Rukre 10.25-28; mãânên Wam Juãw 5.3

34Tã nhũm Parijew nhõ xwÿnhjaja Satusew nhõ xwÿnhjê jarênh ma. Mẽ kot tee ri kãm hamaxpêr o Jejus jakrenh prãm kaprÿ hã mẽ harênhja ma hãmri nê axpên wÿr akuprõ nê Jejus wÿr mra. Kot mẽ uràk nê hêx rom àhkukjêr nê hamaxpêr o hakrenh kaxyw hwÿr mra. **35**Hõja kêp Tirtũm kapêr tũm o mẽ ahkre o mẽ pa xwÿnh jakamã hêx rom kamã hamak kaxyw kãm kapêr nê kãm:

36—Kwa Jejus. Ot pa mẽ awÿr mra. Kwa mẽ inhmã mẽmoj jarê. Na pre Tirtũm ahpÿnhã mẽmoj to 10 nê hã mẽ pamã karõ. Mẽ pahte hkõt amnhĩ nhĩpêx kaxyw hã mẽ pamã karõ. Tã nhÿ kapêr na mex o kot hkwy jakrenh wehe? Anê.

37Hãmri nhũm kuma nê mẽ kãm:

—Nà kot mẽ pamã hã karõ kot:

Kêr ka mẽ anhĩ piitã ho amã Tirtũm kĩnh tÿx o apa. Mẽ amã hkĩnh tÿx o mẽmoj piitã hakrenh par o apa.

38E Tirtũm kot mẽ pamã hã karõ ja na mex o piitã hakrenh par. **39**Nê hkõt ja:

Kêr ka mẽ amã akwÿjê hã ma ho te ka amã amnhĩ tã ma pyræk. Jao ra tãm mẽ hipêx.

40Ã Tirtũm kapêr ã kagã htũm kot mẽ pamã hã karõ kot anhÿr. ã mẽ pahte amnhĩ nhĩpêx anhÿr o papaja na Tirtũm kãm hprãm tÿx kumrêx. Kot kaj mẽ ja wa hkõt amnhĩ nhĩpêx rãhã ho ri apa nê mãânên ra Tirtũm kot mẽ pamã mẽmoj tã karõ xwÿnh piitã hkõt amnhĩ nhĩpêx. Ja na pre Mojes mẽ Tirtũm nhÿ hã kapêr xwÿnhjaja amnepêm Tirtũm nhÿ hã mẽ panhĩgêjtê mã hã karõ ho pa. Anê.

Jejus kot amnhĩ tã mẽ hkukjêr ã harênh

Makre 12.35-37; Rukre 20.41-44; mãânên Rõmãn 1.3-4

41Nhũm Parijew nhõ xwÿnhjaja arĩ Jejus mar o kuhê nhũm amnhĩ tã tanhmã mẽ hkukjêr to. Nom te nhãm mẽhõ hã mẽ hkukjêr pyræk o mẽ hkukja nê mẽ kãm:

42—E mẽ inhmã mẽmoj jarê. Tanhmã na ka htem axpên mã Tirtũm kot mẽ akaxyw ãm mã xwÿnhhta jarênh to? Kêp mẽhõ kanrêhã htãmnhwÿ koja wehe? Anê.

Hãmri nhũm mẽ kãm:

—Nà koja kato nê kêp pahi finat Tawi kanrêhã htãmnhwÿ koja.

43Anê nhũm Jejus mẽ kuma nê mẽ kãm:

—Tỳ. Âm hāmri na ka mẽ harẽ. No mo na htem axpẽn mã kệp pahi Tawi hkanrêhã htàmnhwỳ pix ã harẽ nẽ mãânèn kệp õ pahihti hã harênh kêt nẽ? Tawi na pre Tirtùm Karõ nhỹ hã tanhmã harênh to nẽ harênh o:

44 Na pre Tirtùm inhõ Pahihti mã ã kapěr anẽ nẽ kãm: “E amnẽ ixwỳr tẽ nẽ inhĩhkô hã nhỹ nẽ inhmã mẽ ho amnhĩptàr o akrĩ. Kot paj mẽ kot kãm akurẽ xwỳnh piitã mẽ unênh pa nẽ awỳr mẽ o mra nẽ anhĩhkram mẽ haxàr pa.” Anhỹr o pre kãm kapěr.

45 ã Tawija Tirtùm kot Kris mã kapěr jarênh nẽ kệp õ pahi hã kagà anẽ. Mẽ kajaja na ka htem âm kệp Tawi tàmnhwỳ pix ã axpẽn mã harênh o ri apa. No kêt Tawija na pre kệp õ Pahihti hã harênh o pa. Anẽ.

46 Hāmri nhũm mẽ kuma nẽ tee ri kot tanhmã kutã kãm kapěr to hkukamã hamaxpěr nẽ axte mẽmoj tã hkukjêr kêt nẽ. Tanhmã kot mẽ amnhĩ to nẽ hamaxpěr o hakre? Na prem tee ri kãm hamaxpěr o hakrenh prãm kaprỳ. Jejus mẽmoj piitã hkukamã àhpumunh tỳx o àhpumunh tỳx.

Jejus kot tanhmã Parijew nhõ xwỳnhjê jarênh to

Makre 12.38-40; Rukre 11.43-46, 20.45-47

23 ¹Tã nhũm Jejus mẽ ixte hkôt ixpa ho ixpa xwỳnhjê mẽ mẽ kot mar o kuhê xwỳnhjê mã kapěr nẽ mẽ inhmã tanhmã Parijew nhõ xwỳnh mẽ Mojes kapěr o mẽ ahkre xwỳnhjê jarênh to nẽ mẽ inhmã:

2—Nà Parijew nhõ xwỳnh mẽ Tirtùm kapěr tùm o mẽ ahkre xwỳnhjaja na htem hprĩ hã Tirtùm kapěr ã kagà htùm mar mex nẽ. ³Jakamã kêr ka mẽ mar tỳx nẽ mẽ kot ho mẽ ajahkre kôt amnhĩ nhĩpêx. No mẽ kot amnhĩ nhĩpêxja kêr ka mẽ hkôt amnhĩ nhĩpêx kêt nẽ. Mẽ kot Tirtùm kapěr tùm o mẽ ajahkre htã hkôt amnhĩ nhĩpêx kêt nẽ. ⁴Te mẽ kot mẽhõ kot mẽ katut ã mẽ kãm mẽ jênh pytĩ janhôr tã no âm mẽ kuxwar hkwỳ htur kêt kot amnhĩ nhĩpêx pyràk o na htem amnhĩ nhĩpêx o pa. Jao mẽ amã mẽmoj tã karõ nẽ mẽ amã: “E kêr ka mẽ ã amnhĩ nhĩpêx anẽ nẽ ã amnhĩ nhĩpêx anẽ.” Anhỹr pix o mẽ amã kapěr o pa. Nom mẽ tãmjaja amnhĩ kapěr kôt amnhĩ nhĩpêx kêt nẽ.

5—Na htem hkwỳjê kot mẽ omunh nẽ mẽ kot amnhĩ to mex ã mẽ harênh kaxyw mẽ noo mã tanhmã amnhĩ nhĩpêx to. Nẽ mẽ mẽ noo mã mẽ ê mex pix kãm pa. Nẽ amnhĩm Tirtùm kapěr ã kagà htùm kwỳ hã kagà nẽ amnhĩ nhõkrã hã hanhõ nẽ amnhĩ pa hã hanhõ nẽ hã pa. Mẽ kot hã nohtỳx rãhã hã mẽ hkamnhĩx kaxyw nhũm htem ã amnhĩ nhĩpêx anhỹr o pa. Nẽ mẽ kãm mẽ piitã mẽ kot amnhĩm mẽ rũnh ã mẽ harênh o paja nhũm htem kãm hprãm.

6—Nẽ mẽ pahpê Ijaewjê nhõ Tirtùm kapěr o mẽ ahkre xà hã ixkre kamã mẽ kot amnhĩ to rũnh xwỳnhjê hkrĩ xà mex pix kamã kãm hkrĩ hprãm. Nẽ mẽmoj tã mẽ apkur xà mex ã arĩgro hã nhũm htem ma mẽ

apkur xà hã ixkre hwÿr akuprõ nhũm mẽ kot amnhĩ to rũnh xwÿnhjê hkrĩ xà mex pix kamã kãm hkrĩ hprãm. 7Nê nhÿri pry hã mra nhũm mẽ kot mẽ omunh nê mẽ kêp mẽ ahkre xwÿnh maati hã mẽ hã hpijaam kãm tanhmã mẽ kãm kapêr mex toja nhũm htem kãm hprãm. ã na hte Parijew nhõ xwÿnh mẽ Tĩrtũm kapêr tũm o mẽ ajahkre xwÿnhjaja hêx rom mẽ anoo mã amnhĩ nhĩpêx anhÿr o pa.

8-10—No mẽ kajaja. Kêr ka mẽ ho mẽ urak kêt nê. Kê mẽ axpên mã mẽ ajarênh o: “Pahi Maati” anhÿr o mẽ ajarênh kêt nê. Rÿ mẽ ajarênh o: “mê ijahkre xwÿnh maati” anhÿr o axpên mã mẽ ajarênh hkêt nê. Kêt paxipix na pre Tĩrtũm mẽ akaxyw ixãm jakamã paxipix na ixpê mẽ anhõ Pahi Maati. Nê paxipix na ixpê mẽ ajahkre xwÿnh maati. No mẽ kajaja ixkõt mẽ apê axpên to atõx nê atõ na ka mẽ.

—Nê kêr ka mẽ ri axpên jarênh o: “Mêpahpãm” anhÿr kêt nê. Kêt kaxkwa kamã na Mêpahpãmja.

11-12—Nê kot ka mẽ amnhĩ to rax prãm xaj tanhmã amnhĩ to jarkrar to ho apa htã no nhũm akwÿjaja ama nê ãm ama nê akõt hamaxpêr kêt nê. No kot kaj mẽ piitã mẽ kutã tanhmã anojarêt to ho apa nhũm mẽ amnhĩ tã mẽ apumu nê axpên mã mẽ amex ã mẽ ajarê. Jakamã kot kaj mẽ amã mẽ piitã mẽ kot mẽ amex ã mẽ ajarênh prãm hãmri nê ri mẽ piitã mẽ kãm tanhmã amnhĩ nhĩpêx to pê mẽ kutã anojarêt rãhã ho ri apa. Anê.

Jejus kot mẽ hkwÿjê mã kapêr tÿx ã harênh

Makre 12.40; Rukre 11.39-52, 20.45-47

13-14Tã nhũm Jejus hpãnhã Parijew nhõ xwÿnh mẽ Tĩrtũm kapêr tũm o mẽ ahkre ho mẽ pa xwÿnhjê mã kapêr. Nê mẽ kãm kapêr kãm hihtÿx nê mẽ kãm:

—E mẽ apê Parijew nhõ xwÿnh mẽ Tĩrtũm kapêr tũm o mẽ ahkre xwÿnhjaja. E mẽ inhma. Kot kaj mẽ amex kêt nê. Mẽ apê mẽ no kupyw xwÿnh na ka mẽ. Nê mẽ amã Tĩrtũm kõt amnhĩ nhĩpêx prãm kêt. Nê nhÿrmã atyk nê mẽ amã õ krĩ hwÿr axàpir prãm kêt. Nê akwÿjaja kot hwÿr àpir pymaj na ka htem akwÿjê nê tanhmã mẽ kãm axêx to ho apa. Mẽ kot mẽ apyrà nê Tĩrtũm kapêr kwÿm amnhĩ nhĩpêx prãm xaj na ka htem amnhĩ mẽ tanhmã mẽ kãm axêx to ho ri apa. Jao te mẽ ate mẽ kêp Tĩrtũm nhõ krĩ hwÿr kahêxà kahê htÿx pyrak o apa.

15—Nê mẽ akwÿjaja kot mẽ akõt amnhĩ xunhwÿr nê mẽ akõt amnhĩ nhĩpêx prãm xaj na ka htem ma awry hã nhÿhÿm tanhmã mẽ kãm ri axujarênh to ho ri apa. Jakamã nhũm mēhõ mẽ ama nê mẽ akõt amnhĩ xãm hãmri nê ra amnhĩ tomnuj tÿx o mẽ ajakre. Jakamã koja mẽ nhÿrmã mẽ apyrà nê ma mẽ kot amnhĩ xà htÿx kamã hamak tũm xàta wÿr pa. Jakamã kwa mẽ o kora. Kot kaj mẽ amex kêt nê.

16—Hêxta waa nê. Mẽ apê Parijew nhõ xwÿnhjê mẽ mẽ apê Tĩrtũm kapêr tũm o mẽ ahkre xwÿnhjaja kot kaj mẽ amex kêt kumrêx. Na ka

htem mẽ kêp mẽ hikàxpore jamỳnh prãm xàj atỳx ri tanhmã mẽ ahkre hto ho apa nê mẽ kãm: “Kot kaj mẽ ãm hãmri mẽmoj tã amnhĩ jarênh kaxyw hãmri nê Tĩrtũm mã amnhĩ jarênh xà hã ixkre nhĩxi jarênh kôt mễhỗ mã amnhĩ jarê nhũm ama nê hamaxpêr o: ‘Ko. Apu ãm hãmri na inhmã amnhĩ jarê rỳ ko na apu ãm amnhĩ to hêx.’ Anhỹr o hamaxpêr. Nom kot kaj mẽ ixkreta ho mex kaxyw mẽ kãm kàxpore hkwy gõ hãmri nê ate mẽ kãm ỡr xàta jarênh kôt ãm hãmri mẽmoj tã mễhỗ mã amnhĩ jarê. Hãmri nhũm ama nê hamaxpêr o: ‘Nà ãm hãmri na ã inhmã amnhĩ jarênh anê. Kot ixkre ho mex kaxyw kàxpore hkwy nhõr kôt ã amnhĩ jarênh anê. Jakamã na amnhĩ to hêx kêt nê.’” Anhỹr o hamaxpêr. Na ka htem ã mẽ ahkre ho apa anê. 17Nom mẽ ate mẽ ahkreta mex kêt. Pêr mẽ ajamaxpêr mexti hã. Tĩrtũm mã amnhĩ jarênh xà hã ixkreta mex o ixkre ho mex kaxyw kàxpore nhõrta jakrenh. Tã ka htem axtem nê mẽ kot kãm kàxpore nhõrta mex o ixkre jakrenh ã harê. No mẽ pahte ãm hãmri mẽmoj tã amnhĩ jarênh nê aa paxêx kêt rãhã ho papaja na Tĩrtũm kãm hprãm.

18—Nê na ka htem mẽ kêp mẽ hikukrêx jamỳnh prãm xàj ã atỳx ri mẽ ahkre anê nê mẽ kãm: “Kot kaj mẽ ãm hãmri mẽmoj tã amnhĩ jarênh kaxyw nê Tĩrtũm mã mẽmoj nhõr xà hã mễstija jarênh kôt mễhỗ mã tanhmã amnhĩ jarênh to. Hãmri nhũm mẽ ama nê hamaxpêr o: ‘Nà ãm hãmri na inhmã amnhĩ jarê rỳ ko na apu ãm inhmã amnhĩ to hêx.’ Anhỹr o hamaxpêr. Nom kot kaj mẽ Tĩrtũm mã mẽmoj nhõr xà hã mễstija ã kãm mẽmoj xi. Hãmri nê ra mẽ ate kãm ỡr xàta jarênh kôt ãm hãmri mẽmoj tã mễhỗ mã amnhĩ jarê. Hãmri nhũm ama nê hamaxpêr o: ‘Nà ãm hãmri na ã inhmã amnhĩ jarênh anê. Kot Tĩrtũm mã mẽmoj nhõr ã amnhĩ jarênh kôt kot amnhĩ jarênh anhỹr jakamã na amnhĩ to hêx kêt nê.’ Anhỹr o hamaxpêr.” Anê. Na ka htem ã mẽ ahkre anê. 19Mễ ajamaxpêr kêt xwỳnh na ka mẽ. Tĩrtũm mã mẽmoj nhõr xà hã mễstija na mex o mẽ kot hã kãm mẽmoj nhõrta jakrenh. Tã na ka htem axtem nê mẽ kot hã kãm mẽmoj nhõrta mex o mễsti jakrenh ã harê. 20Nom Tĩrtũm mã mễsti mẽ mẽ kot hã kãm mẽmoj nhõrta te kot axpên pyràk jakamã kot kaj mẽ mễstija jarênh kôt mẽmoj tã amnhĩ jarê nê mããnên mẽ ate hã Tĩrtũm mã mẽmoj xirja jarênh kôt amnhĩ jarê. Hamê wa kot axpên pyràk jakamã hamê wa harênh pê amnhĩ to axêx kêt nê. Jakamã kêr ka mẽ mẽmoj tã amnhĩ jarênh kaxyw nê hamê wa harênh kôt ãm hãmri mẽmoj tã amnhĩ jarê nê ho axêx kêt nê. 21Tã kot kaj mẽ ãm hãmri amnhĩ jarênh ã mẽmoj tã amnhĩ jarênh kaxyw nê Tĩrtũm mã amnhĩ jarênh xà hã ixkre hkôt hã amnhĩ jarê nê mããnên Tĩrtũm kêp ixkre hpãm kôt hã amnhĩ jarê. Jakamã kêr ka mẽ hamê wa harênh pê amnhĩ to axêx kêt nê.

22—Nê kot kaj mẽ ãm hãmri amnhĩ jarênh ã mẽmoj tã amnhĩ jarênh kaxyw nê kaxkwa jarênh kôt amnhĩ jarênhja o mããnên kaxyw kaxkwa

kamã Tirtũm krĩ xà maati hkõt amnhĩ jarẽ. Nẽ mãänën Tirtũm kõt amnhĩ jarẽ. Jakamã kwa hamẽ wa harënh pê amnhĩ to axêx kêt nẽ.

23—Hêxta waa nẽ. Mẽ apê Parijew nhõ xwÿnh mẽ mẽ apê Tirtũm kapër tũm o mẽ ahkre xwÿnhjaja kot kaj mẽ amex kêt nẽ. Mẽ ate mẽ no kupyw xwÿnh na ka mẽ. Na ka htem Tirtũm kapër piitã hkõt amnhĩ nhĩpêx kêt nẽ ãm hkwỹ kõt pix mã amnhĩ nhĩpêx o ri apa. Na ka htem ãm kapër o hpÿnhre nẽ hkõt amnhĩ nhĩpêx ã amnhĩ pumu nẽ ate amnhĩ to mex xwÿnh ã amnhĩ jarënh o apa. No Tirtũm kãm hprãm xà piitã hkõt amnhĩ nhĩpêx kêt nẽ. Mẽ ate tãm mẽ hipêx nẽ mẽ ho mex nẽ mẽ kamã axukaprĩ hã kot mẽ amã karõja. Nẽ mẽ amã Tirtũm kĩnh ã kapër kõt amnhĩ nhĩpêx hã karõja ra mẽ ate mar tã hkõt amnhĩ nhĩpêx kêt nẽ. Mẽ ate kapër piitã hkõt amnhĩ nhĩpêx ronhÿx ja mẽ amã mex o mex. 24Mẽ ate ãm kapër o hpÿnh nẽ hkõt amnhĩ nhĩpêx jakamã te mẽ ate atÿx ri tanhmã axàpkur to ho mẽ akrĩ pyræk. Jao te mẽ axàpkur xà hã mẽõ kamã pure pumunh nẽ nê hanhir nẽ rënh tã mãänën kamã kën rax pumunh tã nê hanhir nẽ rënh kêt rãhã hkur pyræk. Jao Tirtũm kapër o hpÿnhre nẽ hkõt amnhĩ nhĩpêx no piitã hkõt amnhĩ nhĩpêx kêt nẽ. Për mẽ ajamaxpër kêt tã na ka htem atÿx mẽ ahkre ho ri apa.

25—Hêxta waa nẽ. Mẽ apê Parijew nhõ xwÿnh mẽ mẽ apê Tirtũm kapër tũm o mẽ ahkre xwÿnhjaja kot kaj mẽ amex kêt nẽ. Mẽ ate mẽ no kupyw xwÿnh na ka mẽ. Nã mẽ apê Parijew nhõ xwÿnhjaja te mẽ ate mẽ kot apkur kaxyw prat kre kuhõnh punuj tã mex ã harënh nẽ kamã apkur pyræk o na ka mẽ. Jao ãm mẽ akrãhkà rũm pix mã mẽ amex. Nẽ mẽ noo mã te mẽ amex pyræk no mẽ anhõxàhkre kaxwÿnh kãm mẽ ajamaxpërja mex kêt. Mẽ akapër prãm nẽ mẽ axàhkurê nẽ mẽ anhõxÿỹ. 26Mẽ ajamaxpër mex kêt kênã. Kwa kêr ka mẽ tãm ajamaxpër o tãm akwÿjê nhĩpêx o ri apa. Nẽ axàmnhĩx ri mẽ kêp amrakati xwÿnhjê mã mẽmoj nhõr o ri apa. Kot kaj mẽ ã amnhĩ nhĩpêx anê nhũm Tirtũm ja hã mẽ apumu nẽ amnhĩm mẽ amex ã mẽ ajarẽ. No na ka htem amã mẽ amnhĩ to mex prãm xàj ãm tee ri amnhĩ kuhõnh japjê kaprÿ.

27—Hêxta waa nẽ. Mẽ apê Parijew nhõ xwÿnhjê mẽ mẽ apê Tirtũm kapër tũm o mẽ ahkre ho mẽ apa xwÿnhjaja kot kaj mẽ amex kêt nẽ. Te mẽ ate mẽ htykjê jagjênh xà pyræk. Na htem mẽ hagjênh xà ho mex o pa nom kamã mẽ hi nẽ ahpunuj pix. 28Ja pyrã nẽ ã mẽ ate amnhĩ nhĩpêx anhÿr. Kapõt rũm mẽ anhĩja na mex. Te mẽ ate mẽ ho mex o apa pyræk o na ka htem amnhĩ nhĩpêx nhũm mẽ ãm akrãhkà pix pumu nom ãm mẽ akrã hi kaxwÿnh kãm mẽ ajamaxpër punuj rãhã hã mẽ apumunh kêt nẽ. Mẽ ate tanhmã mẽ no kupyw to pix kukamã ajamaxpër jakamã te mẽ ate mẽ htykjê jagjênh xà pyræk.

29-30—Hêxta waa nẽ. Mẽ apê Parijew nhõ xwÿnh mẽ mẽ apê Tirtũm kapër tũm o mẽ ahkre xwÿnhjaja kot kaj mẽ amex kêt nẽ. Mẽ ate mẽ no

kupyr xwÿnh na ka mẽ. Na ka htem ma mẽ hã pika hwÿr apa nẽ Tĩrtũm nhÿ hã kapẽr o mẽ pa xwÿnhjẽ hã pika ho mex. Nẽ mẽ kot amnhĩ to mex xwÿnhjẽ hã pika ho mex. Nẽ axpẽn mã mẽ harẽnh o: “Hêxta waa nẽ. Na pre amnepẽm mẽ pakukamã mẽ panhĩgêtjaja Tĩrtũm nhÿ hã mẽ kãm kapẽr xwÿnhjẽ homnuj nẽ mẽ kupa. No kêt mẽ papajaja mẽ kamã ri papa ronhÿx pu prem mẽ uràk nẽ ã mẽ hipêx anhÿr kêt nẽ.” Anhÿr o axpẽn mã mẽ hkaprĩ ho ri apa. 31-32Nom ãm amnhĩ to axêx. Mẽ ate ã amnhĩ nhĩpêx anhÿr o apa kẽnã. ã mẽ ate amnhĩ nhĩpêx anhÿr jao ra apê mẽ hkanrêhã mẽ hkra kumrêx ã amnhĩ to amnhĩrĩt mex o apa. 33Te mẽ ate kagã xoprê kot mẽ hkamnhar nẽ mẽ homnuj tÿx pyràk jakamã koja Tĩrtũm nhÿrmã ma mẽ kot amnhĩ xà htÿx kamã hamak tũm xàta wÿr mẽ ajano ka mẽ ma hwÿr ajapêx. Hãmri nẽ tee ri amã ajapôx prãm kaprÿ nẽ rĩ amnhĩ pumu.

34—Kot paj nhÿrmã ma mẽ awÿr inhÿ hã ixkapẽr jarẽnh o mẽ pa xwÿnh kwÿ rẽ. Nẽ inhÿ hã mẽ àhpumunh xwÿnh kwÿ rẽ. Nẽ ixkapẽr o mẽ ahkre xwÿnh kwÿ rẽ. Nom kot kaj mẽ ãm mẽ kapẽr ma nẽ apê mẽ hprãm nõkati nẽ tanhmã mẽ homnuj tÿx to ho apa. Nẽ ixpê mẽ hkwÿjê hpar o apa. Jao pĩ kahpa hã mẽ hanhôr o mẽ hkwÿjê hpa. Nhũm mẽ hkwÿjaja Tĩrtũm kapẽr o mẽ ahkre xà hã ixkre kamã mẽ ahkre ho hkrĩ ka mẽ omu nẽ mẽ unê nẽ ixkreja kamã mẽ htak. Hãmri nhũm mẽ apymaj nhãm ahpÿnhã krĩ hkwÿ hwÿr hprôt nẽ mra. ã kot kaj mẽ inhÿ hã ixkapẽr jarẽnh xwÿnhjẽ nhĩpêx anhÿr o apa. 35-36Na prem ra mẽ himex rax nẽ. Amnepẽm panhĩ kator krax rũm Atãw kra Apewta na pre Tĩrtũm nhÿ hã kapẽr o pa nhũm htôja kãm mar prãm kêt nẽ kupĩ. Tã nhũm Tĩrtũm axte mẽ hwÿr ÿ hã kapẽr o mẽ pa xwÿnh kwÿjê rẽ nhũm prem mã mẽ ho anê nẽ mẽ hkwÿjê nhĩmex. Nhũm pre xatã mẽ hwÿr mẽ hkwÿjê rẽ nhũm mẽ xatã mẽ kupa. Apew rũm Parakis kra Jakaris wÿr na prem mẽ himex rũnh nẽ. Hãmri nhũm prem Tĩrtũm mã amnhĩ jarẽnh xà hã ixkre kamã Jakarisja pĩ. Tã mẽ kajaja mẽ ate mẽ uràk nẽ mẽ amã Tĩrtũm kapẽr mar prãm kêt nẽ mẽ uràk nẽ amã Tĩrtũm nhÿ hã kapẽr xwÿnhjẽ nhĩmex prãm nẽ. ã mẽ ate mẽ anhĩgêtjê pyrã nẽ mẽ hipêx anhÿr mÿrapê koja Tĩrtũm mẽ apê mẽ hkanrêhã mẽ hkra nẽ mẽ htãmnhwÿjaja mẽ ato hpimràatã tanhmã mẽ ato htÿx to ka mẽ amnhĩ xà htÿx kamã ajamak rãhã ho ri apa. Anẽ.

Jejus kãm Jerujarẽ nhõ xwÿnhjẽ japê htÿx ã harẽnh

Rukre 13.34-35; mããnẽn Rõmãn 11.25-27

37Hãmri nhũm Jejus te ra kot Jerujarẽ nhõ xwÿnhjẽ pumunh nẽ mẽ kãm kapẽr pyràk o tanhmã kapẽr to ho xa. Nẽ mẽ kãm:

—Hêxta waa nẽ Jerujarẽ nhõ xwÿnhjaja. Tĩrtũm kot xatã mẽ awÿr ÿ hã kapẽr jarẽnh xwÿnhjẽ rẽnh nhũm mẽ kot mẽ akôt mẽ amã kapẽr jarẽnh o pa htã ka mẽ kapẽr mar kêt kumrêx. Nẽ axtem nẽ kẽn o mẽ htak

o mẽ himex o apa. Ā na ka htem amnhĩ tomnuj o apa anẽ. Tã nom arĩ inhmã mẽ ajamãr o ri ixa hprãm. Te ho krãhyre kot nore hpro nẽ ho hikwỹ pyrãk o na pa inhmã mẽ anhĩpêx prãm nẽ. Nom mẽ amã ixpãm nõkati nẽ mẽ ate ixkaga kumrêx. ³⁸Mýrapê koja Tĩrtũm mẽ anhõ krĩ jamãr kêt nẽ. ³⁹Kot paj tokyx ty nẽ mẽ apiitã mẽ are nẽ ma akupỹm api ka mẽ axte ixpumunh kêt nẽ. Ām akupỹn ixwrỹk xã hã arĩgrota pix ã koja mẽ akwỹjaja mẽ amỹrpê krĩ ja kamã ixpõx ã ixpumu. Hãmri nẽ mẽ akurom ixpumu nẽ hkĩnh tỹx nẽ. Nẽ tã ixkõt amnhĩ xunhwỹr kurê kumrêx. Hãmri nẽ axpẽn mã ijarênh o:

Ota Tĩrtũm kot mẽ pahwỹr mẽnh xwỹnhhta wrỹ. Nã ãm hãmri na mẽ pahwỹr wrỹ. Ja mex o mex.

Koja mẽ ã axpẽn mã ijarênh anẽ. Anẽ.

Jejus kot mẽ pakukamã mẽmoj jarênh

Makre 13.1-13; Rukre 21.5-19;

mããnẽn Wam Ximotre 4.1-3; Sikũn Ximotre 3.1-9; Apokarip 6.1-17

24 ¹Tã nhũm Jejus Tĩrtũm mã amnhĩ jarênh xã hã ixkre rũm kato nẽ ma tẽ. Pa mẽ ixte hkõt ixa ho ixa xwỹnhjaja kormã ixkreja pumunh o ixkuhẽ nẽ kãm harẽ nẽ kãm:

—Kwa Pahihti. Hêxta waa nẽ. Ixkreja ãm mex kumrêx. Anẽ.

Hãmri nhũm mẽ inhmã:

2—Tỹ mex nom koja nhỹrmã mẽ kãm Tĩrtũm kurê xwỹnhjaja grãnh pa. Koja arĩ kẽn õ axkrutre nẽ axpẽn mỳnh nẽ nõr kêt nẽ. Koja piitã anhgrã nẽ ahpỹnhã ri hikwỹ. Anẽ.

3Hãmri pa mẽ kuma nẽ tee ri hkukamã ijamaxpêr. Hãmri nhũm Jejus ma tẽ nẽ hixêt pê Oriwêhti hã api nẽ hã nhỹ pa mẽ ma hkõt mra nẽ mẽ kot ã ixkre nhĩpêx anhỹrta ã hkukja nẽ kãm:

—Kwa xã ãm hãmri koja mẽ ã ixkreta nhĩpêx anẽ? Kwa mẽ inhmã aprĩ hã harẽ. Xã koja mẽ nhỹrmã ho anẽ nã? Xã koja mẽ tokyx ho anẽ? Nẽ akupỹn mẽ ixwỹr awrỹk nhũm mẽmoj piitã hapêxja. Kwa mẽmoj koja we wỹj ri tanhmã amnhĩ nhĩpêx to wehe? Anẽ.

4Hãmri nhũm mẽ inhmã hprĩ hã tanhmã mẽmoj kot amnhĩ nhĩpêx to hkukamã ujarênh o nhỹ nẽ mẽ inhmã:

—Nã nhỹrmã mẽmoj piitã hapêx kaxyw tanhmã amnhĩ nhĩpêx toja kumrêx kot paj mẽ amã harẽ ka mẽ inhma. Nã koja mẽ ohtõ nẽ mẽ awỹr mra nẽ hêx rom te pa ixte amnhĩ nhĩpêx pyrãk o amnhĩ nhĩpêx o mẽ akõt pa. ⁵Nẽ mẽ amã amnhĩ jarênh o: “E Tĩrtũm na pre mẽ awỹr inhmẽ. Ixpê kaxkwa rũm ixwrỹk xwỹnhhta na pa.” Anhỹr o mẽ akõt mẽ amã amnhĩ to hêx o pa. Jao ohtõ nẽ mẽ nokupyr o pa.

6—Nẽ koja mẽ nhỹri awry hã axpẽn par o pa nẽ mẽ atã axpẽn par o pa. Nom kêr ka mẽ harênh ma nẽ ri tokyx mẽmoj piitã hapêx ã hkamnhĩx kêt nẽ. Kormã mẽmoj piitã hapêx xã hã arĩgroja kormã. ⁷Koja

mêmoj piitã hapêx kaxyw nhũm ahpÿnhã ri pika piitã hkôt mẽ pa xwÿnhjaja pika hõ nhõ xwÿnhjê kutã kuhê nê pijapu ho kuhê. Jao ra axpên par o pa. Hãmri nhũm nhÿri pika hkwÿ htertet tÿx kumrêx. Nê mẽ hpur kãm mẽõja hapêx nhũm mẽ kãm prãm tÿx nê pa. Jakamã nhũm mẽ ohtô nê prãm xàj axkaprã. 8Nom ja kormã mẽmoj hapêx kaxyw krax pix na. Te ho mênijê hõ hpijagri kaxyw nê kormã kawax pê õhy xà pyrãk.

9—Nê koja mẽ piitã ixkôt mẽ akamã gryk nê kãm mẽ akurê htÿx o pa. Nê mẽ awÿr mra nê ixtã mẽ apynê nê mẽ atomnuj tÿx nê mẽ apa. 10Jakamã koja mẽ kot ixkôt amnhĩ xunhwÿr xwÿnh kwÿjjaja mẽ umaj tee ri amnhĩ kukamã hamaxpêr hãmri nê ixkaga. Nê ixkôt mẽ kãm axpên tã amÿnê nê axpên kãm gryk o pa. 11Nhũm nhÿri mẽ hkwÿjjaja Tirtũm nhÿ hã kapêr jarênh xwÿnh ã amnhĩ to hêx o pa. Jao mẽ ohtô nê mẽ nokupyr o pa. 12Koja mẽ ã amnhĩ nhĩpêx anhÿrja o ra piitã kãm axpên kamã ukaprĩ hkêt o pa. 13Koja mẽ ã ixtã mẽ atomnuj o pa anê. Tã nom kêr ka mẽ amnhĩ to htÿx nê ixkaga hkêt nê. Mẽ kot mẽ apar tã ka mẽ kaxkwa kamã akupÿm atĩr kurê kumrêx.

14—Nê kot kaj mẽ apê ixkwÿjjaja ma krĩ piitã hkôt Tirtũm kapêr o mẽ ahkre ho apa. Mẽ kot amnhĩ tomnuj kaga nê ixkôt amnhĩ xunhwÿr nhũm Tirtũm kot ja hã mẽ omunh nê mẽ ho hkra hã mẽ kãm harênh o ri mẽ piitã mẽ hkôt apa. Kot kaj mẽ piitã mẽ kãm ijarênh pa pa rĩ kormã akupÿn mẽ awÿr wrÿ. Anê.

Mẽ pahtomnuj tÿx xwÿnh maati hã harênh

Makre 13.14-23; Rukre 21.20-24; määnên Sikũn Tesarõn 2.3-4

15Nhũm Jejus arĩ mẽmoj kukamã mẽ inhmã kapêr nê mẽ inhmã:

—Amnepêm Tirtũm nhÿ hã kapêr xwÿnh finat Tãniewja na pre tanhmã mẽ atomnuj tÿx xwÿnh maati ja jarênh to. Tã koja nhÿrmã ra kot harênh xà hkôt axtem nê Tirtũm mã amnhĩ jarênh xà hã ixkre hwÿr axà nê Tirtũm xãm xà kamã xa. Ka mẽ ja hã omu hãmri nê mẽ kot krĩ grãnh par ã hkamnhĩx kurê kumrêx. 16Koja ã amnhĩ nhĩpêx anê ka mẽ amÿm amnhĩ wÿr mẽ omu hãmri nê ajapôj nê ma aprôt nê amrar kurê kumrêx. Mẽ apê jar pika pê Jutej kamã mẽ apa xwÿnhjaja kaj mẽ omu hãmri nê mẽ kot mẽ apar pymaj aprôt nê ma amrar kurê kumrêx. 17Rÿ ka mẽ anhõrkwÿ hkrãmnênh o akrĩ japêr nê amÿm amnhĩ wÿr mẽ omu nê akukrêx wÿr axàr nê hõ hpyr mã ajamaxpêr kêt nê. ãm wrÿ nê aprôt nê ma atêm kurê kumrêx. 18Rÿ ka mẽ apur kãm axapênh o apa japêr nê amÿm mẽ omu hãmri nê akupÿm anhõrkwÿ hwÿr axê jamÿnh kaxyw atêm kêt nê. ãm mẽ umaj aprôt nê ma atêm kurê kumrêx.

19—No mẽ htujarô nê mẽ hkra karàre xwÿnhjaja koja mẽ kêp mẽmoj omnuj tÿx nê. Tanhmã kot mẽ amnhĩ to nê mẽ umaj hprôt tÿx? Nà pika

ja kamã koja mẽ mex kêt o mex kêt. Mẽ kot amnhĩ tomnuj mỳrapê koja Tĩrtũm tanhmã mẽ homnuj tỳx to.

20—Nẽ kwa kêt ka mẽ amnhĩ to Tĩrtũm wỳ kê ã mẽ kot amnhĩ nhĩpêx anhỳr xà hã arĩgroja na wrỳk pê ã amnhĩ nhĩpêx anhỳr kêt nẽ. Rỳ mẽ hkôt xà hã arĩgro pê sap ã ã amnhĩ nhĩpêx anhỳr kêt nẽ.

21—Nẽ ã mẽ kot amnhĩ nhĩpêx anhỳr ã arĩgroja ã koja mẽ piitã amnhĩ xà htỳx kãm hamak tỳx kumrêx. Amnepêm Tĩrtũm kot pika ho kator krax rũm amnẽ mẽ pa xwỳnhjaja kormã aa kot ã amnhĩ xà htỳx kamã hamak anhỳr kêt tã arĩgroja ã koja mẽ amnhĩ xà htỳx kumrêx kamã ama. Hãmri nẽ axte pika ja kamã ã amnhĩ xà htỳx kumrêx kamã hamak anhỳr kêt nẽ. 22Kop apu Tĩrtũm kot mẽ kot amnhĩ xà htỳx kamã hamak xà hã arĩgro hkwỳ ho gri hkêt ronhỳx ka mẽ apiitã apikaprãr pa. Ja pymaj koja mẽ amã ho gri. Kot ra amnhĩ kaxyw mẽ arênh xwỳnhjê japê xaj mẽ amã ho gri.

23-24—Tã ã mẽmoj kot amnhĩ nhĩpêx anhỳr jakamã koja mẽmojaja tanhmã mẽ amã ixto hêx to nẽ mẽ amã: “Ota ra Kris akupỳn wrỳ. Kwa mẽ hwỳr mra nẽ omu.” Anẽ. Rỳ mẽ amã: “Krisja krĩ mỳj kamã na raa. Kwa mẽ ma hwỳr mra nẽ omu.” Anhỳr o mẽ amã ixto hêx o pa. Rỳ mẽ awỳr mra nẽ mẽ amã amnhĩ to hêx nẽ mẽ amã: “E. Ot pa ixpê Kris ã mẽ awỳr wrỳ. Tĩrtũm na mẽ awỳr inhmẽ pa wrỳ.” Anẽ. Rỳ mẽ amã: “E ixpê Tĩrtũm nhỹ hã ixkapêr xwỳnh na pa mẽ awỳr mõn pøj.” Anhỳr o mẽ amã amnhĩ to hêx. Hãmri nẽ mẽ anokupyr kaxyw mẽ amã aa mẽ kot mẽmoj pumunh kêt kwỳ ho anhỳr o pa. Tĩrtũm kot amnhĩ kôt mẽ arênh xwỳnhjaja kãm mẽ ate ja hã mẽ omunh nẽ mẽ gryk ã ixkaga hprãm xaj koja mẽ ã mẽ anoo mã amnhĩ nhĩpêx anhỳr o pa. Nom ãm ã amnhĩ nhĩpêx anhỳr kaprỳ ka mẽ ixkaga hkêt nẽ.

25—E kwa mẽ inhmar tỳx nẽ. Na pa ra ixprĩ hã ã mẽ kot amnhĩ nhĩpêx anhỳrja kukamã ã mẽ amã mẽmoj jarênh anẽ. Tã kêt ka mẽ amnhĩ nẽ ã mẽ kot amnhĩ to hêx anhỳr o mẽ pa xwỳnhjê pumunh mex o apa nẽ axkãm ajamak rom. 26Rỳ koja mẽ tanhmã mẽ amã ixto hêx to nẽ mẽ amã: “Ota Tĩrtũm kot mẽ pahwỳr mênh xwỳnhhta kapôt ã mõn pøj. E mẽ tokyx ma hwỳr mra nẽ omu.” Anhỳr o mẽ amã ijarê ka mẽ ama nẽ ãm mẽ ama nẽ hwỳr amrar kêt nẽ. Rỳ nhũm mẽ amã: “Ota hitom kãm xa. E mẽ mamrĩ hwỳr agjê nẽ omu.” Anẽ no ka mẽ ãm mẽ ama nẽ ãm mẽ ama nẽ hwỳr agjêx kêt nẽ. 27Kot paj nhỹrmã akupỳn mẽ awỳr ixwrỳk kaxyw hãmri nẽ ixpimxur kãm ixwrỳk kêt nẽ. Koja pika piitã hkôt mẽ pa xwỳnhjaja anhĩpê ixwrỳk kãm ixpumu. Te mẽ piitã anhĩpê mẽ kot na haxênh pumunh pyrãk o kot kaj mẽ anhĩpê apiitã ixpumu. 28Te nhỹri mẽmoj kro nẽ nõr nhũm nhõnhti kot omunh nẽ hã htor nẽ hpinhpanh nhũm mẽ piitã hã omunh pyrãk o kot paj amnhĩ nhĩpêx. Anẽ.

Jejus akupÿn wrÿk xwÿj ri mêmoj kukamã harênh

Makre 13.24-31; Rukre 21.25-33; mãânên Wam Tesarôn 4.16-17

29Nhũm Jejus arĩ mẽ ixte hkôt ixpa ho ixpa xwÿnhjê mã kapêr nê mẽ inhmã:

—Nê kot paj akupÿn mẽ awÿr inhnojarêt nhũm rĩ Tirtũm kaxkwa kamã tanhmã mêmoj nhĩpêx to. Kapêr ã kagà htũm kot tanhmã ja kukamã harênh to nê harênh kot:

Koja Tirtũm kaxkwa ho àk nhũm kanhêti piitã rôrôk pa nhũm myyti ahtyk nhũm mytwrÿre uràk nê axte hpôk kêt nê.
Anê.

30Koja ã mêmoj amnhĩ nhĩpêx anhÿr pa hãmri pa kaxkwa hã mẽ amã mêmoj nhô. Hãmri nhũm pika piitã hkôt ri mẽ pa xwÿnhjaja piitã omu nê tee ri amnhĩ kukamã hamaxpêr o hkaprĩ nê mÿr rax kumrêx. No mẽ kajaja kot kaj mẽ omu hãmri nê akupÿn mẽ awÿr ixwrÿk nê mẽ ato amnhĩptâr mã ajamaxpêr kurê kumrêx. Kot paj kakrã kamã hirã htÿx kãm akupÿn ixihtÿx kãm mẽ awÿr wrÿ. 31Hãmri nê Tirtũm kapêr o mẽ wrÿk xwÿnh maati mã anê nhũm pifti kakô hãmri nhũm hkwÿjaja kuma nê ma mẽ awÿr pika piitã hkôt anhgrã nê ma mra nê inhmã mẽ ato akuprô. Ixte amnhĩ kaxyw mẽ axunhwÿr xwÿnhjê o akuprô nê man akupÿn ixwÿr mẽ ato hapêx. Anê.

Jejus kot mêmo pâr o ejêp jarênh

Makre 13.28-31; Rukre 21.29-33

32Nhũm Jejus arĩ mẽ inhmã kapêr nê mẽ inhmã:

—E ka mẽ pĩ hpâr mÿj pumu. Na hte mêmo mytwrÿ hã rã nhũm mẽ omu nê ô hkukamã hamaxpêr kurê kumrêx. 33Ja pyrã nê koja ã ixte mêmoj jarênh anhÿr xwÿnhja amnhĩ nhĩpêx par mẽ ka mẽ omu nê akupÿn mẽ awÿr ixwrÿk mã ajamaxpêr kurê kumrêx. Kot paj te ra mẽ anhôrkwÿ kapem ixãm pyrãk o amnhĩ nhĩpêx. 34Nom akupÿn ixwrÿk kêt ri koja ã mẽ kot mêmoj kot amnhĩ nhĩpêx anhÿr pumunh xwÿnhjaja kormã piitã htyk kêt ri pa akupÿn wrÿ.

35—Nê koja nhÿrmã pika nê kaxkwa wa hapêx pa. Tã no ãm ixkapêrja koja wa uràk nê aa hapêx kêt nê. Koja ãm rãhã ho rãhã. Kot paj aa ihkjê ho tanhmã mênh to hkêt nê. Anê.

Mê pahte akupÿn Jejus wrÿk xà hã arĩgro pumunh kêt ã mẽ pajarênh

Makre 13.32-37; Rukre 12.37, 17.26-30, 17.34-36; mãânên Wam Tesarôn 5.2

36Nhũm Jejus arĩ mẽ inhmã kapêr nê mẽ inhmã:

—Nê ixte akupÿn mẽ awÿr ixwrÿk xà hã arĩgroja mẽ ate omunh kêt. Nê kaxkwa kamã Tirtũm kapêr o mẽ wrÿk xwÿnhjaja haxwÿja kot ja

pumunh kêt. Nê ijaxwýja ixpê Tirtúm Kra htã ixte ja hã amnhĩ pumunh kêt. ãm inhõ Papaj pix na kot ja pumunh.

37—Nê kot paj nhÿrmã man akupÿn mẽ awÿr wrÿ. Akupÿn mẽ awÿr ixwrÿk xà hã arĩgrota ã koja mẽ htÿx ri amnhĩ tomnuj o pa. Te amnepêm Noehti kormã htÿr ri mẽ pa xwÿnhjaja kot htÿx ri amnhĩ tomnuj o pata pyrãk. 38Na pre htem amnhĩ kaxyw Tirtúm mã hamaxpêr kêt nê. ãm jar mẽ kot amnhĩ nhĩpêx pix kukamã hamaxpêr kôt pix mã amnhĩ nhĩpêx o pa. Rôm nhũm Noehti ja gô htãm pymaj pãr rax nhĩpêx mã axã. 39Nhũm mẽ ja hã omu nê ãm omu nê tanhmã ri amnhĩ kukamã hamaxpêr to hkêt nê. Hãmri nhũm naja mẽ haêr pê wrÿ nê wrÿk rax o mẽ hanhir pa. Tã akupÿn ixwrÿk xà hã arĩgroja ã koja mẽ htÿx ri ã amnhĩ nhĩpêx anhÿr o paja o pa mẽ haêr pê naja pyrã nê akupÿn wrÿ.

40—E kot paj mẽ amã nhÿrmã akupÿn ixwrÿk nê tanhmã mẽ anhĩpêx to hã amnhĩ jarê. Te kot ja pyrãk. Koja mẽmyjê hõ wa hamêxkrut nê hpur kãm àpênh o xa. Nhũm hõja ra ixkôt amnhĩ xãm nhũm hõja ixkôt amnhĩ xãm kêt japêr. Hãmri pa amnhĩ wÿr ra kot ixkôt amnhĩ xãm xwÿnhta o api nhũm kot ixkôt amnhĩ xãm kêt xwÿnhta hpur kãm ahte arĩ xa. Hãmri nê tee ri hkrãmnhwÿ japêr rĩt o xa. 41Rÿ nhũm mẽnijê wa hamêxkrut nê harôj kahuk o xa. Nhũm hõja ra ixkôt amnhĩ xãm nhũm hõja ixkôt amnhĩ xãm kêt japêr. Hãmri pa amnhĩ wÿr kot ixkôt amnhĩ xãm xwÿnhta ho api nhũm kot ixkôt amnhĩ xãm kêt xwÿnhja tee ri hkrãmnhwÿ japêr rĩt o xa hãmri nê hamaxpêr rax kumrêx. Kot paj nhÿrmã akupÿn wrÿ nê ã mẽ anhĩpêx anê. 42Tã mẽ ate akupÿn ixpôx xà hã arĩgro pumunh kêt jakamã kwa kêr ka mẽ ijamãr rãhã ho ri apa. 43Na htem htÿx ri nhÿri tanhmã amnhĩ nhĩpêx to ho pa nhũm mẽ kêp àhkĩnh xwÿnh mẽ ôrkwÿ hwÿr agjê nê mẽ kêp ahkĩ. 44Tã mẽ ate akupÿn ixwrÿk xà hã arĩgro pumunh kêt jakamã kwa kêr ka mẽ ixwakre kamã te mẽ apê mẽ ôrkwÿ nhõ dõn kot amnhĩ nhĩpêx pyrã nê atÿx ri tanhmã amnhĩ tomnuj to ho apa hkêt nê. Ixkutêp axkãm ajamak rom nê ri apa. Jao tãm ixkutêp amnhĩ nhĩpêx rãhã ho ri apa. Anê.

Mê kãm mẽ àpênh mex xwÿnhjê jarênh

Rukre 12.41-48

45Nhũm Jejus arĩ mẽ inhmã kapêr nê mẽ inhmã:

—E koja mẽ kãm àpênh xwÿnhjê hõ àpênh mex o pa hãmri nhũm õ patrãw àpênh ã omu hãmri nê ma nhÿhÿm mõi kaxyw nê ìhkram mẽmoj piitã haxãr pa nê kãm: “E kêr ka ixwakre kamã inhmã inhõrkwÿ tãnopxar mex nê. Nê inhmã mẽ àpênh xwÿnhjê mã mẽ apkur xà nhõr o apa.” Anhÿr o kãm mẽmoj tã karõ hãmri nê kato nê ma nhÿhÿm mõi. 46Hãmri nhũm kot kãm àpênh mex xwÿnhja wakre kamã kãm àpênh mex o pa. Jakamã nhũm õ patrãw akupÿn hpôx o mõi nhũm amnhĩ wÿr harênh ma nê hkĩnh nê. Nê tee ri amnhĩ kukamã hamaxpêr o kãm uma

hkêt nê. Kot wakre kamã kutêp kãm àpênh mex jakamã tee ri tanhmã amnhĩ kukamã hamaxpêr to hkêt nê. 47Jakamã nhũm ò patrãwja akupÿn pøj nê kot kãm àpênh mex ã omu nê hkĩnh nê. Hãmri nê kot kãm ò mêmoj piitã hamãr o pa kaxyw ãhkram haxàr pa. 48No koja axtem nê wakre kamã kãm àpênh mex kêt japêr. Nê hamaxpêr o: “Tk. Nà koja tokyx akupÿn mõi kêt nê.” Anhÿr o hkamnhĩx. 49Hãmri nê wakre kamã kãm mē àpênh xwÿnhjê htak nê pipãnh pix o pa. Nê kãm kagôxÿhti xành xwÿnhjê kôt pix mã pa. 50Hãmri nhũm ò patrãwja haêr pê akupÿn pøj nê tee ri ja hã omu. 51Hãmri nê kamã gryk tÿx nê tanhmã homnuj htÿx to nê kãm mē àpênh punuj xwÿnhjê mē mē ho hpimràatã amnhĩ nê mē kator pa. Hãmri nê mē kot kapêr kwÿm amnhĩ nhĩpêx xwÿnhjê mē mē ho hpimràatã tanhmã mē homnuj to nê amnhĩ nê mē kator. Hãmri nhũm mē tee ri amnhĩ kukamã hamaxpêr nê mur nê tee ri amnhĩ nhĩpêx. Tã kêr ka mē ixwakre kamã ho mē uràk kêt nê. Mē kurom ixwakre kamã ixkapêr kôt amnhĩ nhĩpêx mex rãhã ho ri apa. Anê.

Kormã mē mjên kêt xwÿnhjê ho 10 nê mē harênh

Wam Tesarôn 5.1-3

25 1Nhũm Jejus arĩ mē inhmã kapêr nê mē inhmã: —Nê mē ate Tirtũm kôt amnhĩ nhĩpêx o mē apa xwÿnhjaja kêr ka mē akupÿn amnhĩ wÿr ixkãm ajamak rom nê ri apa. Nom mē kêp Tirtũm prãm nõkati xwÿnhjaja koja mē akĩnhã ãm htÿx tanhmã amnhĩ to pix kukamã hamaxpêr o pa. Te kormã mē mjên kêt xwÿnhjaja kot amnhĩ nhĩpêxta pyràk. E pa mē amã tanhmã mē harênh to ka mē inhma. Koja kormã mē mjên kêt xwÿnh kêp 10jaja ma hkràmnhwÿ mjên mã xwÿnh kutã pry hã mra. Amnhĩ kôt kanê jamÿ nê o mra nê kutêp pry nhĩkrep hkrĩ. 2-4Nhũm mē kêp 5jaja hkwÿjê rom amnhĩ kukamã hamaxpêr mex nê kanê kaxyw amnhĩ kôt orti hkwÿ ho mõi. No nhũm mē kêp 5 nê mē hkĩnhã ãm htÿx kanê pix jamÿ nê o mra. 5Hãmri nê mē mjên mã xwÿnhja kutêp axpên mã kapêr o hkrĩ. Nhũm tokyx htêm kêt nhũm mē kutêp hkrĩ nê gaa nê ra õtxwa nê gaa nê hikwÿ nê ra õt pa.

6—Tã nhũm kôt ã kamàt hãmri nhũm mjên mã xwÿnhhta hpôx o tẽ. Hãmri nhũm kot hkukamã harênh xwÿnhja mē õt o mē hikwÿ xwÿnhjê mã amÿra nê mē kãm: “Kwa mē hãmri. Ota mjên mã xwÿnhhta tẽ. Mē tokyx kànhmã akrĩ pu mē kutã mra.” Anê. 7Hãmri nhũm mē hkrã hapøj nê kanê hpôk. 8Nom nhũm mē hkwÿjê hkĩnhã ò kanê kaxyw orti ho pa hkêt xwÿnhjaja ra mē kêp mē kanêja hkaprÿ hpa nhũm mē tee ri kot hpôk kaxyw. Hãmri nê orti hkwÿ hã hkwÿjê hwÿ nê mē kãm: “Xê mē inhmã orti ho inhõ kanê go.” Anê. 9Nom nhũm mē kêp nê nê mē kãm: “Ma mē inhõ kanê kamã orti grire kênã kot pa kêt mē amã ho go. Xê mē tokyx ma mra nê nhÿri amnhĩm hkwÿ japrô mē.” Anê. 10Hãmri nhũm mē tee ri mē kuma nê ma amnhĩm hkwÿ japrôr mã ma mra.

—Rôm nhũm mjên mã xwỳnhta mẽ hãnh tẽ nhũm kanê kamã arĩ mẽ orti xwỳnhjaja omu nẽ hã jêt kurê kumrêx. Hãmri nẽ ma hkôt môn mẽ pikuprônha xà hã ixkreja wỳr wa hã hkính nẽ apkur kaxyw gjêx pa nhũm mẽ hã kahê. Mẽ gjêx xà hã oreja ra hwỳr hpôx jakamã nhũm mẽ hã kahê.

11—Tã nhũm ma mẽ kot orti japrôr mã mrar xwỳnhjaja hãmri amnhĩ to hapu nẽ mra nẽ tee ri mẽ hã hakwakre kupê nẽ htatak nẽ tee ri mẽ kãm akir nẽ mẽ kãm: “Xê mẽ inhmã kahê xà mẽ pa mẽ awỳr agjê.” Anê. 12Hãmri nhũm hprô mã xwỳnhta mẽ kuma nẽ mẽ kãm: “Tk. Nà ixte mẽ apumunhre hã kot pa kêt mẽ amã kahê xà mẽ. Kwa mẽ ma akupỹm mra.” Anê. Ǻ mẽ ujarênh kot anhỹr. Anê.

13Nhũm pre Ǻ Jejus mẽ inhmã ujarênh anê. Hãmri nẽ mẽ inhmã:

—E kêr ka mẽ te kot amnhĩ kôt orti hkwỹ ho môr xwỳnhjaja kot amnhĩ nhĩpêx pyrâk. Mẽ ate akupỹn ixwrỹk xà hã arĩgro pumunh kêt jakamã kêr ka mẽ apkati mẽ ixkamã ajamak rãhã ho apa. Anê.

Mẽ kãm mẽ àpênh xwỳnhjê jarênh

Rukre 19.11-27

14Nhũm Jejus arĩ mẽ inhmã kapêr nẽ mẽ inhmã:

—E kêr ka mẽ ixwakre kamã inhmã tanhmã amnhĩ nhĩpêx mex to ho ri apa pa hpãnhã mẽ amã amnhĩrer mex nẽ. Mẽ ate tanhmã inhmã amnhĩ nhĩpêx to ho apa xà hkôt kot paj mẽ amã amnhĩre. Te mễhõ my kot kãm mẽ àpênh xwỳnhjê nhĩpêx pyrâk. Kojã nhỹhỹm nojarêr nẽ kãm mẽ àpênh xwỳnhjê mã hikukrêx piitã hkaga hpa. Ǫrkwỹ nẽ hpur nẽ hkrit. Ǻm mẽmoj piitã mẽ kot wakre kamã kãm hamãr o pa kaxyw mẽ kãm hkaga hpa. 15Hãmri nẽ ahpỹnhã mẽ kãm kàxpore hkwỹ gô. Mẽ kot kutêp kãm tanhmã ho rũnh to kaxyw ahpỹnhã mẽ kãm ỏr pa. Kot kàxpore pumunh mex xwỳnhja mã nhũm ho 5.000 nẽ kugô. Nẽ kot hkôt kax pê omunh xwỳnhja mã nhũm ho 2.000 nẽ kugô. Nẽ kormã kot omunh tỳx kêt xwỳnhja mã nhũm Ǻm ho 1.000 pix nẽ kugô. Hãmri nẽ mẽ kãm amnhĩ jarê nẽ ma nhỹhỹm mỗ. 16Hãmri nhũm kot ho 5.000 nẽ hamỳnh xwỳnhja kàxporeta py nẽ ma o môr kurê kumrêx nẽ tanhmã ho àpênh to ho môr kãm ra hipy axte ho 5.000 nẽ kumê. 17Nhũm kot ho 2.000 nẽ hamỳnh xwỳnhja mããnhẽn tanhmã ho àpênh to ho môr kamã ra hipy axte ho 2.000 nẽ kumê. 18Nom nhũm kot ho 1.000 pix nẽ hpyr xwỳnhja wa hkính Ǻ axtem nẽ ma o tẽ nẽ kãm kakwỳ nẽ kamã haxà nẽ hity hpa nẽ ma akupỹm tẽ.

19—Tã nhũm mẽ ỏ patrãwja akupỹn môn pôj nẽ mẽ kãm: “E mẽ amnê ixwỳr mra nẽ ixte mẽ amã kàxpore ho ixpigranh xwỳnhta jarê. Tanhmã na ka prem ixkutêp inhmã hipêx to?” Anê. 20Hãmri nhũm kot ho 5.000 nẽ hpyr xwỳnhta kumrêx hwỳr tẽ nẽ kãm: “E ota akàxporeta. Ate inhmã ho 5.000 pix nẽ ỏr tã pa amã ho rax nẽ amã hipy axte ho 5.000 nẽ kumê nhũm ho axkamur nẽ ra ho 10.000. Tã ota.” Anhỹr o

kãm kapêr hãmri nê kãm kugõ 21 nhũm amnhĩm hamy nê omu nê hkĩnh nê. Hãmri nê kãm: “Nà ãm hãmri na ka inhmã ho anê. Ixte amã ho 5.000 pix nê òr tã ka ra inhmã ho rax jakamã kot kaj apê inhmã mẽ àpênh xwỳnhjê hkrãhtũm. E amnê ixwỳr axà pu mẽ apku nê pahkĩnh.” Anê.

22—Hãmri nhũm hpãnhã kot ho 2.000 nê hpyr xwỳnhhta hwỳr tẽ nê ò patrãwta mã kãm: “E ota akàxporeta. Ate inhmã ho 2.000 pix nê òr tã pa amã ho rax nê amã hipy axte ho 2.000 nê kumê. Tã ota.” Anê.

23Hãmri nhũm kuma nê amnhĩm hamy nê omu nê hkĩnh nê. Hãmri nê kãm: “Nà ãm hãmri na ka ã inhmã ho rax anê. Ixte amã ho 2.000 pix nê òr tã ka inhmã ho rax jakamã kot kaj apê inhmã mẽ àpênh xwỳnhjê hkrãhtũm. E amnê ajaxwỳja ixwỳr axà pu mẽ apku nê pahkĩnh.” Anê.

24—Tã nhũm kot ho 1.000 pix nê hpyr xwỳnhhta hapu hã wa hkôt tẽ. Hãmri nê ò patrãw mã tanhmã kapêr to nê kãm: “Nà ra ixte apumunh tũm. Pêr axàhkurê pix kãm na ka hte apa. Nê amã akàxpore ho rax nê anhõ ho rax pix kukamã ajamaxpêr o ri apa. Nom mẽ pajaja mẽ ixàpênh rax pix kukwak ri na ka hte akàxpore rax nê apa. 25Jakamã na pa inhmã apyma nê. Nê akàxporeta py nê ma o tẽ nê kaxyw kre nê kamã haxà. Tã ka akupỳn mõn pøj pa ajarênh ma hãmri nê hkapa nê man akupỳn amã o tẽ. Tã ota anhõ 1.000ta.” Anê. 26-27Hãmri nhũm tee ri kuma nê kãm: “Tk. Kwa amã ixpyma nê ate ixpumunh mex anhỳr tã na ka ixte amã kàxpore nhõrta pyr nê ma ho atẽm. Nê mẽ kot mẽ kêp kàxpore jamỳnh o kuhê xà kamã mẽ kãm òr nhũm mẽ ixkutêp tanhmã inhmã ho rax to hkêt nê? Pêr ãm amã kaga nê ate amnhĩ tomnu pix o ri apa xwỳnh.” Anê. 28-30Hãmri nê kêp kàxporeta py nê nhãm jam kugõ nê kãm: “E amy nê o tẽ nê kot inhmã ho 10.000 nê òr xwỳnhhta mã agõ. Hãmri nê jahti pynê nê ma o tẽ nê kamàt kô kamã amê. Apênh mexti hã. Koja tee amỳra nê amnhĩ xà htỳx kamã hamak xàj tee ri amnhĩ nham o axpên kamnhar tỳx kaprỳ nê rĩ amnhĩ pumu.” Anhỳr o kãm kapêr nhũm kuma nê hpa hã kupy nê ma o tẽ. Hãmri nhũm mẽ ò patrãwja mẽ àpênh xwỳnhjê mã kãm: “E mẽ ate ixwakre kamã mẽ axàpênh mex xwỳnhjaja kot paj ã mẽ ato mex rax anê ka mẽ akĩnh nê. Nom mẽ kot inhmã mẽ àpênh mex kêt xwỳnhjaja kot paj mẽ kêp mẽõ mẽmojta jamy nê nhãm mẽhõm kugõ nhũm hkaprĩ nê.” Anê. ã mẽ ujarênh kot anhỳr. Anê.

Jejus kot nhỹrmã mẽ piitã tanhmã mẽ harênh to hã harênh

Matêwre 13.35-43, 13.47-50; mããnên Apokariþ 20.11-15

31Nhũm Jejus arĩ mẽ inhmã kapêr nê mẽ inhmã:

—Nê kot paj nhỹrmã akupỳn mẽ awỳr wrỳ nhũm Tĩrtũm kapêr o mẽ wrỳk xwỳnh piitã man ixkôt wrỳ. Kot paj wrỳ nê ixpê pahi maati hã ixkrĩ xà maati kamã inhmex nê nhỹ. 32-33Hãmri nê Tĩrtũm kapêr o mẽ wrỳk xwỳnhjê mã anê nhũm mẽ ma krĩ piitã hkôt mẽ apiitã mẽ ato pikuprõnh pa nê akupỳn ixwỳr mẽ ato hapêx. Pa mẽ apumu nê

tanhmã mẽ axunhwỳr to. Te ôwêhti jamãr o pa xwỳnh kot ôwêhti kaêx ã motre pumunh nê nhãm nê motre xunhwỳr parta pyrãk. 34 Hãmri nê ixupôk rûm mẽ ate ixkôt amnhĩ xunhwỳr xwỳnhjê mã ixkapêr nê mẽ amã: “E mẽ kajaja kot kaj mẽ amex kumrêx nê ri apa ho apa. Amnepêm kormã mẽmoj piitã hkêt ri na pa pre Inhĩpêêxà mẽ wa mẽ akukamã tanhmã ijamaxpêr to nê mẽ amã mẽmoj mex xunhwỳr rûnh nê. 35 Tã ka prem ajapôj hãmri nê ixkôt amnhĩ xunhwỳ nê tanhmã ixto mex to ho ri apa.

Na pa pre inhmã prãm nê ixpa ka prem ixpumu nê ixkamã axukaprĩ nê inhmã mẽmoj gô pa kuku.

Nê na pa pre inhmã kôr nê ixpa ka prem ja hã ixpumu nê inhmã gô pa ho ixkô nê akupỳm ixihỳx.

Nê aa mẽ ate ixpumunh kêt tã ka prem nhỹri ixpumu nê amnhĩ nhôrkwỹ hwỳr ixwỳ.

36 Nê na pa pre ixê pynajti nê ri ixpa ka prem ja hã ixpumu nê inhmã axê gô pa haxà nê ri hã ixpa.

Nê na pa pre ixà nê inhĩkwỹ ka prem ixwỳr mra nê ixkane nê tanhmã ixto mex to pa akupỳm inhmex.

Nhũm prem ijaxà pa mẽ hagjênh xà kamã ixkrĩ ka prem ixwỳr mra nê tanhmã ixto mex to.

Ã mẽ ate ixto mex anhỹr o ri apa jakamã nhũm inhõ Papajja ixtã mẽ apumu. Tã koja ixtã mẽ ato mex rax nê.” Anê.

37—Kot paj ã mẽ ate tãm amnhĩ nhĩpêx xwỳnhjê mã ixkapêr anê. Hãmri ka mẽ tee ri inhma nê amnhĩ tã ixkukja nê inhmã: “Kwa xà mẽ pajaja na pa prem ã ato mex anê? Nà mẽ ixte ã anhĩpêx anhỹr kãm amnhĩ pumunh kêt tã na ka ã mẽ ijarênh anê. Kwa nhỹri na ka pre amã prãm nê apa pa prem apumu nê amã mẽmoj gô ka aku? Nê nhỹri na ka pre amã kôr nê apa pa prem amã gô hkwy ka ho ixkô? 38 Nê nhỹri na pa prem apumu nê amnhĩ nhôrkwỹ hwỳr awỳ? Rỳ ka pre axê pynajti nê apa pa prem amã inhĩnôhkà gô ka hagjê? 39 Nê nhỹri na ka pre axà nê anhĩkwỹ pa prem apumu nê akane? Nê nhỹri na prem ajaxà pa mẽ hagjênh xàja wỳr mra nê kamã tanhmã ato mex to? Nà mẽ pa hkêt.” Anhỹr o amnhĩ tã ixkukja. 40 Hãmri pa mẽ amã: “Nà mẽ kêp amrakati xwỳnhjaja na pre htem pa pyrãk. Tã ka prem mẽ kamã axukaprĩ hã tanhmã mẽ kutã anojarêt to ho ri apa jao te pa tanhmã ixto mex to ho apa pyrãk. ãm hãmri na ka prem ã mẽ ho mex anhỹr o ri apa.” Anê. Kot paj ã mẽ ate amnhĩ to mex xwỳnhjê mã ixkapêr anê.

41—Hãmri nê hpãnhã apke rûm mẽ kot ixkôt amnhĩ xunhwỳr kêt xwỳnhjê mã tanhmã ixkapêr to nê mẽ kãm: “No mẽ kajaja kot paj ixupôk rûm mẽ unhwỳr xwỳnhhtajê hkĩnhã mẽ ato mex kêt nê. Amnepêm na pre Tĩrtũmja Satanasti mẽ mẽ kot tanhmã kãm amnhĩ nhĩpêx to ho mẽ pa

xwÿnhjê mẽ mẽ ho hpimràatã mẽ kaxyw kuwy rax kumrêxja nhÿpêx. Mẽ kot amnhÿ tomnuj tÿx mÿrapê nhÿrmã kamã amnhÿ xà htÿx kamã hamak rãhã nê pa ho pa kaxyw. Tã kot kaj mẽ ajaxwÿja ma mẽ hkôt hwÿr ajapêx. Mẽ apê Satanasti hkôt mẽ ate amnhÿ nhÿpêx o apa xwÿnh jakamã kot kaj mẽ uràn ma hwÿr ajapêx pa. ⁴²Aa mẽ ate tanhmã ixto mex to hkêt. Na ka pre htem inhmã prãm nê ixpa hã ixpumu nom inhmã mẽmoj nhôr kêt nê. Nê inhmã kôr nê ixpa hã ixpumu nom inhmã gô hkwyê hkêt nê. ⁴³Nê nhÿri ahte ixpa hã ixpumu nom amnhÿ nhôrkwÿ hwÿr ixwÿr kêt nê. Nê ixê pynajre nê ixpa hã ixpumu nom inhmã axê nhôr kêt nê. Nê ixà nê inhÿkwÿ hã ixpumu nom ixkane hkêt nê. Nê mẽ kot ijaxàr nhũm arÿ ixkrÿ hã ixpumu nom ixwÿr amrar nê tanhmã ixto mex to hkêt nê. ã mẽ ate inhÿpêx anhÿr o apa jakamã e mẽ ma kuwy hwÿr apa kurê kumrêx.” Anê. Kot paj ã mẽ kãm ixkapêr anê. ⁴⁴Hãmri nhũm mẽ tee ri inhma nê amnhÿ tã ixkukja nê inhmã: “Kwa nà ã mẽ ijarênh anhÿr kêt nê. Aa mẽ ixte ã anhÿpêx anhÿÿre hã. Nhÿri na pa prem tanhmã akute hã apumu? Nà aa mẽ ixte nhÿri ã ate amnhÿ nhÿpêx anhÿr ã apumunhre hã.” Anê.

⁴⁵—Koja mẽ ã inhmã amnhÿ tã aprãr anhÿr kaprÿ. Kot paj mẽ kãm: “Nà na ka pre htem mẽ kêp amrakati xwÿnhjê pumu nê ãm mẽ omunh o ri apa nê mẽ kamã axukapriê hkêt nê. ã mẽ hipêx anhÿr jao te pa ã inhÿpêx anhÿr pyrãk. Jakamã kwa mẽ tokyx ma kuwy hwÿr ajapêx kurê kumrêx.” Anê. Kot paj ã kuwy hwÿr mẽ hanor anê. ⁴⁶Hãmri nê hwÿr mẽ rênh pa nhũm mẽ ma hwÿr hapêx nê kamã amnhÿ xà htÿx kãm hamak rãhã nê pa ho pa nê aa kator kêt kumrêx. No kêt mẽ ate tãm amnhÿ nhÿpêx o mẽ apa xwÿnhjaja kot kaj mẽ kurom ma Tÿrtũm mẽ wa inhô krÿ hwÿr api nê kamã amex nê atÿr tũm nê apa ho pa. Kot paj ã ahpÿnhã mẽ apiitã mẽ anhÿpêx anê. Anê.

Nhũm pre ã Jejus akupÿn wrÿk ã amnhÿ kukamã mẽ inhmã ujarênh anê. Hãmri nê mẽ inhmã ujarênh pa.

Mẽ kot Jejus ã àmnênh ã amnhÿ jarênh

Makre 14.1-2; Rukre 22.1-2; Juãw 11.45-53

26 ¹Tã nhũm Jejus mẽ ixte hkôt ixpa ho ixpa xwÿnhjê mã ujarênh pa nê mẽ inhmã:

²—E kot puj mẽ axte pahã apkati axkrut hãmri nhũm arÿgro pê Pas kato. Jakamã koja mẽ piitã amnepêm Tÿrtũm kot Ejit nhô xwÿnhjê pê mẽ pakukamã mẽ panhÿgêjtê kator mã hamaxpêr nê hã hkÿnh kaxyw Jerujarê hwÿr akuprô. Kamã koja mẽ ixpynê nê pÿ kahpa hã inhô nê ixpÿ. Koja mẽ tokyx ã inhÿpêx anê. Anê.

Nhũm pre ã amnhÿ kukamã mẽ inhmã amnhÿ jarênh anê. ³Rôm nhũm Jerujarê kamã patre krãhtũmjê mẽ Ijaew pigêjtaja patre maati Kajpasja nhôrkwÿ kamã axpên wÿr akuprô. ⁴⁻⁵Ra mẽ kãm Jejus pÿr prãm tã mẽ

kãm mẽ kot hkôt kapêr mar o pa xwÿnhjê pyma nê. Hãmri nê tee ri hamaxpêr nê axpên mã:

—Hêxta waa nê. Tanhmã kot puj wem ho nê kupĩi? Kot puj mẽ pahkĩnh kãm tanhmã ho nhũm mẽ hkĩnh xwÿnhjaja hã mẽ pakamã gryk tÿx nê. Pu mẽ hã axpu nê hã tanhmã axpên to. Jakamã kwa pu mẽ kormã tanhmã ho hkêt nê.

Anhÿr o axpên ma.

Mêhõ ni kot Jejus krã gregrer ã harênh

Makre 14.3-9; Rukre 7.36-50; Juãw 12.1-8

6Tã nhũm Jejus kormã krĩ pê Petãn kamã Simãw nhõrkwy kamã apkur o nhÿ. Simãwja na pre hkà kro xàpêr tÿx o pa nhũm Jejus ra arĩgro hõ hã akupÿm hkà ho mex. Hãmri nê akupÿm õ krĩ hwÿr pøj nê õrkwy hwÿr tẽ nê kuri apkur o nhÿ. 7Hãmri nhũm mêhõ nija hpõx ã omu nê hamaxpêr o:

—Ma koja pêr Jejusja pa hã apkati grêre hãmri nê ty. An pa ma hwÿr tẽ nê mẽhkuxwa xà ho hkuxwa.

Anê hãmri nê kên jaka ho kàx kãm mẽhkuxwa xàja nhũm kumÿ nê ma hwÿr o tẽ. Hãmri nê ho hkrã gregrer nê hã hkapĩr pa nê ho hkuxwa hpa. Mẽhkuxwa xà hã kàxpore xohtô rax tã nhũm ã hã hkapĩr par anê. 8Hãmri pa mẽ ixte Jejus kôt ixpa ho ixpa xwÿnhjaja tee ri ã kot hipêx anhÿr ã omu nê axpên mã:

—Tk. Kwa na hã mẽhkuxwa xàta kapĩr pa. 9Kop apu ma kot o htêm nê ho wênê nê hpãnhã kàxpore ho rax kumrêx nê hamÿnh nê ho mẽ kêp amrakati xwÿnhjê nhĩpêx par o nhÿx ja kãm mex nê. Kwa mo na we ã amnhĩ nhĩpêx anhÿr kêt nê? Anê.

10Hãmri nhũm Jejus amnhĩ tã mẽ inhma nê mẽ inhmã:

—Kwa kot ixto mex kaxyw kênã na ka mẽ axtem nê ixtã kãm akir.

11Mẽ kêp amrakati xwÿnhjaja koja mẽ arĩ mẽ akôt pa rãhã nê. Ka mẽ amã mẽmo arĩgro hã tanhmã mẽ ho ajuta hto hprãm nê tanhmã mẽ ho ajuta hto nê mẽ kãm mẽmoj gõ. No pa kot paj ri mẽ akôt ixpa ka mẽ ixto mex ry ho apa hkêt nê. Kot paj tokyx mẽ apiitã mẽ are. 12Ixtyk nhũm mẽ kot ijaxàr kukamã na ã ixkuxwa anê. ãm hãmri na ã inhĩpêx anê. 13ãm hãmri na pa mẽ amã kot ã inhĩpêx anhÿrja jarê. Koja mẽ krĩ piitã hkôt axpên mã ijarênh ã kagà kamã ijarênh o pa nê kamã nija kot ã inhĩpêx anhÿr kamã harê nê kuma. Anê.

Jut Kariot kot mẽ kãm Jejus ã àmnênh

Makre 14.10-11; Rukre 22.3-6

14Tã nhũm Jut Kariotja. Kêp mẽ ixpê Jejus kôt ixpa ho ixpa xwÿnhjê pê 12 hõ htã ra tanhmã hamaxpêr to nê axtem nê Satanasti nhÿ hã ma patre krãhtũmjê hwÿr tẽ nê tanhmã Jejus o mẽ mar to nê mẽ kãm:

15—E ot pa mẽ amã Jejus jarênh o tẽ. Xà kot paj mẽ amã hã amÿnẽ ka mẽ hpãnhã inhmã amnhĩre nà? Anẽ.

Hãmri nhũm mẽ kuma nẽ hkĩnh nẽ. Hãmri nẽ kãm:

—Nà kot paj mẽ amã amnhĩre.

Anẽ hãmri nẽ kãm kàxpore ho 30 nẽ òr kurê kumrẽx nhũm hamÿ nẽ hkĩnh nẽ kato nẽ ma tẽ. 16Hãmri nẽ mẽ kãm Jejus pynênh kaxyw tânopxar o ri hkôt ri pa. Mẽ kot mar o ri pa xwÿnhjê hkàx ã unênh nẽ ma mẽ hwÿr o htẽm kaxyw.

Jejus kot hkôt mẽ pa xwÿnhjê kutã apkur
Makre 14.12-21; Rukre 22.7-13; Juãw 13.21-30

17Tã nhũm mẽ hkĩnh pẽ Pasja kato. Amnepê mormã Ejit kãm mẽ pa ri na pre mẽ inhigêtjaja ôwêhti hkrare hkwÿ hpa nẽ ho anẽ nẽ kuku. Tirtũm kot ja hã mẽ omunh nẽ Ejit nhõ xwÿnhjê nẽ mẽ kator kaxyw nhũm prem ã amnhĩ nhĩpêx anẽ. Tã mẽ ixpê mẽ hkanrêhã mẽ htãmnhwÿjaja na pa htem arĩ amgrà mẽ arĩgro pẽ Pasja ã axpẽn wÿr akuprõ nẽ jam ijamaxpêr pẽ mẽ uràk nẽ ôwêhti hkrare hkwÿ pa nẽ pãwti kaxkrit kêt kãm kuku. Jakamã pa mẽ ixte Jejus kôt ixpa ho ixpa xwÿnhja wa axkrut nẽ Jejus wÿr tẽ nẽ amnhĩ tã hkukja nẽ kãm:

—Kwa nhÿri kot paj we wa tẽ nẽ mẽ akutêp Pas ã mẽ panhõ hã apê? Anẽ.

18Hãmri nhũm wa kãm:

—Nà wa mãmrĩ ma Jerujarêja wÿr wa tẽ. Nẽ krĩm axà nẽ mẽhõ myti pumunh kurê kumrẽx nẽ kãm: “E Jejus na wa inhmẽ pa wa awÿr tẽ. Na awÿr hpêr mênh o: ‘E na pa ra inhnojarêt. Jakamã nhÿri kot paj we ixkôt ri mẽ pa ho mẽ pa xwÿnhjê mẽ Pas ã axpẽn kutã apku?’ Anhÿr o awÿr hpêr mẽ.” Anẽ. E wa ã kãm akapêr anẽ kê war ama nẽ war amã òrkwÿ nhĩmõk ã ixkre rax õ jahkre. Kamã ra kaxyw mẽ paxàpkur xà hã mẽmoj piitã. Ka wa omu hãmri nẽ mãmrĩ mẽ ixkutêp kamã mẽmoj tã apê. Anẽ.

19Hãmri nhũm wa kuma nẽ ma Jerujarê hwÿr tẽ. Nẽ hwÿr axà hãmri nẽ ra kot wa kãm mẽmoj jarênh xà hkôt mẽmoj piitã omu hãmri nẽ mẽ ixkutêp mẽõ hã àpênh o wa xa.

20Tã nhũm kamàt pa mẽ Jejusja kôt ixkreta wÿr ixpõx pa nẽ hwÿr agjê nẽ ixàpkur kaxyw ixkrĩ. Mẽ ixte Jejus kôt ixpa ho ixpa xwÿnhjê pẽ 12jaja pa mẽ ixpiitã Jejus kutã ixàpkur o ixkrĩ. 21Hãmri nhũm Jejus tanhmã mẽ inhĩõ jarênh to nẽ mẽ inhmã:

—E pa mẽ amã mẽmoj jarẽ ka mẽ inhma. Kot kaj mẽ atõ mẽ kãm ixkurê xwÿnhjê nhĩhkram ijaxà. Anẽ.

22Hãmri pa mẽ tee ri kuma nẽ ixkaprĩ htÿx nẽ. Hãmri nẽ axpẽn pãnhã amnhĩ tã hkukja nẽ kãm:

—Kwa xà pa? Nà pa hkêt. Kot paj ã anhĩpêx anhÿr kêt kumrẽx Pahihti.

Anhÿr o axpën pãnhã kãm amnhĩ tã aprã. **23**Hãmri nhũm mẽ inhmã:

—Nà ãm hãmri na pa mẽ amã ixkapêr. Mẽ ate ixkutã guhkrax kãm anhõ pãwti ho mry kagõ nhek o akrĩ xwÿnhjê hõ kot kaj mẽ kãm ixtã amÿnê. **24**Tĩrtũm kapêr ã kagã htũm ra kot ixkukamã harênh xà hkõt koja mẽ tanhmã ixto rax nê ixpĩ. Nom kot mẽ kãm ixtã àmnênh mã xwÿnhhta hêxta waa nê. ã kot amnhĩ nhĩpêx anhÿrja mÿrapê koja amnhĩ xà htÿx kãm hamak rax kumrêx. Kop apu aa õ mãmaj nhõxà hkre rũm kator kêt ronhÿx ja kãm mex nê. Anê.

25Hãmri nhũm Jut Kariot kot mẽ kãm hã àmnênh mã xwÿnhhta hãmri amnhĩ tã kuma nê kãm:

—Kwa xà we pa Jejus? Xà pa kot paj ã anhĩpêx anê? Kwa nà pa hkêt. Anê.

Hãmri nhũm kãm:

—Tÿ. Ka ã ate inhĩpêx anhÿr mã kênã. Anê.

Jejus kot amnhĩ kamrô pikapĩr kukamã harênh

Makre 14.22-26; Rukre 22.14-23; mãânên Wam Korit 11.23-26

26Tã nhũm Jejus pãwti hõ py nê Tĩrtũm mã harê nê mẽ inhmã ho hkry nê ho mẽ inhĩpêx pa nê mẽ inhmã:

—E na pa ã mẽ amã pãwti ho hkry nê mẽ amã õr anê. Ja pyrã nê koja mẽ ã inhĩpêx anê nê te ixto hkry hpar pyrãk o inhĩpêx pa amnhĩ xà htÿx kamã ijamak kãm ty. Nom mẽ anê kot paj ty. E mẽ mãmrĩ aku.

Anhÿr o mẽ inhmã amnhĩ jarê pa mẽ kuma nê kot mẽ inhmã ho hkry xwÿnhja ku. **27-28**Hãmri nhũm hpãnhã kop py nê mã ho anê nê Tĩrtũm mã harê nê mẽ inhmã kugõ nê mẽ inhmã:

—Mẽ kot ixpĩr xà hã arĩgroja ã koja ixkamrô axkapĩ. Nom koja mẽ amarĩ ixpĩr nhũm amarĩ ixkamrô hpikapĩr kêt nê. ãm paa. Pa kot paj mẽ anê mẽ ãhkram amnhĩ jaxà nhũm mẽ ã inhĩpêx anê nê ixpĩ. Koja ixkamrô axkapĩ nhũm Tĩrtũm omu nê ixkukwak ri mẽ ate ixkõt amnhĩ xunhwÿr xwÿnhjê nê mẽ ate amnhĩ tomnuj piitã te amnhĩ katut kõt rênh par pyrãk o hipêx nê mẽ ato hkra. Ra amnepêm kot ã amnhĩ jarênh anhÿr xà hkõt. Jakamã e mẽ ixkamrô pikapĩr mã ajamxpêr pê wĩhti ho akõm o axpën nhĩpêx. **29**ãm hãmri na pa ã mẽ amã amnhĩ jarênh anê. Kot paj axte wĩhti ho ixkõm kêt rãhã nhũm nhÿrmã inhõ Papaj akupÿn mẽ awÿr inhmê. Hãmri pu mẽ akupÿn ixwrÿk xà hã arĩgrota ã pahkĩnh rax kumrêx. No ãm axtem tanhmã hã pahkĩnh to. Anê.

Nhũm pre ã Jejus mẽ inhmã amnhĩ jarênh anê. Pa mẽ axpën pãnhã kopta py nê wĩta kwÿ ho ixkõ. **30**Hãmri nê mẽ ixpiitã ho ixkõm pa nê Tĩrtũm mã mex ã gre. Hãmri nê ijpõj nê hixêt prêk pê Oriwêhti hwÿr ma mra.

Jejus kot Simãw Pêtre mã kapêr ã harênh
Makre 14.27-31; Rukre 22.31-34; Juãw 13.36-38

31Tã nhũm Jejus tanhmã mẽ ixte hkôt ixpa ho ixpa xwỳnhjê jarênh to nê mẽ inhmã:

—E Tĩrtũm kapêr ã kagà htũmta kot tanhmã mẽ akukamã mẽ ajarênh to nê mẽ ajarênh kot:

Kot paj ôwêhti jamãr o pa xwỳnhja pĩ hãmri nhũm ôwêhti
 hpigrãnh pa nê ma anhgrã nê ri mra.

Anhỹr o kot mẽ ajarênh. Te ho mẽ apê ôwêhti pyrã nê ã mẽ ajarênh anê. Tã kamàt ja kamã koja mẽ tanhmã inhĩpêx to ka mẽ ixtã mẽ omu nê mẽ umaj ôwêhti pyrã nê apiitã ixkaga hpa nê ma aprõt nê mra. 32Nê mẽ kot ixpĩr tã kot paj akupỹm ixtĩr. Hãmri nê ma akupỹm mẽ akukamã pika pê Garirej wỳr mō. Kamã kot puj mẽ axte axpẽn pumu. Anê.

33Hãmri nhũm Simãw Pêtre tee ri tanhmã mẽ kot amnhĩ nhĩpêx to hkukamã amnhĩ jarênhja ma nê hkaprĩ nê kãm:

—Tk. Nà kot paj ã amnhĩ nhĩpêx anhỹr kêt nê Pahihti. Koja pahkwỳja akaga japêr no pa kot paj aa akaga hkêt nê. Kot paj akôt ixpa rãhã nê. Anê.

34Hãmri nhũm Jejus kãm:

—Nà ra ixte akukamã ixãhpumunh mex. Koja apkati hkôt krãhyre hkàr kêt ri ka ra mẽ umaj ate ixkôt apa hkêt ã mẽ kãm amnhĩ tã axãprãr o axkrunêpxi kãm ga. Kwa jam ajamaxpêr tỳx nê. Anê.

35Hãmri nhũm tee ri kuma nê axte kãm:

—Kwa nà. Mẽ kot ajaxàr nê apĩr tã kot paj arĩ akôt ri ixpa nhũm mẽ pahto amỹrà nê tanhmã panhĩpêx to. Nà kot paj aa akaga hkêt nê.

Anhỹr o kãm amnhĩ jarê. Pa mẽ ijaxwỳja ã kãm amnhĩ jarênh anê.

Jejus kot Tĩrtũm mã amnhĩ jarênh

Makre 14.32-42; Rukre 22.39-46

36Tã nhũm Jejus mẽ inhmã anê pa mẽ ma nhỹri mẽ kot kãm “Gesêm” anhỹr xwỳnhja wỳr mra. Hãmri nhũm mẽ inhmã:

—E mẽ jar ixkutêp akrĩ. Pa ma mütũm tẽ nê Tĩrtũm mã amnhĩ jarê mãn. Anê.

37Hãmri nê mẽ ixkwỳjê ho axkrunêpxi nê amnhĩ kôt mẽ kuwỳ. Simãw Pêtre nê Jepetew kra pijakrut pê Xiakre nê Juãwja wa nhũm amnhĩ kôt mẽ kuwỳ nhũm mẽ ma hkôt mra. Hãmri nhũm Jejus tee ri mẽ kot tanhmã hipêx tota kukamã hamaxpêr o hkaprĩ nê amnhĩ kamã kahak tỳx nê. 38Hãmri nê mẽ kãm:

—Hêxta waa nê. Na pa tee ri amnhĩ xà htỳx kamã ijamakja kukamã ijamaxpêr nê amnhĩ kamã ixkahak tỳx o ra ixkaprĩ nê. Te ixkaprĩ kot

ixpîr o mör pyrâk. Jakamã e mẽ jar anohtÿx nê ixto Tîrtûm wÿr o akrî kê tanhmã ixto pa mẽ kot tanhmã ixtoja kutã ixihÿx nê. Anê.

39Hãmri nê mẽ kurûm htêm grire nê Tîrtûm mã amnhî jarênh kaxyw htu mÿr pê têm nê pikap nô nê kãm:

— Kwa Papaj. Hêxta waa nê. Inhmã amnhî xà htÿx kãm ijamak prãm kêt kumrêx. Na pa tee ri amnhî kukamã ijamaxpêr nê amnhî kamã ixkahak tÿx nê. Jakamã kot kaj amã inhnê ja ho ajapêx prãm nê mãmrî inhnê ho ajapêx nhûm mẽ kãm ixkurê xwÿnhjaja tanhmã ixto hkêt nê. Rÿ ko. Kot kaj amã mẽ kot tanhmã ixto hprãm kê mẽ mãmrî tanhmã inhîpêx to. Nom pam inhmã hprãm xà hkôt kêt. Anê.

40Hãmri nê kànhmã xa nê akupÿm Simãw Pêtreja mẽ hwÿr tẽ nê tee ri mẽ omu nhûm mẽ ra ôt pa nê hikwÿ. Nhûm mẽ omu nê Simãw Pêtre mã kãm:

— Kwa Simãw Pêtre. E mẽ hãmri akrã hapôj. Kwa wem anohtÿx grire 41nê ixkutêp amnhî to Inhõ Papaj wÿr o akrî kê mẽ ixkôt tanhmã mẽ ato htã ka mẽ amã mẽ uma xàj ixkaga hkêt nê arî mẽ kutã amnhî to htÿx nê akuhê. ã mẽ amã mẽ ate amnhî nhîpêx anhÿr prãm nom kormã mẽ amã maa.

42Anhÿr o mẽ kãm kapêr hãmri nê akupÿm tẽ nê axte Tîrtûm mã amnhî jarê nê kãm:

— Kwa Papaj. Nà inhmã amnhî xà htÿx kãm ijamak prãm kêt. Na pa amnhî kukamã ijamaxpêr nê amnhî kamã ixkahak tÿx kumrêx. Jakamã kot kaj amã inhnê ja ho ajapêx prãm nê mãmrî inhnê ho ajapêx kê mẽ kãm ixkurê xwÿnhjaja tanhmã ixto hkêt nê. Nom ko. Kot kaj amã mẽ kot tanhmã ixto hprãm kê mẽ mãmrî tanhmã inhîpêx to. Nom pam inhmã ja prãm xà hkôt kêt. Anê.

43Hãmri nê kànhmã xa nê Simãw Pêtreja mẽ hwÿr akupÿm tẽ. Nê mẽ omu nhûm kê mẽ axte gôr nê hikwÿ. Ra mẽ ôtخوا htÿx nê axte gôr



Matêwre 26.39-44

nê hikwỹ. Nhũm Jejus tẽ nê tee ri mẽ omunh o xa ⁴⁴nom axte tanhmã mẽ kãm nê hkêt nê. Âm awjanã nê akupỹm tẽ nê kê wam kot Tĩrtũm mã amnhĩ jarẽnh xã hkôt axte kãm amnhĩ jarẽ. ⁴⁵⁻⁴⁶Hãmri nê akupỹm mẽ hwỳr tẽ nê mẽ kãm:

— Kwa xàn ka mẽ arĩ gõr nê anhĩkwỹ? E mẽ tokyx akrã hapôj. Na mẽ ra mẽ kot ixwỳr mrar nê ixpynênh mã. Koja mẽ tokyx ixkutã mẽ kot amnhĩ xunhwỳr xwỳnhjaja mẽ kãm ixtã amỹnê. Ota ra kot ixtã mẽ kãm àmnênh xwỳnhhta tẽ. E mẽ tokyx kànhmã akrĩ pu mẽ kutã mra. Anê.

Mẽ kot Jejus pynênh ã harẽnh

Makre 14.43-50; Rukre 22.47-53; Juãw 18.2-11

⁴⁷Nhũm Jejus mẽ kãm kapêr o âm rãhã nhũm Jut Kariot pẽ mẽ inhĩõja hwỳr tẽ. Nê amnhĩ kôt mẽ ohtô nê hwỳr mẽ o tẽ nhũm mẽ wapohti nê kô jamỳ nê hkôt o mra. Patre krãhtũm mẽ Ijaew krãhtũmjaja kot Jejus wỳr mẽ rẽnh xwỳnhjaja nhũm mẽ man hkôt Jejus wỳr mra. ⁴⁸Na pre ra Jut Kariot amnhĩ kukamã mẽ kãm amnhĩ jarẽnh o:

— Kot paj ixkumrêx hwỳr tẽ ka mẽ ixkôt hapu hã mra. Kot paj hwỳr tẽ nê kãm ixkapêr nê kahti hkôt kumỳ. Ka mẽ hã ixpumu nê hwỳr mra nê unênh kurê kumrêx. Ixte kahti hkôt mỳnh xwỳnhhta kot kaj mẽ unê. Anê.

⁴⁹Hãmri nê Jejus wỳr tẽ nê kãm:

— Pa Jejus? Xàn ka kormã anhõt kêt nê xa?

Anê nê kahti hkôt kumỳ. ⁵⁰Hãmri nhũm amnhĩ tã omu nê kãm:

— Kwa Jut. Ate tanhmã ixto kaxyw mã xwỳnh jakamã e kam nê mãmrĩ tanhmã ixto. Anê.

Hãmri nhũm Jut kôt mẽ mrar xwỳnhjaja Jut kot kahti hkôt mỳnh ã omu nê hwỳr mra nê unênh kurê kumrêx. ⁵¹Hãmri nhũm mẽ inhĩõja tee ri ja hã mẽ omu nê õ wapo kapa nê patre maati mã àpênh xwỳnh kot mẽ hkôt htêm xwỳnhhta mã ho apê. Nê kot ho hkrã nhĩpôn mã tã kuhpaw nê upôk rũm hamak nhĩkjê pix krãhta. ⁵²Hãmri nhũm Jejus omu nê nê kãm kapêr nê kãm:

— Kwa akupỹm awapota hkãm haxà nê amarĩ xa. Na htem wapo ho mẽ oprê ho pa nhũm mẽ amnhĩ xwar wapo ho mẽ kupa. ⁵³Xã kot paj amnhĩ to Tĩrtũm wỳ nhũm âm inhma nê tanhmã jajê pẽ ixpytãr to hkêt nê? Nã kot paj amnhĩ to kuwỳ nhũm ixwỳr kapêr o mẽ wrỳk xwỳnhjê rẽnh kurê kumrêx nhũm mẽ ohtô rax kumrêx nê wrỳ nê mẽ kêp ixpytã. ⁵⁴Nom kot paj ã amnhĩ to hwỳr anhỹr kêt nê. Tĩrtũm kapêr ã kagà htũm kot amnepêm ixkukamã ã mẽ kot inhĩpêx anhỹr ã mẽ harẽnh jakamã kwãr mẽ mãmrĩ Tĩrtũm kãm hprãm xã hkôt ã inhĩpêx anê. Anê.

⁵⁵Hãmri nê hpãnhã mẽ kot unênh xwỳnhjê mã kapêr nê mẽ kãm:

—Kwa na pa pre apkati mẽ Tĩrtũm mã amnhĩ jarẽnh xà hã ixkre kamã mẽ kãm ixujarẽnh o ixa. Ka prem tokyx ixpynẽnh kêt tã jarãhã te ixte amnhĩ tomnuj xwỳnh pyræk o inhĩpêx nẽ ixwỳr wapohti nẽ kô hã akapẽn nẽ ixwỳr tẽ. 56Tã nom ra Tĩrtũm kapêr ã kagà htũm kamã Tĩrtũm nhỹ hã mẽ kapêr xwỳnh kot mẽ akukamã mẽ ajarẽnh nẽ mẽ atã kagà xà hkôt na ka mẽ ri ã inhĩpêx anẽ. Anẽ.

Nhũm pre ã Jejusja amnhĩ tã mẽ kãm kapêr anẽ. Hãmri pa mẽ ixte hkôt ixa ho ixa xwỳnhjaja mẽ omu nẽ tee ri amnhĩ kukamã ijamaxpêr nẽ mẽ umaj ixprôt nẽ anhrã nẽ ma inhm̃rar kurê kumrêx.

Mẽ kot patre maati hwỳr Jejus o mõi ã harẽnh

Makre 14.53-65; Rukre 22.54-55, 22.63-71; Juãw 18.12-14, 18.19-24

57Nhũm pre Ijaew krãhtũmjê mẽ Tĩrtũm kapêr tũm o mẽ ahkre xwỳnhjaja ra patre maati Kajpas nhõrkwỹ hwỳr akuprõ nẽ Jejus kutêp hkrĩ. Hãmri nhũm mẽ kot unẽnh xwỳnhjaja ma mẽ hwỳr o tẽ. 58Hãmri nẽ mẽ hwỳr ho axà nẽ hkôt gjêx pa. Nhũm Simãw Pêtre mẽ hkôt hapu hã mẽ htãnopxar o tẽ nẽ kĩtare hwỳr axà nẽ põristi nhĩhkô hã nhỹ. Hãmri nẽ tee ri Jejus kukamã hamaxpêr o nhỹ nẽ hamaxpêr o:

—Kwa tanhmã koja mẽ ixpê mẽ inhõ Pahihti nhĩpêx to? E pa jar amỳm tanhmã mẽ kot hipêx to hã mẽ omunh o nhỹ. Anẽ.

59Hãmri nhũm patre krãhtũmjê mẽ juistijaja kãm Jejus pĩr prãm tỳx nẽ. Jakamã na prem Ijaew wa ho hamêxkrut nẽ axpẽn kôt tanhmã mẽ kãm ho hêx to nhũm mẽ kot hã wa mar nẽ ra hpĩr kaxyw mẽ pikuprõnh xwỳnhjê kapi. 60Jakamã nhũm prem axpẽn pãnhã mẽ hwỳr mra nẽ tanhmã ho hêx to. Nom axpẽn kôt harẽnh kêt nẽ. ãm ahpỹnhã tanhmã ri harẽnh to nom wahõ wa axkrut nẽ axpẽn kôt harẽnh kêt nẽ. Jakamã nhũm mẽ tee ri hã mẽ kuma.

Tã nhũm ja wa mẽ hwỳr tẽ nẽ axpẽn kôt harẽ nẽ mẽ kãm:

61—Nà na pre tanhmã Tĩrtũm mã amnhĩ jarẽnh xà hã ixkre jarẽnh to nẽ harẽnh o: “Kot paj nhỹrmã inhmã ixkreja grãnh par prãm nẽ kugrã hãmri nẽ ãm ixtã apkati axkrunêpxi pix nẽ akupỹm hipêx pa. Ja kaxyw ixãhpumunh tỳx.” Anhỹr o na amnhĩ jarẽ pa wa kuma.

62Anhỹr o mẽ kãm ho hêx. Hãmri nhũm patre maatija wa kuma nẽ kãnhmã xa nẽ Jejus mã kapêr nẽ kãm:

—Kwa xà ãm hãmri na wa ã ajarẽnh anẽ nã? Xàn ka pre ã amnhĩ jarẽnh anẽ? E mẽ inhmã tanhmã amnhĩ jarẽnh to. Anẽ.

63Nom nhũm amarĩ mẽ kãm xa nẽ mẽ kãm tanhmã nẽ hkêt nẽ. Hãmri nhũm patre maatija tee ri omu nẽ axte kãm kapêr nẽ kãm:

—Kwa aprĩ hã mẽ inhmã tanhmã amnhĩ jarẽnh to. Tĩrtũm noo mã amã ixkapêr jakamã kêr ka akatãt kôt mẽ inhmã amnhĩ jarẽ nẽ amnhĩ

to axêx kêt nê. Xà apê Tirtûm Kra? Xà ka na pre Tirtûm mẽ ixkaxyw axâm? Kwa akatât kôt mẽ inhmã amnhĩ jarê. Anê.

64Hãmri nhũm tă hprĩ hã mẽ kãm amnhĩ jarê nê mẽ kãm:

—Tỳ. Nà ãm hãmri na ka ã ijarênh anê. Ixpê Tirtûm kot mẽ akaxyw ixãm xwỳnhta na pa. Na pre mẽ awỳr inhmẽ pa mẽ awỳr wrỳ. Tã kot paj nhỹrmã axte kaxkwa rũm amnẽ akupỳn kakrã kamã mẽ awỳr wrỳ. Hãmri nê Tirtûm xàhpumunh o àhpumunh xwỳnhta nhĩhkô hã nhỹ hãmri nê pam tanhmã mẽ ajarênh to ka mẽ amnhĩ tă ixpumu nê inhma. Anê.

65Hãmri nhũm patre maatija tee ri ã kot amnhĩ jarênh anhỹr ã kuma nê kamã gryk tỳx nê. Hãmri nê gryk xàj kêp patre maati hã ê kapa nê hkaxônha pa nê kumẽ nê hkwỳjê mã kãm:

—Tk. Kwa mo kaxyw kot puj mẽ axte ri tanhmã kot amnhĩ tomnuj to hã harênh xwỳnh ô japêr? Tãm kot amnhĩ pê Tirtûm Kra hã amnhĩ jarênh ã amnhĩ to hêx nhũm mẽ pahte mar kênã. 66Jakamã e kwa tanhmã kot puj mẽ hipêx to? Anê.

Hãmri nhũm mẽ kãm:

—Nà ã kot amnhĩ jarênh anhỹr mỳrapê koja ty. Ra htyk mã tãm kênã. Anê.

67Hãmri nê tanhmã hipêx kati hto. Mẽ hkwỳjaja hkuk kuhtô nê ãhkra ho htak nhũm mẽ hkwỳjaja ãhkra hpo ho htak nê hã hpêr o axkê nê kãm:

68—E apê Tirtûm Kra hã ate amnhĩ jarênh jakamã mãn urak nê axàhpumunh tỳx. Jakamã e mẽ kot atak xwỳnhta nhĩxi jarê pa mẽ ama. Anê.

Simãw Pêtre kot Jejus kôt pa hkêt ã amnhĩ jarênh

Makre 14.66-72; Rukre 22.56-62; Juãw 18.15-18, 18.25-27

69Rôm nhũm Simãw Pêtre arĩ kítare kamã nhỹ. Hãmri nhũm mẽ kãm àpênh xwỳnh nitita omu nê hprĩ hã omunh kurê kumrêx. Hãmri nê kãm:

—Xê pêr apê Jejus kôt mẽ pa xwỳnhjê hõ na ka. Anê.

70Hãmri nhũm tee ri amnhĩ tă kuma nê kãm mẽ uma xàj mẽ kãm amnhĩ tă aprã nê kãm:

—Tk. Kokỹ. Ixte mēhõ my ata pumunhre hã. Anê.

71Hãmri nê mẽ umaj kànhmã xa nê tẽ nê kítare hwỳr hakwakrem ahte mẽ hkax ã xa. Tã nhũm hpãnhã hõja omu nê hã mẽ kãm:

—Xê ma pêr ãm hãmri na mẽ harê. Kêp Jejus kôt ri mẽ pa xwỳnhjê hõ na pêr. Anê.

72Hãmri nhũm amnhĩ tă kuma nê kãm:

—Tk. Nà mẽ ri ã amnhĩ krã hkôt ri ixto axêx anhỹr kêt nê. Ixte aa mēhõta pumunh kêt kumrêx. Anê.

73Tã nhũm mẽ hkwyjaja hwỳr mra nê kãm kapêr nhũm tanhmã mẽ kãm kapêr to nhũm mẽ kuma nê kãm:

—Kwa pêr ãm hãmri na mẽ ajarê. Apê Jejus kwỳ na ka. War akapêr kot axpên pyræk kênã. Anê.

74Hãmri nhũm tee ri mẽ kuma mẽ kãm amnhĩ tã àprâr kãm hihtỳx nê mẽ kãm:

—Kwa nà. Na pa Tirtũm noo mã mẽ amã amnhĩ jarê. Kot paj amnhĩ to ixêx japêr nhũm inhma nê hã tanhmã ixto. Nà uræk ixpê Garirej nhõ xwỳnhre hã. Ixte mễhõ mũj pumunh kêt kumrêx tã ka mẽ xatã axpên kôt ixte hkôt ixpa ho ixpa xwỳnh ã ixkamnhĩx o xa.

Anhỹrja o ra mẽ kãm amnhĩ tã aprâr o axkrunêpxi nhũm krãhyre hkàr kurê kumrêx. 75Hãmri nhũm Simãw Pêtre kuma nê ra Jejus kot hkukamã krãhyre hkàr kêt ri kot hã amnhĩ aprâr o axkrunêpxi hã harênhta mã hamaxpêr kurê kumrêx. Hãmri nê kànhmã hakry hpar o tẽ nê hkaprĩ htỳx kumrêx nê kítare pê kato nê tẽ nê awry hã xa nê mỳr rax nê.



Mẽ kot pahшти Pirat wỳr Jejus o htêm ã mẽ harênh

Makre 15.1; Rukre 23.1-2; Juãw 18.28-32

27 1Tã nhũm ra myt kator o mõi mẽ nhũm mẽ hkrãhtũmjê mẽ patre krãhtũmjaja axpên wỳr pikuprõnh pa. Hãmri nê Jejus ã axpên mar o hkrĩ nê axpên mã:

—Nà kot puj mẽ hã amỳnê kê mẽ kupĩ. Kêp Tirtũm Kra hã kot amnhĩ jarênh o amnhĩ to hêx kênã. Anê.

2Hãmri nê mẽõ pòristijê mã anê nhũm mẽ hpa hpre hpa nê ma pahшти Pirat wỳr o tẽ. Pirat kêp Rõm nhõ pahшти nhỹ hã mẽ ixpê Ijaewjê ho amnhĩptâr jakamã nhũm mẽ ma hwỳr o tẽ nê ãhkram haxà.

Jut Kariot kot amnhĩ pĩr ã harênh

Atre 1.15-19

3Rõm nhũm Jut Kariot tee ri mẽ kot Jejus pĩr kaxyw mẽ harênh ma nê hkaprĩ nê. Ra kot mẽ kãm hã àmnênh tã mẽ kot hpĩr kaxyw ã mẽ

harênh ma nê tee ri amnhĩ kukamã hamaxpêr o hkaprĩ htỳx nê. Hãmri nê hamaxpêr o:

— Hêxta waa nê. Mo na pa pre ri axtem nê ã amnhĩ nhĩpêx anê? Nà na pa pre amnhĩ tomnuj tỳx kumrêx. Anê.

Hãmri nê ra mẽ kot kãm kàxpore ho 30 nê òrta jamỳ nê ma akupỳm patre krãhtũmjê mẽ Ijaew pigêjtê hwỳr o tẽ. Hãmri nê mẽ kot Tĩrtũm mã amnhĩ jarênh xà hã ixkreja wỳr mẽ hwỳr axà 4nê nhỹri mẽ omu nê mẽ hwỳr tẽ nê mẽ kãm:

— E ota mẽ akàxporeta. Na pa ã mẽ amã Jejus ã ixàmnênh anhỹrja o amnhĩ tomnuj tỳx nê. Kot tãm amnhĩ nhĩpêx o pa htã pa axtem nê ã mẽ amã hã ixàmnênh anê. Jakamã e mĩ. Mẽ akupỳm akàxporeta jamỳ. Kot paj amnhĩm hamỳnh kêt nê. Anê.

Hãmri nhũm mẽ tee ri kuma nê kãm:

— Kokỹ. Nom ka na ka pre mẽ ixwỳr tẽ nê ho mẽ inhmar kênã. Anê.

5-7 Hãmri nhũm tee ri mẽ kuma hãmri nê pikap kàxpore rênh pa nê ma tẽ nê kato. Hãmri nê hkaprĩ htỳx kumrêx nê hamaxpêr o:

— Kwa tanhmã kot pa we amnhĩ to? Nà kot paj amnhĩ pĩ. Anê.

Hãmri nê krĩ pê kato nê ma mẽ kot pika kakwỳnh nê ho amnhĩm poti nhĩpêx xà hã pika hwỳr tẽ hãmri nê amnhĩ mut mã ê nê ho amnhĩ pĩ. Hãmri nhũm patre krãhtũmjaja harênh ma nê tee ri kot kàxpore rênhta kawrà nê hã axpên kukja nê axpên mã:

— Kwa tanhmã kot puj wem ja ho? Jut kot mẽ pamã Jejus ã àmnênh nhũm mẽ pahte hpĩr xà hã kàxpore na. Jakamã kot puj mẽ ho Tĩrtũm mã amnhĩ jarênh xà hã ixkre ho mex kêt nê. Finat Mojes kot ja nê mẽ panhĩgêjtê kurê jakamã na htem mẽ hpar xà hã kàxpore ho ixkreta ho mex kêt nê. Jakamã kwa tanhmã kot puj mẽ ho? Anê.

Hãmri nhũm ja mẽ kãm:

— E na pa ra ijamaxpêr. Pu mẽ ho Jut kot amnhĩ pĩr xà hã pikata japrô hãmri nê kamã jar mẽ kêp mẽ pahkwỳ hkêt htyk xwỳnhjê jagjênh o papa. Anê.

Hãmri nhũm mẽ kuma nhũm ja mẽ kãm mex nê. Jakamã nhũm arĩgro hõ hã nhũm mẽ ma hwỳr mra nê haprô. 8 Hãmri nê hã hixi mẽ nhũm kêp “mẽ hkamrô pikapĩr xà kamã pika”. Mẽ kot Jejus pĩr xà hã kàxpore ho haprôr jakamã nhũm prem ã hã hixi mênh anê. Nhũm htem arĩ axpên mã ã hixi jarênh anhỹr o pa. 9-10 Nhũm pre ra amnepêm Tĩrtũm nhỹ hã kapêr o pa xwỳnh finat Jeremĩsti mẽ hkukamã hpĩr hã ja jarê nê hã kagà. Nê hã kagà o:

Koja Ijaew nhõ patrejaja mêhõ kot mẽ kãm mêhõ my hã àmnênh pãnhã kãm kàxpore ho 30 nê òr xwỳnhja jamỳ. Hãmri nê ma o tẽ nê nhỹri mẽ kot amnhĩm pika kakwỳnh nê ho poti nhĩpêx o pa xà hã pika hkwy japrô. Ra Tĩrtũm kot inh mã mẽ harênh xà hkôt koja mẽ ã amnhĩ nhĩpêx anê. Anê.

Ã finat Jeremĩsti kot Tĩrtũm nhỹ hã mẽ hkukamã mẽ harẽnh nẽ hã kagã anhỹr xàja kõt nhũm prem ã amnhĩ nhĩpêx anẽ.

Pahihti Pirat kot Jejus kukjêr ã harẽnh

Makre 15.2-5; Rukre 23.3-5; Juãw 18.33-38

11Rôm nhũm mẽ pahihti Pirat wỳr Jejus o tẽ nẽ hwỳr ho axà nẽ kutã ãm nhũm xa nhũm Piratja omu nẽ kãm:

—E. Kwa inhmã amnhĩ jarẽ. Xà apê Ijaew nhõ pahi na ka nà? Xà ka na htem amnhĩ wỳr ajamãr o pa? Anẽ.

Hãmri nhũm kãm:

—Tỳ. Nà ãm hãmri na ka ijarẽ. Anẽ.

12Hãmri nhũm mẽ hkrãhtũmjê mẽ patre krãhtũmjaja pahihti Pirat mã tanhmã ho kapêr punuj to. Nhũm amnhĩ tã mẽ kuma nom tanhmã kãm amnhĩ tã àprãr to hkêt nẽ. 13Jakamã nhũm pahihti Pirat tee ri ja hã omu nẽ kãm:

—Kwa xà na ka ã mẽ kot ato kapêr anhỹrja mar kêt nẽ nà?

14Anhỹr tã nom nhũm Jejus akryk xa nẽ axte tanhmã kãm nẽ hkêt nẽ. Hãmri nhũm Pirat tee ri kot ã amnhĩ nhĩpêx anhỹr ã omu nẽ hamaxpêr o:

—Kokỹỹ. Mẽ kot ho kapêr punuj tã nhũm ãm mẽ kuma nẽ te kãm mẽ uma hkêt pyrà nẽ tanhmã inhmã amnhĩ tã àprãr to hkêt nẽ. Anẽ.

Pirat kot Jejus pĩr kaxyw hã àmnênh ã harẽnh

Makre 15.6-15; Rukre 23.13-26; Juãw 18.39-19.16

15-21Tã nhũm Pirat kormã mẽ kot axpên mar xà hã ixkre kamã ỳr rãhã nhũm hprõja hwỳr hpêr mẽ nẽ kãm:

—Xê tanhmã mẽ kãm Jejusja ã axàmnênh to hkêt nẽ. Na pa kamàt ja kamã hkõt amỹti nẽ tee ri hkukamã ijamaxpêr. Kot amnhĩ to mex xwỳnh na. Aa tanhmã kot amnhĩ tomnuj to hkêt jakamã xê tanhmã mẽ kãm hã axàmnênh to hkêt nẽ. Kwarĩ. Anẽ.

Hãmri nhũm Piratja kuma nẽ hamaxpêr o:

—Nà ixte Ijaew krãhtũmjê pumunh tũm. Ijaew kwỳjaja kãm Jejus kĩnh nhũm mẽ hkrãhtũmjaja kot mẽ hã Jejus kamã gryk nẽ. Jakamã ixte tanhmã mẽ kãm hã ixàmnênh to kaxyw na mẽ ã ixwỳr o htem anẽ. Anẽ.

Na htem Pas nhõ arĩgrota hapôx mẽ nhũm pre htem Ijaew o amnhĩptàr xwỳnhja mẽ kãm mẽ hagjênh xà kamã hkrĩ xwỳnhjê ho hpỹnh nẽ mẽ hapôj. Mẽ kãm hprãm xà hkõt nhũm mẽ kãm mẽ hapôj nhũm mẽ akupỹm kapôt ã hamakêtkati nẽ amnhĩx pa. Jakamã nhũm ra mẽ hagjênh xà kamã mẽhõ my pê Parapasja hkrĩ. Na pre tanhmã amnhĩ tomnuj to nhũm mẽ mỳrapê unê nẽ haxà. Jakamã nhũm Ijaewjaja mẽ ho amnhĩptàr xwỳnh Pirat wỳr akuprõ nẽ kuhê nhũm mẽ kãm:

—E kot paj jarãhã mẽ amã mẽ hagiênh xà kamã mẽ hkrĩ xwỳnhjê hõ mã inhũre kê àmnhĩx kato nê ri pa. Nhỹ kot paj mẽ amã kãm inhũre? Xà Parapas nà? Xà mẽ akwỳ kot amnhĩm ho mẽ anhõ pahihti Jejus pê Tĩrtũm kot mẽ akaxyw ãm xwỳnhhta kot paj mẽ amã kãm inhũre? Nhỹ wehe? E mẽ inhmã nhỹ jarẽ. Anẽ.

Pirat na pre mẽ inhõ patre krãhtũmjê pumunh mex nê. Ijaew kãm Jejus kapêr mar prãm tỳx ã nhũm mẽ hã kamã gryk tỳx nê hwỳr o mrarja kôt nhũm mẽ omunh mex nê. Jakamã ã hã mẽ hkukjêr anê. Hãmri nhũm mẽhpigêt mẽ patre krãhtũmjaja kuma hãmri nê mẽ pikuprõnh nê mẽ kuhê xwỳnhjê mã kãm:

—Kwa mẽ kãm anê kê mẽ pamã Parapas mã mãn ure nê mãmri Jejus Kris pĩ. E kwa mẽ tokyx kãm anê kê Parapas mã ure. Anẽ.

Hãmri nhũm mẽ mẽ kuma nê pahihti Pirat mã kãm:

—Nà mẽ inhmã Parapas mã mãn anhũre. Anẽ.

22Hãmri nhũm tee ri mẽ kuma nê mẽ kãm:

—Kwa no mẽ ate Jejus pê Tĩrtũm kot mẽ akaxyw ãm xwỳnh ã harênh xwỳnhhta? Tanhmã kot paj hipêx to? Anẽ.

Hãmri nhũm mẽ kãm:

—Apĩ ri. Tokyx pĩ kahpa hã anhõ kê ty. Anẽ.

23Hãmri nhũm tee ri mẽ kuma nê mẽ kãm:

—Tk. Kwa nà. Tanhmã kot amnhĩ tomnuj tore hã kot pa kêt ri pĩ kahpa kunhõ nhũm ty. Anẽ.

Hãmri nhũm mẽ xatã àmra kamã kãm:

—Kwa pĩ kahpa hã mãn anhõ kê ty. Kwa tokyx ã mẽ inhmã hipêx anê. Anẽ.

24Hãmri nhũm tee ri ja nê tanhmã mẽ kãm kapêr to no nhũm mẽ mar kêt nê. Nhũm tee ri mẽ àmra mar o xa. Hãmri nê kãm Jejus pĩr prãm kêt jakamã amnhĩm gô hkwỳ janhi nê mẽ piitã mẽ noo mã amnhĩ nhĩhkra kuhõnh o xa. Mẽ kot hã omunh xà hkôt kãm hpĩr prãm kêt ã omunh kaxyw. Hãmri nê mẽ kãm:

—E na pa mẽ anoo mã ã amnhĩ nhĩhkra kuhõnh anê ka mẽ ja hã ixpumu. Nà inhmã hpĩr prãm kêt. Tanhmã kot amnhĩ tomnuj tore hã. Mẽ kaxipixjaja mẽ amã hpĩr hprãm jakamã mẽ kam nê tanhmã ho. No pa kot paj tanhmã ho hkêt nê. ãm kwarĩ ho kwarĩ. Anẽ.

25Hãmri nhũm mẽ kuma nê mẽ kãm:

—Tõe. Nà ãm hãmri. Kot paj mẽ pamjaja amnhĩ tã htykja nhõ. Nê mẽ ixkra nê mẽ ixtàmnhwỳjê mẽ amnhĩ to ixpimrãatã amnhĩ tã kunhõ. Kê Tĩrtũm kãm tanhmã hã mẽ ixtõ hto hprãm nê mamrĩ tanhmã hã mẽ ixtõ hto. Anẽ.

26Hãmri nhũm mẽ kuma nê mẽ kãm hprãm xà hkôt mẽ kãm Jejus ã amỳnê nê mẽ kãm Parapas mã ure. Ra Parapas kot pahi Pirat pê õ põristi kutã amnhĩ xãm nê kêp hõxpĩrja mỳrapê nhũm mẽ kot unênh nê haxàr

tã Ijaew kãm hprãm xà hkôt akupÿm kãm ure. Hãmri nê õ pôristijê mã anê nhũm mẽ Jejus tak. Nê htak rax nê hãmri nhũm Pirat mẽ kãm hã amÿnê nhũm mẽ kot pĩ kahpa hã nhôr o hpĩr kaxyw ma o tẽ.

Pôristi kot Jejus ã hpêr o pikênh ã harênh

Makre 15.16-20; Juãw 19.2-3

27Tã nhũm pôristijaja mẽ kot pĩ kahpa hã Jejus nhôr kaxyw ma o tẽ nê pahihiti Pirat nhôrkwÿ kamã ixkre hõ hwÿr ho axà. Nhũm pôristi ohtô nê hwÿr akuprô nê hã pêr o pikênh kaxyw axpên mã:

— E kwa tokyj pu mẽ kãm pahi xê jaxà ri. Kêp pahi hã kot amnhĩ jarênh kênã. Anê.

28Hãmri nê kêp ê kapa nê hpãnhã kêp pahi hã mẽ ê kamrêk mexja py nê kãm haxà. 29Nê kãm pahi hã mẽ ahkà nhípêx nê hkrãm haxà. Nom axtem akunĩ kamã mêmô mrô nhĩ te kot ronh kanêre pyræk xwÿnhja nhũm mẽ hikãx nê hkrãm haxà. Nê kãm pahi hã kô gõ nhũm kupy nê o xa. Hãmri nhũm mẽ ho anhÿr pa nê kutã hkõn krã ho rôrôk nê hkrĩ hpa nê hã pêr o pikênh kamã kãm:

— E ãm hãmri. Apê Ijaew nhõ pahi punuti na ka. Anê.

30Hãmri nê kãnhmã kuhê nê hkuk kuhtô nê kêp kô pytà nê xatã ho hkrãx pê htak. Nhũm prem ã pêr o pikênh kãm hipêx anê. 31Hãmri nê kêp pahi hã ê kapa nê akupÿm kãm ê jaxà nê mẽ kot pĩ kahpa hã nhôr kaxyw ho kato nê ma o tẽ.

Pôristi kot pĩ kahpa hã Jejus nhôr ã harênh

Makre 15.22-32; Rukre 23.27-43; Juãw 19.17-25

32Nhũm pôristijaja Jejus o kato nê ma kapôt mã o tẽ. Nê kãm pĩ kahpa pytĩja gõ nhũm kumÿ nê mẽ hkôt o hkwÿ. Nom ra hirotyx nê nhũm mẽ tee ri ja hã omu nê mēhõ kot ho ajuta kaxyw mẽ kot omunh xwÿnhjê kapi ho xa. Hãmri nê Sirên nhõ xwÿnh Simãw kà htyk pumu nê unê nê kãm kot Jejus o ajuta kaxyw hã karõ nhũm hwÿr tẽ nê kêp pĩ kahpata mÿ nê hkôt kãm kumÿ nê o tẽ. 33Hãmri nhũm mẽ kên nhixêt te kot mẽ hkrã hi pyræk xwÿnhhta wÿr mẽ o pøj. Mẽ kapêr kãm na prem hixêta jarênh o: “Korkot.” No mẽ pakapêr kãm Korkot jarênhja kêp “mẽ hkrã hi xà” nhũm mẽ ma hwÿr Jejus o pøj. 34Hãmri nê mẽ kot pĩ kahpa hã nhôr kaxyw nhũm à htÿx kumrêx kamã hamak pymaj kãm mêmô mẽ hkanexàja gõ. Wĩhti mẽ mêmô mry ma xà ho pihkàr nhũm mẽ kãm hkwÿ gõ. Nom nhũm hkaki nê mẽ kot amnhĩ xà htÿx kamã hamak kêt xà hã omunh kurê kumrêx nê hkaga. Nhũm mẽ tee ri ja hã omu hãmri nê kêp ê kapa nê kumẽ nê pĩ kahpa hã kuxi nê prek o ãhkra nê hpar o htÿx pa. Hãmri nê kãnhmã pĩ jarĩ nê ahkre kamã ãm nê ho htÿx nhũm kÿxpê ajêt. 35Hãmri nhũm pôristi hkwÿjaja axpên mã ê hkwÿ ho pigrãnh kaxyw hã kênre ho jôka. 36Hãmri nê ho anhÿr pa nê pikap Jejus jamãr o hkrĩ.

37Na htem mẽ hpar kaxyw nẽ tanhmã mẽ kot amnhĩ tomnuj to hã kagà nẽ mẽ mỳri pĩ kahpa hã hanhô. Jakamã na prem tapti hõ py nẽ tanhmã Jejus ã kagà hto nẽ hã kagà ho:

IJAEW NHÕ PAHI NA JA

HIXI PÊ JEJUS

Hãmri nẽ hwỳr ho api nẽ mỳri kunhô. ã Jejus kot amnhĩ jarẽnh anhỳrja mỳrapê na prem kupĩ.

38Hãmri nhũm mẽ hpãnhã wa àhkĩnh xwỳnh wa ho axkrut nẽ mãänën pĩ kahpa hã wa kunhô. Nẽ akutã ho Jejus nhĩjê nhũm war ajêt.

39Tã nhũm pry hã mẽ mrar xwỳnhjaja Jejus pumu nẽ hã hpêr o pikẽnh o mra nẽ kãm:

40—Kwa ka na ka pre ate Tĩrtũm mã amnhĩ jarẽnh xà hã ixkre grãnh par nẽ atã apkati axkrunêpxi nẽ akupỹm hipêx par ã amnhĩ jarê. Nẽ apê Tĩrtũm Kra hã amnhĩ jarê. Nẽ axàhpumunh o axàhpumunh jakamã e kwa amnhĩ kapa nẽ wrỳ pa mẽ ja hã apumu. Kwa tokyx. Anẽ.

41Nẽ patre krãhtũmjê mẽ Tĩrtũm kapêr tũm o mẽ ahkre o mẽ pa xwỳnh mẽ mẽ hkrãhtũmjaja piitã hwỳr mra nẽ hã hpêr o axkê. 42Nẽ expẽn mã harẽnh o:

—E jahti na xep pre mẽ kamã ukapri ho pa nẽ tanhmã mẽ ho ajuta hto ho pa. Tã nom tãm tanhmã amnhĩ to nẽ wrỳk kêt nẽ. Kwa pu mẽ arĩ pakuhê nẽ kot amnhĩ kaxàr nẽ wrỳk kãm omu. Kojã wrỳ pu mẽ omu nẽ kêp mẽ panhõ pahшти hã hkôt pajamaxpêr kurê kumrêx. E tokyx wrỳ Jejus. Pa mẽ awrỳk kãm apumu. Nà kot kaj awrỳk rax nẽ. 43Na hte amnhĩ kaxyw Tĩrtũm mã hamaxpêr o pa. Nẽ kêp Kra hã amnhĩ jarẽnh o pa. Jakamã e. Kê Tĩrtũm tãm hwỳr tẽ nẽ kêp Kra hã akupỹm mẽ pahpê utã. Anẽ.

44Hãmri nhũm wa kot akutã hijê nẽ jêt xwỳnhhta wa haxwỳja mẽ mar xà hkôt mã ho kapêr anẽ.

Jejus tyk ã harẽnh

Makre 15.33-41; Rukre 23.44-49; Juãw 19.28-30, 19.51;

mãänën Eprêw 10.19-20

45Tã nhũm kaxkwa nhĩpòk ri myt ỳr mẽ nhũm te kamàt pyrãk nhũm kamàt kô rax kumrêx. Jao hã awry mẽ nhũm ra akupỹm myt katêr o mõ.

46Hãmri nhũm Jejus kapêr kãm hihtỳx nẽ àmra htỳx kãm Tĩrtũm mã kapêr nẽ kãm:

—Inhõ Tĩrtũm inhõ Tĩrtũm. Kwa mon ka ixkaga? Anẽ.

Nom kapêr kamã kãm kapêr o:

—Eri Eri. Rãmã sapatani. Anẽ.

47Hãmri nhũm mẽ kot mar xwỳnhjaja kot Eri jarẽnh ã kuma nẽ htỳx ho finat Eris mã kapêr ã hkamnhĩx. 48Nhũm Jejus par pê guhkrax kãm wĩhti punure xa. Jakamã nhũm mẽ ã kapêr anhỳr ã kuma nhũm mẽhõ

kãm hkaprĩ nê. Hãmri nê mẽmo rerek py nê o tẽ nê kaxyw pĩ rytija py nê ho hkanhwỳ. Nê akupỹn o tẽ nê ho wĩhti nhek nê Jejus kot hkaôr kaxyw kãm kupê. 49Hãmri nhũm hkwỳjaja tee ri ja hã omu nê nê kãm kapêr nê kãm:

—Tk. Kwa nhãm xa. Pu mẽ kop Eris jamã mãn. Kojã hwỳr tẽ nê ho wrỳk japêr. Anê.

50Hãmri nhũm kamàt kô mẽ nhũm Jejus ra htyk kaxyw nê axte àmra htỳx nê hãmri nê ty. 51Tykja kôt nhũm Tĩrtũm mã amnhĩ jarênh xà hã ixkre kamã hakwakre hã kupêxêja kỳj rũm ahpar mã axkjê nê amnhĩ kahê xà mẽnh kurê kumrêx. Utĩ rax tã axkjê nê amnhĩ kahê xà mẽ. Te Jejus htyk o te kot mẽ pahte hkôt amnhĩ xunhwỳr xwỳnhjê mã Tĩrtũm wỳr pry jakwa kre kahê xà mẽnh pyrak o ã amnhĩ nhĩpêx anê. Nhũm pika htertet tỳx kumrêx o kên rũnh kwỳ ohtô nê hkrakrak pa. 52Hãmri nhũm mẽ htyk ã pika kamã mẽ htykjê nhõrkwỳ ho ohtô nê mẽ hã axkjê nhũm mẽ hikwỳ xwỳnhjaja akupỹm htĩr nê hapôj nê kuhê. Na prem kormã htyk kêt ri amnhĩ kaxyw Tĩrtũm kôt hamaxpêr. Tã nhũm Jejus ty nhũm mẽ ohtô nê akupỹm htĩr nê hapôj nê kuhê. 53Nom kormã nhỹhỹm mrrar kêt nê. Arĩ mẽ hã pika nhĩpy Jejus akupỹm htĩr ã hamãr o kuhê. Tã nhũm Jejus apkati hõ hã akupỹm htĩr ã arĩgrota ã nhũm mẽ rĩ kormã ma Jerujarê hwỳr mra nê hwỳr agjê nhũm mẽ ohtô nê akupỹm mẽ htĩr ã mẽ omu.

54Nhũm kormã Jejus htyk o mõrta ã nhũm põristi krãhtũm mẽ põristi hkwỳjaja hãmri hparpê hamãr o kuhê nê htyk kãm omu. Nê pika htertet kamã ama nê mẽmoj kot tanhmã amnhĩ nhĩpêx toja pumu nê tee ri hamaxpêr nê kãm ma htỳx kumrêx. Hãmri nê axpên mã:

—Hêxta waa nê. Pêr ãm hãmri na pre htyk xwỳnhhta amnhĩ jarê. Kêp Tĩrtũm Kra kênã. Tã pu mẽ amarĩ pahtỳx kupĩ. Anê.

55-56Nhũm pre mẽnijaja ohtô nê amỳm Jejus tyk kãm omunh o kuhê. Marir Matarênh nê Xiakre mẽ Juje wa katorxà Marir nê Xiakre hõ mẽ Juãw wa katorxàja nhũm mẽ kormã htyk kãm omunh o kuhê. Na prem Garirej rũm hkôt tanhmã ho ajuta hto ho hkôt Jerujarê wỳr mõ.

Mẽ kot Jejus jaxàr ã harênh

Makre 15.42-47; Rukre 23.50-56; Juãw 19.38-42

57Tã nhũm ra myt greire nhũm krĩ pê Arimatej rũm hikàxpore rax xwỳnh pê Jujeja tẽ. Nom axtem Juje hõ na pre. Ra kot Jejus kôt amnhĩ xãm jakamã kãm ho wrỳk nê haxàr prãm nê. 58Hãmri nê ma pahi Pirat wỳr tẽ nê ã hã kuwỳ nê kãm:

—E ot pa awỳr tẽ. Kwa inhmã htyk xwỳnhhta gõ pa ma o tẽ nê haxà nà? Anê.

Hãmri nhũm kuma nê kãm harê nhũm ma o tẽ nê haxà. 59Kaxyw kupêxê mex õ py nê ho hkupu pa 60nê ma o tẽ nê õ kên kre kamã haxà.

Na pre htyk kukamã kën kre kakwÿ nhũm mẽ kot kormã kamã mẽhõ jaxâr kêt tâ kamã na pre Jejus jaxà. Hãmri nê hã kën rax õ xãm nê ho hitom nê ma akupÿm tẽ. ⁶¹Nhũm Marir Matarên mẽ Marir õja wa kën kreta kapem omunh o wa nhÿ.

Pôristi kot kën kre jamãr o kuhê ã harênh

⁶²Tã nhũm apkati nhũm mẽ inhõ arĩgromnu pê sap kato. Hãmri nhũm Parijew nhõ xwÿnhjê mẽ patre krãhtũmjaja ma pahi Pirat wÿr mra nê kãm:

⁶³—Kwa pahihti. Nà amnhĩ to hêx o pa xwÿnhhta na pre kormã htĩr nê pa ri tanhmã amnhĩ jarênh to ho pa. Nê nhÿrmã ty nê htyk ã apkati axkrunêpxi pix nê akupÿm htĩr ã amnhĩ jarê. ⁶⁴Jakamã kwa hwÿr anhõ pôristi hkwy rê kê mẽ ma hwÿr mra nê hamãr mex o apkati axkrunêpxi. Kot ka anhÿr kêt nhũm hkõt mẽ pa ho mẽ pa xwÿnhhaja ma hwÿr mra nê ho ahkĩ nê ma o mra nê nhÿri haxà nê mẽ piitã mẽ kãm ra akupÿm htĩr ã harênh o hêx o pa. Te tãm kot amnhĩ kukamã amnhĩ jarênh pyrãk. Nom mẽ kot axte ã harênh anhÿrja koja omnuj tÿx o tãm kot ã amnhĩ jarênh anhÿrja jakre. Anê.

⁶⁵Hãmri nhũm mẽ kuma nê mẽ kãm:

—Tõe. Nà koja mẽ ho anê. E mẽ ma hwÿr amnhĩ kõt pôristi hkwy ho mra kê mẽ hakwakre kahê xà jamãr mex o kuhê. Anê.

⁶⁶Hãmri nhũm mẽ kuma nê ma hwÿr mra nê hakwakre hã kën raxta o htÿx pa. Nê mẽhõ kot omunh nê kahê mênh pymaj menh ê ho hkukõ. Hãmri nê ho anhÿr pa nê pôristi mã kãm:

—E Kêr ka mẽ jar kuri hamãr mex o akuhê. Kê mẽhõ tẽ nê tanhmã ho hkêt nê. Anê.

Jejus akupÿm htĩr ã harênh

Makre 16.1-8; Rukre 24.1-12; Juãw 20.1-10

28 ¹Tã nhũm apkati nhũm tãmĩk. Hãmri nhũm Marir Matarên mẽ Marir õja kwÿhtã kãnhmã nhÿ nê ma akupÿm kën kreta wÿr wa tẽ. ²Puh nhũm pika htertet tÿx nê nhũm Tĩrtũm kapêr o mẽ wrÿk xwÿnhja kën kre wÿr wrÿ nê nhãm hakwakre nê kën raxta mẽ nê hã nhÿ. ³Hirã htÿx kãm nhÿ. Te na jaxênh pyrãk. Nê ê haka htÿx kumrêx. ⁴Nhũm pôristijaja tee ri omu nê kãm ma htÿx nê htertet nê umaj pikap rôrôk pa nê te htyk pyrã nê hikwÿ. ⁵Hãmri nhũm wa nita kën kre hwÿr pøj nê tee ri Tĩrtũm kapêr o mẽ wrÿk xwÿnhhta pumu. Nhũm wa kãm:

—Kwa wa amã ma hkêt nê. War ate Jejus pumunh kaxyw na ka wa tẽ. Mẽ kot pĩ kahpa hã nhôr xwÿnhhta. ⁶Nom jar amrakati. Na ra akupÿm htĩr nê kato nê ma tẽ. E wa kam nê amnê axà nê nõr xà kaprÿ pumu. Anê.

Hãmri nhũm wa kuma nê tee ri kën kre kamã Jejus japêr nhũm kamã amrakati. ⁷Hãmri nhũm Tĩrtũm kapêr o wrÿk xwÿnh wa kãm:

—E wa tokyx ma akupÿm tẽ nẽ hkõt mẽ pa ho mẽ pa xwÿnhjẽ mã harẽ. Kojã ma Jejus mẽ akukamã akupÿm Garirej wÿr mō. Garirej kamã kot kaj mẽ axte axpẽn pumu. Ra kot mẽ amã amnhĩ jarẽnh xà hkõt. E kwa wa tokyx ma akupÿm mẽ hwÿr tẽ. Anẽ.

8Hãmri nhũm wa kuma nẽ ma akupÿm hprõt nẽ htẽm kurẽ kumrẽx. Kãm ma htã hkĩnh nẽ. Nẽ ma Jejus kõt mẽ pa ho mẽ pa xwÿnhjẽ mã ujarẽnh kaxyw ma mẽ hwÿr hprõt nẽ wa tẽ. 9Pu nhũm ra Jejus tãm wa kutã tẽ nẽ wa hkaxpa. Hãmri nẽ wa haêr pẽ wa kãm kapẽr nẽ wa kãm:

—Pa? Nhÿhÿm na ka wa tẽ? Anẽ.

Hãmri nhũm wa omu nẽ hkĩnh tÿx kumrẽx nẽ hwÿr hprõt nẽ hpar pẽ hkõn krã ho tẽm nẽ akutã hpar ã kumÿ nẽ kãm mex o mex ã harẽ nẽ kãm:

—Hêxta gàu nẽ. Ma amex kumrẽx. Amex o amex. Anẽ.

10Hãmri nhũm wa kãm:

—E war amã ma hkêt nẽ. Mamrĩ ma tẽ nẽ ixkõt mẽ pa ho mẽ pa xwÿnhjẽ mã ijarẽ kê mẽ ma Garirej wÿr mra. Kamã kot paj mẽ axte axpẽn pumu. Anẽ.

Pôristi kot kàxpore hprãm xàj Jejus o hêx ã harẽnh

11Rôm nhũm pôristi hkwÿjaja akupÿm tãm hkrã hãmri nẽ ma kẽn kreta rũm akupÿm krĩm mra. Hãmri nẽ patre krãhtũmjẽ hwÿr mra nẽ mẽ kãm ujarẽnh pa. 12Hãmri nhũm mẽ tee ri mẽ kuma nẽ mẽhpigêtjẽ ho akuprõ nẽ mẽ hã axpẽn mar o hkrĩ. Hãmri nẽ axpẽn mar pa nẽ pôristi mã amnhĩrer rax nẽ mẽ kãm:

13—E mẽ amnhĩm kàxpore jamÿ nẽ ma ri ã mẽ kãm amnhĩ jarẽnh anhÿr o apa. Nom kêr ka mẽ kãm amnhĩ to axêx nẽ mẽ kãm: “Na pa prem kẽn kre kapem ixtÿx gõr nẽ inhĩkwÿ nhũm Jejus kõt mẽ pa ho mẽ pa xwÿnhjaja mra nẽ mẽ xpẽ ï ho ahkĩ nẽ ma o mra.” Anhÿr o mẽ kãm amnhĩ to axêx o apa. Mẽ ixte kàxpore ho mẽ amã amnhĩrerta pãnhã. 14Kojã pahihti Piratja mẽ anhõt ã mẽ ajarẽnh ma nẽ hã tanhmã mẽ ato kaxyw hã kot paj mẽ axy pẽ tanhmã kãm ixkapẽr to nhũm tanhmã mẽ ato hkêt nẽ. Jakamã e. Mẽ tee ri amnhĩ kukamã ajamaxpẽr kêt nẽ. Mẽ mãmri ma mra nẽ ã mẽ kãm axujarẽnh anhÿr o ri apa. Anẽ.

15Hãmri nhũm mẽ kuma nẽ mẽ kot amnhĩ to hêxta pãnhã kàxpore jamÿ nẽ ma mẽ mar xà hkõt mẽ piitã mẽ kãm Jejus kõt mẽ pa xwÿnhjẽ ho hêx o pa. Tã na htem arĩ jarãhã Ijaewjaja ã axpẽn mã mẽ harẽnh anhÿr rãhã ho pa.

Jejus kot hkõt mẽ pa ho mẽ pa xwÿnhjẽ mã mẽ àpẽnã ã karõ

Makre 16.14-18; Rukre 24.36-49; Juãw 20.19-23; Atre 1.6-8

16Tã pa mẽ ixte Jejus kõt ixpa ho ixpa xwÿnh pẽ 11jaja hãmri akupÿm Jejus htĩr ã harẽnh ma hãmri nẽ ma Garirej wÿr mra. Nhÿri Jejus kot mẽ inhãm mẽmo hixêt prêk jarẽnhja wÿr.

17Nê ra hwÿr ixpôx o mrar mẽ Jesus pumu. Tã nom nhũm mẽ ixkwÿjaja tee ri omu nê htÿx ho nhãm mēhō hã hkamnhix. No kêt mẽ pajaja na pa prem ixprĩ hã omunh kurê kumrêx nê ixkĩnh tÿx nê. Nê ixkĩnh nê hwÿr ixprôt nê kãm:

—Pa Jesus? Hêxta waa nê. Amex o amex. Anê.

18Hãmri nhũm mẽ inhmã:

—E na pre Tirtũm ã inhmã kapêr anê nê inhmã: “E kêr ka amnhĩ nhÿ hã mẽmoj piitã tanhmã ho ho apa. Kaxkwa kamã nê pika kamã. Mamrĩ nhÿhÿm amnhĩ krã hkôt amã tanhmã amnhĩ to hprãm xà hkôt tanhmã amnhĩ nhĩpêx to ho ri apa.” Anê. Na pre mẽ akaxyw ã inhmã kapêr anê.

19—Jakamã e. Kêr ka mẽ ma pika piitã hkôt ri mẽ kãm ijarênh o ri apa. Kê mẽ ixte mẽ nê tanhmã amnhĩ nhĩpêx to hã ijarênh ma hãmri nê ixkôt amnhĩ xunhwÿ nê ixkôt ri amnhĩ nhĩpêx o pa. Nê kêr ka mẽ ja hã mẽ omu nê Tirtũm mẽ wa inhmã mẽ hkrã kumrã. Wa ixkarō nhÿ hã mẽ hkrã kumrã. Mẽ kot wa inhÿ hã pix mã tanhmã amnhĩ nhĩpêx to ho pa kaxyw.

20—Nê mẽ kãm anê kê mẽ ixkapêr piitã hkôt amnhĩ nhĩpêx rãhã ho pa. E kêr ka mẽ ma mẽ kãm ã ijarênh anhÿr o ri mẽ hkôt apa. Kot paj mẽ anhĩhkô hã ri ixpa rãhã nhũm nhÿrmã pikaja hapêx o hapêx. Anê.

Na pre ã Jesus mẽ inhmã mẽ ixapênh ã karō anê.

Matêwre kot Jesus jarênh nê hã kagàja ja kôt na hapêx.